

**INGUQUKO
YEZIMALI ZAKHO**

Amandla Okuthembeka

GARY KEESEE

Mngane othandekayo kuKhristu,

Kungumkhuleko wethu ukuba insiza le eyisifundo ibe yisibusiso lenkuthazo kuwe! Khululeka ukwabelana labangane bakho, imuli yakho kanye lamalunga ebandla lakho. Futhi, sungaya ku FLNFree.com ukuze uthaphe ezinye izinsiza kanye lemfundiso mahala ngolimi lwakho.

UNkulunkulu uyakuthanda njalo Yena ulohlelo olumangalisayo ngempilo yakho! Ukufunda ukuthi uMbuso kaNkulunkulu usebenza njani kwaguqula impilo yethu yabangcono, njalo siyatemba ukuthi kuzakuba njalo lakuwe!

Ngothando kuKhristu

Gary lo Drenda Keesee



P.S. Khumbula ukuya ku website yethu yokuthapha mahala ethiwa FLNFree.com ukuze uthaphe ezinye imfundiso mahala ngolimi lwakho!

**INGUQUKO
YEZIMALI ZAKHO**

Amandla Okuthembeka

GARY KEESEE

Your Financial Revolution,

The Power of Allegiance. Ndebele. By Gary Keesee

© Gary Keesee, 2023

Originally published in English

ISBN: 978-1-945930-03-4

Faith Life Now

P.O. Box 779

New Albany, OH 43054, USA

You can reach Faith Life Now Ministries on the Internet at

FaithLifeNow.com

Inguquko Yezimali Zakho

Amandla Okuthembeka. Ndebele. Ngu Gary Keesee

© Gary Keesee, 2023

Olwadindwa kuqala ngesiNgisi

ISBN: 978-1-945930-03-4

Faith Life Now

P.O. Box 779

New Albany, OH 43054, USA

Ungaxhumana le-Faith Life Now Ministries nge-*Internet*

ku-FaithLifeNow.com

OKUMUNYETHWEYO

ISIQALO.....	5
ISINGENISO.....	7
ISIAHLUKO 1: Umbuso.....	21
ISIAHLUKO 2: Inkungu Eluhlaza Okwesibhakabhaka.....	69
ISIAHLUKO 3: Ngiyacela Nkulunkulu, Iba Lesihawu!.....	79
ISIAHLUKO 4: Inhlanzi Enkulu.....	111
ISIAHLUKO 5: Kwakulukhetho Lukabani?.....	123
ISIAHLUKO 6: Isibusiso Senkosi.....	165
ISIAHLUKO 7: Umnyango.....	187
ISIAHLUKO 8: Amandla Okuthembeka.....	197
ISIAHLUKO 9: Lina Banikeni Ukudla!.....	209
ISIAHLUKO 10: Butha, Ungagingqi!.....	225
ISIAHLUKO 11: Ukuphapha Kulula Kulokuhamba!.....	233

ISIQALO

Sokudlule iminyaka emilutshwane ngifuna ukuloba uhambo esalungeniswa nguNkulunkulu mina lomkami uDrenda. Impilo zethu sezaguquka! Sesibone ngamehlo ethu zonke izimanga ezenziwa nguJesu eBhayibhilini iminyaka isedlula: abafileyo bevuswa; abagokekileyo besukuma, bahambe, babuyele emsebenzini ngosuku olulandelayo; inengi lisiliswa; lezimali zibuyiselwa kumakhulu enkulungwane zabantu. Kodwa izimanga ezinkulu esesizibonile zayenzakala kweyethu imuli lakwezethu impilo.

Injongo yami yikukuqalisisa uhambo, uhambo lokutholisisa engithemba ukuthi luzaguqula impilo yakho ngendlela olwaguqula ngayo eyami. Indaba yakhona ngeke yanele kugwalo olulodwa. Lolu lugwalo lwakuqala kuhlelo lwezingwalo ezimbalwa oluzakuqondisa kunguquko yezimali zakho futhi luveze izimfihlo zoMbuso kaNkulunkulu ezaguqula impilo yami. Kimi, luhambo olumnandi olungasoze luphele. Sizaqhubeka sifunda! Ulwazi loMbuso kalupheli.

Ngiyambonga uNkulunkulu. Isihawu Sakhe siba sitsha nsuku zonke, njalo Yena ulokubekezela kanye lothando. Kangingeke ngikuqalisise uhambo lolu ngingakhulumanga ngonkosikazi wami omangalisayo, uDrenda. Yinhliziyu alayo ngoNkulunkulu kanye lokungibekezelela okwanginikeza isibindi sokumelana

lobuthakathaka bami ngidinge uNkulunkulu ukuze ngizuze
impendulo engangizidinga. Ngabelana lawe ngenjabulo enkulu:

Inguquko Yezimali Zakho
Amandla Okuthembeka



ISINGENISO

Ngincitshiwe ukuthula; angisakwazi ingabe iyini impumelelo.

— Izililo 3:17

Ngavuka ngisazi ukuthi kukhona okwakukubi, okwakukubi kakhulu! Inggondo yami yagcwala ukwesaba okukhulu ngivuka. Ulimi lwami ngangingaluzwa. Izandla zami, inyawo, kanye lecele lobuso bami kwakungelamuzwa. Ngavusa uDrenda ngazama ukumtshela okwakusenzakala ubuso kanye lolimi kwakusala ukutsheda. Ngasenginanzelela ukuthi inhliziyo yami yayigijima lokuphefumula kunzima lapho ngizama ukumazisa ngesimo engangikuso. Wahle wavuka waqala ukungikhulekela. Kancane, imizwa engaqedakaliyo leyokwesaba yaqala ukwehla nje mbijana. Ngabuyela ngalala embhedeni uDrenda wathi usayangiphathela okokudla. Ngangididekile njalo ngisesaba lokho okwakusenzakala emzimbeni wami ngilele lapho ngithandaza. Ngaba lokwethuka; ukwesaba engangingazange ngike ngibe lakho impilo yami yonke kwakukhona kuzahlasela ingqondo yami.

Isikwelede engangiphila kuso kanye lesidingo semali esasingapheli kwasokungenze ngajayela ukuhlala ngilokwesaba empilweni yami nsuku zonke. Ngangihleli ebunzimeni obukhulu okweminyaka emilutshwane eyayedlule ngenxa yesimo sezimali zami esasisibi

kakhulu. Ngangithola imali ngokuthengisa izinto zabanye besengiphiwa okuthile ngakho kwakungasizi isimo sami semali. Sasihlala endlini encane emapulazini eyayakhwa kubo 1800 eyayikhanya sengathi yayingakaze ilungiswe lokhe yayakhwayo. Ngingabe sengisiba lehaba kancane, kodwa yayingekho esimeni esihle leyo ndlu. Amafasitela ayelezikhala ezazifohla amaluba ayekhula engena endlini. Amanengi ayefile amafasitela, njalo sasiwabophe sawavala ngamakhadibhokisi. Noma yayimbi, uDrenda wayeyenelise ukwenza kube likhaya lethu. Kodwa ke noma wayezame ngobungcitshi bakhe bonke, kwakumgceke ukuthi indlu le yayilenkinga.

Konke esasilakho kwakusesimeni esisodwa esifanayo—kwakuqamukile! Imota zethu zombili zasezindala, sezahamaba amamayela ayedlula angu 200,000, sezivuka nzima. Amadodana ethu amabili ayelala kumatilasi owawulahlwe ngabendlu egcina izigoga lalabo asebegugile, phansi ekamelweni labo lokulala kwakulecansi esasilidobhe eceleni komgwaqo ezibini. Sasithenga okwakusetshenziswe ngabanye, njalo sasiboleka kuwo wonke umuntu owayekhanya engasisiza. Sasiphilela elamhlalokho, sidinga noma yini esasingayithengisa, sizama ukuphila, silethemba lokuthi kusasa kwakuyakuba ngcono.

Amakhadi ami awebhanga ayeselezinyanga ecitshiwe, izikwelede ezintathu ezazikhula nge 28 *percent*, zazifuneka. Imbhadalo yezimota zami (yebo, ngangingaqedanga ukuzihlawulela zaze zaba zindala) ngasengiphuze ngamalanga angu 120 ukuzibhadalela ngakho kwasokusele ukuthi ngizithathelwe. Konke okwakumele kuhlawulelwe kwakungahlawulelwanga ngesikhathi. Amaphepha okuthathelwa impahla ngasengiwaphiwe, lababefuna ukuzothatha imali babengivusa nsuku zonke ekuseni. Ngangilemali ye *IRS*, labo babenginike amaphepha awokungithathela impahla ngenxa

yemithelo. Mina loDrenda sasesile \$26,000 yabazali bethu, labo basebekhathele ukusincedisa. Isiqandisi sethu sikagetsi sasihlala singela kudla. Amagetsi ethu ayehlala efuna ukucitshwa ngabanikazi bawo, phose nyanga zonke, Ngasengifike ekucineni kwemizwa yami.

Ubunzima lobu basobusenza okunye emzimbeni wami engang-ingakuzwisisi. Ngemva kokubona omongi abambalwa, bonke bathi ngangihlaselwe yikwethuka banginika umuthi wokwehlisa ukutshaya kwenhliziyo. Ngokubi ke, ukuhlaselwa lokhu kwaqhubeka kusenzakala kanengi okokuthi ngasengisesaba lokuphuma endlini. Ensukwini lezi ezazigcwele ukwesaba, ngazidinga impendulo. Ngaqala ukunanzelela ukuthi okunye ukudla okuthile, okwakuletshukela, okwakufana njalo lesinkwa, kanye lokunye okunathwayo, kwakungenza ngihlaselwe yiso isifo sokwethuka lovalo. Ngakho khathesi ngasengisesaba ukudla ukudla okuthile senginanzelela kakhulu konke engikudlayo. Impilo yami yaba njengeyalowo ongaphansi kwesibopho okokuthi ngangingasanelisi ukusebenza, okwacina kusenza isimo sezimali sibe nzima.

Umkami wayecabanga ukuthi uselahlekelwa ngumyeni wakhe, wazongitshela sengisilile ukuthi wayesekade eqale ukucabanga indlela ayezasala egcina ngayo abantwana. Ngakhala kuNkulunkulu ngidinga impendulo njengoba ngangingela lwazi lwalokho engangisilwa lakho. Omongi babengitshela amabala amakhulu bezama ukuchasisa lokho engangikugula, besithi kwakungalapheki njalo ngasengizaphila ngokunatha imithi. Abanye omongi babesithi ngasengisiba lesifo setshukela, bethi bazangisebenzisa ukuhlaziya eminye imithi yabo lapho umkhuhlane uqina lami ngisiba mdala.

Noma ngangingumKhristu, ngangingela lwazi ngempi zikamoya noma ukumelana lezitha. Eqinisweni, kulesi isikhathi

ngangingakakwazi ukuthi ngangisilwa lomoya wedimoni. Ngangicabanga ukuthi ngangilenkinga emzimbeni kuphela ngakho ngangilokhu ngicela uNkulunkulu ukuba angisilise. Njengom-Khristu, ngangisazi ukuthi uNkulunkulu yiyo impendulo yami, kodwa ngaleso sikhathi kwakuzwakala sengathi uNkulunkulu ukhatshana. Omongi ababengihlola babethola amabizo ayehlukeneyo awomkhuhlane owawungiphethe, onke esondela eduzane lemikhuhlane yengqondo elapheka ngokunatha amaphilisi athile. Njengoba ngike ngatsho, kwakungekho okwakungangilapha ngisile, kwakukhona kuphela imithi yokungincedisa ngesimo sami sengqondo. Amaphilisi lawo ayengigulisa, ngokunjalo, akukho sizo engangiluzuzwa kuwo. Ngempela, wona ayengezelela ukugula kwami. Ayengenza ngizizwe angani ngihlala phakathi kwenkungu, ngihlukuluzwa yimicabango yokwesaba engangingenelisi ukuyiqondisisa. Ngangingela mpendulo, njalo akukho okwakusiza. Lokhu kwaqhubeka okwamaviki ambalwa, isidingo sami saqhubeka sikhula njalo ukwesaba kwasokuthethe impilo yami.

Kwathi ngobunye ubusuku, ngaba lokubhobokela lapho ngidinga impendulo kuNkulunkulu. Ngathola isihluthulelo esikhulu esenkululeko yami. Ngangisesontweni yakwethu enkonzwani yangoLwesithathu ebusuku. Ngesikhathi kuhlatshelwa ingoma zendumiso, kwangibamba ukwethuka lokhuyana. Ngaswela ukuthi ngenzeni. Ngangidinga usizo, njalo ngahle ngabakwazi ukuthi ngidinga ukuthandazelwa, ngakho ngaqala ukuhamba ngisiya phambili. Noma ngangiphambanisa uhlelo lwenkonzo, kangizange ngibe lendaba. Ibandla lethu lalilikhulu ngakho umfundisi wayengangazi mathupha, kodwa omunye wabahlabeleli wayengazi. Ngathi ngizama ukuzihudula ukuthi ngiye phambili, kwamiswa yonke into abantu bonke bangikhangela. Umhlabeleli lowaya

owayengazi wasukuma masinya lapho ebona omantshingelane besiza phambili bezongisusa.

Wathi esetshela umfundisi indaba yami, ngabona ubuso bukamfundisi butshwaphuluka. Wangilanda wazongithandazela. Umngane wami lo wayetshela umfundisi ukuthi kwasokukade ngigula. Umfundisi wangikhangela wathi, “Ulomoya wobuthakathaka.” Ngalokho, wangibeka izandla wakhuza lowo moya ukuba uhambe. Khonapho kwahle kwenzakala into emangalisayo—ngasengikhululiwe. Okwakuqala ngemva kwezinyanga ngazizwa ngikahle, ngingela minakano ecindezelayo, ngingela kwesaba, ngilokuthula okujulileyo. Ngingathi ngangigcwele ukubonga kuyabe kuyikuswela amazwi. Ngingathi ngangigcwele intokozo lakho ngiyabe ngingachasisanga kuhle indlela engangizizwa ngayo. Ngaba ledlabuzane, elomuntu oyethulwe umthwalo, ngangcwele injabulo.

Ngemva kwesonto, mina loDrenda sahamba saya *ePizza Hut* labanye abangane sithakazelela isenzakalo lesi. Ngathi ngihleli lapho ngisidla i-*pizza* yami, ngiyakhumbula kulengoma eyaqala ukukhala kuwayilesi, khonapho nje, ngezwa njalo ukugula lokhuya okuza lokwesaba kungembathisa njengengubo—kwasokuphen-dukile. Futhi, ngaleso sikhathi ngazwisisa ukuthi kwakungumoya. Umfundisi wayethe kwakungumoya wobuthakathaka, Kodwa ngangingakwazi ukuthi wayesitshoni ngalokhu, ngadideka kancane. Ngangicabanga ukuthi ngangisilile kuleya nkonzo, kodwa kwasokukhanya ukuthi kwakungenjalo. Ngelanga elalandelayo ngasengisilwa lokuhlaselwa yikwesaba futhi, Kodwa kwakunzima ukwekela ukucabanga ngalokho okwakwenzakale esontweni izolo. Umfundisi aze angithandazele, akazange athandaze ukuthi ngisile. Wayebeke amandla phezu komoya. Ngenxa yokuthi isimo sami sasabela lapho umfundisi esikhuza kwabasobala ukuthi mhlawumbe

kwakungumoya hatshi isifo. (Usukubona futhi njalo, ukuthi ngangisase ngumKhristu olusane owayesehluleka ukunanzelela lokhu.) Ngaleso sikhathi, ngangilolwazi oluncinyane mayelana lempi zikamoya, Kodwa ngangikwazi ukuthi amadimoni akhona. Ngangike ngalibona.

Ebutsheni bami, ngangibe lesikhundla sokuphatha isitolo esisodwa kwezimbili *eze-pizza* ezazingezabazali bami. Ngobunye ubusuku, kulendoda eyabuya yangitshela ukuthi yayisenza imvuselelo ebandleni leMethodist eliseduze kwethu. Wanginxusa enkonzweni. Waqeda isimemo sakhe ngokuthi, “UJesu lokhe esenza izinto ayezenza eBhayibhilini.” Lokho, kwangikhangela. Mina ngakhulela esontweni. Nganikela inhliziyi yami kuyo iNkosi siseSikolo seBhayibhili eseKhefa ngikuzinga lesihlanu esikolweni. Kodwa ngangingakaze ngibone amandla esilisa umuntu eminyakeni yonke, akulanto eyayikhanya egcekeni ukuthi le yinto eyenzakale ngenxa yamandla kaNkulunkulu. Lokhu kwayenza ukuthi impilo yami iphambuke ezintweni zeNkosi ngokuya kweminyaka. Isedlula leyo minyaka, ngangizinikela ukuthi ngizabuyela esontweni, kodwa ngangiphelelwa luthando endleleni. Kodwa indoda le yakhuluma into entsha kimi njalo ehlukeneyo. UJesu wayelokhe esenza izinto ayezenza eBhayibhilini? Ngangifisa ukukubona ayekhuluma ngakho. Izisebenzi zami ezinengi zazisonta ebandleni lelo, zangikhuthaza ukuthi ngihambe, ngacina ngivuma.

Ngobusuku bakuqala ngilapho, ngezwa ubukhona bukaNkulunkulu ngendlela engangingakaze ngibuzwe ngayo. Kwakungathi ubukhona bukaNkulunkulu obabulapho; babubambeka. Intshumayelo eyanikezwayo yayilamandla, kwathi kubuzwa ukuthi wayekhona na owayefuna ukunikela noma ukubuyisela impilo yakhe kuJesu, ngaphakamisa isandla sami. Habe! Ubusuku

obunjeya. Ngagcwala intokozo. Ngangifuna ukutshela umuntu wonke ngobuhle bukaNkulunkulu.

Kulawo malanga, kwakungela *-Internet*, kungela ma-*CD* noma amakhasethi, omabonakude babeleziteshi ezintathu kuphela. Idolobho lethu lalilincane, ngakho kwakungekho okunengi umuntu ayengakwenza angatshayisa emsebenzini. Ngakho abantu abatsha babejwayele ukuzozilibazisa esitolo se-*pizza* kuze kube sebusuku. Sasandise ukuvala ngo 1:00 ekuseni nxa kwakungoLwesihlanu kumbe uMgqibelo, njalo lapho okwakupaka khona izimota kwakuyabe kugcwele phamu abantu abatsha. Esikhathini esinengi ngangicina ngibaxotsha, ngoba babesenza kubenzima ukuthi abathengi bami bathole indawo yokutshiya ezabo izimota. Kanengi ebusuku abatsha laba babexakululwa ngamapholisa sebeqale ukulwa baxotshwe baye emakhaya. Kodwa khathesi ngasengilecebo. Abatsha laba kwakumele bazwe ngoJesu. Ngakho ngaphuma ngabatshela ukuthi nxa ekhona phakathi kwabo owayefuna ukuhlala, ngangizakwenza isifundo seBhayibhili phakathi kwesitolo se-*pizza* ngemva kokuvala. Khumbula ukuthi, lokhu kwakuzayenzakala ngabo 1:30 ekuseni, ngoba phakathi kuka 1:00 lo 1:30 kwakumele silungise sitshiye indawo ihlanzekile. Ngangingazi lokuthi babezabuya yini, kodwa uyazi, abanye babo babuya, lezinye izisebenzi zami lazo zabuya. Ngobusuku bakuqala size sibe lomhlangano, omunye wabatsha laye wathi ufuna ukukhonza uKhristu wasengibuza ukuthi wayengayenzani. Khathesi, lokhu kwaba yinkinga enkulu ngoba lokho ngangingakakucabangisisi. Khumbula, akukho engangikwazi ngeBhayibhili, kodwa ngangifundile umbhalo owawungani ulempendulo engangizidinga.

Wonke umuntu obiza igama leNkosi uzasindiswa.

— Imisebenzi 2:21

Kwakukhanya kulula, ngakho yikho engacina ngifuna ukukwenza. Iqembu laselisukile lapho ngize ngilandwe ngulo omutsha elombuzo, ngakho ngamtshela ukuthi ahlale phansi esitulweni atsho igama likaJesu. Ngangisithi yinto elula, kodwa ngahlala lapho okwemizuzu emibili, yena akazange atsho lutho. Ngaphinda njalo, ngisithi mhlawumbe wayengangizwanga. Lutho nje. Ngananzelela ukuthi wayeseqhuqha. Ngabona njalo ukuthi ukutsho leli igama kwakumhlupha. Khonapho, njengokudubuka kwedamu, wabiza igama likaJesu. Ubuso bakhe behlelwa yikuthula. Ngingathi, kwasebenza! Ngasengizakwenzenjalo sonke isikhathi nxa umuntu efuna ukunikela inhliziyo yakhe eNkosini. Ngangiyamhlalisa esitulweni akhulume igama likaJesu. Phose bonke, babesehluleka ukulikhuluma masinyane. Babeqala ukuqhuqha, besebezama, ngobunzima, baphumisele, behlelwe yikuthula.

Ngelinye langa ngangisemuva kwesitolo ngihlanganisa impuphu yesinkwa, ngezwa umuntu eqoqoda emuva. Ngathi ngivula umnyango, ngananzelela abantu abatsha ababili engangike ngabatshela ngoKhristu. Ngabanxusa bangena, omunye wabo wathi wayefuna ukunikela inhliziyo yakhe kuNkulunkulu. Ngakho ngamhlalisa phansi esitulweni; njengenjwayelo, waqala waqhuqha waselibiza igama likaJesu. Ngathi ngivusa ubuso, ngabona ukuthi omunye wakhe wayesetshede khatshana lami wayazibandezela emdulwini njengenyamazana evalelweyo. Wayengani uzama ukufuqa umdulli ukuthi atshede le khatshana lami. Lokhu kwakungajwayelekanga, njalo ngangingeke ngikuchasise.

Ngathi ngilokhu ngimile lapho ngimkhangele, ngafikelwa ngumcabango, “Kungaba lidimoni na.” Khathezi ke, mina okwamadimoni ngangingakwazi, kodwa ngangifunde ngawo eBhayibhilini. Asikho esinye isizatho engangisibona sifanele izenzo zakhe.

Ngakho ngathi, “Jesu, lidimoni yini leli?” Khonapho, njengomambule owayedonselwa emuva, ngabona idimoni lime eceleni kwalo umfana. Lalilide okwama-*feet* amathathu, lalimnamathele umfana lo liphakamise inyawo. Abantu bahlala bengibuza, “Lalibukeka njani?” Lalifana lenkawu, lilezanda ezinde ezifana lezenkawu, Kodwa lilamehlo acazimulayo, abomvu njalo lingela similo. Ngathi ngibona amehlo alo, ngaklabalalela phezulu. Inzondo eyayisemehlweni alo yayingikhulela. Indlela enhle eyokuchasisa lokho engakubona kulawana amehlo ngingathi yinzondo egelezayo, inzondo ephuphumayo eyayingathi ingabambeka. Ngabakwazi khonapho ukuthi into le kayisikho ukuthi yayingangithakazeleli nje kuphela kodwa yayingizonda.

Khathesi ngangiyakuthini? Ngangingasakwazi okokwenza ngemva kokubona into le. Kodwa ngacabanga ngathi nxa ibizo likaJesu lisenelisa ukusingenisa eMbusweni, kutsho ukuthi lilamandla phezu kwedimoni leli, ngakho ngamemeza ngathi, “Ngegama likaJesu.” Khonapho, umambule wahle wavaleka. Nxa ukhumbula omabonakude bakudala ababelombala omnyama lomhlophe, wawuthi ungacitsha, umfanekiso walokho owawukade ukubukele wawufiphala kancane uze uphele. Ngakho ke, into le yayinjalo. Ngangingaboni kahle, kodwa ngangibona isithunzi esasikhanyela khatshana. Umambule wathi uvaleka, umfana lo wagijima waphuma phandle.

Ngakho, yebo, ngangisazi ukuthi amadimoni akhona. Ngifisa ukuthi ngabe ngiyenelisa ukutsho ngithi lapho sengikwazi ukuthi inkinga yami kwakungumoya, ngamelana lawo ngathola inkululeko kusukela lapho. Kodwa lokhu akuzange kwenzakale. Kulusizi, ukuthi ngemva kokuba esontweni okweminyaka yonke leyana, ngang-ingazange ngithole isikhathi sokufunda engangiyikho kuKhristu

ukuze ngisebenzise amalungelo ami phezu kwesitha. Kodwa manje njengoba ngasenginanzelele kumbe ngithi sengicabangela ukuthi ngangilwiswa ngumoya, ngakhuthazeka ukufunda indlela yokunqoba. Ngangikwazi okwaneleyo ukuthi idimoni kwakumele lingilalele, kodwa ngangidideka ngoba lona lalingalaleli. Ngemva kwamalanga amalutshwane, ngaba lesinye isehlakalo esiqotho esangenza ngabona ukuthi inkinga yami kwakungumoya.

Ngangisekamelweni lami lokulala ngikhuleka ngiphakathi komoya njalo ngangizimisele ukuchitha isikhathi ngikhuleka ukuze ngithole impendulo mayelana lalokho okwakusenzakala. Ngiphakathi komkhuleko lo, ngezwa ngingani ngiyayekelwa ngaba lokukhululeka okukhulu, njengalaphayana ngize ngithandazelwe ngumfundisi. Ngakhululwa okwamahola amabili ngalobo busuku kwasokuphenduka, khathesi ke ngasengileqiniso ukuthi ngempela umoya ongilwisayo wawubalekiswe ngumkhuleko. Ngazama ukukhuleka njalo kodwa akuzange kwenzakale lutho. Ngakho ngaqala ukubala noma yini engangingayibamba eyayimayelana lezimpi zikamoya futhi ngachitha isikhathi esinengi ngizikhumbuza ukuthi ngingubani kuKhristu. Noma kunjalo kwakungela nguquko. Khonaphana ngize ngikhuleke umoya lowana wangekela okwama hola nje yikho kuphela engawubona khona usabela amandla ami. Ngadideka ngaqala ukucelisisa iNkosi ukuba ingitshela okwakumele ngikwenze. Noma ngangisehluleka ukuthola inkululeko ephelileyo, ukwethuka okwakungihlasela kwakungasangibambi lokugogeka kwakungasekho. Ngakho kwakubekhona ukunqoba okuthize okukhulu. Ngangilokhu ngisalwa lemicabango yenhlungu lokudangala, kodwa ngangileqiniso lokuthi ngangisiba ngcono. Ngangichitha isikhathi nsuku zonke ngifundisisa lokho okwakutshiwo liBhayibhili mayelana lamandla ethu kuKhristu.

Ngeyinye imini ngangilwisana lomuzwa engangiwayejele owokwesaba nxa ngisebenza ehofisini yami. Ngangizamile ukuthandaza ngixotsha umoya wokwesaba ukuba uphume kodwa kwakungasebenzi, njengenjwayelo. Khonapho, ngezwa ilizwi leNkosi. Yona yangitshela ukuthi ngikhuze umoya uhambe, ngikhweze ilizwe, ngikhulume ngamandla. Yona futhi yangitshela okunye okuthile okwaguqula indlela engangibuka ngayo amandla kwezomoya. Yathi ngingalalelisisi imizwa yami nxa ngikhuza ulutho ukuthi luhambe, njalo ngime eLizwini Layo, hatshi ukuma kulokho engangikubona njalo ngikuzwa. Ngangisebenza ngisehofisini, ngakho ngangingeke ngimane ngisukume ngiqale ukukhwazela usathane njengoba kwakugcwele izisebenzi zami. Ngakho ngasukuma ngaya endlini encane ngakhulumela phezu ngathi, “Ngegama likaJesu, ngiyakubopha, wena moya wokwesaba. Okwenzayo akukho emthethweni, njalo ngyakukhuza ngithi phuma khathesi, ngegama likaJesu.” Ngitsho, akuzange kwenzakale lutho. Kodwa ngakhumbula engangikutshelwe yiNkosi, “Ungalalelisisi imizwa yakho.” Ngakho ngabonga iNkosi ngalawo mandla eyayingiphe wona phezu komoya lo, ngaqala ukudumisa uNkulunkulu ngokukhululwa kwami, Ngabuyela ehofisini ngayasebenza. Ngisahleli etafuleni, noma kwakungekho okwakuzwakala kuguqukile, ngangilokhu ngibonga iNkosi ngokukhululwa sonke isikhathi ngingazizwa sengihlaselwa yikwesaba. Ngathi ngisaphethe omunye umsebenzi wabathengi bethu, ngezwa ubukhona bukaNkulunkulu busehlela phezu kwami, ngabona iyezi elimnyama, lisuka kimi lichitheka ngophahla lwehofisi yami.

Lapho ngasengikhululiwe!

Umoya wedimoni owokwesaba wawusuhambile, noma

wawuzaphenduka, ngasengisazi indlela yokumelana lawo. Ngajabula kakhulu! Ngatshayela uDrenda ucingo ngamtshela ngalokho okwakusanda kwenzakala. Wahle wathi uyeza kimi, sazijabulisa ngesidlo semini kwelinye ivinkili lamaChina (engangilithakazelela). Kwakuzamele ngiqhubeke ngimelana lomoya wokwesaba kanengi kusuka kuleli ilanga ngoba amadimoni kawadinwa lula. Futhi noma idimoni laselihambile, ukuxubana kwendaba zami zezimali kwakungakapheli. Ngakho ukwesaba kwakuhlala kufuna ukungihlasela ingqondo ngenxa yezimali, ngakho kwakudingeka ukuthi ngifunde ukukhuza ingqondo yami ihlale ilokuthula.

Zikhona ezinye izimpi okwakumele ngilwe kuzo njalo ngifunde ngazo kweyami impilo, izifundo zikamoya mayelana loMbuso kwakusazamele ngizibambe, kodwa isizatho esenze ngafuna ukukutshela ngendaba le yikwenzela ukuthi uzwisise ukuthi inhlupho zemali zingathinta njani impilo yomuntu zimenze afinyelelwe yikwesaba okuhlukumezayo.

Ngifuna ubekwazi ngeqiniso ukuthi lami ngake ngadlula kukho.

Ngakho noma ukhangелane lobunzima obungakanani namuhla, ithemba likhona. Ngiyafisa ukuhti ngabe ngabakwazi ngoMbuso kaNkulunkulu masinyane. Kuyadanisa ukuthi mina loDrenda saphila phakathi kwengxabangxoza yezimali okweminyaka eyisitshiyagalolunye khona kwakungafanelanga!

Ngokubi ke, isimo sethu esibi esezimali kwakungayisilo thonsi phakathi komfula, sona sasiyiwo umfula. Yindlela esasiphila ngayo. Iminyaka eyisitshiyagalolunye eyokuhlala sicela, leenzakalo eziyangisayo ezifaka amahloni. Izenzakalo engangizazilibala. Makabusiwe umkami! Kunengi ayekumela kuleyo minyaka. Yingakho namhlanje ngizama ukumbusisa ngingathola nje ithuba. Njengendlela iNkosi eyayingifundise ngayo ukumelana lomoya

wedimoni owokwesaba, Yona yaqala njalo ukungifundisa indlela yokuphatha izimali zami ngendlela zakomoya. Lokho esakufundiswa nguNkulunkulu mina loDrenda, lalokho Yena asitshengisa khona mayelana lezimali zethu, kwaguqula impilo yethu ngendlela emangalisayo okokuthi sesizinikele ukuchitha impilo yethu yonke sisiza abanye ukuba babambe imfundiso efanayo.

Mina loDrenda sasuka ekubeni ngabantu abangela mali saba ngabantu abafika bathenge imota ngemali epheleleyo, sayakha umuzi esasiwufisa kungala sikwelede, saqala inhlanganiso ezimbalwa, savula umsakazo kamabonakude owansukuzonke othiwa-*Fixing The Money Thing* owawusakazwa ngezikhathi ezehlukeneyo umhlaba wonke jikelele. UDrenda laye waqala umsakazo owawuthiwa ngu-Drenda owawusakazwa nsuku zonke ku-*ABC Family* ukuze usize imuli zithole indlela zokuphila lokukhuthaza omama. Sezwa uNkulunkulu esikhokhela ukuba siqale i*Faith Life Church*, lapho esifundisa khona inkulungwane zabantu mayelana loMbuso kaNkulunkulu amaviki onke. Khathesi sokudingeka izigidi ukuba senze esikwenzayo, ukuze senze okukamabonakude kudingeka imali eyedlula \$200,000 ngenyanga ngesikhathi ngiloba lapha. Akukho kulokhu, ngempela, okwakungayenzeka ngabe uNkulunkulu wayengasifundisanga lokho esifisa ukukufundisa khona kuhlelo lolu lwezingwalo. Kangifuni ulukhangele ugwalo lolu njengolunye nje ugwalo lwezimali. Akusilo olunye nje ugwalo olukufundisa indlela zokuchitha imali, noma nje lokho kukhuthazwa njalo kudingeka. Akusikho kuvuselelwa kwalokhuyana okwakudala, “okwemali engeneliyo,” ngakho yikuyini okumele ukutshiye okuchitha imali.

Hatshi, lolu lugwalo lwenguquko, ukuhlamukela uMbuso wobumnyama lobuyanga. Lugwalo olumayelana lokuxotsha

izibopho zikahulumende olokungcola sithatha indlela yempilo entsha. Impendulo yami akusiso sixwayiso semali esijwayelekileyo. Ngathola ukuthi ngangidinga utshintsho lwezezimali olupheleleyo:

INGUQUKO YEZIMALI!

ISAHLUKO 1

UMBUSO

Ngabelane lawe kusingeniso indlela impilo yami eyayigalula ngayo phakathi kokuhlukumezeka lokwesaba. Ngakho ngikholwa ukuthi kuqakathekile ukuba siqale uhambo lwethu ndawonye ngomutsho lo okumele uwuzwisise ngeqiniso. UNGAFUNDI UKUPHILA LOKWESABA! Ukwesaba kuvulela amadimoni amasango okukuhlasela, ngodideka, lokudangala, njengoba sike sakubona kusenzakala kweyami impilo lasempilweni zabanye abayizigidi. Ngikholwa ukuthi izimali ezixubeneyo yizo ezivula amasango okwesaba empilweni zabantu. Sengileminyaka engu 34 ngincedisa abantu ngezimali zabo ngenhlanganiso yami ehlela izimali, njalo sengathola ukuthi ngiyabe ngingasuye yedwa umuntu abamaziyo owayeke waba lenkinga zemali kumbe olenkinga zemali.

Eqinisweni, lapho ngiphenya, ngathola ukuthi i-23% yabantu base-America iyehluleka ukuhlawula okuncane kwemali edingekayo ukuze basuse izikwelede zabo njalo lokhu betshelela bengananzeleli isimo semali zabo.¹ Yingxenye yabantu abaselizweni eyodwa kwezine! Izigidi ezingamatshumi amane lasikhombisa, eziyingxenye eyodwa

¹ Tracy Turner, "Debt Is People's Biggest Worry...Finance Problems Rank Higher Than Terrorism and Disasters." *The Columbus Dispatch*, 2006.

kweziyisithupha, ziphila ngama-*stamps* okudla, njalo imuli eziyis-
itshiyagalombili phakathi kwezilitshumi ziphilela elamhlalokho.²
Kangisoze ngikhulume ngesikwelede selizwe esezigidigidi zamadola
ezingu 18 esingasoze sahlawulelwa. Kangisoze njalo ngikhulume
ngemisebenzi yelizwe edinga izigidigidi zamadola ezingu 120
okungayazakaliyo ukuthi leyomali izavela ngaphi.³ Siphila elizweni
elilenkinga zemali ezinkulu! Engakuthola empilweni yami yikuthi
inkinga zemali kunye lenhlupho zayo zenza ukwesaba kube
yindlela yempilo.

Kodwa zikhona impendulo! Ungakhululwa! IBhayibhili liyacaca
mayelana lalokhu: uJesu weza ukuzotshumayela indaba ezimnandi
kwabampofu!

*UMoya weNkosi Yobukhosi uphezu kwami, ngoba
iNkosi ingigcobile ukuthi ngitshumayele izindaba ezinhle
kwabampofu.*

— U-Isaya 61:1

Indaba ezimnandi emuntwini ompofu ngezithini? Yikuthi senga-
khululwa! Namhlanje, ungabe ungazi ukuthi lokho kungenzakala
njani. Lami kwesinye isikhathi empilweni yami, ngangingazi lutho.
Umcabango wokungabi le \$100 yomunye umuntu wawukhat-
shana okokuthi ngangingahleka ngabe kwakungayisiwo mcabango
olokudana okwesabisayo. Iminyaka leyana eyisitshiyagalolunye
ngiphila nzima yangibulala imizwa. Inhlupho zezimali zisithathela
konke okuhle. Ngingakhangela amabhayisikopo awendlu yethu
kuleyo minyaka, ngiba lamahloni. Ngiyazibona kubhayisikopo

² Brad Plumer, "Why are 47 million Americans on food stamps? It's the recession — mostly." *The Washington Post*, 2013.

³ Glenn Kessler, "Does the Nation have 128 Trillion in Unfunded Liabilities." *Washington Post*, 2013.

ngiphuma emoteni abantwana bami abaligugu bengigijimela ngemva kokuba losuku olude ehofisini. Babegijima babambelele ezinyaweni zami, bamemeze, “Sakubona, Baba!” Kubhayisikopo, ngangingabaphenduli noma ukubakhangela. Ngangiphethwe zinhlupho ngidangele okokuthi ngangin-gananzeleli okuqakathekileyo.

Isimo sengqondo yami kuleziyana izinsuku singikhumbuza okuthile engaku-funda lapho ngifundela ukubhukutsha. Nxa ekhona osegalula osememeza ecela

uncedo, kumele uqaphele kakhulu ungakayi siza. Kungani? Umuntu lowo uyabe ezicabangela ukuphila kuphela ngakho usengakud-onsela lawe emanzini engajonganga. Yiyo indlela engangiyiyo yona, ngangifana lesidumbu esihambayo nje esingela mpilo, ngisenza konke nje kungela mizwa phakathi. Njengomyeni, ngangisehluleka umhloliso. Njengobaba, ngangiwehluleka umhloliso. Njengo-nakekela imuli, ngangisehluleka umhloliso. Impilo yami yayinge-lamizwa, kungelambono, njalo igcwele ukudangala.

E-Columbus, kwele-Ohio, kwakusakhiwa izindlu kulezo nsuku. Izindlu zaziphakama yonke indawo, njalo ngenxa yalokho, isigodlo sethu sasisenza uMbukiso weZindlu okweminyaka eminengi ilandelana. Nxa ungazi ukuthi lokho yikuyini, kahle ngikuchazele. Umbukiso wezindlu liqembu lezindlu ezinhle ezakhiwa ngabakhi abehlukeneyo betshengisa ukwehlukana kobungcitshi babo, kanye leziceciso zezindlu ezintsha. Kuye wonke umuntu wakuleyo ndawo, lesi kwakuyisenzakalo esikhulu esasithakazelelwa zinku-lungwane zabantu. Kodwa ngangingawuthandi uMbukiso

**“UMOYA WENKOSI
YOBUKHOSI UPHEZU
KWAMI, NGOBA INKOSI
INGIGCOBILE UKUTHI
NGITSHUMAYELE
IZINDABA EZINHLE
KWABAMPOFU.”**

— U-ISAYA 61:1

weZindlu. Ngenxa yobumpofu esasiphila kubo, ngangingafuni uDrenda ahambe ayebuka lezo zindlu. Kwakungangiphathi kuhle ukwehluleka kwami kwezezimali; ngakho ngangingafuni umkami ahambe ayebona abesenanzelela kakhulu ubunzima esasikubo. Sengisazi khathesi ukuthi umbono wami lo wawulobuwula, kodwa ngalesiyana isikhathi, yiwo okwakungumbono wami. Ngangisazi ukuthi angahamba, uzayifuna laye indlu enhle. Ngakho iminyaka ilandelana, ngatsho ngathi, “Hatshi!” Kodwa ekucineni, komunye umnyaka ngavuma sacina sihamba sonke.

Izindlu lezi, njengoba ungabe usucabanga, zazikhazimula. Zazisenza eyethu encane eyama 1800 ikhanye njengendlu yemap-ulazini elahliweyo elindele ukudilizwa. Ngemva kokuba sesihambe phakathi kwezindlu zakuqala ezimbalwa sihamba nje eceleni komgwaqo, ngananzelela ukuthi uDrenda wayengasahambi eceleni kwami. Ngatshibilika ngimdinga, ngadana ngimbona elokhe emi endlini esasisanda kudlula kuyo. Ubuso bakhe bugeleza inyembezi. Ngabuyela kuye ngambuza umbuzo olobuthutha, “Yikuyini okungabe kuluhlupho?” Ngabuza noma ngangisazi impendulo. Yena wangikhangela nje wathi, “Eyami indlu ngizakuba layo nini”? Ingqondo yami yabhoda, “Indlu? Enjengalezi? Lezi ngezama \$500,000 kusiya ku \$700,000.” Ngangilokhu ngisadinga indlela yokubhadala i\$300 eyendlu yethu endala eyayifuneka nyanga zonke. Ngiyazi kuyadanisa, kodwa ngangingayiboni nje enye indlela yokuphuma, njalo ngehluleka ukunikeza unkosikazi wami omuhle oligugu, ithemba. Ukwesaba lokwehluleka kwakugcwele engqondweni yami njalo kukhanya ngaphandle. Kwakungaseyimi lo; injabulo yami yaseyayaphi, intokozo yami? Ngangisehluleka ukubona phetsheya kwenkinga zami zemali.

Kwakungaba ngu 2:00 kumbe 3:00 ekuseni ngiswela ubuthongo.

Ubuhlungu babuhlaba ubuso bami lomhlathi njengenalithi, njalo ngangidinga usizo. Kumahola angamatshumi amathathu lasithupha ayedlulile ngangelatshwe izinyo elaselixhwala ngakho ubuso bami babuvuvukile njenge-*balloon*. Ubuhlungu babungikhulela. Ngangikade nginatha i*Tylenol* sikhathi sonke ngemva kwamahola amane ukuze ingisize ngobuhlungu, kodwa yayingancedi kangako. Ngathi ngihleli ekamelweni lokuphumula, ngisehluleka ukulala nginatha njalo umuthi, ngathi mehlo suka ebhokisini le*Tylenol* ngafunda imilayo eyayilotshwe kulo. Hatshi ngoba ngangingakwazi ukuthi i*Tylenol* inathwa njani kodwa ngoba ngangingelakho okokwenza, njengoba sonke siyake sifunde ibhokisi lelambazi nxa sisidla ilambazi nsuku zonke ekuseni. Hatshi ngoba silendaba lakho okulotshiweyo kodwa ngoba yikho okuyabe kuphambu kwethu. Yebo, yebo, amaphilisi angu 2 ngemva kwamahola angu 4, kodwa lona lalisithini? Lalisithi akumelanga kunathwe amaphilisi ayedlula angu 10 kumahola angu 24? Inggondo yami yaphangisa yahlanganisa inani lamaphilisi ayenganathwa ngumuntu nxa wayenganatha sonke isikhathi ngemva kwamahola amane, njengendlela enganginathe ngayo kumalanga angu 2 ayedlulile—ngamaphilisi alitshumi lambili, ayedlula inani eliqondileyo ngamaphilisi amabili. Khonapho, isisu sami sabopha ukwesaba kwangibamba.

Iminyaka eyisitshiyagalolunye eyokuphilela elamhlalokho, ukwehluleka njengomyeni, ukwehluleka njengobaba, ukwehluleka ukugcina abanye kwasokungenze ngaba lemizwa esabaleleyo. Omongi babenginikeze imithi elapha ukudangala bethi mhlawumbe ingasiza. Kodwa akukho okwangisizayo. Ngathi ngihleli ngobusuku lobo ngibulawa lizinyo, kwasokusiba lusuku lwesibili ngingalali, futhi ubuhlungu babunzima okokuthi ngangingeke ngilale. Khathesi ke sengifunda okwakulotshwe ku*Tylenol*, ngabona ukuthi lukhona

olunye ulutho okwakusamele ngizihluphe ngalo, ukudlulisa isilinganiso se *Tylenol*. Ngangingakwazi ukuthi ngingadlulisa isilinganiso se *Tylenol* kwakuyakwenzekani kimi, kodwa ngangileqiniso lokuthi kwakungeke kube kubi kakhulu njengoba yayithengiselwa noma ngubani. Ngacabanga ukuthi babebhale izixwayiso ebhokisini ukuze balandele umthetho nje. Ngangingacabangeli ukuthi ukudlulisa isilinganiso ngamaphilisi angu 2 kwakungabangela indaba enkulu. Kodwa umoya wokwesaba wabamba ingqondo yami, ngakubamba konke lokhu, ngaqala ukuhlaselwa yiminakano eyokuthi “kungaba nje ke.” Ngakho ukuze ngipholise ingqondo yami, ngacabanga ukutshayela abe *Poison Control Centre* ucingo. Ngangileqiniso lokuthi babezakuthi akukho nkinga. Owesifazane owayengangale kocingo wayezwakala esazi umsebenzi wakhe aze aphenndule ucingo. Wabuza indlela ayengangisiza ngayo, ngamchazela ukuthi nganginathe i *Tylenol* ngemva kwamahola angu 36 ayedlulile, ngakho nganginatha amaphilisi angu 12 ngelanga kulangu 10 okwakuthwe angadluliswa. Ngamtshela ukuthi ngangitshaye ucingo ukuba ngizwe ukuthi ukudlulisa kwami ngamaphilisi angu 2 kwakungasoze kungiphambanise na. Kwaba lokuthula kancane, ngimuzwa ehlaba i-computer yakhe. Ngasengisizwa amazwi athi, njalo ngitsho ngendlela yena akutsho ngayo, “Mnumzana, kasikaze sibe lomuntu ophilayo onatha amaphilisi amanengi kangako.” Ngangizwe kahle na? Hatshi ngempela! Ngakho ngamchazela njalo ukuthi ngangedlulise isilinganiso ngamaphili angu 2 kuphela kumahola angu 24 njalo lokhu ngangikwenze okwamalanga angu 2.

Khathesi ke waphendula ngelizwi elaliqinisekile, “Mnuzana, njengoba ngitshilo, kasikaze sibe lomuntu ophilayo onatha amaphilisi amanengi kangako. Ngicela uye esibhedlela KHATHESI!” Ngathi ngizama ukumchazela futhi okwakuyenzakele, ngoba ngangileqiniso

lokuthi wayengezwanga kuhle, wangimisa wathi, “Uzaziletha na esibhedlela kumbe ngithumele imota yezigulane izokuthatha.” Ngathithibala! “Ngizaziletha lapho,” ngangagasa. “Uya kusiphi esibhedlela?” wangibuza. Ngamtshela wasebeka phansi ucingo.

Ngama lapho ngimangele. Kwakumele ngibe lomhlangano oqakathekileyo ngo 9:00 ekuseni, khathesi kwakungu 3:30 ekuseni. Ngananabela izitebhisi ukuyafika ekamelweni lami lokulala ngavusa uDrenda ngambikela. Wangikhangela ngokudumazeka. Umyeni wakhe wayeziphatha ngendlela engajwayelekanga njalo wayekade enjalo okwenyanga ezimbalwa, futhi wayesekhathele ngokuhlala kunguye obambanisa yonke into, khathesi ke lokhu kwasokuyini? “Gary, udlulise ngamaphilisi amabili. Ngeqiniso, uyazi ngcono kulokukholwa ukuthi angakubulala. Batshayele ucingo futhi,” watsho. Kodwa ngoba ukwesaba akunaki njalo kuyahlukuluza ngamphendula. “Owesifazane lowana uthe sengingafa; kumele ngiye esibhedlela.” Ngangimbona unkosikazi wami engikhangela ngelihlo elithi, “Yikudlala ke lokhu” lapho ngitshibilika ngiphuma ekamelweni lokulala.

Ngathi ngitshayela imota ngisiya esibhedlela, omnumzana ababili ababelamajazi amlophe babengilindele emnyango wesibhedlela. Ngathi ngimisa imota, bangilanda bathi, “Nguwe uGary Keese?” Ngokuphangisa bangisa ekamelweni lokwelatshwa. Ngathi ngidlula lapho okwakulotshwa khona izaziso esibhedlela, ngabona ibizo lami selilotshwe kudala. Kwakulotshwe ukuthi, “UGary Keese—wedlulise isilinganiso samaphilisi.” Kwangimangalisa. Ngamafitshane, umongi wathi esethethe igazi lami, wangena wathi, “Kungani ulapha? I*Tylenol* esegazini lakho kayeneli lokulapha ikhanda.” Ngathi sengimtshele indaba yami ye*Poison Control*, waqala ukuhleka. Mina kangizange ngibone okwakuhleka lapha

futhi kangizange ngihleke lapho kubuya intego yokwelatshwa eye \$2,000 ifuna ukuhlawulelwa. Usathane wayengithiyile efuna ukungitshontshela futhi.

Indaba lezi ngikutshela ngazo, kunye lesingeniso, ukuze ngikubonise lapho impilo yami eyayikhona ngingakawutholi uMbuso kaNkulunkulu. Yebo, ngangingumKhristu. Yebo, ngangikhupha okwetshumi. Yebo, ngangikhokhela indumiso kwelakwethu ibandla okwesikhatshana. Yebo, ngangimthanda uNkulunkulu. Kodwa kukhona okwakukubi, okwakukubi kakhulu! Ngike ngakutshela ngendlela engayifundiswa nguNkulunkulu ukuba ngilwe lomoya wokwesaba lendlela engazixakulula ngayo ekuhlaselweni yikwethuka kanye lakumithi yokudangala. Kodwa ngangingakakhululwa kulezo zimo ezazilethe impi yokwesaba ekuqaleni, isimo sezimali zami esasingelathemba! Ngangicindezeleka nsuku zonke ukuba ngithole imali ngibhadale inhlawulo zami, futhi ngangilamakhadi ebhanga alitshumi ayesecitshiwe, lemali ezazibolekwe kunhlanganiso zemali ezintathu ezehlukeneyo, isikwelede se-IRS, imali yezihlobo, lamaphepha ambalwa okubanjelwa impahla.

Njengoba ngike ngatsho, impilo zethu zaziphakathi kwengxabangxoza yemali. Inhlupho lokuxubana kwemizwa kwasokuyindlela yokuphila kwami. Noma ngangingumKhristu, sasisifa kwezezimali, njalo linye ngalinye, amakhadi ami ebhanga ayecitshwa. Incwadi zokubamba impahla zazithunyelwa, imvumo yokuboleka yayicitshwa, ababefuna imali zabo babehlala betshaya ucingo. Ekukhuphukeni kosizi lwezimali zethu, njengoba

**“UNKULUNKULU
WAMI UZAKWABELA
ZONKE IZIDINGO ZENU
NGOKUKHAZIMULA
KWENOTHO YAKHE KUJESU
KHRISTU.”**

— KWABASEFILIPHI 4:19

lebhizimusi lalingalethi mali eyanelayo, sasingasenelisi ukuthenga ukudla. Imuli yami yayihlala igombolozele isitofu senkuni idinga ukufudumala ngenxa yokuthi sasingenelisi amafutha okulumatha isifudumezi. Sasidingisisa phakathi kwezihlalo sisithi mhlawumbe singathola imali engamatshe eyayingabe iwele ezikhaleni sithi kumbe ingenela ukuthenga ukudla eMcDonald's ukuze sabele abantwana.

Ngasengikwazi kahle ukuthulisa abantu bezikwelede nxa bengangitshayela ucingo, kodwa ngelinye ilanga omunye wabo waqhatsha igqwetha ukuze lizolanda inhlawulo. Lona langithinta ngocingo njalo lalingelabuntu. Lathi kimi, “Ngifuna imali leyo kungakedluli amalanga amathathu kungenjalo ngizakubophisa.” Ngasengiqediwe. Ngangingasela macebo, ngangingeke ngiboleke, abangane bami bonke ngasengidlule kubo, njalo kulapha engabakwazi khona ukuthi ngasengiphelile, Ngakhasa ngaya ekamelweni lami lokulala ngawela embhedeni ngakhala kuNkulunkulu. Masinyane, ngalizwa ilizwi leNkosi. Umbhalo engangihlezi ngiwuzwa wavuka engqondweni yami.

UNkulunkulu wami uzakwabela zonke izidingo zenu ngokukhazimula kwenotho yakhe kuJesu Khristu.

— KwabaseFiliphi 4:19

Ngayiphendula iNkosi ngokuthi umbhalo lo ngangiwa kodwa izidingo zami zazingapheli! Yona yahle yaphendula umbuzo wami khonapho, “Yebo, kodwa akusiwo mlandu wami lowo. Awukaze uthathe ithuba lokufunda ukuthi uMbuso wami usebenza njani. Ngempela, ibandla lami elinengi liphila njengabako-Isirayeli kuThestamende eNdala—njengezigqili. Baphila impilo yezikwelede lempilo yezibopho zemali. Mina ngifuna abantu bami bakhululwe.”

Ngaphangisa ngehla ngayaphansi ngathatha uDrenda ngamtshela engangikutshelwe yiNkosi. Ngavuma kuye ukuthi ngangingazange ngimdinge uNkulunkulu lendlela zoMbuso Wakhe. Khona, ngaleso sikhathi, sasingazi ukuthi uNkulunkulu wayesitshoni nxa wayethi sasingakwazi indlela zoMbuso. Phezu kwalokho, sasisenkonzweni, sikhupha okwetshumi kuleyo mali esasiyithola, njalo sasimthanda uNkulunkulu. Sasicabanga ukuthi sasesiwubambile umqondo woMbuso. Indaba, kodwa, ngasengizathola ukuthi, yebo, ngangisendleleni yokuya ezulwini, kodwa ngangikwazi ukusondeza amandla lobukhokheli bezulu empilweni yami ngendlela eguqula izenzakalo zemvelo. Ngakho saqala ukufunda iBhayibhili, uNkulunkulu waqala ukukhuluma lathi wasinceda ukuzwisisa lokho ayekutsho ngoMbuso. Esakufundayo kuyamangalisa! Kwaba sengathi yikulumatha isibane egunjini elimnyama. Okwakuqala empilweni zethu, sazithola impendulo zesimo sezimali zethu!

Nkulunkulu, Utshoni NgoMbuso?

UNkulunkulu wathi engitshela ukuthi ngangingazange ngifunde indlela zoMbuso Wakhe, ngadideka, ngingatsho ngamafitshane. UMbuso? Mina loDrenda sasingelalwazi. Sakhuleka sacela uNkulunkulu ukuba asifundise ukuthi wayesitshoni ngalokho: “Nkosi, sifundise okutshoyo ngoMbuso!” Ngakho okwakuqala okwakumele ngikufunde yikuthi uMbuso uyini. Lokhu yinto enzima engqondweni zabasentshonalanga, abaphila ngemiqondo yase-America enikeza ukuzibusa lamalungelo awokuzethula ngendlela ezechukene. UMbuso kaNkulunkulu awusiwo kazibuse; nguMbuso oloMbusi. Amandla oMbusi ageleza kuwo wonke uMbuso eshlela kuzo zonke ingatsha zama hofisi kahulumende ezingaphansi kwalowo mbuso. Ukuba lexuku labantu akusiwo

mbuso. Sungaba labantu abayizigidi kungabi ngumbuso. Umbuso liqembu labantu elibanjaniswa ngumthetho noma uhulumende. Ingcazelo yombuso kusichazamazwi ithi: “umbuso: isigodlo noma uhulumende obuswa yinkosi noma yinkosikazi.”

Noma sithakazelela ukuza kukaJesu emhlabeni ngeKhisimusi, sihlala sisehluleka ukuzwisisa ukuthi Yena wayesiza lohulumende. IBhayibhili likhuluma ngohulumende ku-Isaya 9:6-7:

Ngoba sizalelwe umntwana, sinikezwe indodana, njalo umbuso uzakuba phezu kwamahlombe akhe. Uzayaziwayo njengo Maluleki Omuhle, uNkulunkulu uSomandla, uBaba Lanini, iNkosana yoKuthula. Ukuthuthuka kombuso wakhe kanye lokuthula soke kube lesiphetho. Yena uzabusa esihlalweni sobukhosi sikaDavida laphezulu koMbuso Wakhe, ewuqhelisa njalo ephatha ngobulungiswa langokulunga kuze kube lanini. Ukutshiseka kweNkosi uSomandla kuzaletha impumelelo yalokhu.

UJesu likhanda lalo uhulumende, njalo uma simamukela uJesu njengoMsindisi siba yingxenye kahulumende wakhe; siba ngabahlali balapho. Kasibi ngabahlali kuphela kodwa siba yingxenye yendlu kaNkulunkulu njengamadodana lamadodakazi.

Khepha kubo bonke abamamukelayo, bakhohwa egameni lakhe, wabanikeza ilungelo lokuba ngabantwana bakaNkulunkulu—abantwana abangazalwanga ngokwemvelo, noma ngezinqumo zabantu kumbe intando yabomyeni, kodwa abazelwe ngoNkulunkulu.

— UJohane 1:12-13

*Ngenxa yalokho, kaliseyizo zihambi noma abezizweni,
kodwa selingabahlali kunye labantu bakaNkulunkulu futhi
lingamalunga endlu yakhe.*

— Kwabase-Efesu 2:19

Njengamalunga endlu kaNkulunkulu, siba yingxenyane yemuli yakhe futhi siba ngabanini abaphathisa kukho konke okungoku-kaNkulunkulu. Kodwa sihle sibe ngabahlali bakahulumende Wakhe omkhulu. Lokhu kutsho ukuthi ngokomthetho silamalungelo lenzuzo kulowo hulumende. Ukuze kube lokuzwisisa okungcono mayelana lalokhu engikhuluma ngakho, kahle ngikhulume ngokuba ngumhlali wemvelo owase United States. Amalungelo akho ngokomthetho alotshwe kusisekelo sombuso njalo lakumilayo esebenza phakathi kukahulumende. Imilayo le kunye lenzuzo kufinyelela wonke umhlali walapha, kungakhathalekile ukuthi ngubani. Amalungelo lawo kawalandaba lemizwa yethu noma ukuthi sikhali phe okungakanani. Hatshi, wona alethwa yimilayo, umthetho uyavuma ukuthi atholakale kuwowonke umhlali owafunayo ngitsho kuliphi ikhaya e-America. Kuyenzeka ukuthi umhlali angabiwazi amalungelo akhe ngokomthetho, kodwa noma kunjalo, uyabe elawo ngenxa yokuba ngulowo ohlala e-United States of America.

Khathesi nanku okunye ongacabanga ngakho, njalo ngethemba kuzaguqula indlela okhangela ngayo uNkulunkulu lendlela oyamukela ngayo kuvela kuNkulunkulu. Lapha e-United States singathola ulutho noma umuntu ozama ukusithathela amalungelo ethu omthetho noma ukusiphatha kubi, siyenelisa ukufinyelela ubulungiswa (ubulungiswa butsho ukusetshenziswa komlayo), indlela esebenzisa amalungelo ethu ngokomthetho.

Siyahamba enkantolo, umantshi angabi lendaba lokuthi sibukeka njani, ukuthi simpofu noma silenotho engakanani. Yena ukhangelamlayo. Kumele akhangele umlayo sonke isikhathi. Yikho ukuvikeleka kwethu: silamalungelo omthetho, njalo uhulumendewethu kumele asebenzise amalungelo ethu omthetho ngendlela yobulungiswa eyase-United States. Ngalokho, kasikhangelisise u-Isaya 9 lapho ekhuluma ngohulumende omutsha oledwa nguJesu emhlabeni.

Yena (UJesu) uzabusa esihlalweni sobukhosi sikaDavida laphezulu koMbuso Wakhe, ewughelisa njalo ephatha ngobulungiswa langokulunga....

— U-Isaya 9:7b

Umbhalo lo uthi uMbuso kaNkulunkulu uzathuthukiswa njalo uphathwe ngobulungiswa, ukubekwa komlayo kaNkulunkulu. Ukubekwa kutsho ukuqinisa kumbe ukusebenzisa amalungelo akho omthetho. Amalungelo akho omthetho yilokho uNkulunkulu akubiza esithi yikulunga kumbe lokho Yena athi kuqondile, umlayo Wakhe. Ukuze ube leqiniso lokuthi ulalokho uNkulunkulu akuthi kuqondile eMbusweni Wakhe, lokho okungokwakho ngokomthetho kulowo Mbuso, uNkulunkulu ukunikeze ubulungiswa, obuyisiqiniseko sokuthi uzathola lokho Yena akuthembise khona. UNkulunkulu ukwenze wabakwazi intando Yakhe ngeLizwi Lakhe, iBhayibhili, ukuze sazi amalungelo ethu eMbusweni Wakhe. Lezi zindaba ezimnandi! Konke okubalayo eBhayibhilini mayelana lalokho uNkulunkulu akuthembise khona kungokwakho kudala ngomthetho njengomhlali woMbuso Wakhe!

KwabaseKhorinte beSibili 1:20 kuyacaca ukuthi sonke

isithembiso—SONKE ISITHEMBISO—singu“Yebo” lo “Ameni.”
Isinqumo sesibekwe kudala; sokungokwakho konke ngokomthetho.

*Akukhathalekile ukuthi uNkulunkulu wenze izithembiso
ezinengi okungakanani, zona zingu “Yebo” kuKhristu. Ngaye
u-“Ameni” simkhuluma sinika inkazimulo kuNkulunkulu.*

— 2 KwabaseKhorinte 1:20

Isisekelo soMbuso kaNkulunkulu yibulungiswa lokulunga—
akunyakazi. Ngakho kucabange ngale indlela: “Nxa ngikwazi
imilayo yoMbuso kaNkulunkulu (intando Yakhe), njalo ngikwazi
ukuthi ubulungiswa ngiyabufinyelela, indlela yokusebenza
enika isiqiniseko salokho okutshiwo ngumlayo, kutsho ukuthi
ngilokuzethemba njalo kangesabi.

*Silesiqinisele lesi ekusondeleni kuNkulunkulu: ukuthi
nxa sicela ulutho ngokwentando yakhe, uyasizwa. Nxa sisazi
ukuthi uyasizwa—loba kuyini esikucelayo —SIYAKWAZI
ukuthi sesilakho esikucele kuye.*

—1 UJohane 5:14-15

Uma indima le ithi Yena uyasizwa, kayitsho ukusizwa kwendlebe
okwamazwi asuka kithi esiya kuye ngamagagasi omsindo; ukhuluma

**IMBUSO ISEBENZA
NGEMILAYO NJALO
IMILAYO KAYIGUQUKI.**

ngokuthi Yena usephatha udaba.
Cabanga umantshi olalela udaba
ukuze abone ubulungiswa busen-
zakala. Inkantolo kunye lomantshi
kubekwe ukuze ubulungiswa bufinye-
lelwe ngumuntu wonke. Isinqumo sikamantshi kasilani lemiswa

yakhe kodwa sibekwa ngumlayo awusebenzisa kubo bonke abahlali. Umantshi ukhona ukuqinisa ukuthi ubulungiswa (ukusetshenziswa komlayo) kwenzakale ngendlela zomlayo olotshiweyo. Kudaba lukaNkulunkulu, isihlalo Sakhe sobukhosi (indawo yokubusa) lamandla Akhe kukhona ukuze kube lobulungiswa (ukusetshenziswa kwentando Yakhe) kubo bonke abantu abaza kuJesu laseMbusweni Wakhe.

Ngicela ufunde umutsho lo futhi kancane uwuvumele uguqule indlela obona ngayo uNkulunkulu. Abantu abanengi bacabanga ukuthi uNkulunkulu wenza izinqumo Zakhe udaba-ngo-daba, kodwa lelo akusilo qiniso. Yena unguMbusi woMbuso olemilayo engaguqukiyo. Yena akasoze enze izinqumo ezingaphandle komlayo Wakhe. Ngelokho impendulo Yakhe sibayazi singakaceli, njalo silethemba lokuthi silakho okutshiwo ngumlayo Wakhe noma singakakuboni ngoba Yena ulamandla okusebenzisa umlayo Wakhe.

Lapho mina loDrenda siqala ukufunda amalungelo ethu omthetho woMbuso, indlela esasicabanga ngayo ngoNkulunkulu lebhayibhili yaguquka. Impumela yokuzwisisa kwethu okutsha yaba yikuguquka kwempilo zethu. Kwaphela ukucela. Kwaphela ukuncenga. Safunda ukuthi okwakukhulunywe nguNkulunkulu sasikuphiwe njengabahlali boMbuso Wakhe. Kwakumele siqhubeke sifunda ukuthi sikuthola njani lokho okungokwethu ngomthetho sikusebenzise emhlabeni. Cabanga ukuhambisa i-check ebhanga. Noma ungaba lemali enengi okungakanani, kulendlela yomthetho okumele uthole ngayo imali ungaqhubeza i-check. Kuyo yonke inhlanganiso yomthetho kulendlela eqondileyo eyokuthatha okuthile ngokusemthethweni, noma sokuvele kungokwethu

Amandla akhe aphezulu asinikeze konke esikudingayo

*okwempilo lobungcwele ngolwazi lwethu ngaye osibize
ngenkazimulo langokulunga kwakhe.*

— 2 UPhethro 1:3

Ngumbuso! Labo abangabahlali boMbuso lowo balamalungelo afana lomunye wonke umhlali walowo Mbuso. Kuqakathekile ukuba sizwisise umcijo lo: IMbuso isebenza ngemilayo njalo imilayo kayiguquki. Kungani lokhu kuqakathekile? Kuqakathekile ngoba akutsho ukuthi nxa uMbuso usebenza kumbe usebenzisa imilayo engaguqukiyo, kutsho ukuthi eMbusweni akukhethwa muntu. Kodwa ke, wonke umuntu oseMbusweni ulelungelo elifanayo elokukholisa imilayo yoMbuso njengaye wonke umuntu okulowo Mbuso.

Nansi isizatho esenza izinto zesontweni ziqale ukudida. AmaKhristu amanengi acabanga ukuthi uNkulunkulu ucabanga ngalokho okumele akwenze empilweni yomuntu nxa sokuvuke udaba okumele aluxazulule. Ngamanye amazwi, bacabanga ukuthi uNkulunkulu uyakhetha ukuthi abusise bani atshiye bani. Bacabanga ukuthi uNkulunkulu uyavumela izinto ezithile ezingeke zinqandwe ngabantu ukuba zenzakale kubo. Bacabanga ukuthi uNkulunkulu uzasilisa omunye umuntu atshiye omunye. AmaKhristu amanengi ancenga usizo kuNkulunkulu lapho Yena esekwenzile konke angakwenza ukuba abasize. Yena wabanikeza uMbuso, wonke uMbuso!

UNkulunkulu wathi eqala ukukhuluma lami ngezimali zami lokuthi kwakumele ngifunde okunengi mayelana loMbuso Wakhe, wanginikeza umbhalo lo.

*Babusisiwe abampofu, ngoba uMbuso kaNkulunkulu
ungowabo.*

— ULukha 6:20b

UNkulunkulu wayengitshela ukuthi impendulo yezimali zami yayiseMbusweni Wakhe njalo ungangezelela kulokhu uthi, lasekwazini ukuthinta imilayo yoMbuso lapha emhlabeni njengokwenziwa nguJesu. Ngiyavuma ukuthi ekuqaleni ngangingazi ukuthi konke lokhu kutshoni. Kodwa lapho ngicabangisisa ngalokho engangikutshelwe nguNkulunkulu, ngananzelela ukuthi imbuso ngempela, isebenza ngemilayo. Umsebenzi lokufinyelela komlayo othile kungayaziwa njalo kwethenjwe ukuthi kuzasebenza ngendlela efanayo sikhathi sonke ngoba akuguquki. Ngangingazake ngikucabange lokhu ngeso likamoya. Kodwa ke, nxa kunjalo, ukuthi uMbuso kaNkulunkulu usebenza kanje, ngangikwazi ukuthi ngangingayifunda leyo milayo, ngiyisebenzise, ngithole inzuzo yokusebenza kwemilayo le empilweni yami.

Ngananzelela ukuthi imilayo ebusa umhlaba kayiguquki. Eqinisweni, ukungaguquki kwayo kungethenjwa ukuthumela umuntu aye ezinkanyezini kumbe ukuba indizamtshina indize. Kodwa amaKhristu amanengi kayi kuNkulunkulu elenzwisiso le. Khepha, wona ayancenga njalo akhale nxa efuna okuthile, ezama ukufunza uNkulunkulu izidingo zawo sengathi uNkulunkulu kumele enze ukhetho lokubanakekela.

Isibonelo, nxa ngangiyakuyatshumayela emhlanganweni webandla elithile, abantu balelo bandla babeyaqala na ukuthandazela amalayithi ukuba akhanyise kulowo mhlango? Babeyazila ukudla bethandaza, bencenga uNkulunkulu bethi, “Nkulunkulu, uyazi ukuthi umbuthano lo uqakatheke kangakanani lokuthi amalayithi siwadinga okungakanani,” becela ngezinyembezi bethandaza? Kangicabangi kunjalo, ngiyasola futhi ukuthi ukukhanyisa kwamalayithi kwakuyakuba sezingqondweni zabo lapho besenza amalungiselelo

omhlangano lo. Kasithi bafike ngosuku lomhlangano ebusuku bathole kumnyama, ucabanga ukuthi babezatshayela abenhlanganiso yamagetsi ucingo bebancenga ukuba bazolayitha amalayithi? Hatshi. Bengakwenza lokhu, ngabona owenhlanganiso yamagetsi wayeyalalela okomzuzwana nje, abese khangelalela omunye asebenza laye athi, “Ngitshayelwe ucingo luhlanya.” Wayezaphendula ngokuthi, “Nkosikazi, kasicitshanga lutho thina; uhlupho lukini khonangapho.”

Isibonelo lesi uma ngisixoxela abantu emihlanganweni, wonke umuntu uyahleka. Uyazi kungani? Yingoba bayazi ukuthi ukutshayela abenhlanganiso kagetsi ucingo, ukhala kakhulu, ubatshela ukuthi balayithe amalayithi kuyibuwula; abanengi bayazi ukuthi benzeni kulesi isimo. Bayaphongulayitha emdulwini. Kulula ngalolo hlobo! Akudingeki ukukhalaza, noma ukuhlupheka; bayalayitha emdulwini. Uyazi na ukuthi kungani bengazihluphi ngokulayithwa kwamalayithi? Kungoba BAKHANGELELA ukuthi abe elayithile. Bakhangelela ukuthi abe elayithile ngoba bayazi indlela amagetsi asebenza ngayo. Bayazwisisa futhi IMILAYO ebona ngogets, njalo bayazi ukuthi imilayo le kayiguquki.

Kodwa ungabuyela emuva iminyaka engu 1,000 utshele umuntu ukuthi isigodlo sonke sasizakhanyiswa ngamalayithi ayisigomboloz, amancinyane, lowo muntu wayezacabanga ukuthi uyahlanya. Njalo wayeyathi angabona isigodlo sikhanyiswe ngamalayithi ayisigomboloz, amancane, wayeyakuthi yisimanga. Kodwa kungayisiso simanga; ngumlayo kagetsi osebenza ngendlela yawo engafundwa yiloba ngubani othatha isikhathi sokufunda ukuthi amagetsi asebenza njani.

Sesifundile ukuthi amagetsi asebenza njani, kumbe ungathi

sesiguqule ingqondo zethu mayelana lemithetho yawo amagetsi. Ngakho sikhangelela ukuthi wona asebenze njalo kasethuki uma singawabona ekhona. Eqinisweni, okungasethusa yikuwabona engekho. Ngokuzwisisa imilayo yamagetsi siyilobe phansi, sesingenelisa ukuba lamalayithi umhlaba wonke. Kanjani? Singakwenza ngokufundisa abanye indlela imilayo le esebenza ngayo sibavumele ukuthi bakholise inzuzo yokuba lamalayithi. Lokhu konke kuyenzeka ngenxa yenzwisiso yemilayo kagetsi. Okufanayo kuliqiniso mayelana lemilayo yezomoya. Uma singayizwisisi, kasisoze senelise ukukholisa inzuzo kumbe ukuyiphinda nxa sesiyidinga njalo.

Nxa singabona indizamtshina, kasithi, “Habe, yisimanga lesi.” Hatshi, sikhangelela ukuthi indizamtshina izandiza ngoba, njalo futhi, siyazwisisa indlela indizamtshina ephapha ngayo lokuthi ikwenzelani lokho. Njalo futhi, singabuyela iminyaka engu1,000 besokudlula i-*Airbus* 380 elesitezi phakathi ihambela phezu kwezihlahla, abantu babengathini? Babeyakuthi nansi isimanga! Ngiyavuma ukuthi i-380 iyamangaza, isinda amaphawundi ayizigidi eziyi 1.2, ithwala abantu abedlula abangu 800 ihamba ngesiqubu samamayela angu 580 ngehola iphutshe amamayela angu 9,000. Iyabukeka okokuthi lawe sungathi yisimanga. Kodwa akusiso. Singabuza omanjinela abayilungisayo i-380 ukuthi indiza njani, basitshela imilayo ye-*physics* abayisebenzisayo ukuba indiza le iphapse njalo basitshela lakho konke abakusebenzisayo ukuyibumba lokuyibopha. Omanjinela kabazange bame bayibukele iqala ukuhamba besithi, “Habe, akubuke nje; kangikholwa ukuthi into le iyandiza.” Njalo futhi, silokuzethemba uma singena phakathi kwayo indizamtshina ngoba siyazi ukuthi ukundiza kwayo kumi ngemithetho ye-*physics* engaguqukiyo. Singahlala phakathi

kwaleyo mithetho, indizamtshina leyo izaphapha. Khumbula lokhu: Imilayo kayiguquki!

Sasingeke singene phakathi kwendizamtshina ngabe imilayo yayihlala intshintsha. Kasithi sasithenge itikiti lendizamtshina lilotshwe lokhu, “Gada indizamtshina le usazi ukuthi sokungaba lobungozi ngoba umlayo wokusukuma kwayo kawuhlali usebenza. Ngelinye ilanga umlayo uyasebenza kwelinye kawusebenzi. Akakho okwaziyo ngempela—uzizwa ulenhlanhla na? Sikufisela uhambo lokundiza oluhle.” Uyake uzizwe usesaba ukuthi uzazizwa uphakama esihlalweni sakho? Awukaze? Kungani? Ngoba uyakwazi ukuthi imilayo ye-*gravity* kayiguquki.

Lezi izinto engiziqambileyo yimilayo yomhlaba owadalwa nguNkulunkulu. Kodwa uyazi ukuthini? Imilayo yezikamoya eyoMbuso wakhe isebenza ngendlela efanayo—kayiguquki. UNkulunkulu engakakhulumi lami mayelana loMbuso Wakhe, ngangisazi kakhulukazi ukuthi imilayo yomhlaba isebenza njani, kodwa ngacabanga ukuthi uMbuso kaNkulunkulu wawungenjalo. Ngangicabanga ukuthi uNkulunkulu wenza lokho akufunayo lapho esefuna emuntwini amfunayo. Kodwa ngathola ukuthi leli kwakungayisilo qiniso. Ngathi ngibona ukuthi imilayo kamoya eyoMbuso kaNkulunkulu yayingaguquki njalo yayifundeka, izwisiseka, futhi isebenziseka, ngazozwisisa ukuthi kungani uJesu wayehlala esithi, “UMbuso kaNkulunkulu unje.” Abesefanisa uMbuso lokunye okwemvelo ukuze abantu bazwisise ukuthi usebenza njani. Khonapho, kwangani kukhanyise isibane engqondweni yami. Ngaba lomcabango lo, “Nxa kuyikuthi uNkulunkulu wasinikeza uMbuso, ngoba Yena wakwenza lokho, njalo uMbuso usebenza ngemilayo engeke yaguquka, kutsho ukuthi ngangingayifunda leyo milayo ngiyisebenzise empilweni yami.”

Lingesabi, mhlambi omncane, ngoba uYihlo uvumile ukulipha uMbuso.

— ULukha 12:32

Lelo langa ngahle ngaba yingcitshi ye-science kwezomoya! Ngaqala ukubona abantu ngendlela eyehlukeneyo. Ngaqala ukubuza imibuzo nxa ngifunda iBhayibhili: “Kungani inhlanzi leziyana zaphindwa? Kungani umuntu loyana wasiliswa? Kungani isinkwa lesiyana saphindwa?” leminye enjalo. Ngathi sengiqale ukukhangela iBhayibhili ngale indlela, ngicela uNkulunkulu ukuthi angitshengise imilayo eyayikhona—HABE!

INkosi yathi ikhulume lami ngelanga ngize ngitshayelwe ucingo ngumeli yangitshela ukuthi inhlupho zami zazivela ekuthini ngang-ingazange ngithathe ithuba lokufunda uMbuso Wakhe, khona ngahle ngehla izitezi endlini ngaya kumkami ngayavuma icala lami lokungadingi iNkosi lokuvumela ukuthi siwele enkingeni esasikuyo, njengendlela engike ngachasisa ngayo. Kodwa sasingakwazi ukuthi kwakusitshoni ukwethemba uMbuso ukuze sithole impendulo. Njalo futhi, sasikade sisebandleni, sisendleleni yokuya ezulwini, simthanda uNkulunkulu. Sasingelalo ulwazi lwalokho okwakutshiwo nguNkulunkulu uma Yena ekhuluma ngo “Mbuso” leso sikhathi. Sasikhangelane lohlupho oluzwayo, njalo sasingakwazi ukuthi imali eyayifunwa ngumeli emalangenani amathathu sasiyayizuza njani lokuthi sasiyayiphatha njani indaba le singahanjiswa enkantolo ngenxa yokwehluleka ukuthola leyo mali emalangenani amathathu.

Ngakho, lo kwakungumhloliso omuhle. Kwakuyisehlakalo sami sakuqala sokuhlangana lohlupho olunje olwemali, njalo ngangifuna iNkosi ingibonise lokho ekutshoyo “ngoMbuso.”

Ngakho kahle ngikutshela ukuthi kwayenzakalani. Khumbula, umeli wayenginikeze amalanga amathathu awokuthola leyo mali, engangingelayo! Ubunzima lobu yibo obangenza ngaya ekamelweni lami lokulala ngayakhala eNkosini; ngangisenkingeni! Yebo ke, kulapho Yona eyakhuluma khona lami inginikeza uMbuso njengempendulo; futhi, ngangingazi eyayikutsho ngalokho, kodwa ngangizimisele ukufunda.

Ngemva kwamalanga amabili, ntambama, ngangisendleleni yokuyabona umthengi mayelanana lomshuwalense wempilo. Kenje, kulezo nsuku ngangitshiya imota yami komunye umgwaqo ongayisiwo wendlu yomthengi engangisiya kuye, hatshi phambili kwendlu yakhe. I-*minivan* engangihamba ngayo yayilohlupho oluncane. Ngangithi nxa ngiyivusa, igcwalise indawo yonke ngitsho lomgwaqo ngentuthu emhlophe, hatshi intuthu encane. Ngangibona nje ukuthi kwakungeke kusize ibhizimusi lami uma ngimisa imota endlini yomthengi, besengithi nxa ngisuka, ngigcwalise indlela yakhe ngentuthu. Ngacabanga ukuthi ukuthembeka kwami endabeni zezimali kwakungaphambaniseka njengoba ngangibacela ukuthi bahlanyeke amakhulu ezinkulungwane zamadola kimi. Phezu kwalokho, nxa ngangikwazi ukuphatha kuhle izimali, kungani ngangitshayela imota eyayisehluleka ukuhamba? Ngalobo busuku kwakufana.

Ngathi ngiphuma endlini yomthengi wami, ngethuka ukubona ukuthi yena wayengilandela ngomgwaqo ngisiya emoteni. Wayengela sizatho; sasizixoxela. Kodwa ngangisesaba ukuthi wayezalinda ngize ngiqale ukuvusa imota. Saqhubeka sikhuluma mina ngingena emoteni. Ngehlisa ifasitela, saqhubeka sikhuluma, ngilethemba lokuthi yena uzavalelisa besengisenza njengalowo owayesaqedisa

okuthile lapho yena chamba ebuyela, kodwa akazange. ekucineni, wavalelisa ukuyalala, kodwa watsheda wama buqamama nje lemota. Ngangisazi ukuthi la akusekho enye indlela. Ngayiqala imota, ngisithi kumbe layo kayisoze ivuse intuthu emhlophe lesi sikhathi, kodwa kwakuyisifiso esasingeke senzeke. Khonapho, umoya wagcwala intuthu eyayiphandla amehlo.

Indoda yanginqolonga, masinyane, ukuba ngicitshe imota. Yabuya kufasitela lami yangicela ukuba ngivule imota phambili. Yangichasisela ukuthi yona yayisebenza kwezinye izikhathi njengomlungisi wezimota, njalo kukhona ayefuna ukukukhangela. Ngemva komzuzu, weza kimi wathi, “Njengokucabangela kwami; *i-head gasket* yakho ifile. Tshayela imota uye endlini uyilungisise masinyane.” Ngambonga ngasuka ngahamba, kodwa lokho ayekutholile kwakungatsho lutho kimi, ngangingelayo imali yokuyilungisisa imota.

Ihofisi yami yayikhatshana okwamamayela ayisithupha nje kusuka endlini yomthengi wami lo, njalo ngathi ngibuyela ehofisini, ingubo ejwayelekileyo eyokudangala yangibamba. Kodwa ngathi ngitshayela, ngakhumbula engangikutshelwe yiNkosi, Ngaqala ukukhuluma layo ngemota yami. “Nkosi, ngithi, kangilamali yokulungisa imota le. Lokhe ngingakaqedi lokuyihlawulela, kayithengiseki ifile. Kangazi lokuthi ngenze njani. Mhlawumbe kungaba ngcono uma imota le ingazitshela. Ngaleyo ndlela inhlanganiso yomshuwalense izayihlawulela ngibe sengihlukane layo.”

Sokusele amamayela amathathu ukuba ngifike ehofisini, ngananzelela igwebu engangingazake ngilibone phambili kwayo. Ngathi ngibukele, igwebu leliyana lakhukhumala, kwathi ngimisa imota ehofisini, ladubuka kwaqala ilangabi. Ngathithibala; phambili kwemota kwakubhebha umlilo usiyaphezulu ubude obungaba yi

6 feet. Ngagijima ngangena kusakhiwo sehofisi yami ngatshayela abenhlanganiso yomlilo ucingo. Ngelanga elalandelayo, imota

**NGALESO SIKHATHI,
SASESIKUBAMBILE
SODWA UKUTHI INDLELA
ZIKANKULUNKULU
ZIYASEBENZA, NJALO
SASESIZINIKELE UKUYALA
SIFUNDA FUTHI SISEBENZISA
INDLELA ZOMBUSO KUSUKELA
LAPHO KUSIYA PHAMBILI.**

yayisikhangелwe yinhlanganiso yomshuwalense, bangipha i-check eyayisanela ukuba ngiyihlawulele besokusala imali eyanela ukunikeza umeli owayengifonele kumalanga amathathu ayedlulile. Mina lo Drenda samangala. Sasingazi ukuthi sicabangeni. Sasikwazi ukuthi uNkulunkulu wayesesebenza kithi lokuthi kukhona okwasokuguquka, Kodwa ukuzinikela kwethu

eMbusweni kwasokuzahlolwa ngendlela entsha eyayizahlela indlela yethu yeminyaka elandelayo.

Ngemva kokutsha kwemota, thina, ngokunjalo, sasijabula, kodwa saphanga sananzelela ukuthi sasingasela mota. Noma yayisihlawulelwe lomeli wekhadi lebhanga esebhadaliwe, sasingelayo enye imali yokuthenga imota entsha. Wathi esezwe ngokutsha-balala kwemota yethu, ubaba wami wasitshayela ucingo wathi ufisa ukusinceda ukuthola entsha. Sajabula sisizwa lezo ndaba. Ngakho mina lobaba sahamba kwabathengisa izimota eduzane sathola imota esasisiyithanda mina loDrenda. Ubaba wathi uzasinikeza i \$5,000 yokusincedisisa, yona yayiyi \$17,000. Lokhu kwakusitshiya sidinga enye i \$12,000 yokungezelela. Ngabhala incwadi yokuthola ikhadi lebhanga lobaba wazibhalisa njengofakazi. Babezangazisa ekuseni abebhanga.

Lobo busuku kasilalanga. Sasikwazi ukuthi kwakungamelanga

kodwa sicele kuNkulunkulu lokho esasikudinga simvumele asitshengise indlela yokukuthola.

Isenzakalo semota lesi sangenza ngaba lesiqiniseko sesinye isehlakalo esasenzakele kunyanga ezinlutshwane ezazedlule, kodwa ngaleso sikhathi, ngangingazange ngizwisise engangikutshengiswa nguNkulunkulu. Amatshatha ayengakabanjaniswa engqondweni yami awesimiso soMbuso.

Ngiyathanda ukuyazingela impunzi kodwa okweminyaka bengiphenduka ngingela lutho. Ngangiphuma, ngiqonde umqando, amalanga elandelana kungela lutho. Kwakungayisikho ukuthi ngangithanda ukuzingela kuphela: kodwa ngangilabantwana ababefuna ukudla njalo ngangiyidinga inyama. Noma ngangike ngaphumelela mandulo, kwasokudlule umnyaka ngemva kokuphumelela kwami ukubamba impunzi ngibuyele ngekhaya lenyama. Ngelinye ilanga ngangicabanga ngesikhathi sokuvama kwempunzi esasilandela, ngezwa iLizwi leNkosi. Yona yathi, “Kungani ungan-givumeli ukuba ngikubonise indlela yokuthola impunzi lonyaka?” Kutshoni lokhu? Lapho ngithandaza mayelana lamazwi la, ngezwa ngifuqwa ngaphakathi ukuba ngihlanyele inhlanyelo yemali noma isipho esijonge ukuba ngibambe impunzi leyo. Ngezwa iNkosi ithi kimi uma ngingahlanyela ngenxa yempunzi yami, kwakumele ngikholwe ukuthi ngasengamukele noma ngangingakayitholi, njengokutshiwo kuMakho 11:24:

Ngakho ngiyalitshela, konke elikucela likhuleka, kholwani ukuthi selikwamikele, kuzakuba ngokwenu.

Noma njengomKhristu ngangihlala nginikela njalo ngixhasa ibandla lakwethu, ukuhlanyela ngale indlela ngilenhloso njalo

ngikholwa ukuthi ngangizayamukela lokho engangikuthandazela kwakukutsha. Ngathatha i-*check* ngabhala kuyo ngisithi, “Ngenxa yempunziyamika 1987.” Ngabeka izandlaphezukwayo ngayithumela enkonzweni engangiyethemba ngakholwa ukuthi ngasengamukele impunzi yami. Ngoba ngangihlala eTulsa, Oklahoma, imingcele yedolobho kuleso sikhathi, yayisenza kubenzima ukuthola indawo yokuzingela, kodwa umngane wami owesontweni wangimema ukuba siye emzini kagogo wakhe emakhaya ngekhelfu lokuBonga. Yena wathi kukhona impunzi ezazitholakala ngaphandle kwepulazi. Ngakho mina lemuli yami sahamba ngosuku lokuBonga ekuseni sisiyakholisa ilanga elihle elokudla lokuyanana lokuba ngiyebamba impunzi yami.

Umngane wami wayengazi ukuthi angilaye le ngaphi, kodwa likhona idlelo elaligonjolozelwe ligusu, yena wabona kungcono ukuba ngiye kulelo dlelo ngiyehlala eceleni kwesihlahla esikhulu esasilapho. Khathesi, ngifuna ubambe umfanekiso lo. Ngangihleli phakathi kwedlelo elaliligceke elalilesihlahla esikhulu enzikini yalo. Ngakho ngahlala ngayama isihlahla ngikhangele igusu, elalingaba khatshana lami nge 130 *yards*. Khathesi nxa sengikunakana, ngangihleli egcekeni nje elivulekileyo eceleni kwesihlahla esikhulu, akusiso simo esihle esokuzingela lesi.

Ngemva kwemizuzu engu 30 kumbe engu 40 ekuseni, nginga-nanzeleli, kulempunzi enduna eyayigijima phakathi kwensimu iqonde igusu engangikhangelane lalo. Isihlahla sasiphakathi kwami lempunzi, ngakho yona kayingibonanga lami kangizange ngiyibone. Impunzi enduna le yagijima yaqonda isihlahla endleleni yokuya eguswini, ilokhu ingangiboni ngihleli laphaya. Yathi isondela eduzane lesihlahla, yangizwa ngamakhala yama mpo, izama ukungidinga. Impunzi enduna le yadinga esihlahleni, amehlo ethu

ahlangana ngasikhathi sinye kusele ama yard amahlanu phakathi kwethu. Kangilaqiniso ukuthi owamangala kakhulu phakathi kwami layo ngubani, kodwa impunzi enduna le kayizange ichithe isikhathi yahle yasibathela ngejubane. Yakhokha umoya ngendlela elomsindo, yasukuma ngesiqubu esipheleleyo iqonde eguswini. Ngangilokhu ngihlezi lapho, yona impunzi igijima ngesiqubu ingibalekela, ngizama ukuphakamisa umbhobho wami lokuyikhombela okuqondileyo.

Khathesi, ukuzama ukukhombela impunzi le enduna elomsila omhlophe eyayigijima ngesiqubu sonke lokudubula ngesandla kwakungeke kubelula. Equisweni, ngangingakaze ngidubule impunzi igijima. Ngyakhumbula ukuthi kwakunzima ukwala ngiyikhombele okuqondileyo ngoba yona yayilokhu iseqela phezulu emoyeni, njengalokho okwenziwa zimpunzi zomsila omhlophe uma zivula isiqubu. Kodwa ngathi sengiqhunse umbhobho, impunzi yawa kayizange ibe isatsheda. Ngethuka! Konke kwakwenzakale ngomzuzwana. Ngathi sengibala ngathola ukuthi ngangidubule into eyayikhatshana okwe 110 *yards*.

Wathi esizwa umbhobho, umngane wami waphuma wazojabula lami ngempunzi yami eyayilele laphaya. Ngangingazange ngimtshela ngaphambilini umngane wami mayelana lalokho iNkosi eyayikukhulume kimi mayelana lendlela engangizayamukela ngayo impunzi yami, kodwa khathesi ngamkhangela ngathi, “Kangikholwa ukuthi impunzi le ngiyibanjiswe yikuthi ngingumzingeli omkhulu.” Ngakhupha iphetshana, engangilibhale ngelanga ngisiyathumela i-*check*, laliphakathi kwejazi lami lokuzingela. Lalibhalwe ukuthi, “Ngiyakholwa ukuthi sengamukele impunzi yami ka 1987, ngegama likaJesu.” Kwakulotshwe usuku lesikhathi njalo

ngawukhuleka umkhuleko lo owawubhalwe lapho. Ngaliphakamisa iphepha ukuba umngane wami abone ngaqala ke ukumtshela ngalokho iNkosi eyayithe ngikwenze.

Isenzakalo lesi sathatha ukunaka kwami. Ngangisazi kungela kuthandabuza ukuthi kwakunguNkulunkulu. Kodwa asazi ngasizatho bani, ngangingazwisisanga ukuthi ngasengingena phakathi komlayo woMbuso. Ngempela, ibala elithi “uMbuso” yinto engangingakayicabangi nje. Ukuthola impunzi leyana kwakukuhle, kodwa kwakuzayenzakala futhi na? Ngingakwazi ngezindlela zomlayo woMbuso, ngangingeke ngibekwazi ukuthi yiwuphi umlayo owenza impunzi yavela. Ngakho ngaphonguthi yinto kaNkulunkulu engangizimisele ukuyizama njalo kusigaba somnyaka esinje esasiyalandela. Kodwa lesi sigaba somnyaka singakafiki, imota yethu yatsha. Yathi isitshile imota kwabuya enye enkulu isihlawulelwe, ngasengimnaka uNkulunkulu ngendlela ephелеleyo. Ngasengijabula ukuba ngiphume ngiyebamba impunzi yami kusigaba somnyaka esasiyalandela. Ngangifuna ukuyahlola lokho engangike ngakusebenzisa ngifunde okunye okunengi ngoMbuso kaNkulunkulu. Isigaba sokwanda kwempunzi sasingekho khatshana kakhulu!

Ngadubula impunzi yakuqala e-Oklahoma ngekwindla ngo 1987. Kodwa ngo Ntulikazi ka 1988, sasuka saya e-Ohio lapho engakhulela khona. Noma ngangikhulele khona, kwasokudlule iminyaka elitshumi lambili ngisuke khona. Ngesikhathi ngikhulela khona, ngangingazange ngiphumelele ukuzingela impunzi yase-Ohio. Noma ngangizamile kanengi, kangizange ngithole ithuba lokudubula ngitsho leyodwa. Sathi sesihlezi endlini yedolobheni lase Ohio esasiyihlawulela nyanga zonke, ngananzelela ukuthi ngangingazazi izindawo zokuyazingela. Ngisasengumfana, ngangike

ngayazingela imvundla phetsheya komgwaqo womuzi kababa kokuyisifudlana okwakulapho. Ngangifaka isithiyo iminyaka ilandelana kodwa kangizange ngibone impunzi noma uphawu olwalutshengisa ukuthi indawo leyo yayilempunzi. Ngelinye ilanga ngisasekolitshini, umfowethu wangitshayela ucingo ejabula kakhulu. Wathi wayebone impunzi duzane lesifudlana lesiyana esasiseduzane lomuzi kababa. Sonke kwasimangaza.

Sengikhumbula ingxoxo le, ngathatha isinqumo sokuthi ngangiyakuya ekucineni kwexukwana lelo lapho kuqala isigaba somnyaka esokugcwala kwempunzi. Ngatshayela umfowethu ucingo ngifuna angilayele indawo yesifudlana leso engangingaya kuyo ukuze ngibambe. Noma laye wayeseleminyaka emilutshwane engazange afike khona, wayekhumbula lapho okwakulesihlahla esikhulu ese maple esasisekucineni kwesifudlana duzane leganga ngakho wayecabanga ukuthi leyo yindawo enhle. Njengoba ngakhula ngiqansa lokwehla isifudlana lesi, ngangisazi zonke izindlela zaso ngakho ngahle ngabakwazi lapho ayengilayela khona.

Mina loDrenda saphinda lokho esasikutshengiswe yiNkosi kumnyaka owawedlule sise Oklahoma—ukuhlanyela inhlanyelo, silobe ngayo phansi, besesikholwa ukuthi uma sithandaza siyamukela, njengokutshiwo kuMakho 11:24. Ngaleso sikhathi, e-Ohio kwakuvunyelwa ukubamba impunzi ezimbili kuphela enduna noma ensikazi, kodwa thina sasicabange ukuhlanyelesa impunzi eyodwa besesizophuma sisiyadinga eyesibili. Mina loDrenda sahlanyela inhlanyelo yempunzi sakholwa ukuthi sasesiyamukele lapho sithandaza. Ngesimanga, kwathi sokudlule imizuzu engu 40 ekuseni kuqala isikhathi somnyaka esempunzi, kangibambanga eyodwa kodwa ngabamba ezimbili. Habe, kukhona okwakusenzakala lapha ngempela!

Ngemva kwenyanga eyodwa, ngaba lephupho ngecebo lokusungula ibhizimusi. Ibhizimusi leli laligoqela ulwazi lwezomnotho engangiluthole kubhizimusi lomshuwalense, kodwa ephutsheni lami injongo yayehlukile. Kangizange ngilizwisise okupheleleyo, kodwa ngangileqiniso lokuthi uNkulunkulu wayengikhokhela ukuba ngiqale ibhizimusi lami ngitshiye inhlanganiso engasengisebenze kuyo okweminyaka eyisitshiyagalombili. Ngesikhathi ngisiba laleli phupho, ngangilokhu ngisathengisa umshuwalense wempilo lezimpahla.

Ngeviki ngisiba laleli phupho, kwakumele ngethekelele imuli ethile ukuyakhuluma layo ngomshuwalense, futhi noma sasikhuluma ngomshuwalense wempilo, ngangikwazi ukuthi ukuba lomshuwalense wempilo kwakun-

gayisiso sidingo sabo noma inkinga yabo emqoka. Ukusebenzisa kwabo imali kwakungahlelekanga njalo babelezikwelede. Uhlelo lwami olujayelekileyo lwaluyikunikeza abathengi bomshuwalense iphepha babhale ngomnotho wabo. Lokhu kwakungivumela ukuba ngibe kwazi ukuthi badinga umshuwalense ongakanani. Ngalobo

**NGAMANGALA UKUTHI
IMULI LE YAYINGENELISA
UKUPHUMA EZIKWELEDENI
KUMINYAKA ENGAPHANSI
KWEYISIKHOMBISA, NGIBALA
LOKUHLAWULELA INDLU,
NGEMALI ABABEVELE
BEYITHOLA.**

busuku, kangiphathekanga kuhle ngale imuli. Ngangifisa ukubasiza, kodwa ngangingazi ukuthi ngandlela bani. Ngahlala phansi lephepha ababelilobile ngaqala ukuyidinga indlela. Ngathi ngisebenza le calculator yami yezimali, ngama ukucabanga ngendlela yomshuwalense wemali ngaqala ukudinga indlela yokukhulula imali ethile kuleyo abayichitha ngenyanga. Ngokutshintsha

izinto ezinlutshwane nje ngidlalisa *icalculator*, ngamangala ukuthi imuli le yayingenelisa ukuphuma ezikweledeni kuminyaka engaphansi kweyisikhombisa, ngibala lokuhlawulela indlu, ngemali ababevele beyithola.

Khathesi, ngasengileminyaka engu 8 ngisebenza kwezomnotho, futhi ngangingakaze ngizwe umuntu othi lokhu yinto eyayingenzeka. Ngaphinda njalo ngizama ukulungisa udaba lwemuli le ngilokhu ngithola impendulo eyodwa: babesenelisa ukuqeda isikwelede ngemva kweminyaka engu 6.2 kuphela. Ngazovula ikhabothi eyayihlala amabhuku ami ngaqala ukukhangela amaphepha awabanye abathengi. Ngenza okufanayo ngathola impendulo efanayo: ngeminyaka engaphansi kwengu 7 babesenelisa ukuqeda isikwelede. Eqinisweni, kwangimangaza lokhu.

Ngacabanga ukuthi umthengi wami wayezajabula ukubona lokhu, ngakho ngacabanga ukumbhalela lokhu phansi ngimtshengise engangikutholile ngize ngihlangane laye mayelana lesidingo somshuwalense wempilo. Ngangiyizwela imuli le. Ngangisazi ukuthi uhlupho lwezomnotho luthinta njani indawo zonke ezempilo ngakho ngangifisa ukubatshengisa ukuthi kwakusaselethemba. Ngakho ngatshengisa umthengi wami iphetshana engangililungisile, ngathi ngilokhu ngibizela amanani bona bahlala nje laphayana bemangele. Ngathi sengibatshengise indlela yokuqeda izikwelede zabo masinyane, ubaba walapha ekhaya weqa egcwele inyembezi waqala ukungibonga. Ngempela, kwakunjengalokho okuphuma kumabonakude nxa imuli inqoba *ilotto* noma ukuthola umklomelo omkhulu kumsakazo wemidlalo. Kwakunzima ukuba bakholwe lokho engangibatshele khona. Kwabathinta, lami futhi.

Ngathi sengicabanga ngaleya ntambama, ngabona ukuthi ngokutshintsha nje ingcebo yomthengi kunye lenombolo ezithile

ngangisenelisa ukuveza indlela yokuhlawula izikwelede zonke ngeminyaka engaphansi kwengu 7. Ngabona isisindo salokhu kunye lethemba elalivuselelwa kubathengi bami. Ngabuyela emuva ngikhangela amabhuku awabathengi bami abanengi ngizama ukubona ukuthi yibaphi ababengangena kuqembu lalabo “ababezazqeda ukuhlawula izikwelede ngeminyaka engaphansi kwengu 7” futhi ngamangala ukuthi i-85% yabo yayingena lapha. Kodwa ngubani owayebatshele lokhu abantu? Ngemva kobusuku lobo ngilomthengi wami njalo ngemva kokukhangelisisa amabhuku amadala awabanye abathengi bami, ngananzelela ukuthi ngasengingaqala ibhizimusi lokutshengisa abantu indlela yokuphuma ezikweledeni ngohlelo engasengilutholile.

Khathesi, lami ngangilokhu ngiphakathi kwesikwelede, kodwa ngangibazwela abantu ababehlutshwa ngezomnotho, ngakho ukuqala umsebenzi wokusiza abantu lo kwawukhanya kukuhle kimi kulokuthengisa umshuwalense kuphela. Ngaqala ukutshengisa abathengi bami bonke lokhu engangikulobile ngakudweba ngomtshina ephepheni, bonke, kungekho osalayo, babemangala.

Ukuze ngiqale ibhizimusi le, kulenkinga ezinlutshwane okwakusamele ngizilungise. Eyakuqala yikuthi kwakuthatha isikhathi eside kakhulu ukwenza ama calculations ngesandla besengiwafaka emtshineni ngesandla ukuze ngenelise ukubhala ngendlela etshengiseka umuntu. Okwesibili, imali ngangizayenza njani ngalokhu? Ngemva kwesikhathi esithile, ngabambana lomunye owayelungisa ama software awama *computer* wangilungisela engangingayisebenzisa ukulungisa uhlelo masinyane. Mayelana lenkinga yami yesibili, ngangisazi ukuthi kwakunzima ukuhlawulisa abantu ukuba baphume ezikweledeni bona bevele bengela mali. Ngaqala ukuthandaza mayelana lalokhu.

Ngelinye ilanga ngehlelwa ngumqondo omkhulu. Ngakuzwa ukuthi uNkulunkulu wayenginika indlela yokuphatha inhlanganiso yami, ukusiza abantu ngingabahlawulisi, kodwa lami ngithola imali. Kwelami icebo, ngangiyadinga lokho engangikubiza ngisithi yimali elahlekileyo, imali eyayingeyomthengi kodwa umthengi engayiboni. Isibonelo, ngangizaqathanisa umshuwalense we auto, owendlu, owempilo, lowempilakahle, ngidinga imali eyayingasala eceleni. Ngangizaqathanisa izimali zokuhlawulela indlu ngibone ukuthi ukutshala imali kakutsha kwakungasebenza yini. Ngangizakhangela izinto ezinengi ezinjengalezo, noma kwakungayisimi engangikhangela zonke lezi ndawo zebhizimusi engasengizikhangela. Ngangithi nxa ngisendlini yomthengi wami, ngangibatshengisa imali ababengayitshiya eceleni uma behlawulela lezi zinto besengibathuma ukuthi badinge bodwa inhlanganiso eyayingabasiza ngendlela engangibabonisa ngayo noma umuntu owayesebenzela inhlanganiso engangiyabe ngiyitholile eyayizabahlawulisa imali encane. Masinyane, ngananzelela ukuthi umthengi lo wayesengahlawula imali yokulayelwa kulezo nhlanganiso.

Ngendlela ethile, ngangiyabe sengisebenzile ngokutshela umthengi wami ngenhlanganiso yabo kunye lalokho ababekuthengisa. Bona kwasokusele kuphela ukuthi bababhalise. Ngakho ngaqala ukuthintana labathengisi, abameli, lengcitshi engazethula kubathengi bami ngibatshela ngalokho engangikwenza njalo ngibabuza ukuthi babebona kufanele na ukuba bangibhadalele ukulayela abathengi bami kubo. Bonke bathi “Yebo.” Ngakho ngahle ngaqala ukwenza lokho. Ngatshiya inhlanganiso yami endala ngaqala eyami eyokusiza abantu ukuba baqede izikwelede. Ibhizimusi yasukuma, isiphakathi, yaletha imali eyayisanela ukuthi mina loDrenda siqede izikwelede zethu ngemva kweminyaka

emibili lengxenyane! Sajabula kakhulu! (Nxa ufuna ukulungiselwa uhlelo lwamahala olohlobo lolu, tshaya ucingo ku 1-800-815-0818. Lokhe sisakwenza lanamuhla, ngemva kweminyaka engu 28!)

Lonke usuku lwalusiba lutsha lapho uNkulunkulu eqhubeka esibonisa okunye okunengi mayelana lendlela uMbuso Wakhe owawusebenza ngayo. Ngathi ngivakatsha lomunye umthengi, uNkulunkulu wakhuluma lami ngokuqhatsha abantu lokwakha ibhizimusi lami ukuthi libe libhizimusi langempela. Ngathi sengiqale ukuqhatsha abantu ukuzosebenza lathi, ibhizimusi lethu laqala ukuphumelela okwamazinga aphezulu. Ngikutshelile kusingeniso indlela esaqala ngayo ukuhlawulela izimota zethu ngemali eyaneleyo kanye lendlela esayakha ngayo indlu esasikade siyiphupha. Kumihlangano yebhizimusi eyanyanga zonke ngilezisebenzi zami, ngangisabelana lazo mayelana loMbuso kaNkulunkulu, njalo abantu bahugeka besiza kunhlanganiso yami ukuze bazokuzwa okunengi mayelana loMbuso langendlela ababengawusebenzisa kwezabo impilo noma nje futhi babelande ithuba lebhizimusi.

Izifundo engangizitshengiswa nguNkulunkulu zazimangalisa futhi, ngeqiniso, ezinengi zalezi zifundo ngangizifunda lapho ngiphuma ukuyazingela mnyaka ngomnyaka. Izindaba engangizibona ngizingela, zonke, zazimangaza, ngingatsho ngamafitshane. Ngangingeke ngazikholwa ngabe ngangingazibonanga ngawami amehlo. Yonke indaba yayingifundisa okutsha mayelana loMbuso engangingazange ngikubone ngaphambilini. Ngakho ngicabange ukuthi ngabelane lawe okulutshwane kwalezondaba kulolu ugwalo, kodwa uma ufuna ukubala ngezindaba zami zokuzingela, kumele uthathe ugwalo lwami oluthiwa, *Faith Hunt*, ku-*website* yami.

Indaba le yayenzakala ngemva kweminyaka embalwa sengifumane ukuzingela impunzi ngisebenzisa ulwazi olutsha loMbuso.

Njengoba sengike ngabelana lawe, uNkulunkulu wangifundisa indlela yokuhlanyelesa impunzi yami enduna besengiyamukela emthandazweni—njalo kungela kukhekheleza, ngangiyibamba impunzi yami ngemva kwemizuzu engu 30 kusiya kwengu 45 mnyaka ngomnyaka. Lokho sokwenzakele kwazw kwaba namuhla okweminyaka engu 28, ngingatsho. Kungasenani, kulo umnyaka lakho ngaphuma njengenjwayelo, ngilethemba lokuthi impunzi yayizavela. Ngeqiniso, ngemva kwemizuzu emilutshane, ngabona impunzi ihamba nje ingifulathele isiyangena emzini kamakhelwane wami owawukhatshana nge 200 *yards*. Ngangisazi ukuthi impunzi le ingavele ingene egangeni akusela kuyibamba, kodwa mina ngisazi ukuthi kwakuyimpunzi yami. Lapha kwakusazinsuku ngingakabikwazi lutho mayelana lokuzingela ngamadandili, ukusebenzisa imisindo yokubiza, kumbe ukuhanqa impunzi. Ngangisazi ukuthi impunzi le yayiyisivuno sami, kodwa ngayibukela kungekho engangingakwenza isiyangena exukwini likamakhelwane wami. Kodwa khonapho nje ngezwa ngaphakathi komoya wami, “Itshele impunzi ize kuwe.” “Ini? Ngitshele impunzi ize kimi; kutshoni lokhu?” Ngangingela qiniso, ngakho ngamemeza, kodwa hatshi ngelizwi elalingezwakala kuyo impunzi, “Mpunzi, ngyakukhuza ngithi mana, utshibilike, uze uzokuma ngaphansi kwesihlahla lesi.” Ngangizingela ngedandili ngakho ngangezelela ukuthi ize izokuma esihlahleni sami ngoba ngangifuna impunzi ibe seduzane kakhulu. Ngazitshela ukuthi nxa ukholo lwaluzaphendukisa impunzi le kimi, kwakuzamele ize ngaphansi kwesihlahla sami lapho engangizayitshaya khona kuhle.

Ngesimanga, ngathi ngisitsho lawo mazwi, impunzi yahle yama, yatshibilika, yaqala ukuhamba ilanda isihlahla sami. Ngethuka lapho impunzi iquma zonke i-200 *yards* isiza ngaphansi kwesihlahla sami,

yebo, yama khona ngaphansi kwesimiso sesihlahla sami, esasiphezu kwayo nge 12 *feet* kuphela. Ngangingagqokanga impahla zokuzifihla, kungela mkhondo, kungela msindo yokubiza engangiyenzile, kwakuyimi loNkulunkulu, khepha impunzi le yayifike yama ngaphansi kwami kanye. Noma ngubani wayengeke ayikhuthe lapha. Ngayithwala ngaya layo ekhaya ngenjabulo enkulu, kodwa kwakunzima ukususa engqondweni loku engangikubone kusenzakala. Impunzi leyana yaphenduka yeza kimi ngenxa yokuthi engangiyibizile? Kwakukhanya kunjalo.

Ipulazi esasiliqhatshile e-Ohio lalihleli phezu kwe 89 *acres* njalo lileganga, lezihotsha ezazilezihlahlana, kanye lamasimu. Ngesikhathi sobusika, ikakhulu nxa kwakulongqwaqwane phansi, sasithanda ukuyazingela imvundla. E-Ohio izikhwehle ezilentamo emhlophe zazitholakala kanye kanye lemvundla, kodwa zazingatholakali kwelethu ipulazi.

Ngalolusuku, saphuma sisiyazingela imvundla phakathi komphetho wesifudlana kwathutsha isikhwehle esiliqhude. Ngaphangisa ngakhombela kuso ngadubula. Ngabakwazi ngesikhathi ngidubula ukuthi ngangikhuthile ngatshaya uphiko kuphela. Sona sawa isikhwehle; kodwa, sathi sithinta phansi, saphanga sasukuma sathela ngesiqubu. Isikhwehle siyenelisa ukugijima ngesiqubu samamayela angu 35 ngehola, njalo lesi sasitshengisa isiqubu lesi sonke. Phansi kwakulongqwaqwane omutsha, njalo inyoni yayibaleka phakathi kwedlelo elikhamisileyo elalisemqansweni, ngakho kwakulula ukubona lonke inyathelo lenyoni le lapho izama ukubaleka.

Ngama lapho okwesikhatshana ngicabanga ukuthi inyoni izabaleka, kodwa kwafika okuthile emoyeni wami. Ngangilolwazi lwalokho okwakwenzakele ngize ngikhuze impunzi ukuba ime

ize kimi. Ngakho ngezwa kusithi ngikuzame lalapha, ngakho ngamemeza, “Sikhwehle, ngegama likaJesu, MANA!” Khonapho, kangizange ngisabona inyoni isiya phambili kumbe emuva. Ngangibona kuhle yonke indawo kuleli idlelo, isikhwehle lesi sasesimile futhi sasime ngesikhathi ngize ngimemeze. Ngangilen-dodana yami uTim yona yathi, “Baba, isikhwehle lesi sime lapho lize limemeze.” Kodwa sasingaphi? Mina loTim salandela umzila sisiyaphakathi edlelweni, safica inyoni ihleli phezu kongqwaqwane. Ikhanda layo laseliphosa ukutshona phakathi kongqwaqwane, kodwa umzimba wawuhleli nje, phezu kongqwaqwane. Kwakungemva kotshani nje obuncane, yingakho sasingasayiboni sisase khatshana. Yayifile? Ngayiphakamisa inyoni le. Eyahle yaqala ukungiphaphatha ngamaphiko. Yayiphila! Sesiyihlolisisa siyihlinza, ngabona ukuthi ngangithinte kancane nje uphiko lwayo. Mina loTim sakhangelana ngokumangala. Akakho owayengakukholwa esasikubonile, akakho.

Njengoba ngitshilo ngaphambilini, i-Ohio yayivumela impunzi ezimbili kuphela ezinsikazi noma ezinduna, kodwa ngomnyaka kwakuvunyelwa impunzi enduna eyodwa. E-Ohio kwakulomzamo wokwehlisa inani lempunzi elalikhona ngokubulala impunzi ezinsikazi ezinengi. Ngakho ngangifaka inhlanyelo yempunzi ensikazi lenduna, njalo sikhathi sonke, impunzi enduna yayisiza ngemva kwemizuzu engu 30 kumbe engu 40; besekuthi ngingaphuma okwesibili ngiyebamba ensikazi. Kwelinye ilanga kwangehlela, “Mana kancane; impunzi lezi zazisiza zilandelana ngendlela engangibhale ngayo lapho ngifaka inhlanyelo yami.” Lokho kwakungaba liqiniso na? Yikuyini okwakuzayenzakala ngingabhala ngenye indlela? Ngangiyandisa ukuhlanyelesa impunzi enduna lensikazi, njalo zazisiza zilandelana ngale indlela. Khathesi ke ngahlanyelesa impunzi ensikazi kulandela enduna; zabuya impunzi,

kodwa khathesi, kwaqala ensikazi kwalandela enduna. Ngayala ngitshintshanisa ngale indlela okweminyaka emilutshwane, ngihlola ukuthi yikho yini, njalo kwakusebenza sonke isikhathi. Ngilokhu ngibona izinto lezi zisenzakala, ngangimangazwa nguMbuso lokuthi ngangisazi okulutshwane ngawo. Iqiniso kwakuyikuthi, iNkosi yayingitshengisa ukuthi ngangilamandla amanengi phezu kwempilo yami kulalokho engangikucabanga.

Omunye umcijo omqoka, yisigaba sempunzi sika 2015. Ngabeka inhlanyelo eyempunzi elempondo ezine kumbe ezedlula lapho, ensikazi elomnyaka owodwa, lenduna elenyanga eziyisithupha, ukuze sidle. Ngokunjalo, kwabuya elempondo eziyisithupha esihlahleni sami; kwathi kokulandelayo, ngathatha ensikazi eyayilomnyaka owodwa, eyayiyiyo yodwa eyayize esihlahleni sami. Ngiyazi ukuthi kuyalandela enduna elenyanga eziyisithupha. Ngiyazi kuzwakala njengomsangano; ngikutshela nje engikubona kusenzakala.

Kodwa kukanye lapho engayazingela khona impunzi engaciselwa khona ngaze ngesaba. Ngangifake inhlanyelo yami yempunzi enduna elempondo ezine noma ezedlula lapho kanye lenduna elenyanga eziyisithupha (impunzi elenyanga eziyisithupha ibalwa njengempunzi ensikazi njengoba impondo zayo ziyabe zisasengaphansi koboya zifana lezikopela ezincinyane). Ngaphuma njengenjwayelo ngabamba enduna elempondo eziyisitshiyagalombili ngemva kwemizuzu engu 15 ngesikhathi sedandili. Ngathi sengiphuma futhi esikhathini esalandelayo, ngangileqiniso lokuthi impunzi elenyanga eziyisithupha yayizakube ikhona.

Ngemva kwamaviki amabili ngaphinda ngaphuma futhi, ngathi ngihlala kusimiso sami phezu kwesihlahla, ngabona elempondo eziyisitshiyagalombili isiza ingilanda iquma phakathi kwedlelo ikhatshana nje okwe 300 *yards*. Yona yayilanda isihlahla sami.

Kayizange iphambuke endleleni yaqhubeka isiza iquma insimu yazokuma ngaphansi kwesihlahla sami okwemizuzwana engu 20. Yasitshibilika ibuyela ensimini ngendlela eyayibuye ngayo ukuzofika kimi. Khumbula, kwakuvunyelwa impunzi enduna eyodwa kuphela e-Ohio, njalo mina ngasengithethe kudala leya elempondo eziyisitshiyagalombili, ngakho ngazihlalela ngayibukela enduna le kangizange ngidubule. Khathesi ke ngasengididekile. Kwakuqala ukuthi ngiphume ngisiyazingela ngilandwe yimpunzi okungayisiyo kanye engangiyihlanyelegele inhlanyelo. Indlela impunzi le eyaziphatha ngayo, ukuquma insimu ingilanda mina ibisisima ngaphansi kwesihlahla sami, ibisibuyela futhi ngendlela efanayo yayingazwisiseki. Kwakungani yayithunyiwe. Ngama ikuseni yonke kodwa impunzi yenyanga eziyisithupha kayizange ibuye.

Ngalobo busuku ehofisini yami ngangihlupheka ngaphakathi. Kukhona okwakungamanga kuhle; impunzi yenyanga eziyisithupha kwakumele nga yayivelile. Kungani kwafika elempondo eziyisitshiyagalombili? Ngathi ngihleli lapho, ngaqala ukuthandaza emoyeni, ngicela uNkulunkulu ukuthi angitshengise okwakwenzakele. Ngezwa ilizwi lisithi kimi, “Khangela inhlanyelo yakho.” Ngikhangele inhlanyelo yami? Ngangisazi engangikuhlanyelile. Ibhanga engangikuyo yayingenzele amaphetshana awe *check* engangilibhalile, ngakho ngalidonsa ngakhangele i-*check* engangilibhale lapho ngihlanyelegele impunzi yami. Ngacabanga ukuthi ngangihlanyelegele impunzi ezimbili ezinduna, eyodwa elempondo ezine noma ezedlula lapho kanye lelenyanga eziyisithupha eyodwa, ebalwa njengensikazi, njengoba ngike ngatsho ngaphambilini. Kodwa nanku engangikulobe ku *check*, “ezimbili impunzi ezinduna ezilempondo ezine noma ezedlula lapho, impunzi enduna elenyanga eziyisithupha.” Mina ngangijonge ukuthi impunzi ezimbili

ezinduna, eyodwa ibe lempondo ezine noma ezedlula lapho, eyinye kube ngelenyanga eziyisithupha, kodwa kayisikho engangikulobile. Lapha kwakusithi, ezimbili impunzi ezinduna ezilempondo ezine noma ezedlula lapho, impunzi enduna elenyanga eziyisithupha.” Zimpunzi ezingaki lezo? Ngezintathu, njalo eyesibili kwakungelempondo ezine noma ezedlula lapho njengeyakuqala. Ngathi ngikubona lokho, ngema lapho ngimangele. Leya elempondo eziyisitshiyagalombili yayithunyiwe. Kwakumele ibekhona ngenxa yomthetho woMbuso. Ngeqela phezulu ngaqala ukumemeza ngigijima ngibhoda indlu yonke. HABE!!!!

Ngasikhathi sinye, engakubonayo kwangethusa. Nxa lokhu engangisanda kukubona kwakuyiyo ngqo indlela uMbuso osebenza ngayo, kutsho ukuthi kwakumele ngiqaphelise. Ngangenze ngingananzeleli lokho engangingafuni kwenzakale ukuba kwenzakale, ngoba ngangikukhululile ngomthetho wezomoya. Ngasenginanzelela ukuthi abantu abanengi, lami ngokunjalo, bayehlalwa yizinto abangafuni ukuba zenzakale, kodwa bona yibo, abayabe beyenze ukuba zenzakale. Khumbula, ngamazwi Akhe, uJesu wabulala isihlahla somkhiwa kodwa ngelinye ilanga wabiza uLazaro ethuneni. Izikhathi lezi zombili kwasebenza umlayo owodwa ukufeza injongo ezimbili. Ngesikhathi esalandelayo ngisizazingela, impunzi elenyanga eziyisithupha yavela njengendlela engangihlanye ngayo.

Isenzakalo sonke lesi sangifica ngingalindelanga njalo saba lokufinyelela okujulileyo kumbono wami ngoMbuso. Ngasengisazi khathezi, kungela kuthandabuza, ukuthi uMbuso ngempela uqonde kakhulu. Kodwa kumele kusimangaze lokhu na? Noma umlayo wemhlabeni uqonde ngalolo hlobo. Ngethemba ngangingazake nje nginanzelele ukuthi imilayo yezomoya isebenza njengeyalokho

okubambekayo okulethwa yimilayo yezomoya. Kumele ngabe ngangikunanzelele kodwa kangizange. Kodwa khathesi sengisazi ukuthi uMbuso uqondile, uqonde nta.

Kuhle, ungibuzile, ngakho ngizakutshela ngeyinye indaba yami yokuzingela eyodwa nje. (Ngiyazithanda izifundo lezi engan-gizifunda ngizingela, ngakho kuzamele ungibekezelele.) Ngathi sengibona indlela uMbuso oqonde ngayo, ngacabanga ukuhlolisisa ngeyinye indlela eqonde ngqo. Lowo mnyaka, ngabeka inhlanyelo yempunzi elempondo eziyisikhombisa. Ngokujwayelekileyo, impunzi iba lenani lempondo elifanayo nxa zonke. Elempondo ezine iyabe ilezimbili ngapha langapha; elempondo eziyisitshi-yagalombili iyabe ilezine ngapha langapha, njalonjalo (kusiya). Kodwa esikhathini esinengi, impunzi enduna kayibi lempondo ezihambelanayo ngale indlela ngenxa yezizatho ezinengi, iba lenani elehlukeneyo ngapha langapha. Kodwa njengoba ngike ngatsho, okujwayelekileyo, yikuthi ibe lenani elifanayo nxa zonke.

Ngangifuna ukukhulula ukholo lwami phezu kokuqondileyo okungajwayelekanga, lapho ngisahlolisisa. Ngasengifunde ukuthi ungaqamba okuthile okuqondileyo, kuyamele ulinde isikhatshana esithe, njalo uMoya oNgcwele laye uzakunikeza imilayo eqondileyo eyokuba lokho kufezeke. Ngakho kwathi sokuqala isikhathi sedandili, kangizange ngiphume; ngangisazi ukuthi kwakungela lutho. Ngempela, ngalinda uMfumfu waze waphela, ngisizwa ngaphakathi emoyeni wami kusithi, “Hatshi, akukabi lolutho.” Kwakucaphula; umbala womkhathi ngekwindla, legusu, ngangifuna ukuphuma. Kodwa ngalinda.

Kwasokusenzakala. Ngobunye ubusuku obubodwa ngihleli ekamelweni lokuphumula ngikhuluma labazali bomkami, ababeze ukuzosibona bevela eGeorgia, ngakuzwa. Kusasa kusisa kwakuyilo

ilanga. Elempendo eziyisikhombisa yayizakube ikhona! Ngatshela imuli yonke ukuthi ngangizathola impunzi yami kusisa. Ngavuka ngentokozo ngaphuma kungakabi mnyama. Ngangizingela ngedandili ngime kusimiso esasiphezu kwesihlahla ngibona ixhaphozi elaligombolozele iganga elalingama *acre* alitshumi. Kwakuyindawo enhle eyokuma. Kwakusiza amadada ephapha nje ngizihlalele lapho; ama *muskrats*, kanye lama minks ayebonakala nje ezula zula emiphethweni yamakhaphozi. Okuyizihlahlana nje kwakugombolozele ixhaphozi, njalo impunzi zazithanda ukulala kuzo kowami umuzi. Ngathi ngilokhu ngilindile ngime kusimiso sami, akukho okwayenzakalayo. Ngalinda okwemizuzu engu 45, kwaze kwathi ihola, lutho nje.

**NGASENGISAZI
KHATHESI, KUNGELA
KUTHANDABUZA, UKUTHI
UMBUSO NGEMPELA
UQONDE KAKHULU.**

Ngezwa izivalo zemota zivuleka zabuye zavaleka phezulu endlini yami, ngahle ngabakwazi ukuthi ngabazali bakaDrenda abase-bebuyela eGeorgia. Ngangithembise ukudla labo isidlo sekuseni bengakahambi, lokuthi yimi engangizapheka. Uhlelo lwami lwakuqala kwakuyikubamba impunzi yami masinyane besengibuyeka endlini ngiyekudla labo isidlo sekuseni. Kodwa njengoba ngangilokhu ngingakayibambi impunzi, ngayehla esihlahleni ngithikaza ngabuyela endlini. Ngolwazi engangilalo ngomuzi wami impunzi kwakumele ivele duzane lexhaphozi ngezikhathi zekuseni, njengoba kuyilapho ezazithanda ukulala khona, njengoba ngike ngatsho. O akusenani, noma ngangisazi ukuthi impunzi yayizafika lapho maduzane nje, ngangingeke ngibe ngilokhu ngilindile. Ngangizaphenduka kwelinye ilanga ekuseni.

Ngabingelela wonke umuntu endlini ngaqala ukupheka isidlo sekuseni. Yimi engihlala ngipheka isidlo sekuseni ngekhaya njalo lokhu sengikwenze okwesikhathi eside kakhulu. Ngilendlela yami eligugu eyokupheka amawaffles, noma ngisitsho ngizika-kezela. Amaqanda, isausage, lecheese kuphuma phambili, kodwa okukodwa okwenza isidlo sami sekuseni sibe mnandi kakhulu yi maple syrup eqotho. I-Ohio lilizwe le *maple syrup*, njalo abantu bonke lapho esihlala khona bayayilungisa bayithengise imaple syrup. Kangivumeli imaple syrup engayisiyo endlini yami, ngifuna eqotho. Ngakho ngangilapho ngipheka isidlo sekuseni, ifasitela lendlu yethu yokuphekela likhangелane leganga kanye lexhaphozi. Khonapho, ngabona impunzi enduna ithutsha isuka exhaphozini. Ngamemeza, “Nansiyana impunzi yami!” Ngatshela ababesendlini ukuthi baqedise ukupheka ngoba ngasengisiya yilanda!

Ngiyikhangele ngasengisazi lapho eyayiqonde khona; njalo ukuze iyefika lapho, yayizadlula ngaphansi kwesimiso sami. Ngakho ngacabanga ukuthi ngingabhoda ngangemuva ngiyefika kuso isimiso yona ingakafiki, ngangizayitshaya. Ukuphuma ngiyegada isihlahla impunzi ingakafiki kwakuyakuba nzima, kwakuyamele ngiphume KHATHESI! Ngaphuma ngigijima emnyango, ngidobha idandili lami. Ngabhoda insimu, nganyenya, ngaqansa ngama kuso isimiso. Kwasokukahle, impunzi kodwa ngangingakayiboni.

Ngasukuma ngabuye ngahlala phansi lapho sengibona impunzi ithutsha iquma ixhaphozi isiza lapho engangihlezi khona. Yona kayizange idinge okunengi ngenxa yempunzi ensikazi eyayiyilandela ngakho kayingibonanga noma ukungizwa ngomnuko. Ensikazi yona yadlula ngaphansi kwesimiso sami isiyangena exhaphozini, njalo le enduna yayilandela ngendlela efanayo. Kwakungeke kulunge ukwedlula lapha. Khathesi ke ienduna le yayisikhatshana

nge 25 *yards* kuphela, ngayikhombela ngedandili lami ngayekela umcibisholo. Ngananzelela sengekele umcibisholo wahamba ukuthi ngangitshaye eceleni. Okukhona yikuthi; ngasengiphosa ukuphela umoya ngenxa yokugijima engangikwenzile ngibhoda ngemva kwensimu ngizama ukuqalela impunzi.

Ngadumazeka ukubona umcibisholo wami usiyatshaya phansi kakhulu, ngabakwazi ukuthi ngangikhuthe indawo ezibalulekileyo. Yathi isitshayiwe, yeqela phakathi kwexuku lezihlahlana elalise-duzane lexhaphozi yahamba yanyamalala. Engakubonayo kwezinye zonke izikhathi ngizingela yikuthi ngedandili, kwesinye isikhathi impunzi kayazi okwenzakalyo nxa itshayiwe. Esikhathini esinengi, yona iyazihambela nxa ingakubonanga kumbe ingakunukanga. Ngangisazi futhi ukuthi kanengi impunzi elimeleyo iyalala phansi phakathi kwezihlahlana ingabe isaya khatshana. Njengoba impunzi le yayingangibonanga, yikho kanye eyayikwenza. Nganyenya ngisehla esihlahleni ngiqonde endlini ngendlela engangibuye ngayo, yayinde kodwa ngangisenzela ukungayethusi.

Ngathi ngifika endlini bonke baqala ukungibuza ukuthi kwakwenzakeleni lokuthi ngangiyibambile na impunzi. Ngabatshela konke okwakwenzakele ngacela amadodana ami ukuba ayengincedisela ukwethusa impunzi iphume phakathi kwezihlahlana, ngilethemba lokuthi ngaleyindlela ngangizayitshaya kühle. Sagombolozela okulixukwana lokhu sangena phakathi kwakho ngonanzelelo. Masinyane, ngabona ukuthi omunye wamadodana ami wayeyenelise ukuyethusa impunzi yasukuma, yayiqhula isedlula izihlahlana ezinde. Yayiphambi kwami ngama *yard* angu 70, ihamba isuka kuleli icele isiya kuleliya.

Khonapho, impunzi yasibona omunye wamadodana ami esekucineni kwensimu. Yananzelela ukuthi akusuye lo umuntu

owayeyivusile njalo yayisiswele ukuthi igijime iqonde ngaphi okwakuphephile, yama ilokhu ithalaza idinga. Ngabakwazi ukuthi leli yilo ithuba okwakumele ngilithathe. Mina yayingakangiboni. Yayisime buqamama lami nge 70 *yards* ikhangele indodana yami. Idandili lilamandla amakhulu awokubulala impunzi ekulelobanga, kodwa umtshoko usungawela phansi ngama-*inches* kumbe ama-*feet* kuleyo 70 *yards*. Ngangingakaze ngidubule idandali kulowo mango, njalo le kwakungasiyo enye yama-*crossbow* amatsha angama phawundi angu 185 ayanelisa ukudubula ibanga eledlula i-400 *feet* ngomzuzwana. Ukuqonda kwayo kwakusehliswa ngama-*yards* angaba ngu-35 kusiya ku-40.

Njengoba impunzi le yayilokhe ikhona njalo imile mpo, ngakhetha ukuba ngidubule. Ngaphakamisa idandali, ngaqondisa kuyo impunzi enduna njalo, ngesimanga, ngabona umtshoko usiyangena entanyeni yempunzi. Wafika wangena phakathi laphakathi kwentamo yempunzi (uxolo ngolwazi lonke lolu) umtshoko wawulenga nxazonke impunzi iqolotsha. Impunzi yaqolotsha ingena esigcawini angibonanga ukuthi yaqonda ngaphi. Ngaqala ukuhamba kancane ngisiya esigcawini lapho impunzi eyayinyamalelele khona. Nansiya lapha! Umtshoko wawusuwenzile umsebenzi wawo, ngasengiyitholile impunzi yami.

Kwathi lapho indodana yami u-Tim efika kimi, ngangiphatheke kakhulu ngempondo zayo kulakho konke okunye. Ngangingazange ngibe lethuba elaneleyo lokuyibala, kodwa sathi sesiyibala kwakuy-imiklomelo eyisikhombisa. Sengiyihlolisisa eduzane impunzi leyi, sananzelela ukuthi yona yayisanela ukuba yi miklomelo eyisitshi-yagalombili, kodwa olunye uphondo lwaluhluzukile, lusenza ukuba ibelemiklomelo eyisikhombisa. Mina loTim samane sama laphaya sadumisa iNkosi. UMBuso uyamangalisa kakhulu! Mina loTim

sisemi lapho, sananzelela njalo, “Ngubani owayengasikholwa? Kambe ukhona owaziyo ukuba uMbuso usebenza ngaleyindlela?”

Ngethemba uyawuthola umcijo lowu. UMbuso usebenza ngemithetho ethile ebekiweyo njalo okwaziwayo ukuthi izasebenza ngendlela efanayo sonke isikhathi. Ngangijabula kakhulu ekuqaleni lapho nginanzelela ukuthi imithetho leyi isebenza noma nini, ngitsho lakwezemali. Ngangingayifunda imithetho leyi. Ngingaba yingcitshi yezikamoya, ngangizakubakwazi ukuthi uMbuso usebenza njani. UNkulunkulu nguye usizo lwami.

ISAHLUKO 2

INKUNGU ELUHLAZA OKWESIBHAKABHAKA

Ngesikhathi mina loDrenda siqala ukubona uMbuso wezulu usebenza empilweni zethu, saba ngabantu abangela sikwelede, njalo sasifuna ukutshela wonke umuntu esasihlangana laye ngesasikufundile. Sasitshela wonke umuntu owayengalalela siqala ibandla lethu njalo ngigijimisa ibhizimusi lami. Kodwa ngangisizwa emoyeni wami ukuthi kwakukhona okunye; ngangingakwazi ukuthi kungaba yini, kodwa ngangikwazi ukuthi kwakukhona okunye uNkulunkulu ayengiholela ukuthi ngikwenze ngokwabela ilizwi loMbuso wakhe labantu.

Ngo 2005 ngaba lentshisekelo emoyeni wami ukuthi ngiyenze engingakubiza ngithi ngumhlango wenguquko yezimali, ngangizakuba lemihlango emihlanu lapha engangibona ukuthi ngingabeka obala ezinye izimiso zoMbuso ezemali ezasezantshintsha impilo yami. Ukukhulela ebandleni leMethodist, sasiyayele ukuba lemvuselelo ezazithatha iviki yonke. Kwakungumfanekiso engangiwebona emoyeni wami, inhlelo eziyisihlanu lapho engangizahola khona abantu kumicabango lakuzimiso engazifundiswa

nguNkulunkulu ngezimali. Kuze kufike lesi sikhathi, ngangingakaze ngifake izimiso ngendlela ehleliweyo. Kodwa emoyeni ngangizibona ngiqhuba imihlangano emihlanu ngendaba zemali.

Ngisakhuleka ngakho ngahlangana lomngane wami uLarry, engasengacina kudala ukumbona. Wangitshela ngomhlangano owawusiza e-Albania owawuzabe uqhutshwa nguye, wangimema ukuba ngikhulume kuwo. ULarry wayesendimeni e-Albania okweminyaka engu 12 njalo wayesenza utshintsho olukhulu elizweni lelo. Ukucabanga uhambo olwalukhatshana kwakukutsha kimi. Ngangingavakatshi kakhulu njalo ngangingakaze ngiye e-Albania njalo ngangingela siqiniseko sokuthi i-Albania yayin-gaphi. ULarry wangikhuthaza, esithi wayelomhlangano labanye abafundisi bakulelo lizwe, njalo wayecabanga ukuthi imbono yami ngezimali zoMbuso izabaluncedo ebantwini. Larry wayethe ngizaba lenhlelo emhlanganweni ezimbili noma ezintathu zokwabelana labantu. Noma kwakungasiwo mathuba amahlanu awokukhuluma, ngangilokhu ngikhangelele ukufundisa ngodaba lolu kunhlelo ezimbalwa engangilazo. Yikho ngathi ngingathabela ukuza.

Ngisehla indizamtshina eAlbania, uLarry wangibingelela ngomutsho omangalisayo. “Garry,” watsho “omunye wabakhulumi uthe akasabuyi, ngakho usuzakuba lamathuba okukhuluma amahlanu.” Inhliziyo yami yeqa. Yikho lokhu! Ngangisazi ukuthi kwakuhlelwe nguNkulunkulu futhi ngangizabona ukuthi engangikubone emoyeni kwakuzaphuma njani. Ngangile mbhalo yami kodwa ngangingalungiselelanga inhlelo ezinhlanu. Ngakho amalanga engangifundisa ngawo, ngangibuyela ngiyekhuleka emoyeni, ngibhale imibhalo yenhlelo ezazilandela. Kuhlelo lunye ngalunye, ugcobo lwalumangalisa.

Ngingakayi khatshana, ngifuna ukulitshela ukuthi i-Albania

kwakulilizwe elimpofu kakhulu ngesikhathi ngisiya khona. Imali eyayiholwa linengi ngaleso sikhathi kwakuyi \$500 ngenyanga, isifumbathiso kwakuyindlela yokuphila kwabantu balapho. Ngisacabanga ngokufundisa abantu bakulindawo ngezezimali, ngangingakwazi ukuthi babezakwamukela njani. Ngangisazi ukuthi iLizwi lisebenzela loba ngubani, kodwa konke kwakukutsha kimi. Ngisafundisa uhlelo lwakuqala, ngangisizwa kulemiduli evalayo ekuqaleni. Ngohlelo lwesibili, ngangisizwa indlala yabantu ngokomoya ingidonsa, njalo ngangibona ukholo lukhula ebusweni babo besizwa indaba ezimnandi zoMbuso. Suku ngosuku ngifundisa abantu babethaba futhi bethabisisa, njalo ngangibona ukuba babejabulela uMbuso.

Ntambama kungakabi luhlelo lokucina engangizalufundisa, iNkosi yakhuluma kimi ukuthi ngangizathatha umnikelo owamabandla akuleyondawo. Ngangingela siqiniseko ngalokho ngoba, okwakuqala, kwakungaso mhlango wami; futhi okwesibili, ngangingela siqiniseko ukuthi abantu babezaphendula njani. ULarry kanye lami sasibhadale imali zokuhamba lezokuhlala kwabafundisi bakuleyondawo ukuba bafike kulowo mhlango. Ngakhuluma lo Larry mayelana ngakho, wangitshela ukuba ngiqhubeke ngithathe umnikelo.

Ngesikhathi sohlelo lokucina ngathatha umnikelo womhlango, ugcobo lwalulamandla ngangingenelisi lokuma. Wonke umuntu kuleyondlu wayegida futhi ememeza lapho behamba besletha imali phambili eyomnikelo. Abancedisi bephethe izikhwama abantu befaka imali labo babekhala besehluleka lokuma. Ngangingakaze ngibone into efana lale ngaphambilini, ikakhulu kunikelwa. Ngibukele abantu begida futhi bememeza ngokuthaba okukhulu besipha, ngangikhulelwa lugcobo langeqiniso lokukholwa kwalaba ababesipha inhlanganyelo enje eligugu.

Ngemva kwenkonzo, kwakusobala ukuthi uLarry wayezunguzwe yilokhu ayekubonile. Wayemangaliswe layizikhwama zemali ezimbili ezazigcwele sizithwalisana siziya endlini yakhe ngemva kwenkonzo yantambama. ULarry wangitshela ukuthi babevame ukuthi iskhwama esisodwa sasiyabe singangcwalanga ngemva komhlangano lapho ayethethe khona umnikelo ngaphambilini. Satshitsha sacatshisa izikhwama zemali siqonda endlini kaLarry encane sidlula ngomgwaqo owawugcwele.

Sifika endlini ka Larry, sahlala phansi endlini yokuphumula savula izikhwama zomnikelo ukuze sibale imali. ULarry ethulula okwaku-sezikhwameni phezulu kwetafula, kulento eyayenzakalayo eyokuthi kuze kufike ilanga lanamuhla inzima ukuyichaza ngamazwi. Kwathi ngokuphangisa, inkungu eluhlaza okwesibhakabhaka yagcwala indlu futhi ubukhona bukaNkulunkulu basikhulela ngamandla. Sahlala ngaphansi kogcobo olwalugcwele kulindawo. Kwakulugcobo olwalungafanani lengangiluzwe ngesikhathi ngitshumayela noma ngithandazela abantu. Kodwa ke, ugcobo lolu lwalulobukhona kulo. Lwalungcwele futhi lwangenza ngazizwa ngisebukhoneni bukaNkulunkulu, uqobo Lwakhe. Njengoba sasihleli lapho, lwayala luqina kuleyondlu. Esasingakwenza kwakuyiku hlala nje sikhale. Ngasengibona, phakathi kwenqwaba yemali eyayisithelwe phezu kwetafula, indandatho yomtshado yomuntu wesilisa. Ngafikelwa yikuthi umuntu owayengelamali wapha ngento eyayiligugu kuye. INkosi yakhulumisana lami ngalowo mzuzu yathi:

“Ngiyakubizela ezizweni ukubafundisa izimiso engakufundisa zona ngoMbuso lezimali. Indandatho le ifakwe emnikelweni namuhla ngokukholwa. Kodwa ngifuna uyithathe uyigcine njengesikhumbuzo sobusuku balamuhla. Njalo wazi ukuthi njengendandatho

yomtshado ikhuluma ngesivumelwano, ukhankasa ngesivumelwano sami sokunakekela ebantwini bami. Njalo wazi ukuba lapho engikuthuma khona, ngizakunikeza imali edingakalayo.”

Ngehluleka lokulala ubusuku bonke. Ngangihleli endlini kaLarry ngalobo busuku, ugcobo lwalusasele lapho. Indlela yonke sidlula i-Atlantic ngisiya ngekhaya ngangingenelisi ukulala. Engangikwenza kwakuyiku khangela phandle kwe fasitela ngikhala okwamahola ayisitshiyagalombili ngindiza. Ngehluleka ukulala okwamahola ayi 46 ngemva kokuba iNkosi ikhulume lami ngalobo busuku. Izinyanga ezadlula ngemva kwalobuyana busuku, ngangithi ngingacabanga, ngangisizwa ubukhona obufanayo ngiqale ukukhala.

Angizange ngitshale uLarry engangikutshelwe yiNkosi ngendandatho. Imali yomnikelo yayingeyamabandla ase Albania, njalo ngangisazi ukuthi indandatho yayiza thengiswa ukungezelela imali—kodwa ngangisazi engangikutshelwe yiNkosi ngayo. Ngakho ngajabula ngesikhathi ngitshayelwa ucingo nguLarry esithi iNkosi yakhulumisana laye yamtshele ukuthi angiphe indandatho. Ngayithatha indandatho leyo, futhi isewofisini yami manje. Kulezikhathi ezinengi engithi ngingayikhangela indandatho ngikhumbule amazwi eNkosi kimi ngalobuya busuku, njengoba ngakhangelana lokwakungaba zinkathazo zezimali ezinkulu okweminyaka kusukela lapho. Kungela kwehluleka, uNkulunkulu ubethembekile ukupha engangikudinga ukuhamba indlela Yakhe. Ubusuku lobuya e-Albania batshintsha impilo yami, kodwa kwakukunengi uNkulunkulu ayezangitshengisa khona kunsuku ezazilandela.

Ngifika ngekhaya ngivela e-Albania, ngezwa ngikhuthazwa

ukuthatha umbiko lowu owoMbuso ngiwufikise yonke indawo engangenelisa khona. Ngaba lomvutho olamandla owokudlulisa ulwazi lolu, futhi ngangikhathazekile ukufundisa inhlelo leziya ezinhlanu ezifanayo ukuze ngibone ukuthi into efanayo yayizayenzeka na. Angizange ngilinde isikhathi eside. Ngamenywa ngumfundisi owayese Utah ukuthi ngibuye ngizofundisa inhlelo leziya ezinhlanu ezifanayo. Wayezwe ngo Larry ukuthi zaziguqula impilo, futhi wayefuna ngibuye. Wayengumfundisi webandla elincane ele-India elalimpofu. Babedinga uncedo ngezezimali, futhi engangikutshelwe nguLarry nxa kwakuliqiniso, wayecabanga ukuthi ngingasiza.

Ngakho ngandiza ngaphatha imihlangano ngeSonto ekuseni lange Sonto ebusuku kusiya ebusuku bangoLwesithathu. Kwakulenhlelo ezinhlanu njenge-Albania, futhi ngayamukelwa ngendlela efanayo. Abantu bamemeza begida ngobusuku bokucina obomhlangano, ngaphansi kogcobo olulamandla, besipha umnikelo. Angizange ngibone inkungu eluhlaza owesibhakabhaka ngalesosikhathi, kodwa ngezwa ugcobo olulamandla kunhlelo ezinhlanu zonke. Ngemva kohlelo lokucina, ngayethuka, njengalokho uLarry ayekade ehlangana lakho e-Albania, kwakunikele abathatheneyo abangu 17 kuphela kumnikelo omkhulu. Ngakhiyela umnikelo phakathi kwesikhwama somnikelo ngasihambisa ehofisini yami ngisenzela ukusikhangela kusas.

Kusisa lelolanga, ngathola ucingo luvela ehofisini yami. Umabhalani wami wayese cingweni, futhi ngangisizwa ukuthi kukhona okwakusenzakala. Ilizwi lakhe laliqhuqha, futhi kwakuzwakala engani ubekhala. Amazwi akhe okuqala wathi “Mfundisi, ikhona into mayelana lemali elibuye layo.” “Uzama ukuthini, Tracy?” ngabuza. Wabesengitshela ukuthi wayevule isikhwama ukuze abale

imali ayeyifaka ebhanga, kodwa evula isikhwama, wafikelwa lugcobo olulamandla esehofisini, wawela phansi. Omunye umabhalani esizwa isiphithiphithi, wabuya, kodwa laye, waqala ukuqhaqhazela ngaphansi kogcobo. UTracy wathi, “Kwenzakeleni ngemali le lise Utah?” Ngamtshela ukuthi ngangingakwazi.

Ngemva kwamaviki ambalwa, ngangifundisa izimiso ezifanayo ebandleni elincane elalise ningizimu ye-Ohio. Kuleli ibandla, sasithumele inhlelo zezifundo ezine zingama DVD, ngakho babezibukele kumaviki amane ayedlulile. Ngazohamba mina ngeSonto ntambama ukuyaqedisa isifundo sesihlanu. Ugcobo lwasolufuna ukuphinda njalo ukusiwisela phansi. Ngathi ngithatha umnikelo ngalobu ubusuku,

ngathola impendulo efanayo kubantu njengakweminye yonke imihlangano. Abantu babejabulele ukupha. Ngesikhathi somnikelo, ibandla lafaka ingcebethu eyodwa ukuze abantu bafake izipho zabo phakathi. Ngaleso sikhathi inkungu eluhlaza okwesibhakabhaka yabakhona futhi. Kwakulesigombolosi esasiqhele nagama *feet* amahlanu ngaphandle kwengcebethu yomnikelo abantu besipha. Ugcobo lwalulamandla

okokuthi ngancediswa ukuya emoteni umhlangano suphelile ngoba ngingenelisi ukuzihambela ngedwa.

Izinto lezi zisenzakala, ngangingakwazi ukuthi kwakusen- zakalani, ngangingakaze ngizwe kusenzakala kwezinye indawo.

**KODWA UJESU KAZANGE
AHLAWULELE ILUNGELO
LETHU LOKUYA EZULWINI
KUPHELA, YENA WENZA
KWENZEKA UKUBA SIPHILE
NJENGAMADODANA
LAMADODAKAZI
KANKULUNKULU NJALO
SIKHOLISE INZUZO ZOMBUSO
KANKULUNKULU LAPHA
EMHLABENI.**

Ngaqhubeka ngisiba lemibuthano, futhi ugcobo lwaluqhubeka lusiba lamandla. Futhi yebo, inkungu eluhlaza okwesibhakabhaka yayivela kweminye imibuthano emilitshwane. Kodwa ingxenyeyangididayo kakhulu yikuthi ugcobo lwalusemalini ngokwayo. Ngemva kombuthano, abasebenzi babesiba lobunzima ukubala umnikelo. Khumbula ugcoba olwafika sisendlini e-Albania ngesikhathi uLarry elahlela imali yomnikelo phezulu kwetafula? Wawusithi ungadobha isiqephu semali eyayiphiwe emnikelweni, wawuphangisa uzwe ugcobo uqale ukuqhaqhazela. Ngiyazi kuzwakala kuphambene, kodwa yikho engakubonayo.

Njengalowo ophenya ahlaziye izinto zikamoya, ngethuka ngakho konke lokhu ngabuza iNkosi ngakho. Yakhuluma lami yangitshela ukuba kungani ugcobo olulamandla lwaluvela emnikelweni. Yangitshela ukuba inengi labantu lipha ngokufanele ukuthi umuntu akwenze noma okomthetho. Abanye bapha okokuthi yinhlala yenza, kodwa bengekho ekukholweni ngokweqiniso nxa besipha. Inengi lipha ngoba licabanga ukuthi uNkulunkulu uzabathukuthelela nxa bengaphanga. Abanye bapha ngani yisikwelede okumele basibhadale. Yangitshela ukuthi ngisafundisa ngoMbuso wakhe ngiveza imfihlo ngezimiso zezimali zoMbuso, ukholo luyaphakama enhlizweni zabantu. Khonapho nxa besipha basekukholweni ngokweqiniso, futhi ukuxhumana koMbuso kukhona, yikhokugeleza kgcobo.

Kusukela kuhambo lwami lwase-Albania ngo2005, impilo yami yatshintsha kakhulu. Isifiso sami sokufinyelela ebantwini lendaba ezimnandi zoMbuso sesenze mina loDrenda sisebenzise umabonakude ukufinyelela ezizweni lendaba lezi ezimnandi. Ngokweqiniso, sesisebenzisa izigidi ngomnyaka ukutshela abantu ngendaba ezimnandi zoMbuso esawufumana iminyaka eyadlulayo.

Kodwa mhlawumbe awukezwa ngendaba ezimnandi zoMbuso. Sasinjalo—sasingamakholwa aya ezulwini kodwa singazi ukukhulula izulu emhlabeni. Kodwa uJesu kazange ahlawulele ilungelo lethu lokuya ezulwini kuphela, yena wenza kwenzeka ukuba siphile njengamadodana lamadodakazi kaNkulunkulu njalo sikholise inzuzo zombuso kankulunkulu lapha emhlabeni. Kodwa okuqakathekileyo, kulezigidi okusamele sizifinyelele lendaba ezimnandi zevangeli, njalo kufuna imali ukwenza lokho. Impilo zethu kumele zibukeke zihlukile!

Yini engayifundisa e-Albania eyaletha yangenisa ugcobo? Yini engayitshelwa nguNkulunkulu ukuba ngiyitshumayele ezizweni? Yiso isizatho salolu ugwalo, futhi ngiyakholwa lizatshintsha impilo yakho njengendlela okwaguquka ngayo eyami.

ISAHLUKO 3

NGIYACELA NKULUNKULU, IBA LESIHAWU!

UJerry watshayela ucingo ehofisini yami wabuza ukuthi engadlula na edle lami isidlo semini ngoba ngangiseduze lalapho ahlala khona. Ngangilhlelo kumabonakude kude edolobheni elaliseduze laye, futhi wayefuna ukungitshela ukuthi impilo yakhe yatshintsha njani ngenxa yezinsiza zami lenhlelo zikamabonakude. Ngangingakaze ngihlangane lo Jerry ngaphambilini kodwa ngangike ngakhuluma laye ecingweni kabili noma kathathu. Ngathi, “Ngempela.” Kwakumele sidle isidlo semini vele, ngacabanga ukuthi, silapho, ngingathanda ukuhlangana laye ngizwe indaba yakhe.

Ngesikhathi sokudla kwemini ngahlangana lo Jerry lendodana yakhe, uJerry waqala ukungitshela udaba lwakhe. UJerry wayengu mfundisi owayesefundise okweminyaka engu 30, kodwa kwakumele atshiye inkonzo ngenxa yokoma umhlubulo okwakumtshiye egogekile. Ngesikhathi leso ngemva kokoma umhlubulo, impilo yakhe yadilika. Njengoba wayengasenelisi ukusebenza,

ngokwezimali, umuzi wemuli yakhe wasilela emuva wabusufakwa ukuthi uthengiswe. Ukubhadalela indleko zemuli lokuthenga ukudla kwabanzima. Eqinisweni, uJerry wathi into zaba zimbi okokuthi ngelinye ilanga wahlala phansi ethwele umbhobho oyi .45 kwesinye isandla kwesinye ethwele iBhayibhili, ecabanga ukuzibulala.

Kwakuphakathi kokulahlekelwa lithemba lapho uJerry ebona umsakazo wami kumabonakude wasefaka isicelo sezinsiza zami. Waqhubeka wachasisa ukuthi eqala ukuthola izinsiza, wayedinga imali engange \$2,000 ukubhadala izikwelede lokuthenga ukudla. Walalela izinsiza lezi elokhe eziphindaphinda njalo ukholo lwakhe lwakhula enhlizweni yakhe. Wabesethatha isinqumo sokukholwa kuNkulunkulu ngaleyo \$2,000 ayeyidinga. Ngakho wenza okwayenzwa ngu Drenda lami ngempunzi yokuqala esayitholayo. Wahlangela imbewu yokuthola leyo \$2,000. Wabhala kusiqephu sephepha ilanga lesikhathi ayekholwa ukuthi wayamukela leyo mali, ngokutsho kuka Makho 11:24, wabeseyithumela enkonzweni yethu.

Ngangingazi ukuthi lokhu kwakusenzakala njengoba nganginga khulumanga lo Jerry. Wathi ngemva kweviki lengxenye kwabuya indoda emnyango wakhe yacela ukukhuluma laye. UJerry wayeyazi indoda le kusukela kudala kwakhe, kodwa wathi basebacina kudala ukukhuluma. Baqhubeka bekhuluma ingxoxo nje ezincane okwesikhatshana, indoda le yasisithi yayibuye ukuzonika uJerry i\$2,000. Yathi kuviki lengxenye eyayidlulile ngelanga elithize ngesikhathi esithize, wezwa ngoMoya oNgcwele emkhuthaza ukuphathela uJerry i\$2,000.

UJerry wema lapho emangele. Waphangisa wakhupha iphepha elincane esikhwameni semali elalichaza ilanga lehola ayekholwe ukuthi wayamukela i\$2,000 ayeyidinga. Usuku lesikhathi esasibhalwe ephepheni lika Jerry sahambelana le sikhathi esatshiwo

yindoda le ukuthi yezwa ikhuthazeka ukupha uJerry i\$2,000. UJerry wayekwazi ukuthi kwakungayisikho kuziqondanela nje; wayesazi ukuthi kwaku yimpendulo yoMbuso kaNkulunkulu, ikakhulu imithetho yoMbuso.

Waqhubeka ngendaba yakhe wangitshela ukuthi ulabantwana abayisikhombisa, bonke babetshadile ngaphandle kwendodana yakhe eleminyaka engu16 (leyo ayebuye laye kusidlo sasemini), eyayisifulathele uNkulunkulu ibona kubunzima obabuhlangana lobaba wayo. Indodana yakhe yayimthukuthelele uNkulunkulu ngoba uyise wayethembekile kuye okweminyaka engu 30, ngakho indodana yayisizwa engani uNkulunkulu wayemlahlile.

UJerry wayedinga indlela yokufinyelela kundodana yakhe, futhi wayeselecebo. Ngikhuluma kakhulu ngokuzingela impunzi kuzinsiza zami ngibuye ngikhulume njalo ngokuthi uNkulunkulu wangifundisa njani ukuzingela ngokukholwa. Ukuzingela impunzi kwakuthandwa yindodana yakhe, ngakho uJerry wachasisela indodana yakhe indlela yokuthola impunzi ngesikhathi leso kuyikwindla. Indodana yakhe yakucabanga lokhu ekucineni yavuma, yena loJerry bakhulula ukholo lwabo, njengokwakwenziwe nguJerry nge \$2,000 yakhe. Umfana wathola impunzi enhle ngemizuzu eyisitshiyagalombili. Lapho uJerry lendodana bethatha impunzi beyisa evinkilini lenyama, uJerry wayedlala iCD lami emtshineni wokudlala amaCD. UJerry esathatha impunzi eyisa phakathi kwevinkili, umfana wathi uzasala emoteni elalela okwesikhatshana. UJerry wathi ephuma, indodana yakhe yathi, “Baba, ngicabanga ukuthi besikhutha eyinye into iminyaka yonke le. Ngiyazi ukuthi impunzi leya yimpumela yoMbuso kaNkulunkulu.”

Indodana yakhe yasinikela impilo yayo kuNkulunkulu yatshela uyise ukuthi nxa uNkulunkulu wayengaletha i\$2,000 le mpunzi

wayesengaletha i\$17,000 ababeyidinga ukuhlawulela indlu yabo ukuze ingavalwa. Kukulesi isikhathi engathola ukwazi uJerry okokuqala. Ngikhumbula incwadi kaJerry ingena lenhlanyelo kaJerry lendodana yakhe befuna ukukhupha indlu yabo ukuze ingavalwa. Ngikhumbula njalo ukuthi incwadi yayimfitshane kodwa ichaza ababekudinga. Kwakungabhalwanga okunye, kodwa ukukhupha indlu ekuvalelweni kuphela. Ngikhumbula njalo ngibeka izandla zami kuleyo ncwadi ngivumelana labo. Ngiyakhumbula ithuba lelo lesikhathi engakwenza khona.

Ngaleso sikhathi, uJerry wangitshela ukuthi kumaviki amabili eyinye indoda yavela phambi komnyango wabo. Njalo futhi, kwaba ngumuntu uJerry ayemazi kudala. Indoda le yathi yabona indlu ibhaliwe ukuthi iyathengiswa futhi wabuza uJerry ukuthi kwakudingeka malini ukukhupha indlu lapha eyayizavalwa khona, uJerry wamtshela intengo wathi, engaphezu kwe \$17,000. Indoda le yabhala i-check yentengo yonke yasihamba. UJerry wakhangele imali le. Ngalowomzuzu, uJerry wayesekhala ehlezi phambi kwami ekhefa futhi engibonga ngokufundisa abantu ngoMbuso ka Nkulunkulu. UJerry uthi wayejabulele ukuthi abantwana bakhe bonke babona isandla sikaNkulunkulu, futhi kwamupha ithuba lokwabelana labo ngoMbuso. Ngiyakujabulela! Leli yilo iqiniso ngoMbuso ka Nkulunkulu, futhi ngibusisekile ukwabelana labantu besengisizwa indaba zabo. Uyabona, uJerry wayengadingi uzwelo. Wayedinga impendulo, futhi wazithola eMbusweni.

Khathesi, ngizwa kuthi ngingezelele okuthile mayelana lendaba kaJerry. Noma kwakungakhanya sengathi abantu babesiza emnyango kaJerry besiyamnikeza imali, kangifuni utholi umqondo omubi owokuthi impendulo yakho yemali izavela wena uhlezi unatha okunambithayo. Hatshi, kulendima okumele uyidlale ukuze

uvune okudingayo. Kundaba kaJerry, uJerry wayesetshumayele okweminyaka engu 30. Wayehlanye ebantwini laba okwesikhathi eside. Okwesibili, uJerry wayesehluleka ukuphuma endlini ngenxa yokoma umhlubulo. UJerry wayevuna lapho ayehlanye khona, kusuka ebantwini bebandla lakhe lapho aye hlanye khona okweminyaka eminengi.

Ngifuna ukulitshela ukuthi uJerry wayesesiliswe ukoma umhlubulo ngokupheleleyo njalo wayeseyehle umzimba ngama phawundi angu 70 ngihlangana laye kusidlo sasemini ngalolo suku. UNkulunkulu makadunyiswe, wayesewubambile uMbuso. Ungathi, “Kahle kahle, uJerry wayeng mfundisi; ngempela, wayesazi konke ngokoMbuso.” Kodwa akunjalo, futhi kakho yedwa kusukela kwesengakubonayo. Ngokudaniso, inengi labantu bebandla kalikwazi ukuthinta uMbuso kaNkulunkulu lamukele impendulo. Indaba ekuMathewu itshengisa ukuthi inengi licabanga njani.

Bathi sebefike exukwini labantu, indoda ethile yamqonda uJesu yaguqa phambi kwakhe. “Nkosi, ake uhawukele indodana yami,” yatsho. “Ilezithuthwane njalo iyahlupheka kakhulu. Kanengi iwela emlilweni kumbe emanzini. Ngiyilethile kubafundi bakho kodwa behlulekile ukuyisilisa.”

“Lina sizukulwane esingakholwayo lesonakeleyo,” uJesu waphendula, “ngizahlala lani kuze kube nini na? Ngizalibekezelela kuze kube nini na? Mletheni lapha kimi umfana lowo.” UJesu walikhuza idimoni laphuma emfaneni wahle wasila ngalesosikhathi.

Abafundi basebesiza kuJesu ngasese bambuza bathi,

“Kungani sehlulekile ukulikhupha idimoni na?” Waphendula wathi, “Ngilitsbela iqiniso, ukuthi nxa linagaba lokukhowlwa okuncinyane njengentanga yemastadi, lingathi entabeni le, ‘suduluka lapha uye laphana,’ izasuduluka. Kakukho kini okungasoze kwenzeke.”

— UMathewu 17:14-20

Kundaba le, sibona indoda ephelweyo; indodana yayo ihlukunyezwa yimimoya emibi, citshe ifike ekufeni. Ngokuzwa inkonzo kaJesu futhi lokuthi uJesu uyaxotsha amadimoni, yenza icebo lokuhambisa indodana kuJesu ukuze Yena ayisilise. Kungas-enani, wathi efika lapho, wathola ukuthi uJesu wayengekho kodwa wayethethe abafundi Bakhe abathathu baya entabeni ukuyakhuleka. Abafundi ababekhona bathi akula nkinga; babekade bekhupha amadimoni kusukela uJesu ebapha amandla okwenza lokhu, egameni Lakhe, ngakho babezenelisa ukunakekela indodana le. Kodwa besakhulukela umfana omncane lo, idimoni alizange lihambe. Bazama kodwa idimoni kalizange lihambe. Ubaba womfana wadana lexuku elalilandela uJesu ladideka.

Kodwa ngalesosikhathi, uJesu labafundi abathathu bafika khonapho, bevela entabeni. UJesu, ebona isiphithiphithi, wabuza ukuthi kwakusenzakalani. Ubaba wendodana wachasisa ukuthi wayebise umfana kubafundi, kodwa behluleka ukukhupha idimoni. Ubaba lo wasesenza okungaba liqiniso kwabanengi, nxa kungasi-bonke abantu nxa bekhangelane lesimo esinje kungela mpendulo. Wakhala kuJesu ecela isihawu. Noba ukuncenga umusa kuzwakala njengento elungileyo ukwenza nxa uphelewe, kwakungayisiyo impendulo yendoda le, futhi kasiyo yakho lawe. Ubaba, ezama ukuvusa uzwelo lesihawu sikaJesu kulesi simo sakhe, waqhubeka

ngokutshela uJesu ukuthi leli dimoni laselihluphe njani indodana yakhe, ukumlahlela emlilweni, futhi lokuzama ukumbulala. UJesu wayimisa leyo ndoda. Wayengadingi ukuzwa ukuhlupheka okwakubhekane lendodana yakhe. uJesu wamemeza wathi, “*O lina sizukulwane esingakholwayo lesonakeleyo, ngizalibekezelela kuze kube nini na, mletheni lapha kimi umfana lowo.*” Emutshweni Wakhe owodwa, uJesu uyachasisa ukuthi kungani idimoni lingaphumanga.

Ngaphambili kokuthi sikhangele ingcazelo yalokho okwakutshiwo nguJesu, kumele siqinise isisekelo esimi kuso, okuyikuthi uNkulunkulu akangeke futhi kasoze aqambe amanga. Akutshoyo Yena kuliqiniso. Sesikulungisile lokhu, singahlola isimo ngomutsho lo, “Amadimoni KUMELE aphume!” Nxa engaphumanga, kukhona okungalunganga, futhi akukho ecaleni likaNkulunkulu kodwa elethu. Khumbula lokhu, inkinga yokuyamukela kuvela kuNkulunkulu ikwelethu icala. UJesu usitshela isizatho esenza idimoni langahambi—ukonakala lokungakholwa. Sizakhuluma ngezizatho lezi ezimbili nje ngemva komzuzu. Kodwa ngalesi sikhathi sengxoxo yethu, ngifuna sikhangele ubaba lendodana kundaba le.

Ubaba kwakusobala ukuthi wayephelelwe ngenxa yendodana yakhe. Ngesikhathi lapho kungenzakali lutho bemkhulekela abafundi, kwakungela okwakusele. Kwakungela mpendulo eqinisekileyo. Impendulo okwakuyi yona yodwa ayecabanga ukuthi izamsiza ayenzanga okuhle. Kwasokusele into eyodwa eyokwenza futhi kwakuyikuncenga isihawu. Umutsho othi “ukuncenga isihawu” utsho ukuthi ukhona olamandlaokusisiza kodwa usekhethe ukungasizi. Ngaleyo ndlela, okuseleyo yikupha ingcazelo yezinto ezimbi ezehlele umfana, ukuze uJesu abe lozwelo ngesimo sakhe.

Ngempela, yiyo indlela inengi labantu elikhuleka ngayo, besazi ukuthi uNkulunkulu ulawo amandla okusiza kodwa bengela

siqiniseko lempendulo Yakhe, bayancenga umusa. Ngakho ngemikhuleko emide lamazwi amanengi, bayatsho wonke amazwi ngezinhlungu lezimo zabo. “Baba, uyazi ngidinga imali ngoLwesihlanu; ngiyacela, Nkulunkulu ngisiza.” Kumbé “Nkulunkulu, ngiyacela, nxa ungasilisa indodana yami, ngizakukhonza insuku zonke zokuphila kwami. Ngiyacela, Nkulunkulu.” Angikwenzi kubengani zilula izimo ezikhangelane labantu, kodwa ngiyacela ukhangele ubone ukuthi uJesu waphangisa njani ukuletha amandla kaNkulunkulu kulesosimo wakhulula umfana. Le yinhliziyó kaNkulunkulu, isifiso Sakhe. Akula kuswelakala kozwelo, kumbé amandla. Lokhu kwakungayisiyo nkinga lakule indaba. UJesu utshengisa inkinga kuyikukonakala lokungakholwa. Ngamanye amazwi, ukucabanga okungayisikho kanye lokuswela ukholo kwavalela amandla okusebenza koMbuso.

Kulungile, kunengi okumele sikhulume ngakho lapha, isihluthulelo soMbuso lokuthi usebenza njani. Angifuni ukungena ngokupheleleyo ezintweni ezinye okumele ubezazi lapha, kodwa ngizaziqamba, njalo sizafunda imithetho esiyibona isebenza lapha ngaphambilini.

Ukuthola ulwazi oluyisiqalo ngemithetho yoMbuso, kumele sizwisise isiqalo lesisekelo lesi: uNkulunkulu wapha uAdamu amandla ngokupheleleyo phezu komhlaba. Wayeza busa phezu kwawo.

UNkulunkulu wasesithi “Asenze umuntu ngomfanekiso wethu, ngesimo sethu, njalo abuse phezu kwenhlanzi zolwandle laphezu kwenyoni zesibhakabhaka, laphezu kwezifuyo, laphezu kwezidalwa ezihambayo emhlabeni.”

— UGenesisi 1:26

Ngicabanga ukuthi KumaHebheru 2:7-9 kuyacacisa:

Wamenza wabangaphansi kwezingilosi; wamethesa umqhele wenkazimulo lodumo futhi wafaka konke ngaphansi kwenyawo zakhe. Ekufakeni konke ngaphansi kwakhe, uNkulunkulu katshiyanga lutho olungehliselwanga kuye.

Okungenani okwakhathesi, zwisisa ukuthi uNkulunkulu kenelisi ukusebenzisa amandla Akhe lapha emhlabeni (eMbusweni wabantu) ngaphandle umuntu oyindoda loba owesifazana olamandla okubusa lapha ekhulula amandla ezulu.

Yikho uJesu watshela abafundi bakhe kuMathewu 18:18:

“Ngiqinisile ngithi kini, konke elizakubopha emhlabeni kuzakubotshwa lase zulwini, njalo elizakukhulula emhlabeni kuzakhululwa lase zulwini.”

Njalo, amazulu awalamandla okubusa lapha emhlabeni ngaphandle owesilisa noma owesifazana akhulule lapha. Yikho uJesu esithi ukuba nxa owesilisa noma owesifazana engakhulula amandla awezulwini lapha, amazulu azalisekela. Singekela, izulu kalenelisi. Nxa umcabango lo ungajwayelekanga kuwe, ungami lapha. Ngizakhuluma ngalokhu kabanzi phambili. Kodwa okwakhathesi yamukela iqiniso leli njengesizatho esenza idimoni lekela ukutshiya umfana—**lalingeke liphume!** Lalisebenza okusemthethweni walo ukuhlala lapho. Futhi njalo, uJesu wathi isizatho

**KODWA AKUNJALO KUWE,
MNGANE WAMI; WENA
ULEMVUMO YOKUTHOLA
UBULUNGISWA
EMBUSWENI. ZIKHONA
IMPENDULO ZENKINGA
ZAKHO.**

ukuba idimoni lingahambi kwakungenxa yokusweleka kokholo, kumbe ukuswela amandla okubusa. UNkulunkulu walahlekelwa ngamandla Akhe okubusa indaba zabantu ngesikhathi uAdamu exotsha uNkulunkulu ngokuhlamuka kwakhe. Kulapha uSathane athola khona amandla akhe okubusa phezu komuntu njalo.

Usathane wamusa (uJesu) endaweni ephezulu wamtshengisa yonke imbuso yomhlaba. Wathi kuye, “Ngizakunikeza amandla onke lobuhle bonke, ngoba konke lokhe kwanikezwa mina (ngu-Adamu), nja;lo nginganikeza noma ngubani engimkhethileyo. Ungangikhonza, kuzakuba ngokwakho.”

— ULukha 4:5-7

Ngenxa yalokhu, uNkulunkulu walahlekelwa ngamandla Akhe okubusa emhlabeni njengoba wayeselahlekelwe yindoda eyayiwathwele—u-Adamu. Njalo futhi, ngizakhuluma ngemithetho le uqobo phambili, njengoba ngitshilo, kodwa isizatho esiqakath-ekileyo esenza ngakhuluma ngaleyi ndaba kwakuyi kukhombisa isimo sengqondo lokuphelelwa lithemba kukababa lo langendlela ayeyame ngayo ekuncengeni isihawu. Ngicela ubale imitsho elandelayo ngonanzelelo.

Nxa kungela mandla noma umthetho futhi kungela hlelo lobulungiswa loku bisa impendulo emuntwini odingayo, ukuncenga isihawu yikho kodwa okuyabe sokusele. Kahle ngitsho ngeyinye indlela. Nxa umuntu engela ndlela esemthethweni yokux-azulula inkinga futhi engela ku finyelela indlela lapho ubulungiswa obutholakala khona, akula siqiniseko sempendulo. Ukuncenga yikho kodwa okusaleyo.

Kodwa akunjalo kuwe, mngane wami; wena ulemvumo

yokuthola ubulungiswa embusweni. Zikhona impendulo zenkinga zakho. Khumbula, uMbuso nguhulumende, futhi usebenza ngomthetho ongakhekheleziyo futhi otholakala kuye wonke ohlala ngaphansi kwamandla esikhundla salowoMbuso. Njengoba ngitshilo ngaphambilini kulolu ugwalo, uMbuso kaNkulunkulu wakhiwe phezu kobulungiswa (indlela yomthetho efinyelelisa amandla kaNkulunkulu ukuqinisekisa ukuthi okutshiwo ngumthetho Wakhe kuliqiniso) lokulunga. Kwakulesizatho idimoni lingaphumanga, futhi kwakungaso buthakathaka bukaNkulunkulu kumbe utshintsho lwentando Yakhe. UJesu uyasitshengisa lokhu ngokuphangisa ukuthuka abafundi ebese xotsha idimoni.

AmaKhristu amanengi, nxa engaboni umzekeliso woMbuso, ayantshintsha imfundiso yabo, bethi, “Akusiwo madimoni onke aphumayo.” Bayakwazi ukuthi uNkulunkulu ulamandla wonke, ngakho bazitshela ukuthi uNkulunkulu wenza yini ayifunayo emhlabeni, ngakho nxa idimoni lingaphumanga, kutsho ukuthi uNkulunkulu ukhethe ukuthi lingaphumi. Mngane wami, inzwisiso le kayiqondanga. UJesu wathi kwakuyikonakala lokuswela KWABO ukholo okwacitsha amandla ezulu ukuba abuse kule indaba. Mana ngikubeke ngaleyi indlela. Isizatho esayenza idimoni langaphumi yindaba yomthetho—kuphela. Lalingeke liphume ngenxa yokuthi akula lapho owayelethe amandla ezulu lokubusa kwalo ukuthwala lesisimo. “Kodwa, Gary, babezama ukulixotsha.” Yebo, kodwa

**NJENGOBA UMUNTU
ELAMANDLA OMTHETHO
PHEZU KOMHLABA,
UHULUMENDE
KANKULUNKULU
LAMANDLA AKHE
AKUNGEKE KUSEBENZE
KUZE KUTHI OWESILISA
NOMA OWESIFAZANE
OLAMANDLA OKUBUSA
PHEZU KOMHLABA.**

njengoba ngitshilo, ngokomthetho, lalingeke liphume. Kungani? Njalo futhi, amazulu ayengela mandla esikhundla ukwenza idimoni liphume.

Mana ngikubeke ngeyinye indlela engikutshoyo. Babelokonakala, bethi into enhle noma eyamukelekayo imbi kumbe belomcabango ogonqomileyo nxa uqathaniswa lalokho uNkulunkulu ayengakutsho mayelana lendaba. Ukungakholwa kwakungeyinye indaba enkulu njengoba ukholo ludingakala ukuthi izulu libe lamandla okubusa emhlabeni. Abafundi babengaqinisekanga, ukuqiniseka okupheleleyo, ukuthi idimoni lizaphuma. Babesesaba.

Njengoba umuntu elamandla omthetho phezu komhlaba, uhulumende kaNkulunkulu lamandla akhe akungeke kusebenze kuze kuthi owesilisa noma owesifazane olamandla okubusa phezu komhlaba, akholwe ngokupheleleyo okutshiwo ezulwini, abesekhulula amandla lawo lapha. Kenje futhi, ukuqiniseka kwezinhliziyi zethu ngalokho okutshiwo lizulu kubizwa kuthiwa lukholo, njalo kwakungela owayelokholo ngalelo langa. Babengqondombili futhi begcwele ukungakholwa, yikho okwakuquma amandla okubusa kwezulu kuleso simo. Kodwa uJesu wayeloku kholwa ekwazi ukuthi idimoni lalizaphuma! UJesu wathatha indawo futhi laphuma. “Kodwa, Gary, ngesikhathi uJesu elikhuza kwakungoba idimoni laphuma ngesikhathi uJesu elikhuza kwakungoba Yena wayengu Jesu.” Kunjalo yini? Asikhangeleni u Makho 6:5 uJesu etshumayela edolobheni langakibo.

UJesu wehluleka ukwenza izimanga lapho, ngaphandle kokuba abeke izandla zakhe phezu kwabalutshwane abagulayo abasilise.

Kumele uvume ukuthi uJesu wayelamandla okusilisa, angithi? Ngakho kumele wenelise ukuphendula ukuthi kungani wayengenelisi ukwenza konke ayefuna ukukwenza kuleyindaba. Isidingo sasikhona, kodwa kukhona okwamvimbayo. Uyaphendula lokhu ku 6, “*Yena wamangaliswa yikuswela kwabo ukholo.*” Ukholo (isivumelwano lezulu) lunika izulu umthetho emhlabeni. Isibonelo, usungabona kalula isimiso lesi ngokukhangela indlela owasindiswa ngayo wabuya kuKhristu.

*Ngoba ngenhliziyo yakho uyakholwa uthole ubulungiswa,
njalo ngomlomo wakho uyafakaza usindiswe.*

— KwabaseRoma 10:10

Uyakholwa enhlizweni (okutshiwo lizulu), susiba lobulungiswa. Lelo ligama lomthetho, elitsho ukusetshenziswa komthetho njalo lisitsho ukuthi izulu selilamandla omthetho emhlabeni. Nxa singakhangelisa kuhle isimiso lesi, asikhumbuleni ukuthi u-Adamu waphiwa amandla okubusa lapha emhlabeni, futhi umuntu usalaso laye isikhundla leso. Lokhu akumelanga sikuphambanise lokungenelisi komuntu ukubusa ngokomoya, okwamlahlekela kuSathane eNgadini. UNkulunkulu kenelisi ukuphambanisa isikhundla somthetho esibanjwe ngumuntu emhlabeni. Ngakho, uNkulunkulu kumele adinge owesilisa kumbe owesifazane ozavumelana lezulu ukuze angene ngokusemthethweni aziveze emhlabeni.

KwabaseRoma 10:10, uzananzelela ukuthi kulento ezimbili okumele zenzakale ngaphambili kokuthi amandla ezulu akhululwe lapha emhlabeni. Okwakuqala sengikukhulumile: Kumele siqiniseke ngokugcweleyo sivumelane lenhliziyo zethu ngokutshiwo lizulu; lokhu kubizwa kuthiwa lukholo. Okwesibili; kumele

sizwisise ukuthi ukuba lokholo kuphela akusoze kukhulule izulu lapha. Sumangele? Mana ngichaze. Cabanga isikopela esisemdulwini esokulayitha amalayithi. Amagetsi ayabe ekhona, kodwa kumele uthinte isikopela esisemdulwini ukuze ulayithe. Nxa sikhulwa enhlizweni okutshiwo lizulu, kuyenza ukuxhumana lezulu kube semthethweni kumbe kube lobulungiswa. Kodwa kumele sikhulule amandla lawo lapha. Njengakumzekeliso wami, kumele sithinte okwenza ilayithi likhanyise. Siyakwenza lokhu sifakaza njalo sisebenzisa amandla oMbuso.

Ngiyakwazi ukuthi ngiyaziphinda, kodwa ukuzwisisa umthetho lo owoMbuso ku QAKATHEKILE kuwe ukuba wenelise ukwamukela izulu elikubekela khona. Uzayamukela konke okumele ukwamukele ezulwini ngendlela efana lokusindiswa kwakho—ngokukholwa okutshiwo lizulu enhlizweni yakho ubusukhuluma kumbe ukwenza okutshiwo lizulu.

UMbuso, njengokwafundiswa kwatshengiswa nguJesu, kwakuyinto eyayingaziwa ngabafundi. Ezikhathini eziningi, siyababona abafundi bedidwa ngabakubonayo. Kumbhalo esesike sawubala, ngiyakholwa ukuthi abafundi babesesaba abakubona kusenziwa lidimoni bacina besibangqondo mbili, okwanciphisa ukholo lwabo. Ngicabangela ukuthi bathi behamba ukuyaxotsha idimoni, lazibonakalisa, ngabona lilahlela umfana phansi lizibonakalisa ngendlela enkulu. Lokhu kungabe kwayenza baba lokwesaba. Ngiyafanisela la, kodwa engilesiqiniseko ngakho. Kukhona okwayenza inhliziyi zabo zaphuma kusivumelwano lezulu baswela ukholo.

Kolunye uhlangothi, uJesu wayekholwa ngempela okwakutshiwo lizulu ngesimo wakhuza idimoni ukuthi liphume. Njengoba sibona, inkinga eyenza idimoni lingaphumi yayisemhlabeni, hatshi ezulwini.

Nxa ngingakhetha umbhalo owodwa ongakhombisa umsebenzi woMbuso emhlabeni ngcono kuleminyey, ngingathi nguMakho 11:22-24. Ukuze sihlele inkundla, kumele sibuyele emuva ngendima ezinlutshwane, sizabona ukuthi uJesu wakhuluma lesihlahla somkhiwa safu. Ngemva kokuswela isithelo kuso, uJesu wasithuka. Ngosuku olwalandelayo abafundi badlula kuleso sihlahla, bathola sifile. UPhethro abesemangala amemeze kuJesu ngokwethuka.

**“NGAKHO
NGIYALITSELA, KONKE
ELIKUCELA LIKHULEKA,
KHOLWANI UKUTHI
SELIKWAMIKELE,
KUZAKUBA NGOKWENU.”
— UMAKHO 11:24**

“Woba lokholo kuNkulunkulu,” uJesu waphendula. “Ngilitshele iqiniso, ukuthi nxa noma ngubani esithi entabeni le, ‘Suka, ziphosele olwandle,’ engela kuthandabuza enhlizweni yakhe kodwa ekholwa ukuthi lokho akutshoyo kuzakwenzakala, kuzakwenziwa kuye. Ngakho ngiyalitshela, konke elikucela likhuleka, kholwani ukuthi selikwamikele, kuzakuba ngokwenu.

— UMaKHO 11:22-24

Nanzelela ukuthi uPhethro wayemangele ngokwakwenzakele. Kwayenzakala njani? UJesu wayekhulume lesihlahla. Kodwa kungela kuthandabuza isihlahla sasabela amazwi kaJesu safu. UJesu utshela uPhethro “iqiniso,” umthetho waseMbuso kaNkulunkulu. Ingcazelo kaJesu iyasipha ukuzwisisa yokuthi uMbuso kaNkulunkulu ungena njani emhlabeni. Njalo kulo umzekeliso sibona umthetho ofanayo usebenza ebesikhuluma ngawo; owesilisa noma owesifazana emhlabeni, eqiniseke ngokugcweleyo ngokutshiwo

lizulu (khathesi ngobulungiswa) ebesekhuluma noma ukukhulula amandla ezulu. Ngempela, indoda ekule indaba, enguJesu, uqobo Lwakhe, kodwa uJesu uyacacisa kungcazelo yakhe kubafundi Bakhe ukuthi “noma ngubani” wayengenza lokho ayekwenzile.

Ngiqinisekile ungavumelana lami ukuthi nxa abantu babekwazi lokhu njalo bezwisisa umthetho owawufundiswa nguJesu, kwakuzatshintsha impilo zabo ngendlela emangalisayo. Ngabona utshintsho olwayenzwa nguMbuso empilweni yemuli yami, kodwa kwakumnandi ukubona uMbuso utshintsha ezinye izimuli lapho sibafundisa esasikufundile. Mana ngililandisele indaba ebandleni lami lapho engabona umthetho lo ubonakaliswa. Izikhathi ezinengi, ukuba lolwazi ngoMbuso lomsebenzi wawo ngumahluko phakathi kokufa lokuphila. Kwakukele indaba.

UJennifer waqala ukungena ibandla lami lokuzwa ngokholo langoMbuso. Wayejabulela ukufunda ngamandla lakhe lamalungelo eMbusweni ngoba wayezithwele umntwana wakhe wesibili, njalo wayefuna ukubelethela endlini. Ngakho waqala ukufunda okwakutshiwo liLizwi likaNkulunkulu mayelana lokubeletha lezithembiso eMbusweni ezazizasebenza emntwaneni wakhe. Wayeqinisekile ukuthi uzabeletha kuhle endlini. Wabesedinga umbelethisi, wacela lomama othile ebandleni, owayeseke wabelethisa endlini, ukuthi bamcedise ekubeletheni kwakhe.

Ngesikhathi esesiyabeletha, wayengakhuthi inkonzo efunda ngezimiso zoMbuso. Imicabango le yayimitsha kuJennifer, futhi wayethokozela ukufunda ngokuthi kwaku lempendulo zeqiniso eMbusweni kaNkulunkulu. Ngokubi ke, kulesi isikhathi, umyeni wakhe kwakumele asebenze ngeSonto ngakho wayengenelisi ukufika laye enkonzweni kwezinye izikhathi. Yebo ke, isikhathi sokuzalwa komntwana safika. Umabelethisa lomama we bandleni babizwa.

Kwakungu 2:00 kumbe 3:00 ekuseni ucingo lwami oluseceleni kombheda lwakhala. Ngangale kocingo, ngangisizwa umama oncedisayo ememeza ecingweni, “Mfundisi, ngiyacela khuleka; umntwana ubelethwe efile!” Indaba le yangivusa khwatshu. Umama owayencedisa wasesithi umntwana sebemgijimisele esibhedlela ngemota yezigulane. Wangitshela ukuthi, ngempela, ekufikeni kwabezempilakahle babethe umntwana ufile.

Mina loDrenda seqa saqgoka. Ngaqala ukukhuleka ngoMoya, ngilalela okwakumele ngikwenze. Ngangisazi ukuthi uSathane wayengathanda ukuthi ibandla likhulunywe kubi ngesehlakalo lesi. Ngangani ngiyabona “Umntwana Ufa Ngenxa Yebandla Elivumela Ukubelethwa Kwabantwana Endlini.” Sasingangela mlayo wokuthi umntwana kumele azalwe najni, endlini noma cha, kodwa inengi labomama lalikhetha ukubelethela endlini; lelo kwakuliqiniso. Mina loDrenda saqhubeka sikhuleka ngoMoya sisiya esibhedlela, kwakuthatha imizuzu engu20 ukuyafika lapho. Sesiphakathi laphakathi kokuyafika, ngamuzwa uMoya kaNkulunkulu engehlela, futhi ngabakwazi ukuthi umntwana uzavuka. Ngalowo mzuzwana, unkosikazi watshibilikela kimi wathi iNkosi yayisanda kumtshela ukuthi umntwana uzaphila.

Ngangikwazi iNkosi eyayikukhulumile kunkosikazi lakimi, ngakho singena esibhedlela, ngangizibuza ukuthi ngizatholani. Ku *ER*, ngabona iqembu labo mongikazi abayisikhombisa noma ababeyisitshiyagalombili beme begombolozele okwakukhanya kungumntwana ophilileyo, olegazi, okhalayo. Ngabakhangela ngonanzelelo buso ngobuso. Endaweni ezinengi obona khona umntwana ephethwe ngabomama ubona behlekelela. Kodwa lapha, babengahlekeleli. Kodwa ke, babekhangeleka beyethukile.

Sahlangana lomama owayesitshayele ucingo. Wasitshela

ukuthi umntwana kwakuthwe ufile besendlini, okwakukhatshana ngemizuzu engu20. Umntwana lasesibhedlela kwakuthwe ufile befika kodwa, njengokuba, wavuka. UNkulunkulu makadunyiswe! Mina loDrenda sasithabile ukubona umntwana ephila njengokutsho kukaMoya oNgcwele.

Kusasenjalo, eyinye imota yezigulane yayithwalele umama womntwana, uJennifer, ewadini yabomama ababelethileyo. Kusenzakala lokhu, wayengakwazi ngesimo sendodakazi yakhe. Unkosikazi, uDrenda, wahamba ukuyamkhangela endlini zabomama ababelethileyo. UDrenda wathi engena lapho uJennifer ayephumulele khona, wathi, “Jennifer, umntwana wakho ukahle, futhi muhle.” Umongikazi wangenela esithi, “Cha, umntwana usebalelwa kwabafileyo!” Unkosikazi wamqondisa umongikazi ngokuphambanisa kwakhe. Namhlanje, ngenkazimulo kaNkulunkulu, umntwana oyinkazana, owabizwa kwathiwa nguHaley, yintombazana enhle engela monakalo wengqondo noma inkinga emzimbeni. Ngokuzwisisa ukuthi uMbuso kaNkulunkulu usebenza ngomthetho kaMoya, ngangisazi ukuthi impumela le yayingenzakalanga yodwa. Ngakho njengalowo ophenya ahlaziye izinto zikaMoya (hatshi usoSayensi wesiKhristu, kodwa umuntu ofunda ukuthi uMbuso kaNkulunkulu usebenza njani) enginguye, ngangifuna ukwazi ukuthi kwayenzakalani.

Ngangisazi ukuthi umntwana uHaley babethe “ufike efile” ngabantu bemota yezigulane eyayimlande endlini. Ngangisazi ukuthi umntwana babethe ufike efile esibhedlela. Ngakho yikuyini okwayenzakalayo? Ngakhuluma lomama owayencedisa ukubeletha owayelapho, ngabuza ukuthi angitshela konke okwayenzakalayo. Ngangidinga okwakungangisiza. Wathi konke kwaqala kuhamba kuhle umntwana waze wazalwa. Wayengatshengiseli impilo futhi

umzimba wakhe uluhlaza. Umabelethisa wazama ukuvusa umntwana kodwa kenelisanga. Umncedisi waphinda wathi uJennifer wayelezi-hlobo zakhe lapho ezaqalisa ukutshaywa luvalo. Kodwa uJennifer wabatshele kuhle ukuthi bathule, futhi wafaka umunwe ebusweni bomkakhe, wathi, “Ungakhulumi lutho—umntwana lo uzalunga!”

Ngabamba umcedisi umlomo ngamcela ukuthi aphinde futhi okwakukhulunywe nguJennifer etshela umkakhe. Wangitshela into efanayo, ukuthi uJennifer wafaka umunwe wakhe ebusweni bomkakhe wathi, “Ungakhulumi lutho—umntwana lo uzalunga!” Habe! Yikho lokhu! Kwakuyiso isikhathi leso, isimemezelo esasindisa impilo kaHaley. Ngazizwa njengomphenyi owayesombulule icala! Ngajabula. Kwakulula, kodwa kujulile. UJennifer wayesebenzise umthetho kamoya kulesisimo, futhi kwakusindise impilo yomntwana wakhe! Nxa ngilokhe ngicabangisisa ngalokhu engasengikufundile, kwakuzwakala.

UJennifer wayesazi lokhu, ngenxa yomsebenzi, umkakhe wayengakakhuli okholweni njengaye kunyanga ezazedlule. Laye wayesazi ukuthi, njengenhloko yekhaya labo, ukuvumelana lokwakusenzakala kuzalwa umntwana kwakuza qgiba okwaku-zayenzakala ngomntwana. Yikho wahle wakhuluma lomkakhe wangamvumeli ukuthi avumelane lokufa komntwana wabo. UJennifer wayeqinisekile ukuthi umntwana uzaphila alunge, futhi wakumemezela ngokholo lokuzethemba lokhu.

Ngesikhathi uJennifer ekhululwa esibhedlela, wahamba kwabemota yezigulane wababuza ukuthi bamenzani umntwana ngesikhathi besendleleni yokuya esibhedlela. Bamkhangela ngobuso obulenhloni.

“Akula,” omunye wabo waphendula.

“Lizama ukuthini nxa lisithi, akula?” wabuza uJennifer, “Layenza iCPR?”

“Cha,” batsho

“Kukhona elakwenzela umntwana?”

“Cha,” batsho njalo.

Bamtshelela ukuthi umntwana wayefile, futhi babengela themba lokuthi angavuka. Kodwa, umntwana waphonguku “vuka” befika esibhedlela! Abantu bemota yezigulane baphiwa imiklomelo evela esibhedlela lakwabomlilo ukuthi yibo ababephangise kulabanye bonke ukulanda isigulane, umklomelo ngempumela yesimo esinzima. Kodwa bavuma ukuthi babengenzanga lutho.

Sike saba loHaley lonina, uJennifer, kuhlelo lwethu lukama-bonakude; lathi sonke, sileniyembezi emehlweni, sadumisa njalo ngoMbuso kaNkulunkulu. Sasinika udumo lokuthi kwakukhona umuntu kulesosimo owayekwazi ukusebenza ngomthetho kamoya langamandla oMbuso.

Endabeni le sibona uJennifer, oqiniseke ngokugcweleyo ngokutshiwo lizulu ebese khulula amandla lawo kulesisimo ngamazwi akhe. Umthetho uyasebenza!

Eyinye imuli ebandleni lami yahlangana lomthetho ofanayo woMbuso kaNkulunkulu. Odade ababili babecabange ukuhlengana badle isidlo semini ndawonye, okwakungalula, njengoba babe labantwana abayi 12 kumbe 13 phakathi kwabo. Yebo ke, besadla isidlo semini bananzelela ukuthi uJoel, oleminyaka emine, wayeselahlekile. Bamdinga indlu yonke kodwa abazange bamthola. Yikho bacabanga ukuthi mhlawumbe ucatshile, kodwa bamdinga yonke indawo bamswela. Khonapho uTina, unina, wabesesiba lomcabango omubi. Wacabanga ukuthi ngemuva kwakulebhukutsho? Wagijima ngemva kwendlu lomntwana kadadewabo, uCourtney, owayeleminyaka engu 13, eceleni kwakhe. UTina wafikelwa yikwesaba ethola uJoel engaphansi kwebhukutsho,

engatshedi. Akula owayekwazi ukuthi wayele sikhathi esinganani elapho. UTina wamemeza ukuthi bathinte ucingo lwe 911 engena phakathi kwebhukutsho edonsela uJoel phandle. Wayengasaphefumuli, emhlophe njalo engatshedi.

Lo ole minyaka engu13, owayekhuliselwe enkonzweni yethu yabantwana, wathi mamncane wakhe, “Cha, mamncane Tina, asidingi kuthinta abe 911; silamandla lapha. Kumele sikhuleke.” Ngakho bonke baqala ukukhuleka, kodwa akula okwayenzakalayo. UTina wamemeza futhi, “Thintani u911!” UCourtney wasesithi kumamncane wakhe, “Mamncane Tina, sidinga ukukhuluma impilo kuye.” Ngakho uCourtney wathi, “Joel, ngegama lika Jesu, vuka.” UJoel wahitshwa, wakhafula amanzi, wavuka, ephelele.

Nxa ngicabanga emuva ngaleyindaba, ngiyamangala, angimangaliswa yikuphila komfana, kodwa ngimangaliswa yibukhona bengqondo yomntwana oleminyaka engu 13 ngalesosikhathi. Ngesikhathi esasiphakathi kokufa lokuphila, wenelisa ukubona okwakumele kwenziwe engavumelanga ukwesaba. UCourtney waqinisekisa ukuthi ukwazi indlela zoMbuso kumnandi kulentshumayelo; kuyikufa lokuphila!

Futhi njalo, ukuthi umthetho woMbuso wasebenza njani. Ekuqaleni uCourtney wathi kwakudingakala ukuthi bakhuleke, bakwenza lokhu, kodwa akula okwayenzakalayo. Lokhu kungoba nxa sikhuleka asikhululi mandla kaNkulunkulu. Kodwa sikhulekela ukutshengiswa indlela. Yikho lokhu ababekudinga ngaleso sikhathi. Uzananzelela endabeni ukuthi uCourtney wazokuthi badinga ukukhuluma impilo kuye. Bakwenza lokhu, wavuka ekahle lanamuhla usaphilile. Njalo futhi, sibona inhliziyo eqinisekileyo ngokutshiwo lizulu, kodwa akula okwenzakalayo kuze kukhululwe amandla lapha emhlabeni ngumuntu wesilisa noma owesifazana ngokholo.

Mana ngixoxe eyinye indaba eyodwa, eyayiseduze lathi endlini. Umfowabo kaDrenda wayethethe uCandy, unkosikazi wakhe, emusa esibhedlela esiyabeletha umntwana wabo wesihlanu. Mina loDrenda sadlula esibhedlela ekuseni uCandy ehelelwa sifuna ukuyabona ilunga elitsha elemuli. Sasicabanga ukuthi wayebelethe kudala singakafiki. Kodwa sezwa kuthiwa, ngenxa yempazamo ezinlutshwane, umntwana wayesanda kuzalwa. Singena egumbini lokubelethela, usane uHolland wayengeniswa egumbini labantwana abasanda kuzalwa. Njengoba like labona, igumbi labantwana abasanda kuzalwa livulekile njenge fasitela, liyakuvumela ukuthi libone bonke abantwana nxa bengena.

Bengenisa uHolland omncinyane, ngananzelela ukuthi wayengani umhlophe. Bonke abantwana bakaJohnny balenwele eziphose zibemhlophe; futhi ekuqaleni, ngacabanga ukuthi ukuswela kwakhe umbala kwakujayelekile njengokwabanye bonke abantwana bakhe. Kodwa kakhangelekanga ephilile. Khonapho, omongi

**KHUMBULA UKUTHI
IMITHETHO YOMBUSO
ISEBENZA SONKE
ISIKHATHI, KUYE WONKE
UMUNTU!**

baqalisa ukugijima. Omongikazi baphangisa bavala igumbi leli ukuze ngingaboni phakathi, kwakungayisilo phawu oluhle lolu. Loba babevalile, kwakulesikhadlana engangibona ngaso konke. Omongikazi baqala ukudonsa imitshina, udokotela waqala ukuzama

iCPR kuHolland. Ngahamba komunye umnyango lapho engangisizwa kuhle konke omongi ababe kukhuluma. Lapho ngilalela, engangikuzwa bekukhuluma kwakusethusa ngoba babesithi umntwana wayengaphefumuli njalo babesehluleka ukuvusa inhliziyoyakhe. Ngilokhu ngilalele, ngangisizwa umtshina owawukhangele inhliziyoyakhe ukhalela lapha lalaphaya. Ngangisizwa inhliziyoyakhe

yakhe itshaya besokudlula imizuzwana engu 15 kumbe engu 20, ibisitshaya futhi. Inhliziyo kaHolland yayingatshayi!

Umongi waphuma egunjini waya kuJohnny, “Akukhangeleki kuhle, Johnny; ngiyaxolisa, kodwa sisazama.” Sasingavunyelwa egunjini labantwana, ngakho uDrenda lo Johnny babeka izandla emnyango wegumbi labantwana, lami ngabeka ezami izandla kolunye uhlangothi lwegumbi. Saqala ukukhuleka sisithi uHolland uzaphila kasoze afe futhi uzaphila. Satshela inhliziyo ukuthi itshaye, ngengama likaJesu.

Masinyane, umongi owayekhuluma lo Johnny waphuma egunjini labantwana egijima. Wagijima esedlula kithi engatsho lutho. Ngemizuzu emilutshwane, waphenduka edlula kithi elandelwa ngumongikazi, bekhulumela phezulu, “Mongi, asingeke sikwenze lokho kulesi isibhedlela akuvunyelwa. Angingeke ngivume ukuthi ube legazi lelo.” Kazange amlalele umongikazi wabuyela egumbini labantwana. Wadobha ugwalo, lapha okwakukhanya ukuthi wayebala khona indlela yokuqhubeka. Ngangikubona lokhu ngesikhala esasisele esukuma efaka umizo omude emntwaneni. Ngananzelela ukuthi wayefaka umntwana igazi.

Khonapho, ngezwa inhliziyo iqala ukutshaya. Yangezelela ukutshaya isitshaya kakhulu yayitshaya kuhle okufanele ikwenze nxa umntwana esanda kuzalwa. Umongi waphuma ngemva komzuzu wathi, “Bekulezingilosi phakathi laphaya; uNkulunkulu ungince-disile ngomntwana lo!” Sasibona ukuthi wayeyethukile. Sasisisizwa ukuthi wayengasebenzi ngalobo busuku njalo wayengaphathisanga ekubeletheni kukaCandy. Wayefike esibhedlela ezokhangela omunye wezigulane zakhe leso sikhathi kusenzakala konke lokhu. Ngangibona ukuthi umongi wayesamangele lapho esitshela ukuthi uHolland inhliziyo yakhe ayizange itshaye okwemizuzu engu36!

Namuhla uHolland muhle futhi uleminyaka emine. Ngikholwa ukuthi kwakuyikuzwisisa kwethu ngomthetho woMbuso okwabisa impendulo kuleso. Ngisakhumbula, ngibeka izandla emnyango wegumbi labantwana, ngicabanga ngedwa, “Asisoze sibe lemfa yomzukululu ka Drenda! Hayikhona sikhangele!”

Nxa sisima sikhangele indlela uMbuso osebenze ngawo ezindabeni esengikhulume ngazo, ngingathanda ukhumbule ukuthi imithetho yombuso isebenza sonke isikhathi, kuye wonke umuntu! Njengoba ngitshilo ekuqaleni kogwalo lolu, imithetho yemvelo yomhlaba isebenza ibe lempumela efanayo sonke isikhathi. Ayikhetshi futhi izasebenza kunoma ngubani othatha isikhathi sakhe ukuyifunda ayisebenzise. Amagetsi asebenza okufananayo e-USA njengoba esebenza e-Africa; akula mehluko.

Ngizala ukunanzelela ukuthi uMbuso kaNkulunkulu kwakunguMbuso owawule mithetho echaziweyo noma ifihlakele, ngabakwazi ukuthi ngasengithole impendulo yenkinga zami. Ngananzelela ukuthi kwakungasuye Nkulunkulu owayengangitsheli okokwenza, ekhetha ukungangibusisi noma ukungisiza ngeskhathi ngilesidingo. Hatshi, ngananzelela ukuthi uNkulunkulu wayengiphe konke engangingakudinga empilweni ngoJesu Khristu, owathi ngokuzinikela Kwakhe wangipha ukufinyelela kukho konke okukhona ezulwini. Ngazwisisa ukuthi uMbuso wawusebenza ngemithetho engangingayifunda ngiyisebenzise empilweni yami.

Ngaqala ukufunda zonke indaba ezaziseBhayibhili ngengqondo ehlukileyo, ngidinga imicijo eyayizakwambula eminye imithetho yoMbuso. Ngazinikela ukuba ngusosayenzi ngokomoya ukuze ngifunde ukuthi yindaba izinto zazisenzakala ngendlela ezazisenzakala ngayo kundaba zeBhayibhili engangizibala sonke

iskhathi. Umbhalo oku 1 UJohane uzwakala uhlekisa kumbe engajwayelekanga kwabanengi. Ngiyakwazi sike sayifunda ekuqaleni, kodwa asiyibaleni futhi ngoba kuyo kuhleli iqiniso le mpendulo yakho.

Silesiqinisele lesi ekusondeleni kuNkulunkulu: ukuthi nxa sicela ulutho ngokwentando yakhe, uyasizwa. Nxa sisazi ukuthi uyasizwa (uyaphatha udaba)—loba kuyini esikucelayo —SIYAKWAZI ukuthi sesilakho esikucele kuye.

— 1 UJohane 5:14-15

Ngiyawuthanda umbhalo lowu ngoba ukhuluma ngomthetho, futhi umthetho usipha isiqiniseko ukuba sizathola ubulungiswa. Lesi yisiqiniseko sethu—singacela ulutho ngokwentando kaNkulunkulu (umthetho, uNkulunkulu akuthi lilungelo), Yena uyasizwa. Futhi njalo, ibala elithi “uyasizwa” alikhulumi ngoNkulunkulu esizwa amazwi ethu, noma ewezwa. Kodwa, likhuluma ngoNkulunkulu ephatha udaba. Nxa ungacabanga ngomahluleli ophatha udaba ebesebusa ngokutsho komthetho, engasebenzisi imizwa yakhe (ngoba kumele kusebenze njalo), uzazwisisa lokhu okutshiwo ngumbhalo lowu. Yena uyasizwa—Yena uyaphatha udaba noma uyaluzwa udaba, futhi singaba lesiqiniseko sokuthola ubulungiswa, okwethu ngomthetho.

Mngane wami, ngicabanga ukuthi kumele ume ufunde lokhu futhi, ungajahi. Nxa okubalileyo kuliqiniso, futhi kuliqiniso, impilo yakho izagcwala intokozo! Abantu abakhuleka bengelawazi lolu abalaso isiqiniseko; bayanqongoloza nje nxa bekhuleka. UJesu wakhuluma ngakho kuMathewu 6:7-13.

“Njalo nxa likhuleka, lingenzi ubugabazi linqongoloza njengabahedeni ngoba, bacabanga ukuthi bazezwakala ngenxa yamazwi abo amanengi.”

— UMathewu 6:7

Ibala elithi “ukunqongoloza” litsho ukukhuluma amabala adidekileyo angatsho lutho ayimisindo. Leyi yiyo indlela abanengi abakhuleka ngayo. Abakwazi ngelungelo labo lobulungiswa noma abakuphiwe nguNkulunkulu ngokomthetho eMbusweni. Akumelanga ukhale loba uncenge ngento osuvele ulayo!

Asithi ipholisa lalime emgwaqweni litshela imota ukuthi ime, beseliqala ukukhala lincenga imota ukuthi ime. “Ngyakucela, mota, mana. Wobalesihawu kimi. Ngyakucela, ngesihle ngyacela, mana.” Lokhu kungadanisa futhi kuyangise kubuye kweyise ilizwe le-United States lomthetho abawusebenzisayo. Hatshi, ipholisa liyama litshele imota ukuthi ime, ibisisima ngenxa yomthetho obekiweyo lesikhundla sakhe njengepholisa emele uhulumende welizwe.

Abantu abancenga uNkulunkulu abakwazi umthetho wabo noma isikhundla sabo. Isizatho esenza kuyangise elizweni nxa ipholisa lincenga imota ukuthi ime yikuthi kutshengisa ilizwe elingela mthetho lamandla. Okuzaba khona kulelo lizwe elingela mthetho yingxabangxoza. Nxa amaKhristu eqhubeka encenga, kutshengisa uMbuso kaNkulunkulu engani awulamandla, awulazo impendulo. Kuyenza ukuthi abantu bamsole uNkulunkulu lentando kanye lokwanelisa Kwakhe ukubasisa, kodwa isikhathi sonke, bebelungelo lalokho akade bekucela. UJesu usipha impendulo ecacileyo ngomkhuleko wokuncenga—“WEKELENI!”

“Njalo nxa likhuleka, lingenzi ubugabazi lingongoloza njengabahedeni ngoba, bacabanga ukuthi bazezwakala ngenxa yamazwi abo amanengi. Lingabi njengabo, ngoba uYihlo uyakwazi elikuswelayo loba lingakakuceli kuye. Kumele ke, likhuleke kanje:

‘Baba wethu esezulwini, kalidunyiswe ibizo lakho, uMbuso wakho kawuze, intando yakho kayenziwe emhlabeni njengalokhu isenziwa ezulwini. Siphe lamuhla isinkwa sethu sansukuzonke. Njalo usithethelele izono zethu, njengoba lathi sibathethelela abasonelayo. Njalo ungasingenisi ekulingweni, kodwa usisindise komubi.’”

— Mathewu 6:7-13

Khumbula, uJesu usifundisa ukukhuleka kule indima. Ngokubi ke, abanye bacecise ngayo indima le ezindlini zabo kodwa kabazwisisi ukuthi itshoni. Umbhalo lo ubizwa kuthiwa nguMkhuleko weNkosi, kodwa Yona yayifundisa abafundi Byo ukuthi bakhuleka ngamazwi lawo. Yayingawakhulumi ngendlela esikwenza ngayo enkonzweni zamasonto ethu. Lawo mazwi angumlayo, nxa ufuna, owokukhuleka uthole impumela, hatshi indima nje okumele uyazi ngekhanda.

“UMbuso wakho kawuze, intando yakho kayenziwe emhlabeni njengalokhu isenziwa ezulwini,” ngumlayo wendlela yokukhuleka. Kumele sikhuleke, intando kaNkulunkulu esezulwini syibisa emhlabeni lakuzimo zethu. Ngakho impendulo yakho ithini? Kholwa uNkulunkulu akuthi ngokwakho, usebenzise amandla akho aseMbusweni wezulu ukubisa izulu emhlabeni wabele izidingo zakho lezidingo zabanye ophila labo.

Ngakho mana okwemizuzu ucabange lokhu. Ngabe wawukwazi kungela kuthandabuza ukuthi umkhuleko wakho uyasebenza njalo izulu liyawusekela, wawuyakuba lesiqiniseko nxa ukhuleka? YEBO!!! Ngokwazi amalungelo akho njengomhlali wasezulwini, ukwazi okuphiwe mahala lokuzwisisa indlela yokwamukela, lokuthakazelela inzuzo zemithetho leyo, ungahamba endleleni entsha yokuphila—indlela yoMbuso. Kuzakwenzakalani ngokwesaba? Kungenzakalani nxa ungela siqiniseko? Ulwazi lolu lungakwenza njani ukuthi ubelesiqiniseko ngekusasa lakho lokuzithemba phakathi kwezinto ezinzima? Le yiyo indlela esathinteka ngayo mina loDrenda lapho siqala ukukuthola lokhu. Sasimangala ngesasikubona kanengi. Hatshi, mana ngikutsho kuhle. Sasitshona simangele njalo sethukile! Sasimangaliswa ngamandla uNkulunkulu ayesiphe wona njengebandla ukusebenza endaweni kahulumende wasezulwini lapha emhlabeni.

*Ngoba ngoKhristu uJesu UMTHETHO woMoya
wokuphila wangikhulula EMTHETHWENI wesono lokufa.*

— KwabaseRoma 8:2

Ukuthola ukuthi lokho esakhululwa kukho “emthethweni wesono lokufa” saphiwa uMbuso lokufinyelela “umthetho womoya wokuphila” kwakujabulisa. Njalo, okwakukukhulu kithi kwaku-yikubona umthetho uzala ukulunga koMbuso empilweni zethu.

UMbuso wavumela ukuba ngisile ngokwenyama, lakumizwa yami ngingena ethembeni elitsha futhi ngikhululwa kumaphilisi ayeqeda ukudangala. Wangivumela ukusuka ekuhluphekeni, ukuyehluleka ukubhadala i-\$300 ngenyanga eyendlu eyayizifele, eyemapulazini eyayakhwa ngabo 1800, ngacina sengisakha lokubhadalela

okugcweleyo umuzi oyi 7,700 square foot owawuhleli phezu kwama acre angu 59 amahle. Lonkosiksazi wami wayesengithanda ngcono futhi! Ukutshayela imota ezingcono ezazingafi nsuku zonke kwakukuhle kakhulu. Ukwenelisa ukupha izinkulungwane zemali ngenxa yeVangeli kwakungenzeki ngokubona kwethu eminyakeni edluleyo. Impilo, ukukhanya koMbuso, kwawungcwaba ubunyama; njengokutsho kukaNkulunkulu kuncwadi kaGenesis ekhangela izidalwa Zakhe, “Kuhle lokhu!” Lami futhi, ngama ngimangele ngathi, “Lokhu kuhle, kuhle kakhulu.”

Mina loDrenda sasijabule okokuthi sasitshela wonke umuntu owayengalalela ngo Mbuso sibatshele indaba yethu. Abantu ebandleni lethu basebethola impumela efana laleyo esasiyithola, njalo omunye wabo kwakuyindondakazi yethi eleminyaka engu12. Wayebone uNkulunkulu esenza into ezinengi njalo wayebone kanengi umthetho owawungehluleki owoMbuso uletha izithelo empilweni zethu. Ngangikwazi ukuthi wayebukele njalo efunda ngemithetho leyi, kodwa indaba eyodwa yangitshengisa ukuthi wayefunda okwangempela.

Ngelinye ilanga ngahamba endlini yakhe yokulala ukuyamtshela ukuthi alale kuhle kodwa kukhona okwakungani kuhlukile. Emdulwini wakhe kwakulomfanekiso wenja engumhlobo we*Pomeranian*. Lokhu, kumzali wonke okwaziyo, kwakuyindlela eyayitshengisa ukuthi wayezacelainja. Ngakho, ngathatha isinqumo sokuthi ngangisasoze ngimelele ukuthi acele ngoba ngangingafuni eyinyeinja endlini. Udadewabo ka Kirsten uPolly wayelenja eyayihlala endlini, njalo babelala bonke endlini yabo yokulala, ngakhoinja kaPolly yayitshona ikhona iloPolly loKirsten.

Ngatsho kuKirsten indlela engangithanda ngayo umfanekiso wakhe kodwa ngangingafuni eyinyeinja ehlala endlini. Nxa

wayefunainja, kwakumele achithe isikhathi lenja kadadewabo eyayiluhlobo lweDachshund. UKirsten kazange atsho lutho ngalobo busuku, wavuma engangikutshilo. Ngacabanga ukuthi udaba lolu lwaseluphelile, kodwa indaba ye*Pomeranian* yavuswa futhi, ekhuluma ethi, “Ngeke kubemnandi ukuba le*Pomeranian* na?” kumbe “Yona iloboya obuhle.” Yebo ke, wayephinda angitshengise umfanekiso waleyo nja eyayikumagagasi. Njalo, ngangisithi, “Hatshi.” Ngangilamandla endlini, njalo sasingasoze sibe leyinyeinja endlini.

Njalo futhi ngacabanga ukuthi indaba yayisidlulisiwe kodwa ngelinye ilanga ngemva kwenyanga eyodwa sivela enkonzweni, uKirsten wabuya kimi ngokuzithemba wathi, “Baba namuhla ngiyamukele umdlwane oyi*Pomeranian* ngokukholwa njengokufundisa kwakho.” Ngamkhumbuza futhi engangikutshilo mayelana lokuba leyinyeinja. Elokhe emoyizela, wathi, “Kodwa Baba, uMama uthi uNkulunkulu uyanelisa ukutshintsha inhliziyoyinkosi.” Wayengadeleli ngempendulo yakhe. Wayevumelana lonina njalo ekhuleka ukuthi uNkulunkulu uzatshintsha inhliziyoyami. Wayengitholile. Ngasengikwazi ukuthi yena lonina babekhulumile, njalo unina wayemkhuthaze ukuthi uNkulunkulu wayengatshintsha ingqondo yami.

Ngenkuthazo leyo, wayekhulule ukholo lolu ekuseni sisenkonzweni, ehlanyela njalo efakaza ukuthi wayeyamukeleinja ngokukholwa. Ngamenqabela ngamandla kodwa ngimqinisekisa ukuthi ngiyamthanda kodwa ngibeka udaba lwami ngisithi kuye, “Kasisoze sibe leyinye inje ehlalala endlini.” Ngamxolisa kodwa kwakungasoze kuyenzakale. Wayekhangeleka engelandaba lengangikutsho; wahamba ehlekelela. Njalo ngacabanga ukuthi indaba yethu yayisiphelile.

Kodwa ngemva kwenyanga, ngathola isimemo sokufundisa

ebandleni elincane eMississippi. Kwakulibandla elincane elaligonjolozelwe ngamagceke ayemade okwamamayela. Ekupheleni kobusuku bokuqala, umfundisi weza kimi wathi iNkosi yayikhulume laye phakathi kwenkonzo. Wathi, “Angikwazi ukuthi uyakwazi lokhu kumbe awukwazi, kodwa ngikhulisa ama*Pomeranian* eceleni, futhi iNkosi ingitshele ukuthi ngikuphe umdlwane owodwa osulamaviki ayisithupha osulungele ukuthola ikhaya.” Ngama lapho ngivule umlomo. Ngangizimisele ukungayithathi leyo nja, ngakho ngathi, “Ngizakwazisa.” Ngangingakwazi ukuthi wayekhulisa izinja njalo ngangingatshongo lutho kuye ngokuthi uKirsten wayefuna umdlwane.

Ngacina sengitshela uDrenda ngokwakwenzakele futhi lokuthi ngangingafuni ukuhamba lenja leyo endlini. Wangikhangela wathi,” Uzayenqabela ukholo lwendodakazi yethu?” UDrenda laye wayengafuni inja yesibili endlini, kodwa wayethanda uKirsten ukwedlula ukungahlaliseki kwethu ngeyinye inja yesibili. Futhi khathesi njoba uNkulunkulu wayesesilethele inja ngokukholwa kukaKirsten, sasizanqaba njani? Ngakho ngatshela umfundisi ukuthi ngangizayithatha inja.

Asizange sitshela uKirsten kodwa satshela udadewabo ukuthi aqinisekise ukuthi uyamletha egcekeni lendizamtshina nxa sebebuya ukuzosithatha. UKirsten wabuya egcekeni lendizamtshina, futhi sahamba kuye samupha isikhwama esincane esasisithengele inja. Wathi uKirsten ebona i*Pomeranian* encane, wakhala. Yonke into yama. Wonke umuntu owayesigombolozele wama esesibukele. Kungekudala, kwasokuleqembu labantu elaselisigombolozele libukele uKirsten ekhala, ebambe umdlwane. UDrenda wayetshela abantu ukuthi inja sasiyiphiwe njani lokuthi uKirsten wayekholwe kuNkulunkulu ukuba ayithole.

Kwabayilapho engananzelela ukuthi wawungaba lemvuselelo egcekeni lendizamtshina ngokubamba umdlwane esandleni sakho. Wonke umuntu wayefuna ukubona umdlwane, njalo wonke umuntu wayesekhala loKirsten, labasebenza emahofisini eTSA. Ngaleso isikhathi ngazizwa njengobaba omubi. Ngibona intokozo eyalethwa ngumdlwane kundodakazi yami futhi lokuthi uNkulunkulu wayebiseinja leyo ngenxa yokholo lwakhe, ngazibuza ukuthi nganginqabelani into eyayili gugu kuye. Wamnika ibizo wathi ngu Shakespear, wayethandeka. Waba lilunga lemuli ngeqiniso. Noma wayezimele, wayelandelela uKirsten yonke indawo busuku lemini.

Noma leyi kuyindaba ethintayo, ngidinga ukubuza umbuzo odinga ukuphendulwa njalo uyinhloso yogwalo lolu. **Inja leyi yavela njani?** Ngangingakaze ngiphiweinja. Njalo kwaze kwaba yinja indodakazi yami eyeyikhulule ukholo lwayo kuyo? Kwakuyinhlanhla? Hatshi, ngempela kwakungayisiyo. Kwakuyi mpumela yoMbuso lemithetho yayo eyayisiletha izithelo empilweni yemuli yami. Yayisakha njengendlela ezakwenza ngayo kuye wonke umuntu olokholo njalo okhulula amandla oMbuso lapha emhlabeni. Singatsho sithi kwakunguMbuso kaNkulunkulu owabisa leyo nja. Kodwa wakwenza njani? Imithetho eyakwenza kwafezeka lokhu yayisithini? Ngethemba, siqhubeka ngogwalo lwethu, sizaba lempendulo ezicacileyo ezizasinceda ukwazi indlela yokukholisa uMbuso kaNkulunkulu. Ngoba, wena ungowaseMbusweni ngakho ulamalungelo omthetho kanye lenzuzo! Kodwa kuqala mana ngikuphe omunye umzekeliso ngoMbuso ovela empilweni yemuli yami.

ISAPHLUKO 4

INHLANZI ENKULU

Lapho mina loDrenda sifunda ngoMbuso kaNkulunkulu lamandla esasilawo emhlabeni, sayala sikhula sinanzelela ukuthi yithi esasihlela indlela esiphila ngayo. UMbuso kaNkulunkulu wawuthinta yonke indawo yempilo yethu, kodwa yithi okwakumele sikhulule ukutholakala kwalokho esasikudinga kumbe esasikufuna empilweni zethu. Akuzange kwenzakale kodwa. Njengakundaba yomdlwane wendodakazi yethu, akukho okwakukuncane noma okwakungaqakathekanga ukuba sikulethe ngaphansi kwamandla oMbuso. Sathi sesikunanzelele lokho, akukho okwakungeke kwenzeke kumbe okwakukhanya kunzima kithi. Kungxenywe enkulu eyempilo yami, kangizange ngizwisise ukuthi uNkulunkulu wayesinike uMbuso, WONKE uMbuso ukuba siwukhwabithe. Ngakho kwakumnandi ukubona uMbuso uthinta yonke indawo yempilo yethu, ngitsho lezindawo ezincane ezingabalulekanga kangako. Isibonelo salokhu satshengiswa yindaba elandelayo. Ngiyibiza ngithi yindaba yenhlanzi enkulu.

Kwayenzakala imuli yethu ise-Alaska ngekhofu. Ukuba kuleyondawo nje kwakuliphupho kimi. Sahamba ngendiza saya e-Anchorage sathola iRV yokuqhatsha amaviki amathathu

siyitshayela kakhulu ezigabeni zasentshonalanga. Kwakukuhle! Ngelinye ilanga silokhu sitshayela nje sibhoda eKanai Peninsula, sananzelela inhlanzi enkulu ilenga eceleni kwengalani yesikepe esisiqhatshiwe. Izikepe ezinengi eziqhatshiweyo zazisanda kungena; ziphambana zisiya le lale zonke zilengise inhlanzi ezifanayo ezinkulu. Kimi zazifana lomhlobo wenhlanzi othiwa yi*flounder*. Ngangingakaze ngibone *ihalibut* ngaleso sikhathi, futhi ngangingazi ukuthi iyikuyini, kodwa yayinkulu. Sasimangala sidlula inhlanganisano ezinengi eziqhatshisa izikepe, zonke zisakaza ngokugola *ihalibut* okosuku olulodwa. Masinyane, unkosikazi wami watshibilikela kimi wathi, “Ngingakuthabela ukubamba *ihalibut*, ngakho ngifuna ukuyabamba eyodwa lomholi lowana olaphana.” Wakhombela uphawu lokusakaza ukubamba *ihalibut* olwaluse-sikepeni esiqhatshwayo, njalo uphawo lwesiKhristu olwenhlazi lwalukulolo phawu.

Okwakuqala, ngamangala! “Ufuna ukubamba *ihalibut*?” Yena wayengakaze afune ukuyathiya ngaphambilini. Kodwa waphikelela, ngakho sama sahamba ehofisini. Abasebenza ehofisini yalapho babematasela belomunye owayefuna ukuqhatsha, ngakho sasilokhu sibhodisa amehlo nje sibuka, sifunda izinto ezazifakwe ngabantu emdulwini wokusakaza izindaba. Sabona uphawu olwalukhuluma ngomncintiswano wama *halibut* owawusen-zakala, kodwa wawusuzaphela. Njengoba thina sasingakwazi ukuthi lokho kwakuyini, lawe sungabe ungakwazi, ngakho kahle ngichasise. *IHalibut Derby* ngumncintiswano wokuthola lowo ozabamba *ihalibut* enkulu kuleyonyanga phakathi kwabaholi bonke abahola izikepe zokuqhatsha. Ophuma phambili kwakuyafakwa umfanekiso wakhe kuphephandaba kunye le*check*. Mina loDrenda sakhuluma ngokungena ku *Derby* (kuMncintiswano) njoba sasivele

sizakuyathiya. Kwakungamadola ambalwa ukungena; yikho ke lapho okwayenzakala khona.

UDrenda, owami obuthakathaka, unkosikazi wami othobeke njengaye wonke umuntu wesifazane watshibilikela kimi wathi yena uzanqoba i*Derby* ukuze ibhizimusi lomholi lo libonakale kulezinye zonke izikepe eziqhatshwayo ngoba engumKhristu njalo uNkulunkulu wayezaphiwa inkazimulo ngalokhu. Ngakho kwathi sokufike ithuba lethu etafuleni, uDrenda watsho ngokuzethemba wathi uzanqoba i*Halibut Derby* ukuze uNkulunkulu aphiwe inkazimulo lokuthi ibhizimusi labo lazakale ngoba babelebhizimusi elesiKhristu. Ngempela, umholi wesikepe esiqhatshiweyo, ungacabanga nje ukuthi yena wacabangani. Ngempela, wonke umuntu angakuthanda ukunqoba i*Halibut Derby*; njalo ngileqiniso lokuthi lokhu wayesekuzwe kukhulunywa ngabantu abanengi, kumbe bonke ayebabhodisa ngesikepe. Kodwa ke, kangila qiniso ukuthi abanengi babesitsho na ukuthi bafuna ukunqoba ngenxa yenkazimulo kaNkulunkulu.

Kuhle ke, yena akazange atsho okunengi ngamazwi ayekhulunywe nguDrenda mayelana le*Derby*. Sathi siphuma sisiyaqala ukuthiya, saqala ukugola amah*alibut*, njalo uDrenda wayelokhe ebuza umholi, owayengumnini wesikepe, ukuthi i*halibut* kwakumele ibe nkulu kangakanani ukuba umuntu anqobe i*Derby*. Yena wayephendula ngokuthi kwakumele ibenkulu kulaleyo ayesanda kuyibamba, okwakumenza abuze njalo sonke isikhathi angabamba eyodwa. Ngakho wathi esebambe eyayingama phawundi angu40, yena wathi yayingekho nkulu okwanelayo. Wathi esebambe engamaphawundi angu 70, kwakulokhe kuthiwa kayinkulu okwanelayo. Ngempela, wonke umuntu uyazi ukuthi i*halibut* imnandi kangakanani, ngakho sasijonge ukuthumela ekhaya wonke amah*alibut* esasizawabamba.

Umuntu wayevunyelwa ukuthwala amabili kuphela, ngakho sagcina le eyayingamaphawundi angu70.

Lwaqhubeka usuku kwaze kwabantambama, kwasokusiba sebusuku. Indodana yami uTom, indodakazi uPolly, kunye lami sasibambe omunye lomunye amah*alibut* amabili. Abanye abantwana bethu ababili u-Amy loTim, babebuyele ngendiza besiya emhlanganweni ngakho sasesingelabo. UDrenda, yebo, wayeleyakhe eyayingamaphawundi angu70, kodwa akukho inhlanzi esasilazo esikepeni ezazinganqoba i*Derby*. Kodwa uDrenda wayelesiqiniseko sokuthi wayezabamba enkulu. Ubusuku bathi sobusondela ngokuphangisa, umholi wasitshela ukuba siphendukise umambule wethu esikepeni ngoba kwasokumele sibuyele. UDrenda akazange alalele lapho umholi encedisa thina abanye sonke ukuphendukisa konke okokuthiya esikepeni sikugogqo sikubeke kule. Wacela eminye imizuzwana nje emilutshwane elokhu esitsho ukuthi wayezabamba inhlanzi ezanqoba ku*Halibut Derby*. Umholi walinda okwemizuzu emilutshwane waze wacina esemlandla esithi, “Ngiyaxolisa, kodwa kumele sibuyele.”

Engakabambi isigodo sakhe sokuthiya, sona saqala ukudonselwa emanzini. Kwakuyinhlanzi enkulu ngoba isigodo saqala ukugoba lowayedonsa laye wayesememeza. Umholi waphakamisa isigodo ukuba aphumputhe ubukhulu benhlanzi wasevuma ukuthi kwakuyinhlanzi enkulu kodwa wathi kwakuyi *shark*. Wathi wayesizwa ngendlela inhlanzi le eyayidonsa ngayo. Yebo ke, kwathathela uDrenda isikhathi ukuba inhlanzi le ayidonsele phezulu. Kwamthathela amandla akhe onke ukuba ayidonse isuka phansi, ngoba yayiphansi ukutshona kwama *feet* angu 300. Inhlanzi yathi ibonakala phezulu, wonke umuntu wayebona ukuthi kwakuyi *halibut* enkulu, eyayinkulu kuloDrenda ngokwakhe.

Lapho inhlanzi idonselwa phakathi kwesikepe, umholi ngokwakhe wathi inhlanzi le yayinkulu kakhulu ukuba iphongudonselwa phakathi kwesikepe iphila ngoba yayizakube iphaphatha; futhi ngobukhulu bayo, yayingalimaza umuntu kumbe isikepe. Yena wayelensimbi ebalulekileyo eyenhlanzi ezinkulu njengale. Insimbi le yayilokuncane okudubukayo emlonyeni wayo, okwakuthi kungafithizelwa ekhanda lenhlanzi, kudubuke kuyibulale inhlanzi. Lapho umholi ebeka insimbi le ekhanda lenhlanzi elalilikhulu idubuka, inhlanzi yatsheda, okwayenza insimbi yakhutha.

Ngenxa yomsindo lowo, inhlanzi yantsheza ngamandla ayo onke ibuyela ngaphansi kwamanzi. Yabuyela phakathi phansi, yonke intambo eyayiyi 300 *feet* yathukululeka. Sasisesaba ukuthi intambo le yayingasozwe iyibambe inhlanzi noma ingwegwa yayizayekela lapho inhlanzi le iseqela emanzini ngodlame. Ngakho njalo, uDrenda kwasokumele aphinde ayidonsele phezulu. Kwakumsinda ukwenza lokhu njoba wayeseke walwa layo ngaphambilini; ngakho ngafaka ingalo zami zamgombolozela, ngimbambisa isigodo sabamba ndawonye, sancedisana sayidonsela phezulu futhi. Khathesi ke umholi wayenelisa ukuyingenisa esikepeni lapho sonke esasihleli khona simangala ngobukhulu bayo.

Sayithatha *ihalibut* sayisa esikalini esasisenkundleni yenkaba yedolobho esasilobukhulu obabungayiphakamisa. Inhlanzi le yayingamaphawundi angu 123 njalo yayinde kuloDrenda. Indoda eyayifaka esikalini yathi, le yiyo, ngaleso sikhathi, eyayinkulu kulezinye zonke ezazingene umncintiswano; kodwa kwakusasele amaviki amabili ukuba umncintiswano uphele, ngakho sasingeke sibe kwazi ukuthi inhlanzi yethu yayizanqoba na. Kodwa ke ngeqiniso, ngelinye ilanga kwafika *ichcek* lilebizo likaDrenda lephephandaba elalilomfanekiso wakhe. Sajabula kakhulu.

UMbuso wasebenza futhi njalo! Kumele ngiphinde njalo ngibuze umbuzo. “Wayibamba njani inhlanzi leyana?” Mina selokhe ngabamazi lokhe satshadayo sengambona esiyathiya kabili kuphela, ukuyathiya inhlanzi vele kwakungayisikho kwakhe. Ngangilokhu ngimangala ukuthi wayefune njani vele ukuyabamba *ihalibut*. Kodwa wayelezizatho zakhe; wayefuna ukuyabamba eyayizangoba *iderby*! Wanqoba ngokunjalo. Sathi sesixhumana lomholi wase-Alaska, sayabelana laye ngoMbuso kaNkulunkulu lokuthi inhlanzi leyana sasiyibambe njani. Noma kwakungayisiyo eyayinqobile, ngesikhathi sitshiya umholi leliyana langa, inhlanzi yayinkulu kakhulu ukuba ithole ukunaka kwakhe. Njalo ngeqiniso, yacina iphuma phambili.

Usungacabanga ukuthi indaba yethu, kumbe ngingathi indaba kaDrenda eyenhlanzi enkulu iphelela lapho. Ngiyazi abanye abantu sebengacabanga ukuthi yena wabalenhlanhla nje kuphela, kodwa kabili konke? Yebo ke, ngemva kweminyaka emihlanu, mina loDrenda sanxusa umngane wethu owayengumfundisi ukuba siye e-Alaska ukuyathiya uhlobo lwenhlanzi oluthiwa yi*salmon*. Sasingakaze sibuyele khona kusukela kuhambo lwethu nge RV silemuli ngakho sasihlala sidinga isizatho sokubuyela. Saphinda njalo saqhatsha iRV sahlela ukuyathiya ama *salmon* njengoba *isalmon* ethiwa yi *sockeye* yayivamile. Ngakho sathi sithiya *isalmon*, ingxoxo yacina isikhuluma ngokubanjwa kwama *halibut* lenhlanzi kaDrenda Umngane wethu wayengakaze ayethiya *ihalibut*, ngakho sathi kuye, “Ngokunjalo, kasambe ke.” Sacabanga ukubuyela endaweni efanayo lokuyasebenzisa umholi wezikepe zokuqhatsha esasimsebenzise kuqala nxa ibhizimusi lakhe lalilokhu lisaphila.

Satshayela ke sisiya lapho ayekade etholakala khona, sathola ukuthi wayengasekho sacabanga ukusebenzisa omunye umholi.

Singakenzi lokho kodwa, sacabanga ukukhangela ku-*Internet* ukubona ukuba sasingeke sithole ibizo lakhe na, njengoba elbhizimusi lakhe kumbe elesikepe sakhe sasingasalikhumbuli. Ngemva kokuphendla, senelisa ukuthola ucezu lwephephandaba elalilandisa ngendaba yenhlanzi kaDrenda, lilokhe lilomfanekiso wakhe owathathwa sokudlule iminyaka emihlanu. Kwakulotshwe ibizo lesikepe kanye lebizu lenhlanganiso, ngakho saphanga samtshayela ucingo, sakhuluma laye ukuze siqedisise. Inhlanganiso yakhe yayilokhu ikhona kodwa yayisitshedile ngamamayela amahlanu kusehla ngomgwaqo.

Sathi singena kubhizimusi labo, owesifazana owayephambili, owayengunkosikazi womholi engumnini, waphakamisa ubuso wasikhangela wathi, “Ngangu umnqobi *wehalibut!*” Sakholisa ukuxoxa laye okwemizuzu emilutshwane mayelana *lehalibut* enkulu langalokho okwakukade kusenzakala kuminyaka emihlanu eyayidlulile. Kwakube lesimo esibi esomnotho ngakho izinto zazingahambi kakuhle kubhizimusi labo. Wasitshela ukuthi abantu babengasavakatshi kangako noma ukuchitha imali yabo bethiya njengakudala, njalo umyeni wakhe wayesedumazeka. Samkhumbuza ngoMbuso, wasitshela ukuthi umyeni wakhe wayengakuthokozeli ukusebenzela uNkulunkulu.

Sathi sesingena esikepeni, yena laye umyeni wakhe, wakhumbula uDrenda lenhlanzi enkulu. UDrenda wamlanda wafika wambuza ukuthi zazihamba njani ezokuthiya, wabephendula ukuthi wayekade ebamba ezincane uma eqathanisa lalezo ayekade ezibambela i*Derby*. Kodwa wathi ezinkulu zazingekho kuleyo ndawo ngoba amanzi ayengatshoni kangako. Waqhubeka wachasisa ukuthi isizatho esasimenze wathutha esusa ibhizimusi lapho elalikhona yikuthi lapho ayethiya khona, lalapho uDrenda ayebambe khona eyanqoba

iDerby, kwakutshona kodwa kwakugcwele amashark. Amashark ayebamba isithiyi singakafiki ngaphansi, ngakho kwasokumqedele izithiyi kanye lesikhathi esinengi.

Ngakho sambuza ukuthi wayesejayele ukubamba ezingakanani endaweni entsha, wathi wayengazange abone inhlanzi eyedlula amaphawundi angu 20 kusiya kwangu 30 ngenyanga eyodwa. Ngakho uDrenda wamkhangela wathi, “Kuhle ke, mina ngizakubambela enkulu namuhla, enkulu kulalezo osujayele ukuzibona, ukuze wazi ukuthi uNkulunkulu uthembekile.” Kodwa yena wamenza inhlekisa nje. Ilanga lonke sasilokhu sibamba ezingama phawundi angu 20 kuphela njengokwakukhulunywe ngumholi, njalo umholi wayelokhu eqala uDrenda nge “nhlanzi enkulu” ayezayibamba. Uhambo lwethu loluyana lwasoluziphinda.

Ilanga lathi seliphelile, umholi wasitshela ukuba sidonse izigodo zokuthiya sizigaxe, uDrenda akazange alalele, ethi ufuna umzuzu noma emibili ukuba abambe inhlanzi enkulu. Futhi njalo, umholi walinda umzuzu owodwa wasemtshela ukuthi kwakumele kuhanjwe. Kulapho ke isigodo sakhe esadonseka khona ngamandla, ngamafitshane, wabamba eyayingamaphawundi angu 70. Umholi wamangala njalo futhi.

Sathi sesisekhefa ngemva kokuthiya inhlanzi, sakhuluma lomunye umholi oqhatshisa izikepe owayesidla isidlo sakusihlwa lapho. Wathi esizwa ukuthi uDrenda wayebambe engamaphawundi angu70, kwaba nzima ukuba akholwe. Belithiya ngaphi; belikhatshana okungakanani? Wayefuna ukwazi ukuthi sasiyibambe ngaphi inhlanzi enkulu. Sathi sesiphumile ekhefa, kwakumele sibuyele kunhlanganiso eqhatshisayo siyebhalisa ukuba inhlanzi ithunyelwe ngekhaya.

Singakayehlukani lomholi, saba lelinye ithuba lokwabelana laye

ngoMbuso kaNkulunkulu. Ngamkhangela umholi ngathi kuye, “Kumele udingisise ukuthi inhlanzi lezi unkosikazi wazibamba njani. Imithetho yoMbuso iyasebenza lasemalini.” Khathesi ke wayesefuna ukulalela, wayekhanya efuna. Samtshiyela ugwalo lwami oluthiwa, *Fixing the Money Thing* sahamba.

Inhlanzi lezi ezimbili zabanjwa ngenhlanhla na kumbe ngomthetho woMbuso? Zicabangele lawe, kodwa mina loDrenda sabakwazi kudala. Kusukela sihamba sisiyathiya, ukuphuma ezikweledeni, kumbe ukusiliswa, izehlakalo zethu loMbuso kaNkulunkulu zazijabulisa njalo ziguqula impilo. Abanye basahlangana lawo uMbuso ngokunjalo. Nansi incwadi evela kowesifazane owezwa indaba kaDrenda.

Ngiyalibingelela Gary loDrenda,

Ngicabange ukuthi njengoba sengifunde ugwalo lwenu olukhuluma ngalapho uDrenda aze abambe *ihalibut* eyamtholela umklomelo, lami, ngokufanayo, kumele ngabelane lani eyami iNdaba yeNhlanzi. Sathatha uhambo lwekhedu sisiya eCocoa Beach/Cape Canaveral, eFlorida. Umyeni wami, uRobert, wayefuna singene esikepeni esasisiyathiya inhlanzi enzikini yolwandle elethemba lokuthi sizaphenduka lenhlanzi ngekhaya, sesiphendukile eColorado. Sasesilenyanga sihlela lolu hambo, ngakho wathi engitshela ukuthi wayefuna siyethiya, ngajabula kakhulu ngathi, “Asenze njalo! Futhi kasikholwe ukuthi uNkulunkulu uzakwenza sigole ezinengi!” Ngabuza uRob ngenhlanzi ezazitholakala eFlorida lapho esasithiya khona. Kuzo zonke inhlanzi ayengitshela ngazo, ngakhetha ukukhuleka ngokukholwa ukuthi sizabamba *ired snapper* enkulu.

Lwafika ke usuku njalo sasilindele ukulayelwa ngumholi

wesikepe labanye abasebenza laye. Ngangilokhu ngifakaza ukuthi ngizabamba inkalakatha *yered snapper*, ngakho intokozo yami yayisengezwa lapho umholi ekhuluma. Ngadumazeka kakhulu ukumuzwa umholi ethi inhlanzi esasingeke sizithole *yibass*, *iflounder*, le *red snapper*! Ugh, ngacabanga; yikuyini okunye engingabeka kukho ukholo lwami?

Ngakho ke, ngangingeke ngikhuthe ithuba lokusebenzisa ukholo lwami. Ngathi, “Nkosi, bengikade ngikholwa ukuthi ngizabamba inkalakatha *yered snapper*, kakube njalo, ngizayibamba ngithole lezinye inhlanzi zokuthwalela ngekhaya!

Ngakho ngathi ngisesikepeni, ngatshibilikela kundodakazi yami eleminyaka engu 8, uRachel, ngathi, “Khumbula ukuthi uyenelisa ukuthandaza ukholwe kuNkulunkulu ukuba uzabamba inhlanzi namuhla. Uyakholwa na?” Yena wabobotheka wanqekuzwa ikhanda evuma. Ngatsho inkuthazo efanayo kundodakazi yami eleminyaka engu 21, uJordan. Yena wangikhangela emangele wasevuma. Ngakhangela uRob ngathi, “Kasikholwe ukuthi sizathiya okuzwayo!”

Kwadelula amahola ambalwa kodwa akukho okwathuza izithiyo zethu ezazilokhu zimi. Kwathi masinyane, isithiyo sikaRachel sathuzwa wajabula kakhulu. Wabiza uyise ukuba amsize. Ngemva kwemizuzu emilutshwane, badonsa i-*Atlantic shark*! Habe, uRachel wayeyibambile indaba yokukholwa! Ngakho samkhuthaza. Intshantshu engaka!

Ngikhumbula sengiqala ukucabanga ukuthi mina ngangingasoze ngibambe lutho, kodwa ngawuvimba lowo mcabango ngafakaza ukuthi ngasengiyitholile inhlanzi yami. Ngahlala phansi ngaphumula ngezwa uNkulunkulu esithi, “Ungahlala phansi ungekele ngilethe inhlanzi kuwe,

uzayithola.” Yebo ke, ngangingayisiyo ngcitshi kwezokugola inhlanzi, ngakho ngangingeke ngithembe ukwanelisa kwami. Ngahlala ke phansi ngakhokha umoya wokuthembela kuNkulunkulu ngalinda. Ngemva kwemizuzu engu 20 kusiya ku 30, sathintwa isithiyo sami; ngangithi sithintiwe nje kancane, kodwa kwakuyinhlanzi enkulu kakhulu.

Umkami waqala ukungisiza engilayela, umholi wabuya laye wenza okufanayo. Wangitshela ukuthi ngangidonsa inhlanzi enkulu kwasokungaba yi *snapper* enkulu. Ngamangala ukuthi wayesazi ukuthi yinhlanzi bani ingakakhanyi! Ngeqiniso, ngaqhubeka ngidonsa, yaze yathutsha *ired snapper* yami enkulu eyayingama phawundi angu 20!! Ngaqala ukubonga uNkulunkulu ngenjabulo lentokozo enkulu. Ngangisazi ukuthi ngasengithole ukubhobokela okholweni lwami. Ngaqhubeka ngikhumbula ukuzethemba kukaDrenda ngacabanga ukuthi lami ngangisenelisa ukuba lokholo olufanayo. Ngazimisela njalo ngathola impumela enhle.

Ngiyabonga ngenkonzo yenu langengwalo elizilobayo, kugoqela oluthiwa *The Faith Hunt*. Ngigcwele ukubonga kuNkulunkulu lakunkonzo yenu esingisize ukuba ngingene kuzibusiso ezinkulu. Ngikhangelela ikusasa ngokholo olukhulu kanye lentokozo. Ngiyazi futhi ukuthi isehlakalo lesi sathinta kakhulu imuli yami!

Ngobuqotho,
S.T.

ISAHLUKO 5

KWAKULUKHETHO LUKABANI?

Kundaba engike ngaziloba, siwubonile uMbuso kaNkulunkulu uthela izithelo, lapha emhlabeni,inja, inhlanzi, imali yokuhlawulela indlu, imali yokuhlawulela izimota lemizi edingakala empilweni, ukusinda kwempilo zabantwana abathathu, lokunengi. Zonke izindaba lezi zalethwa nguMbuso kaNkulunkulu, kumbe kahle ngikwenze kube seduzane, uMbuso kaNkulunkulu WETHU! Akumelanga simangale ngoba uMbuso Wakhe ulobukhulu obungelinganiswe.

UPhethro wesibili 1:3a uthi:

Amandla akhe aphezulu asesinike konke esikudingayo ekuphileni kanye lobunkulunkulu.

Kuzo zonke indaba esesizikhangele, ngifuna ukubuza umbuzo oqathekileyo, “Kwakulukhetho lukabani?” Engikutshoyo yilokhu: uNkulunkulu wavela nje wacabanga ukunikeza uKirsteninja, kumbe ukunikeza inhlanzi kunkosikazi wami, uDrenda? Izenzakalo lezi yizinqumo ezenziwa nguNkulunkulu nje ngenxa yentando

yakhe ephezulu? Kumbe singabakhona yini esinye isizatho sokwenzakala kwezinto lezi? Ngicabanga ukuthi impendulo izamangaza abantu abanengi. Mina ngiyazi yangimangaza.

Ukuphendula umbuzo lo, kasikhangele indaba yeBhayibhili ekuLukha 8,

Kwathi uJesu esesiya khona, abantu baminyezela ingathi bazampatshaza. Khonapho kwakulowesifazane owayeseleminyaka elitshumi lambili esopha, kodwa kungekho owayengamelapha. Weza ngemva kukaJesu wathinta umphetho wesembatho sakhe, masinyane nje ukopha kwahle kwaphela.

“Ngubani ongithintileyo?” UJesu wabuza. Kwathi ngoba bonke bephika, uPhethro wathi, “Nkosi, abantu bayaminyezelana besondela kuwe.” Kodwa uJesu wathi, “Ukhona ongithintileyo; ngiyazi ukuthi amandla aphumile kimi.”

Owesifazane esebone ukuthi uzacina eboniwe, weza ethuthumela wazilahla ezinyaweni zakhe. Wachaza phambi kwabantu bonke ukuthi kungani wayemthintile uJesu lokuthi wasiliswa njani masinyane.

UJesu wasesithi kuye, “Ndodakazi, ukholo lwakho lukusilisile. Hamba ngokuthula.”

— ULukha 8:42-48

IBhayibhili liyacaca ukuthi uJesu wayeminyezelwa empantshazwa nxa zonke, njalo loPhethro wamangazwa ngumbuzo kaJesu, “Ngubani ongithintileyo?” Njengalowo ophenya ahlaziye izinto zikamoya, ngifuna ukwazi, kumele ngibekwazi, ukuthi kungani umama lo wasiliswa yena yedwa. Kungani ugcobo lwagelezela

kuye lwangagelezeli kwabanye bonke ababemthintile ngaleso sikhathi? Impendulo ilapha, kodwa ngingakawuphenduli umbuzo lowo, kahle sibuze omunye. UJesu wayekhonzisa kuye ngabomona? Wayembeke izandla na? Impendulo ngethi hatshi; ngempela, uJesu wayengazi lokuthi wayekhona. Yena wenza okokubuzisa ukuthi ngubani owayedonse ugcobo Kuye ngoba wayengambonanga. Ngakho kwakulukhetho lukabani olwamenza wasila lelo langa?

Kahle ngibuze ngenye indlela. UNkulunkulu wakhetha ukumsilisa ngaleso sikhathi kumbe kwakuyisinqumo sakhe ukuba ayamukele okubela kuNkulunkulu? Lo ngumbuzo oqakathekileyo njengoba kulabantu abanengi “abalindele” ukuthi uNkulunkulu enze okuthile empilweni zabo. Ngikholwa ukuthi njengoba uJesu wayengazi lokuthi wayekhona lapho kutshengisa ukuthi kwakuyisinqumo sakhe ukuba ayamukele hatshi esikaJesu ukuba amsilise.

Khathesi, lokhu kuvula esinye isambulo esiqakathekileyo, njalo siyilokhu—uNkulunkulu akakhethi kusilisa umuntu othile ekele ukusilisa omunye nganoma yisiphi isikhathi. Yena usinikile ukuba sifinyelele ukusiliswa ngendawo yethu yomthetho eMbusweni Wakhe. Ngakho eqinisweni, yithi esikhethayo. Kodwa ngifuna ukwazi, yena wawathinta njani amandla lawo? Wathatha njani “isinqumo” sokuba ayamukele? UJesu usitshela kahle indlela eyasebenza lapha ukuba athinte amandla oMbuso. Wathi, “Ndodakazi, ukholo lwakho lukusilile. Hamba ngokuthula.” Umutsho lo usitshela konke esikudingayo ukuze sazi njalo uphendula umbuzo wethu mayelana lokuthi kungani yena wayamukela abanye bonke bengazange bamukele mhla lokho. Njengabososayensi bakamoya, kasiqale ukukhangelisisa indaba le sibone ukuthi singathola yini imikhondo ezasitshengisa ukuthi kungani yena wayamukela.

Okwakuqala, uJesu umbiza ethi “ndodakazi,” okutsho ukuthi

wayengowesizweni sika-Isirayeli. Lokhu kutsho ukuthi wayelesivumelwano loNkulunkulu. Noma usungathi, wayelelungelo lasezulwini njengomhlali wase-Isirayeli ukuba ayamukele kuNkulunkulu. Iqiniso leli kalingeke libe yiso sodwa isizatho esamenza wayamukela njengoba wonke umuntu owayelapho empantshaza uJesu wayelelungelo elifanayo. Kwakumele kubekhona okunye okwayenza amandla ageleza. UJesu usitshela esinye isizatho esisodwa esamenza wayamukela. Eqinisweni, uJesu wathi lesi yiso nta isizatho esamenza ayamukele. Wathi ukholo lwakhe lwalumsilisile.

Ngakho khathesi sesikwazi isizatho esamenza wenelisa ukwamukela. Okwakuqala, kwakulilungelo lakhe ngokomthetho ukuba ayamukele njengoba wayeyindodakazi ka-Abhrahama; njalo okwesibili, ukholo lwakhe lwaba yisilumathiso esavumela ukuba amandla ageleze engena emzimbeni wakhe ngaleso sikhathi. Ukuthi wayeyindodakazi ka-Abhrahama, okutsho ukuthi wayesima phambi kwezulu ngaphansi kwesivumelwano esabekwa nguNkulunkulu ku-Abhrahama, kungaqathaniswa labenhlanganiso yamagetsi abaletha amagetsi lentambo zawo endlini yakho. Kodwa lokho akutsho ukuthi izibane zizakhanyisa. Kumele uthinte isikopela emdulwini ukuze izibane zikhanyise. Ngakho khathesi okumele sikuthole yikuthi isikopela singaphi noma sona siyikuyini. UJesu wathi lukholo lwakhe, kodwa ukholo luyini njalo siluvusa njani? Lo ngumbuzo omqoka okumele siwuphendule.

Luyini Ukholo?

Ukholo libala elikhulunywa kalula ngamaKhristu amanengi. Njalo ngileqiniso lokuthi inengi, nxa kungasi phose onke, awakwazi ukuthi ukholo luyini, lusebenzani, kuzwakala njani nxa ulokholo,

lokuthi lutholakala njani. Nxa ukholo kuyiso isikopela esasilisa umama lo, kutsho ukuthi kumele sikhangelisise ngonanzelelo kulo ukholo! Sithola ingcazelo yokholo KwabaseRoma 4:18-21. O, ngiyazi usucabangani, “Hatshi Gary, KumaHebheru 11:1 yikho okulengcazelo yokholo.”

Ukukholwa yikuba leqiniso lalokhu esikulindeleyo njalo kuqinisekile ngalokho esingakuboniyo.

— KumaHebheru 11:1

Yebo, le yiyo impendulo ejwayelekileyo, kodwa ungawukhangela umbhalo lo, KumaHebheru 11:1 sitshelwa ngenzuzo yokholo, hatshi ukuthi lona luyini. Ngikholwa ukuthi umbhalo wethu oKwabaseRoma uzasinikeza umfanekiso ocacayo wokuba ukholo luyini.

Kungekho themba, u-Abhrahama ngethemba wakholwa waba nguyise wezizwe ezinengi, njengoba kwakutshiwo kuye ukuthi, “Izakuba njalo inzalo yakho.” Engekethisanga ekukholweni kwakhe, wamelana lobuqotho bokuthi umzimba wakhe wawusufana lofileyo—njengoba wayeseleminyaka ephosa ibe likhulu ubudala—kanye lokuthi isibeletho sikaSara laso sasesifile. Khepha akazange atshede ngokungakholwa kusithembiso sikaNkulunkulu, kaqiniswa ekukholweni kwakhe, wapha udumo kuNkulunkulu, ekholwe ngesiqiniseko esipheleleyo ukuthi uNkulunkulu wayelamandla okwenza lokho ayekuthembisile.

— KwabaseRoma 4:18-21

Kasizwisiseni isimo sale indaba. U-Abhrahama loSara

babesehluleka ukuba labantwana. Kangitsho ukuthi babezama ukuba lomntwana njalo kwakumele baqhubeke bezama. Ngitsho ukuthi laba bantu basebesiyabamba iminyaka engu 100, kwasokubaphelele. Imizimba yabo yayingasenelisi ukwenza abantwana; kwakunzima! Kodwa uNkulunkulu wayethembise

"UKUKHOLWA YIKUBA

LEQINISO LALOKHU

ESIKULINDELEYO NJALO

KUQINISEKILE NGALOKHO

ESINGAKUBONIYO."

— KUMAHEBHERU 11:1

u-Abhrahama umntwana noma ngokwemvelo kwakungasayenzi. IBhayibhili lithi u-Abhrahama wayekholwe ngesiqiniseko esipheleleyo ukuthi uNkulunkulu wayelamandla okwenza lokho Yena ayekuthembisile, noma iqiniso lemvelo lalisitsho okutshiyeneyo.

Nansi ke ingcazelo yethu yokholo: "ukukholwa ngesiqiniseko esipheleleyo ukuthi uNkulunkulu ulamandla okwenza lokho Yena ayekuthembisile." Mina ngikubeka ngale indlela: **Ukuvumelana lezulu**, hatshi ngengqondo kuphela kodwa ukukholwa ngesiqiniseko esipheleleyo, inhliziyo zethu sihlalisekile njalo zileqiniso ngalokho okutshiwo nguNkulunkulu, kungakhathalekile ukuthi imvelo yomhlaba itshengisani.

Ingcazelo Yethu Yokuthi Ukholo Luyini:

Ukholo yikukholwa ngesiqiniseko esipheleleyo kulokho okutshiwo nguNkulunkulu! Yilapho inhliziyo kunye lengqondo yethu okuvumelana khona lezulu, inhliziyo zethu zikholwa ngesiqiniseko esipheleleyo, ngokuzethemba langokuhlaliseka.

Kungani Ukhulo Ludingakala?

Kungani uNkulunkulu engasilisi wonke umuntu esibhedlela nxa efuna? Kungani Yena engaqedi izimpi? Kungani Yena engathumeli izingilosi ukuba zitshumayele iVangeli kithi? Ngethemba usuke wayizwa imibuzo le ngaphambilini. Impendulo yikuthi Yena akenelisi. Akusikho kodwa ukuthi uNkulunkulu akala mandla okukwenza lokho kodwa akalayo imvumo yomthetho noma amandla okubusa awokwenza lokho. “Gary, utsho ukuthi uNkulunkulu akenelisi ukwenza noma yini ayifunayo?” Ngiyazi ukuthi lokhu kuzwakala kungaqondanga kuwe, kodwa ake sikhangele iBhayibhili ukuze sithole impendulo yalapha.

Kodwa ikhona indawo lapho omunye ofakaza khona esithi:

“Uyini umuntu osungaze uzihluphe ngaye na, loba indodana yomuntu ukuba uyinanze na? Wamenza waba mncinyazana kulezingilosi; wamethesa umqhele wodumo lobukhosi, wabeka lezinto zonke ngaphansi kwezinyawo zakhe.”

Ekubekeni izinto zonke ngaphansi kwakhe, uNkulunkulu katshiyanga lutho olungekho ngaphansi kwakhe. Kodwa khathesi kasiboni zinto zonke zingaphansi kwakhe.

— KumaHebheru 2:6-8

Siyabona kulo umbhalo ukuthi uNkulunkulu wanikeza umuntu umthetho wokubusa phezu komhlaba wonke aze ambeke kuwo. Akukho okwakungekho ngaphansi kwakhe.

Wayebusa kule indawo ngamandla wonke awokubusa. Ukwanelisa kwakhe ukubusa kwakusekelwa ngamandla kahulumende owayembeke lapha. Ngezinye indlela, umuntu wayebusa ngamandla ayewaphiwe nguMbuso kaNkulunkulu. Wayegqoke umqhele kahulumende lowo, owawumela inkazimulo kaNkulunkulu, ugcobo, lesikhundla senhlonipho ayelaso.

Ukuze sithole umfanekiso omuhle owalokhu, cabanga inkosi yalapha emhlabeni. Noma engumuntu wemvelo engela mandla aqotho nxa esesimeni sakhe sobuntu, yena ugqoka umqhele otshengisela ukuthi umela umbuso wonke kunye lohulumende. Amazwi akhe alamandla ngoba asekelwa ngamandla lezinsiza zemvelo ezikahulumende lombuso awumelayo.

Ungacabanga ngomuntu olipholisa lesiqinti oqondisa izimota emgwaqweni, yena uyayimisa inkalakatha ye tractor truck ngokuthi, “Mana ngegama lomthetho.” Yebo, yona itruck inkulu kulaye, njalo yena, ngokwakhe, ngeke azilinganise letruck, kodwa itruck iyama. Iyama hatshi ngenxa yendoda le kodwa ngenxa yebheji, emela uhulumende, eyabe igqokwe yindoda le. Kule indaba, uhulumende umkhulu kakhulu kulendoda egqoke ibheji. Umtshayeli *we-truck*, akusikho ukuthi wesaba indoda le, kodwa wesaba uhulumende omelwa yile indoda, okwenza ukuthi itruck ime. Okufanayo kuliqiniso lapha. U-Adamu wabusa phezu kwakho konke okwakudalwe emhlabeni. Amandla kaNkulunkulu okubusa, ayetshengiswa ngumqhele wenkazimulo lenhlonipho, ayenikeza umuntu isiqiniseko sokuthi amazwi akhe ayebusa endaweni yoMbuso kaNkulunkulu.

Kuqakathekile ukubamba ukuthi u-Adamu walahlekelwa ngamandla akhe okubusa phezu komhlaba ngokwenza umvukela emisana lohulumende kaNkulunkulu, waselahlekelwa ngumqhele

wakhe. Umhlaba wangcoliswa waguqulwa. Ukufa kwangena emhlabeni, uSathane wahle waba lelungelo kanye lamandla phezu kwendaba zabantu. Kubalulekile ukuba uzwisise futhi ukuthi umuntu nguye umbusi womthetho emhlabeni, njengoba wabekwa nguNkulunkulu, kodwa khathesi akaselawo amandla okubusa ngokomoya njengakudala. Noma esewile, kodwa ke, lokhe ephethe umhlaba. Yebo, yena akaselawo umqhele kahulumende kaNku-

**YINGAKHO UNKULUNKULU
KUMELE ASEBENZISE
ABANTU ABAGCWALISWE
NGUMOYA UKUBA BENZE
INTANDO YAKHE EMPILWENI
ZABANTU.**

lunkulu omsekelayo. Akalawo amandla okubusa ngamandla kaNkulunkulu kunye lenkazimulo; sowalahlekelwa yisikhundla sakhe senhlonipho. Kodwa ulokhe engumnyango osemthethweni wokungena emhlabeni. Yingakho uNkulunkulu kumele asebenzise abantu abagcwaliswe nguMoya ukuba benze intando Yakhe empilweni zabantu. Ngendlela efanayo, uSathane usebenzisa abantu abalamadimoni ukuba afinyelele umhlaba ukuze afeze uhlelo lwakhe ngomuntu. Isimiso samandla omuntu awokubusa emhlabeni siqakathekile ukuze uzwisise imithetho yoMbuso, njalo ungazwisisa, sizaphendula imibuzo eminengi ongabalayo kusasa mayelana lokuthi kungani ezinye izinto zisenzakala, kumbe kungani zayenzakala kumbe kungani zingenzakali ngokomoya.

Usungathi, “Kodwa bengicabanga ukuthi uNkulunkulu nguye umnini womhlaba lokugcwala kwawo?” Liqiniso, Yena ungumnini. Ngithemba isizatho lesi sizakuchasisela uzwisise engikutshoyo. Ngingakuqhatshisa indlu yami, noma iyabe ingeyami ngokomthetho, ngiyabe sengingaselalo ilungelo lokuzongena noma nini. Kukhona umutsho olotshwa kuzivumelwano zokuqhatshisa

izindlu otsho ukuthi abanini bezindlu sebengangena endlini zabo abaziqhatshisileyo—isibonelo, nxa kukhona okuphuthumayo kumbe okufuna ukulungiswa—lokuthi kumele bazise umqhatshi kusase lesikhathi. Ngingazama ukungena endlini le ngaphandle kwesivumelwano lesi, kuyathiwa yikungena ngokugqokeza, noma kuyindlu yami. Ngingekela ukulandela umthetho olotshwe kusivumelwano, umthetho usungangiphoqa ukuthi ngisuke kuleyo ndlu noma ingeyami. Lokhu kubonisa ukuthi kungani uSathane wangena emhlabeni esebenzisa u-Adamu. Ngu-Adamu kuphela owayelesihluthulelo! USathane kwakumele angene ngomnyango njalo u-Adamu nguye owayeyiwo. Ngabe uSathane wazama ukubhoda ngemva kuka-Adamu, wayeyaxotshwa ngokomthetho.

USathane wamholela endaweni ephakemayo wamtshengisa ngesikhathi esifitshane yonke imibuso yomhlaba. Wasesithi kuye, “Ngizakunika amandla lenkazimulo yayo, yonke ngoba kuphiwe mina, njalo ngingapha loba ngubani engifuna ukumupha. Ungangikhonza konke kuzakuba ngokwakho.”

— ULukha 4:5-7

Uyabona kule indima ukuthi uSathane uthi amandla lenkazimulo (inotho) yemibuso yasemhlabeni isinikezwe yena. Ngubani owamnikeza amandla lawa? Lowo owayelawo, u-Adamu! Yikho uNkulunkulu kangeke atheleke nje endabeni zabantu engangenanga ngesango elilungileyo. Ngabe Yena wayengakwenza lokho, uSathane wayeyakuthi uyaqila. Hatshi, uNkulunkulu laye kumele angene ngomnyango ofanayo owasetshenziswa nguSathane ukuze alethe uhulumende kanye lamandla Akhe ukuzophatha umhlaba, umnyango lo ngumuntu. Kodwa wake wabakhona na umuntu onje?

INKOSI yathi ku-Abhrama, “Suka elizweni lakini, lebantwini bakini lasendlini kayihlo uye elizweni engizakutshengisa lona. Ngizakwenza ube yisizwe esikhulu, njalo ngizakubusisa. Ngizakwenza ibizo lakho libe likhulu, njalo uzakuba yisibusiso. Ngizababusisa labo abakubusisayo, lalowo okuqalekisayo ngizamqalekisa; njalo bonke abantu emhlabeni bazabusiswa ngawe.”

— UGenesisi 12:1-3

U-Abhrahama ubizwa kuthiwa ngubaba wokholo lwethu ngoba nguye owavula umnyango wemhlabeni owokuthi uNkulunkulu abusise zonke izizwe zomhlaba. Yebo ke, nxa indima le ikhuluma ngokubusiswa kwezizwe, ikhulume ngoJesu Khristu, owayezalungisa indlela yokuthi uhulumende kaNkulunkulu athole ilungelo emhlabeni ngokholo luka-Abhrahama. Ukholo luka-Abhrahama lwavulela izulu umnyango osemthethweni, owavulwa kokuphela nguNkulunkulu ngokwenza isibopho somthetho (isivumelwano) lo-Abhrahama lentanga yakhe lezindlalifa. Kahle ngichaze kabanzi engikutshoyo.

**“NGAKHO-KE,
UKUKHOLWA
KUELA EKUZWENI
ILIZWI, LELIZWI
LIZWAKALA NGELIZWI
LIKAKHRISTU.”**

— KWABASEROMA 10:17

Uhulumende wasezulwini uthola ukungena kuphela emhlabeni ngowesilisa kumbe owesifazane osemhlabeni ngoba uyabe elamandla okubusa lapha. Okusemthethweni lokhu kwenzakala kuphela kowesilisa lowesifazane okholwa ngesiqiniseko esipheleleyo lokho okutshiwo nguNkulunkulu (ukholo).

Eyinye indlela yokukubeka ngayo yikuthi izulu lenelisa

ukufinyelela owesilisa lowesifazane ngokusemthethweni nxa lowomuntu efisa njalo ekhetha ukuzibeka ngaphansi kwamandla lokubusa kukaNkulunkulu. Lesi yiso isimiso esasetshenziswa nguSathane ukungena emhlabeni, esebenzisa u-Adamu ukuba enze njalo. Yena wavumisa u-Adamu ukuba angamethembi uNkulunkulu wasusa inhliziyi ka-Adamu kusivumelwano loNkulunkulu. Ngakho ke, u-Adamu wakhetha ukukholwa uSathane walahla amandla kaNkulunkulu.

Lesi yisimiso esifanayo esiyasetshenziswa nguNkulunkulu ukuphendukisa uhulumende Wakhe lamandla emhlabeni ngo-Abhrahama. U-Abhrahama wakholwa kuNkulunkulu njalo isivumelwano sakhe sabalwa nguNkulunkulu njengokulunga, kusitsho ukuthi isivumelwano semthethweni esasidingeka sasikhona. Isivumelwano lesi sasingesababili, uNkulunkulu lo-Abhrahama, sivumela uNkulunkulu ukuba abeke isibopho somthetho (isivumelwano) endaweni eyayiqinisa ukufinyelela kwezulu emhlabeni, KODWA kuqakathekile ukwazi ukuthi isivumelwano lesi sasingesika-Abhrahama lendlalifa zakhe. Uphawu lwesivumelwano lesi lwanikezwa zonke indlalifa zika-Abhrahama, ukusokwa. Ukusokwa kwakuyikusikwa kwejwabu lesitho sendoda. Indoda yayithi lapho ihlanyela inhlangano phakathi kowesifazane, inhlangano yayo yayidlula ngesitho esisokiweyo, okwakubonisa uSathane lobaba lomama ukuthi umntwana lo wayesima phambili kwezulu njengendlalifa yesivumelwano somthetho esasibekwe nguNkulunkulu lo-Abhrahama.

Njengoba sike safunda, kodwa ke, wonke owesifazane lowesilisa, noma isivumelwano somthetho sitholakala kuye, kwakumele agcwalise isidingo somthetho esokuba inhliziyi yabo ikholwe ngesiqiniseko lokho okwatshiwo nguNkulunkulu ukuba

kuzakuba yinzuzo eyinjabulo eyesivumelwano. Ngempela, isivumelwano kwakuzintambo zamagetsi ezazisendlini yabo, kodwa kwakumele bathinte isikopela ngokukholwa lokulenza iLizwi likaNkulunkulu mathupha.

Kulungile, sesikwazi ukuthi ukholo luyini lokuthi kungani ludingeka ngokomthetho. Sokubalulekile ke khathesi ukuthi sibekwazi ukuthi ukholo siluthola njani lokuthi sazi njani ukuthi sesilalo.

Siluthola Njani Ukholo?

Nanku umkhondo: Ukholo kaluthandazelwa. Uyamangala? Ngiyazi.

Ngakho-ke, ukukholwa kuvela ekuzweni ilizwi, lelizwi lizwakala ngelizwi likaKhristu.

— KwabaseRoma 10:17

Ukholo luza njani ngokuzwa iLizwi likaNkulunkulu? Yikho kodwa nje kuphela? Kwenziwa njani? Ukuzwa iLizwi nje qha yikho okudingekayo ukuthi ukholo luthuthuke emoyeni womuntu? Ukuze sizwisise ukuthi ukholo luza njani lokuthi KwabaseRoma 10:17 kukhulunywa ngani, singakhangelanga uMakho isahluko 4; kuqakatheke ngalolo hlobo! UJesu watsho kuMakho 4:13 ukuthi uma ungazwisisanga ayekufundisa kulesi sahluko, kawusoze uzwisise ezinye zonke izindatshana eBhayibhilini. Lokhu sengingatsho ngithi kuqakatheke kakhulu!

Kungani isahluko lesi siqakatheke kangaka? Yingoba sona sisitshela ukuthi izulu lingena njani emhlabeni, ukuthi lithola

njani umthetho wokubusa, lokuthi lokho kwenzakala ngaphi. Akukho okunye okuqakathekileyo empilweni yakho kulokwazi ukuthi isahluko lesi sikhuluma ngani. “Umbuso kaNkulunkulu usebenza njani?” usungabuza njalo. Funda uMakho isahluko 4! Kulesi isahluko, uJesu usitshela indatshana ezintathu mayelana lokuthi ukholo luthuthuka njani emoyeni womuntu, njengoba ususazi, ukuthi lokhu kuyisidingo sokuthi izulu lingene emhlabeni.

Indaba ezintathu ezikusahluko lesi yindatshana yomhlanyeli, indatshana yendoda eyayihaza inhlanyelo, lendaba yentanga yemastadi.

Asiqale ngokukhangela indaba yesibili uJesu ayikhuluma kuMakho isahluko 4, indaba yendoda ehaza inhlanyelo.

Waphinda wathi, “UMbuso kaNkulunkulu ufana lalokhu. Indoda ihaza inhlanyelo emhlabathini. Ebusuku lemini ingabe ilele loba ikhangele inhlanyelo iyamila ikhule ibe lehlumela, loba yona ingakwazi ukuthi kwenzeka njani. Umhlabathi uyiwo wodwa uthela amabele—kuqala ikhaba, kuze isikhwebu, besekusiza inhlamvu ezikhwetshini. Kuthi amabele angavuthwa, iwavune ngesikela, ngoba ukuvuna sekufikile.”

— UMakho 4:26-29

Singakagxamukeli kule indima, kasiqale sichasise amabala ethu. Iyini inhlanyelo uJesu akhuluma ngayo, njalo uyini umhlabathi? UJesu uchasisa amabala la kundatshana elandelayo eyomhlanyeli kusahluko esifanayo. Inhlanyelo iyiLizwi likaNkulunkulu, njalo umhlabathi yinhliziyi yomuntu kumbe umoya womuntu. Ngakho kule indatshana, uJesu usebenzisa ezakhe ingcazelo zalawa amabala amabili, sesingathi uJesu uthi indoda ihaza iLizwi likaNkulunkulu enhlizweni. Uyiwo wodwa umhlabathi noma inhliziyi yomuntu

iyaqala ukuthuthukisa ukholo (isivumelwano sezulwini) emhlabeni.

Ngingakayiphambili, kubalulekile ukuba ukhumbule ingcazelo yethu yokholo: inhliziyo yowesilisa noma owesifazane oqinisekileyo ngalokho okutshiwo lizulu. Indima le ithi noma umuntu engakwazi ukuthi kwenziwa njani, iLizwi elahlanyelwa enhlizweni yakhe liyaqala ukukhula lilethe isivumelwano sodwa. Lokhu kwenzakala elele noma ekhangele; akukhathalekile, kuyaqhubeka. Lapho umuntu egcina iLizwi enhlizweni yakhe, kancane inhliziyo iyabe isiya ivumelana lalokho okutshiwo lizulu, ukholo soluqala ukubakhona.

Umbhalo wethu oyinsika okuMakho isahluko 4 usitshela ukuthi inhliziyo yiyo eletha isivumelwano ngendlela ethile. Indaba leyo isitshela ukuthi ekuqaleni inhliziyo yethu iyamukela iLizwi, ukholo besoluqala. UJesu ufanisa isikhathi lesi lehlumela. Ihlumela liyaqhubeka likhula beselisiba likhaba. Ngokuya, isikhwebu siyamila phezu kwekhaba, kodwa noma sokusekucineni kuyabe kungela sithelo, kungela sivumelwano, njalo kungala nguquko emhlabeni wemvelo. UJesu abesesithi lokhu kuyaqhubeka lapho isikhwebu simila besesithela amabele. Nxa umsebenzi usukulesi isimo, lapho imbewu evuthiweyo isiphezu kwesikhwebu, isivumelwano sibakhona, ukholo lubekhona, luvumela owesilisa noma owesifazane ukuba avune emhlabeni lokho okuhlanyelwe lizulu enhlizweni yomuntu.

Khatesi lalelisisa. Kasikhangele okwayenzakala ngempela. Izulu liyahlanyela iLizwi likaNkulunkulu emhlabeni, enhlizweni yowesilisa noma owesifazane odinga isivumelwano. Ngaleso sikhathi, inhliziyo yomuntu iyabe ingakavumelani lezulu, kodwa kuyaqala umsebenzi enhlizweni oletha inhliziyo, yona yodwa, ukuba ivumelane lalokho okuhlanyeliweyo. UJesu usebenzisa umzekeliso

omuhle owokusitshengisa umsebenzi lo. Nxa singawuqathanisa lomlimi ohlanyela inhlangano lokuthi ikhula njani, uJesu usinika umfanekiso wokuthi ukholo lunjani. Ngokwemvelo, nxa inhlangano ephezu kwesikhwebu isivuthiwe, izafana **XATHU** lenhlangano ebifakwe emhlabathini. Kahle ngiphinde futhi.

Nxa inhlangano ephezu kwesikhwebu isivuthiwe, izafana—XATHU—lenhlangano ebifakwe emhlabathini.

Ungahlanyela umumbu nxa intanga yawo isiyavuthwa iyakhupha lokho okufanana lenhlangano obuyihlanganelile. Kuyabe kufana, kukhangeleka kufana, kuzwakala kufana emlonyeni. Ngeke ubone umehluko kulokhu okubili; kufana xathu.

Ngakho kahle ngikubeke ngamanye amazwi lokho okutshiwo nguJesu. Uma sisizwa iLizwi, (KwabaseRoma 10:17), siyabe sihaza iLizwi likaNkulunkulu ngaphakathi komoya wethu, enhlizweni zethu. Singaligcina iLizwi lelo ezinhlizweni zethu, lizavuthwa; njalo uma selivuthiwe, imifanekiso esenhlizweni zethu (emhlabeni) izafana lalokho okutshiwo lizulu. Singakufaka ngamanye amabala ayehlukene, singatsho sithi lapho uhlanyela isithembiso sezulwini enhlizweni yakho, sona sizathela ithemba phezu kwalokho okutshiwo nguNkulunkulu sodwa. Ngokuya, inhliziyo yakho izakholwa ngesiqiniseko esipheleleyo lokho okutshiwo lizulu, besokusiba lesivumelwano. Isibonelo, nxa ukhangelane lomkhu-hlane, umzimba wakho uyabe ukhuluma lawe ukuthi uyagula. Lapho uhlanyela iLizwi likaNkulunkulu elithi uNkulunkulu usehlawulele ukusiliswa kwethu ngezenzo zikaJesu, inhliziyo yakho iyaqala ukuvuma lokho okutshiwo nguNkulunkulu yona yodwa.

Ilizwi uma livuthwa enhlizweni yakho, ithemba lokusila liba yilokho **wena** okukholwayo njalo okukhulumayo. Awusatsho nje ngamazwi lokho okutshiwo lizulu. Inhliziyo yakho isivuma

ngempela. Nxa usithi, “Sengisilisiwe,” akusiwo mazwi angela lutho nje owatshoyo; khepha, lokho ngokukholwayo njalo okwazi kuliqiniso. Lokho okutshiwo lizulu kuba ngumbono wakho weqiniso.

Yingakho KumaHebheru 11:1 kuthiwa:

Ukukholwa yikuba leqiniso lalokhu esikulindeleyo njalo kuqinisekile ngalokho esingakuboniyo.

Kulokuqiniswa okungaphezu kwemvelo mayelana lalokho okutshiwo lizulu nxa kulokholo, khepha kusasekhona elinye inyathelo lokugcwalisisa indlela le.

Umuntu sokumele athwale isikela avune, ukuze alethe ekuphileni, lokho aqiniseke ngakho enhlizweni yakhe.

*Kuthi amabele angavuthwa, **iwavune ngesikela**, ngoba ukuvuna sekufikile.*

— UMaKho 4:29

Nanzelela ukuthi noma inhliziyi ivumelana lezulu, njalo iqiniso lezulu selibe liqiniso kowesilisa noma owesifazane, akukho nguquko eqotho esiyenzakele ebambekayo. Ngenxa yokuthi umuntu nguye olamandla okubusa emhlabeni ngokwemvelo, nguye njalo okumele akhulule amandla lawo kule indawo. UNkulunkulu kangeke akwenze ngaphandle kowesilisa noma owesifazane. Ngingakutshengisa lokhu kumbhalo ojwayelekileyo esike sakhuluma ngawo.

*Ngoba ukholwa ngenhliziyo yakho njalo **ulungiswa** ngayo, njalo kungomlomo wakho **ofakaza** ngawo usindiswe.*

—KwabaseRoma 10:10

Ngenhliziyo umuntu uyakholwa iLizwi, ethuthukise ukholo, abeselungiswa. Ukulungiswa libala lomthetho elitsho ukusetshenziswa komthetho. Ngakho nxa inhliziyi yomuntu ivumelana lezulu, inhliziyi yakhe isikholwa ngesiqiniseko esipheleleyo lokho okutshiwo lezulu, yena uyalungiswa. Sokusemthethweni ukuba izulu ligelezele empilweni yakhe, emhlabeni. Kodwa ukulungiswa kodwa akuwakhululi amandla kaNkulunkulu. Njengendlu elamagetsi asuka esiteshi sawo, kulenyathelo elinye eliseleyo—yikulayitha emdulwini ukukhulula amagetsi, izibane besezikhanyisa. Kungani? Ngoba njengokutshiwo KwabaseRoma 10:10, kulelinye inyathelo elilodwa ngemva kokulungiswa.

Owesilisa noma owesifazane oma phambili kwezulu lomhlaba elungisiwe kumele afakaze noma enze okutshiwo yisivumelwano ukuze akhulule amandla logcobo lukaNkulunkulu emhlabeni. Ngicela ufunde umbhalo lwana futhi uphinde njalo uze uzwisise engikutshoyo. Kusebenza kanje! Izulu lithola kanje umthetho emhlabeni, nxa inhliziyi ixhumanisa izulu lomhlaba lapha, amazwi ethu lezenzo zethu kusiba yizikopela ezikhulula amandla ezulu. Ngicela ulalelisisa ingxenye yesibili kule indima: Yithi okufanele sikhulule amandla ezulu lapha.

Umnakano wokuthi izulu lilindela owesilisa noma owesifazane, kuqala, ukuba alethe ukuvunyelwa komthetho, okwesibili, amandla okubusa emhlabeni, ubonakala kulokho okwafundiswa nguJesu kuMathewu 16 lakuMathewu 18.

*Ngqiqinisile ngithi kini, konke elizakubopha emhlabeni
kuzakubotshwa lase zulwini, njalo elizakukhulula emhlabeni*

kuzakhululwa lase zuluwini

— UMathewu 18:18

UJesu uyatsho lapha ukuthi Yena wayezanikeza ibandla izihluthulelo (amandla) zoMbuso wezulu emhlabeni. Wathi noma yithi okubotshwa emhlabeni izulu lalizasekela, njalo noma yini okukhululwa emhlabeni, izulu lalizasekela. Futhi njalo, cabanga ipholisa; lona lilamandla, kodwa uhulumende ulamandla okubusa. Ipholisa lithwele isihluthulelo noma amandla kahulumende, njengoba liyabe lifunge ukuba ngumeli kahulumende. Lokho elikutshoyo, kusekelwa nguhulumende. Khumbula, ngowesifazane noma owesilisa olamandla okubusa lapha, ngakho ngowesilisa noma owesifazane onganikeza izulu amandla okubusa lapha.

Kulomcijo owodwa oqakathekileyo okumele ubewazi mayelana lokholo. Kahle ngiwuthathe embhalweni kaMakho kusahluko 4 futhi njalo kancane.

Umhlabathi uyiwo wodwa uthela amabele—*kuqala ikhaba, kuze isikhwebu, besekusiza inhlamvu ezikhwetshini.*

— UMakho 4:28

Khumbula, uJesu wachasisa umhlabathi kule inganekwane ngokuthi wona umela inhliziyo yomuntu, noma umoya womuntu, njengokutsho kwami ngaphambilini. Nanzelela lapho ukholo oluthuthuka khona; kuyakumangalisa na? Ukholo akusiso sithelo sezulwini, njengokucatshangwa ngabanengi, kodwa lona luthuthukiswa lapha emhlabeni njalo luyisithelo senhliziyo yakho. Kawungezake uluthandazele noma ulucele kuNkulunkulu. UKholo kaludingakali ezulwini. Kasisoze sidinge isivumelwano ezulwini.

Hatshi, sona sidingakala lapha emhlabeni, njalo senzakala kuphela kunhliziyo zabisilisa labesifazane emhlabeni. Njengokufundiswa yinganekwane kuMakho 4, kulendlela eyodwa eyokulufumana, ngokufaka iLizwi likaNkulunkulu enhlizweni yakho uvumele indlela yesivumelwano isebenze. Ngakho uma ngidinga ukholo, kuyini engingakwenza? Ungahaza iLizwi likaNkulunkulu enhlizweni yakho ulekele likhule ukholo luze lubekhona. Yiyo yodwa indlela ukholo oluza ngayo.

Ngingakasuki kuMakho 4, ngifuna ukukhuluma ngesikela okukhulunywa ngalo lapho.

*Kuthi amabele angavuthwa, **iwavune ngesikela**, ngoba ukuvuna sekufikile.*

—UMakho 4:29

Ngikholwa ukuthi inengi lomhlaba webandla alikafundiswa ukusebenzisa isikela, okutsho ukuthi kalikafundiswa ukuvuna lokho elikufunayo. Ibandla ngobubanzi balo selifundiswe indlela zokupha kodwa hatshi ukuhlakulela lokuvuna inhlanyelo ehlanyeliweyo. UJesu uyacaca kule indima, esithi nxa isivuno sokholo lwethu sesikhona, THINA kumele sifake isikela. Noma siyabe siyenze umsebenzi omuhle owokukhulula inhlanyelo yethu ngokukholwa, nxa singakwazi ukufaka isikela, akusoze kube lesivuno. Eginisweni, lami lokhu ngangingakwazi iNkosi yaze yaqala ukungifundisa ngoMbuso. Kahle ngikunikeze izibonelo ezinlutshwane ezalokhu.

Nganginxuswe ukuyakhuluma ebandleni lase-Atlanta. KwakungoLwesithathu njalo ibandla lalingekho likhulu kangako, ngang-ingelankinga lakho lokho. Ngangijabulela nje ukufundisa abantu ngoMbuso. Ngathi ngifika ebandleni, ngathola kunxele ukuthi

iminyango yayivaliwe kungela muntu lapho. Kwakusele imizuzu elitshumi ukuba inkonzo iqale. Ngezwa itruck ibanga umsindo ngemvakwami; kwakungani ayilakho okusebenza ukucitsha umsindo ezimoteni. Ngathi ngikhangela, ngabona itruck endala, efileyo isima emkotweni webandla. Kangizange ngikufake engqondweni; ngoba nje, ngangisendaweni ye-Atlanta ephansi kwedolobho. Ngilokhu ngimile, kwafika indoda ihamba ngemva kwesakhiwo yathi yona ingumfundisi. Yaxolisa ngokuphuza, yathi imota ibisala ukuvuka. Yangitshela ukuthi imota yayifuna ukufuqwa emehlweni, ibisigijima, igxothwe i-clutch, njengoba okokuyivusa kwakungasebenzi. Yona yathi yayizame kanengi kodwa isala ukuvuka, okwakusitsho ukuthi kwakumele ihambe amamayela amahlanu ukuyafika esontweni.

**IZULU LITHOLA KANJE
UMTHETHO EMHLABENI,
NXA INHLIZIYO
IXHUMANISA IZULU
LOMHLABA LAPHA,
AMAZWI ETHU LEZENZO
ZETHU KUSIBA YIZIKOPELA
EZIKHULULA AMANDLA
EZULU.**

Wathi eqhubeka engitshela ngebandla lakhe, wangitshela ukuthi noma wayengumfundisi webandla, umsebenzi webandla kwakuyikunika abantu bedolobheni ukudla. Babenikeza ukudla kubantu abedlula 10,000 ngenyanga. Lapho umfundisi elokhu ekhuluma, ngangisizwa ngingasaphathekanga kuhle. Nansi indoda kaNkulunkulu eyayinika ukudla abantu abangu 10,000 ngenyanga, kodwa yayingela lamota ephilileyo? Yona ingumfanekiso ongaba yiwo wodwa okaNkulunkulu ozabonwa yilabo abayamukela ukudla empilweni zabo. Uma bembona edubeka, ehamba amamayela amahlanu ukuya ebandleni ilanga litshisa okwe 100 degrees, babezakuba lesiqiniseko bani sokuthi uNkulunkulu

wayezabancedisa? Ngangingamsiza ngalokho. Ngangilemota entsha endlini eyayihambe amamayela angu 20,000 engangingamnikeza yona. Ngamtshela ngohlelo lwami lokuthi ngangizathumela omunye wezisebenzi zami e-Atlanta laleyo mota. Yena, ngokunjalo, wajabula. Ngachitha ubusuku ngimfundisa yena lebandla lakhe elincane mayelana loMbuso kaNkulunkulu lokuthi wona wawusebenza njani ngezimali.

Ngathi ngifika endlini, ngahlela ukuthi imota ihanjiswe e-Atlanta. Isisebenzi sami sathi sifika endlini yami ukuzethatha imota, ngabakwazi ukuthi ngangithengiselana ngokomoya lezulu. Ngangikwazi ukuthi lapho ngikhulula imota leyo kuMbuso kaNkulunkulu, ngangingakhulwa ukuthi uNkulunkulu lami uzanginikeza imota engangizayidinga phambili. Kangisuye muntu wezimota, okutsho ukuthi kangizithandi kangako. Abanye abantu bayazithanda, kodwa mina hatshi. Imota yithuluzi nje kimi. Ngiyakhuthanda ukuba lemota enhle ngempela, kodwa mina ngiyayisebenzisa ize iguge idinge ukutshintshwa.

Isisebenzi sami sathi sifika, ngaphuma ngaya endlini yemota, ngabeka izandla zami phezu kwemota leyo ngathi, “Baba, ngiyayikhulula imota le ukuba iyekwenza umsebenzi wenkonzo yakho, njalo lapho ngikhulula imota le, ngiyamukela enye imota...” Ngathikaza. Ngiyazi ukuthi uMbuso kaNkulunkulu uqotho okungakanani, njalo ngangisazi ukuthi ibala elithi “imota” lodwa lalingasoze livume. Ngangisazi njalo ukuthi kwakumele ngicace njalo mina loDrenda kwakumele sivumelane ngemota esasifuna ukuyamukela. Ngathi ngilokhu ngimi lapho ngiqumeke umlomo, ngananzelela ukuthi ngangingakwazi lohlobo lwemota engangiyifuna. Ngakho ngaqala kutsha, “Nkosi, namuhla ngiyayikhulula imota le ukuba iyekwenza umsebenzi wakho, njalo ngiyakhulwa

ukuthi ngiyamukela imota enhle lapho ngihlanyela, kodwa kuyamele ngiphenduke ngikutshela uhlobo lwemota engilufunayo nxa sengikwazi.” Kwabanjalo; yahamba imota. Ayikho imota engan- gilayo engqondweni engangingathi, “Yebo, ngifuna LEYO imota.”

Kwadlula inyanga ezinlutshwane. Ngempela, uDrenda wayevu- melana lami ukuba sinikele leyana imota ihambe, futhi njengami, laye wayengakwazi ukuthi wayefuna imota enjani. Kunyanga ezimbili ezalandelayo sakhuluma ngezimota, kwathi ekucineni ngelinye ilanga wathi, “Uyazi, ngicabanga ukuthi singakholisa evuleka phezulu.” Ngavumelana laye, ngathi yona yayizwakala inhle, kodwa eyohlobo luphi? Futhi njalo, sasingazi ukuthi kwaku- layiphi imihlobo yezimota ezivuleka phezulu. Kodwa ngelinye ilanga sathi siphuma ngemota sisiyakudla isidlo semini, umkami wathutsha ngokuthi, “Yiyo le!” “Yikuyini?” ngatsho. “Yiyo le,” watsho ekhombela ngale kwendawo yokumisa izimota eyekhefa esasisiya kulo. “Yikuyini?” ngatsho. “Imota leya, yiyo engiyifunayo!” Ngabona imota evuleka phezulu enhle ngangale kwalapho esasimise khona imota, “Asambe siyebona ukuthi ngumhlobo bani,” ngatsho. Ngakho sahamba ngeyethu imota sayakuma ngemva kwayo.

Yikho, akumangalisi ukuthi sasiyithandile. Kwakuyi BMW 645Ci, inhle ivuleka phezulu, njalo ilentengo ephezulu. Ngikut- shele iqiniso, ngathi ngibona ukuthi iluhlobo luphi, ngacabanga ngathi, “Kulungile, baba, sitshengise okumele sikwenze.” Ngangisazi ukuthi ngangingasozze ngihlawule i-\$115,000 ye-BMW entsha, kodwa ngangisazi ukuthi uNkulunkulu uyazenza izimanga. Mina loDrenda kasitshelanga muntu mayelana lemota noma ukutsho ukuthi sasidinga imota.

Ngemva kwamaviki amabili, umfowabo kaDrenda wasitshayela ucingo wathi, “Ngiyitholile imota kaDrenda!” “Utshoni nxa usithi

uyitholile imota kaDrenda?” ngatsho. Yena wathi, “Ngibone imota le ithengiswa, njalo masinyane, ngezwa ukuthi le kumele ibe yimota kaDrenda; futhi bekumele ngikutshele ngayo.” “Ngumhlobo bani wemota?” ngabuza. “Yi BMW 645 Ci, njalo inhle okuqotho; iqotho. Ngaphandle kwalokho, umuntu oyithengisayo uyamazi.” “Ngiyamazi?” ngatsho. “Yebo, uthe; umtshayele ucingo likhulume ngayo.” Ngakho, wathi engitshela uhlobo lwemota, ngisazi ukuthi yiyo kanye eyayifunwa yimi loDrenda kumaviki ambalwa ayedlulile, ngabakwazi ukuthi kukhona uNkulunkulu ayekwenza.

Ngamthinta ngocingo umnini wemota. Yebo ngangimazi, njalo yena wangitshela ngokuthi imota yayisesimeni esihle, futhi engitshela ukuthi yayisaqinile. Wasesitsho amazwi la kimi. “Uyazi, kusukela silokhu sikulolu ucingo sikhuluma ngemota le, ngizwa ukuthi yona kumele ibe ngekaDrenda.” Ngangingamtshelanga lokuthi imota le ngangiyidingela ukuthi ibe ngekaDrenda. Indoda le yaqhubeka yathi, “Kahle ngikutshele, ngizakuthengisela yona nge \$28,000.” Indlebe zami zazingakholwa engangikuzwa. Imota le yayisedlula leyo ntengo. Ngathi ngitshela uDrenda ngalokhu, yena wajabula, ngingatsho ngamazwi amalutshwane. Sahlawula yonke iphelele njalo lanamuhla lokhe silayo. Lokhe isebenza njalo iyabukeka. Ayihluzukanga lakancane, njalo sesihambe ngayo kanengi ivuleke phezulu, ikhalela iwayilesi phezulu, ilanga liphefumulela impilo phakathi kosuku olugcwele ukukhathala.

Uhambo esaluthakazelela kakhulu ngemota le enhle evuleka phezulu kulapho size siyedlula phakathi kwezintaba zase Colorado silezinto zethu zokuyakhempa phakathi kwe-*truck*. Indodakazi yethu uKirsten yayilathi kulolo hambo, njalo ngiyakhumbula sidlula eKansas ku I-70 phakathi kobusuku imota ivulekile phezulu. UKirsten wayesemuva elele mina ngitshayela. Inkanyezi zazikhanyisa

okukhazimulayo phezu kwamakhanda ethu, njalo umgwaqo wawungela zimota ezinengi ngaphandle kwe *truck* eyodwa noma ezimbili. Kwakuyibusuku obuhle lapho umoya wawuvunguza kahle konke kukuhle nje emhlabeni. Sachitah amaviki alandelayo amabili sitshayela phakathi eRockies, ngathola ukuthi imota le yayidonsa kahle. Lilodwa nje ibala elingayichasisa—Yayimangalisa!

Kodwa nanku umbuzo omkhulu. Imota le yafika njani kithi? Kungani kwaba yimota xathu uDrenda ayethe, “Yiyo le!”? Ngangisazi ukuthi uMbuso kaNkulunkulu wawulethe imota le empilweni zethu. Ngangisazi ukuthi ngathi ngihlanyela imota kumfundisi lwana, ngangisebenzisa umthetho kamoya. Ngikhumbula ngisithi ngizayamukela enye imota, hatshi i-SUV, hatshi ijeep, kodwa imota; ngikhumbula ngisithi enhle. Kodwa mina loDrenda kwakumele sifake isikela. Imota yayingeke ize ngaphandle kokuba sithi, “Yiyo le!” Noma ngangisekholweni lapho ngikhulula imota, sasingakafaki isikela kwaze kwaba lapho uDrenda esithi, “Yiyo le.”

Esinye isenzakalo sabakhona esatshengisa isimiso lesi ngendlela enkulu. Njengoba usukwazi, ngithanda ukuzingela. Ngiphila elizweni elivumela ukuzingela kahle, njalo ngabusiwa ngowami umhlabathi engizingela kuwo. Ku 60 *acres* zami, ngile 19 *acres* zezihlahla zegusu le 10 *acres* zamaxhaphozi. Ngizingela impunzi londlegu mnyaka wonke ngempumelelo. Kuhlala kulamadada lamathendele aphaphayo, kodwa asazi ngasizatho bani, kangikaze ngicabange ukukubamba. O, kanye kumbe kabili iminyaka isedlula, mina labafana sasihamba sisiya exhaphozini siyebamba amathendele amalutshwane awesidlo santambama. Kodwa sasingakaze sizingele amadada.

Ngakho, kuminyaka emilutshwane edlulileyo, lapho ngibukele amadada amanengi ephaphela exhaphozini,

ngacabanga ukuyawazingela. Habe, kwakungijabulisa! Kwangingena! Ngekwindla ngizingela amadada, ngathola ukuthi kwakusadingeka ukuba ngifundele ukudubula amadada. Ngangisenelisa ukutshaya amalutshwane njalo ngathola ukuthi wona ayeyikudla okumnandi. Ngananzelela ukuthi izikhathi ezinengi amadada ayekhatshana kumbe ayeseceleni kwalapho engangingafinyelela khona ngombhobho wami, engikholwa ukuthi yikho okwakusenza ngikhuthe kwezinye izikhathi. Ngangisebenzisa umbhobho wami ojwayelekileyo, engangihlala ngiwusebenzisa kukho konke kusukela kubomvundla kusiya kuzo impunzi, i*Remington 11-87*. Ungangitholi kubi, ngiyawuthanda umbhobho lo, njalo usebenza kahle kakhulu. Kodwa ngangizwile ukuthi kwasokulembhobho engcono eyayidalelwe ukuzingela amadada. Yona yayilombala ofihlakeleyo ithwala ama magnum shells angama inch amathathu lengxenywe, engangisazi ukuthi ayezangincedisela ukudubula khatshana. Ngahlela ukuwudinga isikhathi samadada esilandelayo singakafiki.

Ngakho ke, isikhathi samadada sasesidlulile, kwasokunguZibandlela, njalo ngangihamba phakathi eCabela's ngacabanga ukuthi kahle ngiye okwakulembhobho khona ngiyebona ukuthi leyo yayinjani. Ngathi ngifika okwakulembhobho, ngabona ukuthi babelecele lonke elikhulu elalilembhobho yokuzingela amadada kuphela. Ngakhangela emilutshwane yakhona ngacabanga ukuthenga omunye engangiwothandile, kodwa wawubiza \$2,000 njalo isikhathi samadada sasikhatshana ngezinyanga. "Ngizalinda," ngacabanga ngaphakathi. Kodwa ngenza okuthile okungajwayelekanga sengisuka. Kanginanzelelanga engangikwenza lapho ngikwenza. Ngakwenza ngingacabanganga. Ngakhombela umbhobho engangiwothandile ngaphumisela. "Ngizakuba lawo umbhobho lo, ngegama likaJesu." Futhi njalo, kangizange

ngicabange okunengi ngakho; ngangimemezela nje ukuthi ngangizakuba lawo umbhobho lo. Inhliziyo yami yayilomfanekiso oqotho owombhobho wamadada engangi-wufuna.

Nganxuswa ukuyakhuluma emhlanganweni webhizimusi ngemva kwamaviki ambalwa, kukhona okwangikhangayo ngikuwo. Sengiqedile ukukhuluma, umnikazi wenhlanganiso wangilanda wangazisa ukuthi babefuna ukunginikeza isipho sokungibonga ngokubuya kwami. Yena wathi, “Besikwazi ukuthi uthanda ukuzingela, ngakho sikuthengele umbhobho lo.” Ngamangala lapho bekhupha iBenelli entsha, isemi automatic eyamadada,

xathu leya engangiyibone esitolo, engangitshiye ngiyikhombele! Uyakubona yini lokhu? Umbhobho lo oyiwo xathu wavela njani. Nganginikeze imibhobho eminengi kakhulu iminyaka isedlula kodwa ngangingakaze ngifake isikela. Ngamanye amazwi, ngangihlanye le imibhobho ngokholo lokunikela kodwa ngangingakaze ngifake isikela. Ngangingakaze ngithi, “Nkulunkulu, yiwo lowu! Yiwo engi-wufunayo.” Kodwa ngesikhathi ngikutsho lokhu, isivuno savela!

Ngangitshela omunye umngane ongumtshumayeli indaba le eyombhobho. Yena wathi, “Yebo, ngikholwa ukuthi uNkulunkulu uyakwenza lokho kwezinye izikhathi. Yena uzakubusisa ngesipho esincinyane esibalulekileyo ukuze akutshale ukuthi uyakuthanda.” Lapho ngicabangisisa ngalokho ayekutshilo kimi, ngananzelela, “Hatshi, lokhu kwakungaqondanga. Yebo, uNkulunkulu uyangithanda, kodwa Yena wayengafuni ukungipha isipho esincane

**...UNKULUNKULU
WAYEFUNA
UKUNGITSHENGISA
UKUTHI UYANGITHANDA.
WANGITSHENGISA
UKUTHI UYANGITHANDA
AZE ATHUMELE
UJESU NGENXA YAMI
WANGINIKEZA UMBUSO!**

nje.” Inja, inhlanzi, impunzi okwabuya kulandelana, lezimota kwakubuye ngoba uNkulunkulu wayefuna ukungitshengisa ukuthi uyangithanda. Wangitshengisa ukuthi uyangithanda aze athumele uJesu ngenxa yami wanginikeza uMbuso!

Ngifuna ukukutshela eyinye indaba eyodwa mayelana lokuvuna. Njengoba ngike ngakutshela, kangisuye muntu wezimota. Thina sesingatshayela imota eyodwa ize icine idinga ukutshintshwa isindala. Isibonelo yi*Honda Pilot* yethu esileminyaka eyisitshiyagalombili. Siyayithanda leyo mota, iyasebenza, iduma kahle, ikhanya intsha, ngakho siyayigcina. Kodwa sasihlala sicabanga ngokuthenga iSUV enkulu eyokuthwala abantu lezivakatshi. Kudala, sasike saqhatsha i*Cadillac Escalade* eyokusebenzisa komunye umcimbi esasibe lawo eNow Centre, njalo mina loDrenda sasibhoda ngayo. Sasiyithanda. Sasithanda umbala wayo olobuhlophe bobuhlalu, njalo le sasiyithanda ngoba kwakungemfitshane yakhona hatshi ama-*Escalade* amade. Sathi, “Le yiyo esiyifunayo, i*Cadillac Escalade*, emhlophe okobuhlalu, emfitshane. Kumele sithenge enje.” Impilo yayimatasa njalo sasingelaso isikhathi sokubhoda sidinga ukuthenga.

Ngemva kwenyanga, ngangisanda kuphuma emnyango endlini yami ngithatha iphephandaba phambili, umakhal’ekhu-khwini wami wakhala. Indoda yathi, “Yebo, Mfundisi, ngifuna ukukuthengela i*Cadillac Escalade*; ufuna elombala uphi? Ngokumangala, ngathi, “Habe, kuyamangalisa lokho. Mina loDrenda sithanda emhlophe okobuhlalu.” “Kulungile,” watsho, “kahle ngikhangele ngibone engingakuthola.” Ngomthabo, ngakhohlwa ukumtshela ukuthi sasithanda emfitshane yakhona. Yena wayefisa ukuthenga eyayilomnyaka owodwa kumbe emibili eqinileyo njalo ingakahambi kakhulu.

Ngakho ke, kasizange sizwe kuvela kule indoda okwenyanga yaze

yacina isithinta ngocingo yathi, “Sengilayo i-*Escalade* yenu, kasih-langaneni endaweni enje ngesikhathi esinje, liyithathe lihambe layo ngekhaya.” Ngakho sahamba sayahlangana samthola ele-*Escalade* emfitshane emhlophe okobuhlalu. Yayinhle! “Ngiyaxolisa ngathatha isikhathi eside ukuphenduka kini.” watsho. “Ngangizama ukudinga ende yakhona, kodwa yona idingwa ngumuntu wonke ngakho ngayiswela. Engenelise ukuyithola yile emfitshane. Ngethemba lokho kulungile.” Kulungile? Le yiyo xathu esasiyifuna njalo yikho kanye esasikukhulumile!

Futhi njalo, ngiyawubuza umbuzo: I-*Escalade* eyiyo xathu esasiyifuna yabuya njani? Yebo, okwakuqala, senginikele imota eziyisitshiyagalombili ngaphandle kwaleya engayinikeza umfundisi engike ngakhuluma ngaye. Kodwa nganginakaze ngithi, “Yiyo le!” mayelana lemota ngaphambilini kuze kuthi uDrenda atsho njalo ngeBMW leyana. Khathesi, futhi, mina loDrenda savumelana saphumisela sathi, “Yiyo le!” Sengikhulume okweminyaka ukuthi ibandla selenze umsebenzi omkhulu ngokufundisa abantu ukuba baphe kodwa lenze umsebenzi omubi wokubafundisa ukuvuna. Ngakho usubona na ukuthi isikela yikuyini kulezi izindaba engisanda kuzixoxa? Ngethembe kusegcekeni! Sengahlanyela imota ezinengi ngifuna ukuzuza okuthile, kodwa mina loDrenda sasingakaze sivumelane ngemota entsha. Futhi, sasisebenzisa izimota zethu okwesikhathi eside. Kodwa ngomzuzu sisithi, “Yiyo le!” yona yayivela. Isikela kwakungamazwi ethu!

*Ulimi lulamandla okufa lokuphila, njalo labo
abaluthandayo bazakudla izithelo zalo.*

— Izaga 18:21

Kwake kwaba lesikhathi lapho ibandla elalifundisa kakhulu ngokufakaza kwethu. Sengake ngaba labantu, ngethemba lawe sowake waba labo, ababesitsho ulutho besebezibamba umlomo bethi, “Kumele nginanzelele engikufakazayo.” Lokhu kuzwakala njengento enhle, njalo ngiyavuma ukuthi kuzanceda ukugcina iLizwi lisenhlizweni. Kodwa ke, ukunanzelela lokho okufakazayo akulani lesikela. Ini? Kodwa nje uthe isikela ngamazwi ethu. Yebo, ngitsho njalo, kodwa ukubamba indlela yokutsho lokho okuqondileyo akusiso sihluthulelo khona kodwa.

*Ngilitshela iqiniso, ukuthi nxa omunye **esithi** entabeni le, “Suka, ziphosele olwandle,” engelakuthandabuza enhlizweni yakhe, kodwa **ekholwa** ukuthi lokho **akutshoyo** kuzakwenzakala, kuzakwenziwa kuye.*

— UMaKho 11:23

Futhi, isikela elikuMaKho isahluko 4 ngamazwi akho! Ngesikhathi uMaKho isahluko 4 ekhuluma ngesikela, uyabe esekhulume ngendlela yokholo lokuthi lutholakala njani. Uthi nxa amabele angavuthwa, uwavune ngesikela ngoba ukuvuna sekufikile. Ukuvuna kuyabe sokufikile ngoba uyabe usulokholo, uvumelana lezulu enhlizweni yakho. Indima ephezulu kuMaKho 11 ibeka isimiso esifanayo. Inhliziyo yakho ikholwa iLizwi, ubusukhuluma ukhulule amandla ezulu. Kodwa nanzelela umutsho lo, “**ekholwa ukuthi lokho akutshoyo kuzakwenzakala.**” Uhlola ukholo nxa ukholwa lokho okutshoyo. Ukukhuluma nje kumbe ukufakaza iLizwi likaNkulunkulu nje akusikho kukholwa. Ngaphandle kokuba inhliziyo yakho ivumelana lezulu, usungafazaka ubuso bakho bube luhlaza kungela okwenzakalayo. Ngakho kumele siqaphele ukufakaza

kwethu na kumbe inhliziyo yethu?

Umuntu olungileyo uveza izinto ezinhle eziphuma kokuhle okugcinwe enhlizweni yakhe, njalo lomuntu omubi uphihliza ububi obugcinwe enhlizweni yakhe. Ngoba umlomo ukhuluma lokho okuphuphuma enhlizweni.

— ULukha 6:45

Phezu kwakho konke, gcina inhliziyo yakho, ngoba ingumthombo wokuphila kwakho. Lahla izibozi zamazwi emlonyeni wakho; ungakhuphi inkulumo yokuxhwalala ezindebeni zakho.

— Izaga 4:23-24

Siyabona mgceke ukuthi lokho esikukhulumayo kuvela kulokho okukholwa yinhliziyi yethu. Ngokulandela indlela ekuMakho isahluko 4, sibakwazi ukuthi siguqule njani lokho okukholwa yinhliziyi yethu siyenze ibe kuntando yezulu ngokholo. Nxa sesile-siqiniseko esipheleleyo, besesifaka isikela ngamazwi ethu lezenzo. Sukubambile? Kuhle, kahle siqhubeke.

Lapho siqhubeka ngengxoxo yethu yokholo, ngifuna ukuletha omunye umbuzo okumele wenelise ukuwuphendula.

Ngazi Njani Ukuba Sengilalo Ukholo?

Lo ngumbuzo omuhle njalo **okumele** ubewazi njengoba kungenzeki ukukhuleka umkhuleko wokukholwa ungakabi lalo ukholo. Zinengi izindlela zokubakwazi nxa ulokholo noma cha, zinengi impawu okumele ubezazi njalo uzinanzelele. Usungenza

izinqumo zokwesaba ezinengi ezimbi ngaphandle kokukholwa. Izinqumo ezenziwa umuntu esesaba ziyabophela kusiqalekiso somhlaba njalo zizakwenza ukhuthe lokho uNkulunkulu akufunela khona. Ngakho ubufakazi bobukhona bokholo buyini? Uphawu lwakuqala lulula; usungakhangela emuva ingcazelo yethu yokholo uzwisise ukuthi ukuba lesiqiniseko esipheleleyo enhlizweni yakho yiso isihluthulelo seqiniso. Kodwa esikhathini esinengi sicabanga ukuthi siqinisekile kodwa siyabe silivuma iLizwi ngengqondo yethu hatshi ngenhliziyo. Kumele ubewazi umehluko. Nxa ulesiqiniseko esipheleleyo kubakhona, ngeqiniso, ukuvumelana kwengqondo lalokho okutshiwo liLizwi kodwa kufuneka ubekwazi ngokuqiniseka, ubelethemba eliletha ukuthula lokulangazelela.

Ukukholwa yikuba leqiniso lalokhu esikulindeleyo njalo kuqinisekile ngalokho esingakuboniyo.

— KumaHebheru 11:1

Nxa ulobufakazi bokuthi ulolutho oluthile, ungadinga na ukuvunyiswa ngabanye ukuthi ulutho lolo ulalo? Hatshi akunjalo. Njalo futhi, nxa ulokholo, kulolwazi, kulokuthula, lokuthemba ukuthi ulakho iLizwi likaNkulunkulu elikutshoyo, noma ungakuboni. Abantu abanengi bakutsho ngale indlela: “Ngiyazi ukuthi ngiyazi ukuthi ngiyazi ukuthi ngiyazi ukuthi ngilakho.” Ulwazi lolu ngoluvela ngaphakathi hatshi kuzehlakalo ezikuhanqileyo. Luvela phakathi komoya wakho kumbe enhlizweni yakho. Ukwesaba kuyahamba, kungasabikhona imicabango enengayo ekhulela ingqondo yakho; uyabe ukwazi ukuthi sokwenzakele.

Esinye isiqo sokholo yinjabulo lokulangazelela. Impendulo yakho ilapha. Ulayo! Ukholo lungaphezu kokuzwa ukuthula

lokuzethemba, noma lokhu lakho kuyabe kukhona. Kumele ubekwazi ukuvikela lokho okukholwayo ngomoya. Nxa ngisitsho lokhu, cabanga inkantolo wena uligqwetha elibuza abafakazi imibuzo. Kungani ukholwa okukholwayo mayelana lesimo sakho? Ungakumela njani lokho okukholwayo? Impendulo iyodwa, iLizwi likaNkulunkulu.

Isibonelo, nxa umuntu angabuya endlini yakho athi, “Phuma endlini yami,” wena ungatsho na uthi, “O, ngiyaxolisa; nginikeza usuku olulodwa, ngizaphuma”? Hatshi, wawungezake utsho njalo; wawuzahleka. Umuntu lo angathi, “Hatshi, le yindlu yami; phumani nxa lingafuni sizahlangana enkantolo,” impendulo yakho yayiyakuthi, “Kungcono siyehlangana enkantolo!” Nxa sokuthonisiswa, ngokuthula wawuzatshengisa umahluleli amaphepha akho okuba ngumnini wendlu. Wayezakhangela abesebopha lo omunye okuhlukuluzayo amenze ahlawule zonke inhlawulo zenkantolo. Ukuzethemba kwakho kuyabe kungezanga ngemizwa yakho, kodwa, ngomthetho langokuthi wena ungumnini wendlu ngokomthetho.

Mayelana lokuba lokholo, ngithola ukuthi esikhathini esinengi abantu abangazwisisiyo ukuthi ukholo luyini badideka lula ngoba bafaka ithemba labo ezenzweni hatshi emthonjeni wokholo, oliLizwi likaNkulunkulu. Kulula ukuphica isenzo sokwenza iLizwi likaNkulunkulu lamandla oMbuso, avela enhlizweni elesiqiniseko sokuzethemba. Isibonelo, ungahlanyela imali eMbusweni kaNkulunkulu, besengikubuza ukuthi kungani ukholwa ukuthi uzayamukela ngenxa yokunika kwakho, impendulo yakho

**“UKUKHOLWA YIKUBA
LEQINISO LALOKHU
ESIKULINDELEYO NJALO
KUQINISEKILE NGALOKHO
ESINGAKUBONIYO.”**

— KUMAHEBHERU 11:1

akumelanga ithi, “Ngoba ngelanga elinje nganikela imali ethile.” Ubufakazi lobo bukhangele izenzo zakho kuphela, lendlela yokwenza, ngakho kayilampande yesiqiniseko. Ukuqiniseka kwakho kuvela kuphela kuLizwi likaNkulunkulu.

Sekukanengi ngikhuleka labantu abathi bengabuzwa ukuthi kungani bekholwa ukuthi bazayamukela nxa bethandaza bangikhangele nje bengela mpendulo. Nxa ngibuza, ngiyabengidinga ukholo lwabo, ukuvumelana kwabo lezulu. Ngifuna ukubezwa besithi, “Ngiyazi ukuthi ngizayamukela ngoba uNkulunkulu ungithembise kuncwadi enje lenje kundima enje lenje ukuthi lokhu sokungokwami.” Nxa besehluleka ukunginika umbhalo, kabagxilanga njalo kabakwazi lokuthi isikepe sabo siyaphi.

Khumbula, ukholo lubakhona kuphela nxa usazi intando kaNkulunkulu. Ngenxa yani? Ngoba ukholo lubakhona kuphela nxa inhliziyi yakho ivumelana lentando kaNkulunkulu. Ngikhulwa ukuthi abantu abanengi bacabanga ukuthi balokholo kodwa bengelalo. Futhi, ingqondo zabo zingabe zivuma ukuthi iLizwi likaNkulunkulu liyiqiniso njalo lihle, kodwa ukholo lubakhona kuphela nxa sebelesiqiniseko esipheleleyo. Kwabanengi, ingqondo zabo ziyabe zivumelana leLizwi likaNkulunkulu, kodwa inhliziyi zabo zingahlalisekanga.

Nanku umfanekiso walokhu engikhuluma ngakho, engikhulwa ukuthi uzatshengisa ukuthi inengi kalilalo ukholo kodwa kalikuboni. Ngingakutshela ukuthi isibhakabhaka kasikho luhlaza, njengokutshiwo ngabanengi, besengisithi umbala othiwa uluhlaza ngabanengi ulithanga? Ngamanye amazwi, ngiyabe ngikutshela ukuthi impilo yonke besifundiswa amanga mayelana lemibala ngakho umbala oluhlaza awukho luhlaza kodwa ulithanga. Wawuyakwenzani? Wawuyayethuka na udobhe ucingo lwakho uthinte umbalisi

wakho wezinga lakuqala esikolweni umthethise, umtshele ukuthi wakuphambanisela impilo, ekufundisa amanga ngemibala? Kangi-cabangi kanjalo. Ngeke kube lomuzwa othi thika nje ngaphakathi kuwe, ngeke ube lokwesaba. Wena uyahle ubekwazi nje ukuthi lesi yisiwula, wekele nje lokunaka lokho okukhuluniweyo, uqhubeke ngempilo yakho. Kungani? Ngoba uqiniseke okupheleleyo ukuthi umbala oluhlaza uluhlaza!

Khathesi, kasiqathanise isibonelo sami lengxoxo yethu yokholo. Kasithi wena wawuqiniseke okupheleleyo okutshiwo nguNkulunkulu mayelana lokusiliswa, umongi abesekutshela ukuthi uzabulawa yimvukuzane? Wawuyakhangela umongi lowo ucabange ukuthi uyisiwula ngoba usazi ukuthi akukho okuzayenzakala kuwe. Ngenxa yani? Ngoba uyabe uqiniseke okupheleleyo mayelana lokusiliswa okwahlawulelwa nguJesu. Usukubona? Yebo, abantu abanengi bayathandaza, kodwa uma sebhlolewe, babuyela bayethandaza imkhuleko hatshi eyokholo kodwa eyethemba, bengelaqiniso lempumela. Mngane wami, yingakho kuqakathekile ukuthi sizakhe ngeLizwi likaNkulunkulu. Kumele sazi ukuthi intando kaNkulunkulu iyini ukuze sibe lokuzethemba kulokho Yena akutshoyo, futhi njalo ukuze silahle lokho okungayisiyo ntando Yakhe. Kahle ngikuphe isibonelo sempilo yami esitshengisa ukuthi kuqakatheke kangakanani ukuthapha lokho okutshiwo nguNkulunkulu ngempilo.

Ngangikhathele, ngoba kwasokudlule amaviki anzima ngiqale ukuba ngumphathi webhizimusi (ngangingakabi ngumfundisi webandla). Ngangihlala ngisamukela ucingo lwezokuthengiselana sikhathi sonke, yebo njalo, lokubandezeleka kwezimali ngenxa yokuphila ngemali etholakala ngemva kokwenza umsebenzi othile. Ngangisiya kumongi wamazinyo ngisiyavala isikhala ezinyweni. Konke kwakukuhle kwaze kwathi umongi esefuna ukungihlaba

iNovocaine. Wathi efaka inalithi, masinyane kwathi qha, ngezwa umhlathi ungasezwa lutho, akwenzakalanga kancane kancane njengakwezinye insuku. Ngamangala ngatshela umongi okwakwenzakele. Wathi, “O, ngicabanga ukuthi ngithinte umthambo womuzwa.” Ngambuza masinya ngathi, “Kujwayelekile na lokho?” Yena watsho la amazwi, “Khona ke, kwandise ukuphola.” Ini? Ngimuzwe kahle? “Mongi, utshoni nxa usithi kwandise ukuphola?” Wathi, “Ku 80 *percent* kusiya ku 85 *percent* yesikhathi, kuyaphola kungela monakalo ohlalayo.”

Ini? Ngabanjwa yikwesaba. Ngasengizathini? Kuzaphola na? Inggondo yami yaqala ukuginywa yimicabango yokwesaba. Ngemva kokuhlangana kwami lomongi, ubuso bami bahlala bungezwa lutho, okwehlukene lakwezinye izikhathi lapho obuphola khona kancane kancane. Ngangisiyabona umthengi owayehlala endaweni eyayikhatshana lomongi ngehola, ngakho ngangilesikhathi esinengi sokucabangisisa ngalokho okwakusanda kwenzakala. Kodwa indlela yonke ngisiya, ngangisebuhlungwini, hatshi obenyama, kodwa ngangingela kuthula futhi ngangilokwesaba okwakubhoda ingqondo.

NGALESO SIKHATHI,
NGANGISAZI UKUTHI ITHEMBA
LAMI KWASOKULILIZWI
LIKANKULUNKULU KUPHELA.

Endleleni sengisiya
 endlini, emini, ngadlula
 ngisima endlini yomngane

wami. Ubuso bami babulokhu buthule, njalo ngangidinga ukuqiniswa ngomunye umuntu ukuthi engangikuzwa kwakuzaphola. Nanzelela iphutha lami: Kangizange ngikhangele iLizwi likaNkulunkulu kodwa ngakhangela umuntu owayengasilo lakholwa eliqinileyo ukuthi angiqinise. Ngatshela umuntu lo ngokwakuyenzakele ngalinda ukuthi athi, “Akusiyo nto

enkulu leyo, Gary; kuzaphola!” Khepha, nanku engakuzwayo. “O, maye! Ngilomngane owake wehlelwa yilokho futhi ubuso bakhe kabuzange buphole; yena wahle wagogeka ubuso.” Kangizange ngikukholwe engangikuzwa!

Inggondo yami khathesi ke yayisifuthelana ngokwesba. Ngazenza mina engangikwazi ukuthi kuzalunga ngambonga ngesikhathi ayesichithe lami. Ngokuphelelwa, ngadlula endlini yomunye umngane ngambuza umbuzo ofanayo, ngamangala, ngisizwa impendulo efanayo, “O, maye,” watsho, “Ngilomngane owake wehlelwa yilokho futhi ubuso bakhe kabuzange buphole; wahle wagogeka ubuso lanamuhla.”

Ngemva kwalapha, ngangingaselalo ithemba. Ngangisazi ukuthi uNkulunkulu uyasilisa (engqondweni yami), kodwa ukwesaba lokhu ngangisehluleka ukukuxotsha. Inhliziyo yami yayin-gaqinisekanga. Ngobusuku lobo, ngezwa ubuhlungu! Inggondo yami yayigcwele ukwesaba, njalo ubuso bami babulokhu buthule kusukela ngisehofisini kamongi. Ngilokhu ngisazama ukulala, ngaqala ukuzwa ubuhlungu obuncinyane ngaphansi kwendlebe yami yokunene. Yikho yini? Ubaba wayeke walwisana le *Bell's palsy* sokudlule umnyaka noma emibili, njalo yena wayengitshale ukuthi yayiqale ngobuhlungu ngaphansi kwendlebe. I*Bell's palsy* yenzakala nxa umthambo wemizwa yobuso, ohamba phakathi kwesikhala esincane ethanjeni elingaphansi kwendlebe, usubanjwa yisifo kumbe usuvuvuka.

Ngilokhu ngilele lapho ngidinga ubuthongo, engangikuzwa kuphela ngamazwi la ehamba engqondweni yami, “Wena uzakuba le*Bell's palsy* njengoyihlo.” Ngathi ngivuka ekuseni, ngangile *Bell's palsy* yangempela! Khathesi, umhlathi wami wawuthule, njalo ubuso bami bonke labo babuthule bungezwa lutho, ngangisehluleka

ukuvala umlomo lamehlo. Ngangilusizi.

Ngalanda umongi owayeseduzane ukuba ngiyekuzwa ukuthi engangikucabanga kwakuyikho na. Ngemva kokungihlola, wangikhangela wavuma ukuthi ngempela ngangile *Bell's palsy*. Ngasengisithi kuye, “Manje yikuyini okuzayenzakala?” Yena wathi, “Ku 80 kusiya ku 85 *percent* yezindaba ezinje, uyaphola ungela kugogeka okuhlalayo.” “Yikho na akukhulumileyo lokhu engikuzwayo?”

Leso sikhathi, ngabakwazi ukuthi ngasengisenkingeni. Ngabakwazi ukuthi usathane wayengasoze ame lapha, njalo ngang-ingafuni ukubona okwakuzalandela. Ngangikwazi okwaneleyo ngezimpi zikamoya ukuthi ngibone ukuba ngangiqonda endleleni engayisiyo. Khumbula, kwakusasele umnyaka ukuba ngazi okunengi ngezinto lezi. Kodwa ngangisazi okwaneleyo ukuba nginanzelele ukuthi into le yayifuna ukulwiwa ngokomoya. Ngananzelela futhi ukuthi lesi kwakuyisithiyo samadimoni ukungibamba ngilibele ngikhathele ngingacabangeli ngitsho lankinga.

Ngaleso sikhathi, ngangisazi ukuthi ithemba lami kwasokuliLizwi likaNkulunkulu kuphela. Ngaphakathi kimi ngangingenelisi ukumisa ukwesaba okwakugcwalise ingqondo yami. Ngakho ngabhala amakhadi ayi 3X5 imibhalo yokusiliswa ngawafaka yonke ndawo endlini yami. Ngaphenduka phambili kweNkosi ngaqala ukukhulisa ukholo enhlizweni yami. Ngangikwazi ukuthi kwakumele ngihlanye le iLizwi enhlizweni yami ukuze ukholo lukhule, ngakho ngangitshona ngifundisisa ngeLizwi likaNkulunkulu ilanga lonke.

Ekuqaleni akukho okwatshintshayo. Ubuso bami bayala bungezwa lutho, ngahlala ngisilwa lomoya wokwesaba. Ngemva kweviki, kungekho okwaguqukayo ebusweni bami, kwasokusenzeka! Njengakundlela yethu efundiswa ngumbhalo wethu kuMakho 4:26,

ngahlanyela iLizwi enhlizweni yami, ukholo lwaqala ukukhula, kuqala ukusikwa, besekuthi ikhaba, kuze isikhwebu, besekuthi inhlamvu ezivuthiweyo zimile esikhwetshini.

Kukho konke lokhu, akukho ukuvumelana ngakho ukholo—alukabikhona. Kodwa ke, noma ngingayiboni inguquko kumbe ukwazi ukuthi indlela le isebenza njani, uMakho 4 uyatsho ukuthi, izinto ziyaguquka. Inguquko engikhuluma ngayo kayikabonakali emhlabeni wemvelo, kodwa utshintsho lusayenzakala enhlizweni. Singabambeleva eLizwini, iLizwi liguqula kancane ncane esikukholwayo ngenhliziyo isuse ukungakholwa ibe lesivumelwano lezulu yona yodwa. Ngakho kule indaba, ngabambeleva eLizwini, ngisazi ukuthi yilo lodwa elaliyimpendulo yami.

Ngokuphangisa, ngelinye ilanga, ngilokhu ngihamba nje endlini yami lamakhadi lawo ayi 3X5 alemibhalo yokusiliswa ebekwe indawo yonke, ngathalaza kwelinye engasengilibone kanengi. Kodwa khathesi ngathi sengilikhangela, NANKO! Masinyane, ugcobo lwangehlela, ukwesaba konke kwasukuma, NGABAKWAZI ukuthi sengisilile. Yebo, ubuso bami babulokhu bungezwa lutho. Kwakungela nguquko, kodwa ngabakwazi ukuthi ngasengisilile. Ngemva kwamahola ambalwa, ubuso bami basobukahle, ukungezwa lutho kwasokuhambile. Makadunyiswe uNkulunkulu! ILizwi liyasebenza!

Noma ngangivumele impilo yami yezomoya yawa ngenxa yokunganaki lokuhlala ngimatasa, ngaphangisa ngananzeleva iphutha lami ngaphenduka kubo ubuwula bami. Lapha kukudala ngisafundela ukuthi ukholo lusebenza njani, njalo ngangingela lwazi olunengi kule indawo. Ngiyakhangela emuva kulokho engakwenzayo, lapho ngibuza abantu ikusasa lami kulokuya eLizwini

likaNkulunkulu ngibone ukuthi ngangisenza ubuwula. Ngathi sengizwizisa okwakusenzakala, ngaphendukela eLizwini likaNkulunkulu ngokuzethemba. Ngokubi ke, abantu abanengi kabalakho ukuzethemba endleleni le ngoba kabakaze bafundiswe ngokholo lokuthi luza njani. Njengoba bayabe bengayazi indlela le, nxa sebecindezeleka, bayalekela iLizwi, becabanga ukuthi kalisebenzi.

Ukuzwisisa Ukuhlasela KukaSathane

UChristine weza ebandleni lethu engakwazi okunengi ngoNkulunkulu. Wazalwa kakutsha kweyinye inkonzo yangeSonto ekuseni impilo yakhe yaguquka ngendlela emangalisayo. Ebandleni lethu silesifundo sokwazisa abantu ngoMbuso. Okunye esifundisa ngakho kulesi sifundo lilungelo lomthetho wokwamukela ukusiliswa. UChristine wayekade ethwala nzima ukuzwa endlebeni okweminyaka. Empelweni, wayekade egqoka isigxingi esisiza ukuzwa okweminyaka engu40 futhi wayeselahlekelwe yikuzwa okwedlula isilinganiso se50 *percent*. Unina wayengezwa, njalo abafowabo labo babebulawa yisifo esifanayo esokulahlekelwa yikuzwa. UChristine wathi esizwa ukuthi, njengekholwa, wayelelungelo ngokomthetho ukuthi asiliswe, wajabula kakhulu!

Ezifundweni lezi, umkami wabeka izandla phezu kwakhe wathandazela ukuthi indlebe zakhe zivuleke, khonapho nje, qha, wahle waqala ukuzwa kuhle. UChristine waqala ukuklabalala ekhala edumisa uNkulunkulu. Kwathi umkami, uDrenda, loChristine besiza kimi bezongitshela ngendaba le emnandi, ngezwa ngifuqeka ukuba ngimtshele ngokuhlasela kukaSathane. Ngatshela uDrenda ukuthi atshele uChristine ukuba nxa kwakuyabonakala sokuphenduka ukuzomhlasela ngesifo sokungezwa akhulume

ngokuzethemba amemezele ukuthi wayesilisiwe axotshela uSathane khatshana. Kusisa ngelanga elalandelayo isivivinyo seza. Indlebe yakhe yayisibuyele yavaleka. Wenza lokho kanye engangimtshele ukuthi akwenze, “HATSHI! Sathane, kangikwamukeli lokho. Sengisilisiwe njalo *bengikade* ngisilisiwe, ngegama likaJesu!” Qha! Indlebe zakhe zaphonguthi qha zavuleka njalo lanamuhla lokhu zinjalo.

Khumbula ukuthi uSathane uzahlasela azame ukuzothatha indawo njalo. Ungamvumeli. Wena mana ngeLizwi likaNkulunkulu!

Kusahluko lesi, ngithethe isikhathi ukukunikeza inzwisiso eyisiqalo eyokuthi ukholo luyini, lusebenza njani, lokuthi wazi njani nxa usulokholo. Ukuze uMbuso kaNkulunkulu usebenze empilweni yakho, kumele wazi lokhu. Khumbula uJesu watshela owesifazane, “Ukholo lwakho lukusilisile.” Kuzakuba njalo lakuwe: Ukholo lwakho, lenhliziyo ekholwa ngesiqiniseko esiph-eleleyo ngalokho okutshiwo lizulu, lokufaka isikela kuzakuba yimpendulo yakho kunoma yiphi inkinga noma isidingo ohlangana laso empilweni.

ISAHLUKO 6

ISIBUSISO SENKOSI

Ngangihlezi ekhefa lonkosikazi wami kanye lesivakatshi esasiyiyisikhulumi. Kwakungu 10:00 ntambama, njalo sasiqeda inkonzo elamandla eyantambama. Isisebenzi sekhefa sabuya sizosibuza esasi zakudla saqala ukuxoxa laso. Isivakatshi sami saqala ukumtshela ukuthi inkonzo ibibusisa kakhulu futhi yaxoxa langebandla lethu. Wasebuza, “Uyathanda ukuzingela na?” Waphendula wathi uyakuthanda ukuzingela. Isivakatshi sami sathi sasihlala sithokozela indaba zami zokuzingela, njalo empelweni, ngangimuphe ugwalo lwami oluthiwa *Faith Hunt* leyo ntambama ayezahamba lalo endlini esiyakupha umngane wakhe. Ngangi lalo ugwalo engangizamupha lona ukuthi ahambe lalo eceleni kwami.

Isisebenzi sekhefa sakhuluma ukuthi sasikade sizingela kodwa singazake sibambe impunzi. Mina lesivakatshi sami saqala ukumchasisela ukuthi uMbuso kaNkulunkulu usebenza njani futhi wayengakhangelela ukuyithola impunzi nxa engayazingela. Wayengakwazi ukuthi acabangeni ngathi. Kodwa ngakhumbula engangiluthwele ngamupha lona. Ngatshela isivakatshi ukuthi ngangizadinga olunye ugwalo sona savuma. Isisebenzi sekhefa sabonga sathembisa ukuthi

sizakhangela ugwalo, kodwa ngacabanga ukuthi sasesicine lapho ukubonana. Kwakungenjalo.

Ngemva komnyaka, isivakatshi esifanayo sabuya ebandleni futhi satsho ukuthi sasilithandile ikhefa esasihambe kulo sacela ukuthi siye khona. Ngakho sahamba. Sathi sihlala phansi samangala ukuthi isisebenzi sekhefa esasisizayo ekuqaleni ngomnyaka owadlulayo yiso njalo esasisiza futhi. Wathi esilanda, wasikhangela wathi, “Salibonani, lalilapha umnyaka odlulileyo, sakhuluma ngokuzingela impunzi.” Sathi, “Yebo, siyakhumbula.” Wathi, “Ngabala ugwalo elangipha lona, ngayenza elakutshoyo. Ngathola impunzi ezimbili umnyaka odlulileyo futhi ngikhangelele ukuthola eyinye njalo lonyaka.” Sajabula ukuzwa indaba leyi kodwa kasimangalanga. UMBuso usebenza sonke isikhathi!

Ngangibambe umhlangano owabafundisi abangu 25, ngibachazela ngoMBuso kaNkulunkulu lendlela osebenza ngayo. Kwaba ngumhlangano omuhle. Ngathi ngifuna ukusuka egunjini esasenzele khona umhlangano izisebenzi zami zisaqoqa izinto, omunye wabafundisi waphenduka. Yena lo nkosikazi wakhe balanda unkosikazi wami bacela ukukhuluma lathi. Umfundisi waqala ukusitshela ukuthi indlu yabo yayizathathwa iviki ingakapheli nxa bengabhadalanga i-\$6,900. Wachasisa ukuthi wayengela mali wayesele le \$100, ekhuluma eyiphethe ngesandla. “Lokhu yikho kodwa engilakho,” watsho, “kodwa ngifuna ukuhlanyela ngayo njengokufundisa kwenu namuhla, lina livumelane lathi ngemali esiyidingayo kule iviki.” Sabambana izandla sakhuleka sibonga uNkulunkulu ngemali.

Ngemva kwenyanga, ngabona umfundisi ofanayo komunye umcimbi, wangigijimela ethabile. “Kumele ngilitshele okwayenzakalayo,” watsho. “Angisalitshelanga size sikhulume kuqala,

kodwa mina lonkosikazi silebhizimusi lezikipa ezenziwe ngesilika esiyiyenza lapha lalapho egunjini lemota ngekhaya. Kasenzi okunengi ngalo, kodwa kukhona abasidingayo lapha lalapho. Khepha, ilanga elalandela size sithandaze ndawonye, sathola umsebenzi owasipha \$8,900. Kwakumele sisebenze nzima ngaleyo viki, kodwa kusiyafika uLwesihlanu, sasithwele i-\$6,900 esasiyidinga ukugcina indlu yethu. Ngiyabonga!”

Ngangise mhlanganweni wabafundisi eNorth Carolina owawu labafundisi abangu 500. Ngangingaso sikhulumi, lami nganginxusiwe. Kulendoda eyeza kimi yathi, “Ngidinga ukukhuluma lawe.” Wayengumfundisi owayevela eGermany, wathi wayelendaba emnandi okwakumele angitshele yona.

Indodana yakhe, eyayisasebutsheni bayo, yayithole iCD lami. Ngemva kokulalela, yaqiniseka ukuthi yayizathola i*PlayStation 3* ngokukholwa njengoba yayingela mali yokuyithenga. Ngithemba wonke umuntu uyakwazi ukuthi i*PlayStation 3* yinto enjani, kodwa kulabo abangela lwazi, ngumdlalo wama *computer*. UMfundisi wangitshela ukuthi indodana yakhe yeza ehofisini lakhe yamcela ukuthi avumelane laye nge *PlayStation 3* leyo. Indodana yakhe yamchasisela izifundo eyayizithola ilalele iCD lami futhi yayifuna ukuhlanyela inhlanyelo ikhuleke loyise ngendaba leyo. Umfundisi wangitshela ukuthi kazange acabange okunengi ngakho, kodwa njengomfundisi webandla, wayamukela inhlanyelo evela kundodana yakhe, umnikelo wemali owawusiya ebandleni. Wakhuleka lendodana yakhe bavumelana ukuthi indodana yakhe isilayo i*PlayStation 3*, futhi bazitshela ukuthi indaba le yayisiqgitshiwe.

Ngelanga elalandelayo, indoda esebandleni labo yatshayela umfundisi ucingo yambuza ukuthi indodana yakhe yayingeke ijabulele ukwenza okuyimadlana eceleni yini ngoba

kwakulomsebenzi omfitshane owawudinga ukwenziwa. Indodana yakhe yajabula futhi yayakwenza imali eyaneleyo ukuthenga i*Play-Station 3* ngemva kokusebenza amalanga amabili kuphela.

Lokhu kwabamba ukunaka kwendodana, ngemva kwamaviki ambalwa, umfundisi wathi indodana yaphenduka ehofisini yazocela ukuba bavumelane ngolunye ulutho. Umfundisi wangitshela ukuthi wathi, “Ngiyavuma,” kodwa wamangala indodana yakhe icela ukuthi bavumelane ukuba uNkulunkulu angamupha iziqwanga ezinkulu. Umfundisi wangitshela ukuthi waswela impendulo. Kodwa ekucineni, watshela indodana yakhe ukuthi kwakumele adlale indima yakhe nxa ecela iziqwanga futhi wayezavumelana laye nxa wayezwisisa lokho. Indodana yakhe yavuma. Ngakho indodana yahlanyela ukuze ithole iziqwanga ezinkulu, futhi bakhuleka bevumelana kulokho.

Ngelanga elalandelayo, kwafika imota endlini kamfundisi. Kwakuyimuli abangena layo inkonzo. Umfundisi waphuma esiya khuluma labo, bathi babeqoqa izinto ezazigcinwe egunjini lemota bathola insimbi yokuzivoxa futhi bacabanga ukuthi indodana yomfundisi ingayi thanda. Nxa wayengayifuni, mhlawumbe umfundisi wayengabekwazi umuntu ebandleni owayengayithanda. Umfundisi wangitshela ukuthi kwakungela muntu owayekwazi ngendaba yendodana yakhe yokufuna iziqwanga lokuthi babekhuleke ngakho izolo ebusuku. Umfundisi uthi wamangala! Wahamba endlini wathi kundodana yakhe, “Angaphi ama *CD* lawo?”

Indaba ezinje zivamile. Ngizizwa sonke isikhathi, futhi ngifuna ukuthi zivame empilweni yakho njalo. Ngakho sesisungule sakhuluma ngezici ezinengi ngokusebenza komthetho woMbuso kaNkulunkulu, njalo langokuthi isivumelwano kumbe ukholo ludingeka njani ukuze izulu lizuze umthetho loba amandla

okubusa emhlabeni. Khathesi, kasikhangeleni ngokujulileyo indlela imithetho yoMbuso enganceda ngayo isidingo sethu semali.

Isibusiso seNkosi siletha inotho, leyonotho ingabi lahlupho.

—Izaga 10:22

Ngathi ngiqala ukubona umbhalo lowu, “Ngempela, lokhu akutsho engicabanga ukuthi iyakutsho, ungabe usitsho lokhu?” Kodwa sengathola ukuthi utsho khona ngempela! Ukuzwisisa okutshiwo ngumbhalo lowu, kumele sikhangele ekuqaleni, umuntu eqala ukudalwa.

Kodwa ikhona indawo lapho omunye ofakaza khona esithi:

“Uyini umuntu osungaze uzihluphe ngaye na, loba indodana yomuntu ukuba uyinanze na? Wamenza waba mncinyazana kulezingilosi; wamethesa umqhele wodumo lobukhosi, wabeka lezinto zonke ngaphansi kwezinyawo zakhe.”

Ekubekeni izinto zonke ngaphansi kwakhe uNkulunkulu katshiyanga lutho olungekho ngaphansi kwakhe.

—KumaHebheru 2:6-8

Sayibala indima le ngaphambilini, kodwa iqakathekile kungxoxo yethu. Nxa sikhangela, ngesikhathi umuntu edalwa, yonke into emhlabeni yabekwa ngaphansi kwakhe. Kwakungekho noma okukodwa okwakungekho ngaphansi kwakhe. Wabusa emhlabeni ngesikhundla sokuphiwa amandla njalo wagqoka umqhele kahulumende ayewumele. Waqgokiswa ngogcobo lwakhe wanikezwa njalo wahlonitshwa ngendawo yamandla ayekuyo. USathane, owayesehlamukele uNkulunkulu, wayese lahlelwe emhlabeni kudala u-Adamu engakabikhona. USathane wayezonda umuntu njengoba

wazithola esebuza ngumuntu lo owayegqoke umqhele wamandla kaNkulunkulu. USathane kwasokumele azehlise kulesi sidalwa

**“ISIBUSISO SENKOSI SILETHA
INOTHO, LEYONOTHO INGABI
LAHLUPHO.”**

— IZAGA 10:22

semvelo, esasithi uma sisen-
yameni sasibuthakathaka kulaye.
Ngokomoya, kodwa ke, lonke ibala
elalikhulunywa ngu-Adamu lalila-
mandla afana lokuthi akhulunywa
nguNkulunkulu uqobo lwakhe.

U-Adamu, indodana ka Nkulunkulu, wabusa emhlabeni ekulesi isikhundla samandla lobukhulu.

Ngakho uSathane wamzonda umuntu lo walangazelela amandla akhe phezu komhlaba. Impendulo yakhe kwakuyikuthatha umqhele, lesikhundla esasilomuntu. Kwakule nkinga eyodwa. USathane wayengela mandla okuthatha umqhele ku-Adamu; ithemba lakhe kwakuzaba yikukhohlisa u-Adamu ukuba azikhuphe umqhele wakhe yedwa. Ngokukholisa u-Eva emtshela ukuthi uNkulunkulu wayenga thembakalanga njalo impilo yayilento ezinengi kulalezo uNkulunkulu ayebatshengisa zona, u-Adamu lo Eva bakhetha ukukholwa uSathane kuloNkulunkulu bahla-mukela uNkulunkulu. Ekucineni, uAdamu loEva balahlekelwa yisikhundla sabo somthetho lamandla eMbusweni kaNkulunkulu, njalo uSathane waba ngunkulunkulu emhlabeni, njengoba sibona uPhawuli ekhuluma ngaye lapha ku 2 KwabaseKhorinte.

Kubo nkulunkulu walesisikhathi umpumputhekisile ingqondo zaba ngakholwayo, ukuthi bangaboni ukukhanya kwevangeli lenkazimulo kaKhristu, ongumfanekiso ka Nkulunkulu.

— 2 KwabaseKhorinthe 4:4

U-Adamu engakahlamuki, wayejabulela inzuzo yokuba yindodana. Konke uNkulunkulu ayelakho kwakungo kwakhe ukuba akukholise, njalo wayengakwazi ilanga lokuba lezidingo kumbe ukwesaba. Konke okwakungaba yisidingo kuye kwasekubekiwe yena engaka kunjwa.

Nxa singakhangela emuva kumalanga ayisithupha awokudalwa kuncwadi kaGenesisi, sithola ukuthi umuntu wadalwa ekucineni kwelanga lesithupha elokudalwa, uhlelo lokucina olokudala kukaNkulunkulu kwasokumele lufezuke. Kwakumele aphile ngelanga lesikhombisa, lelo lilanga uNkulunkulu alibeka laba ngelokuphumula. Lokhu kwakungasikho ukuthi uNkulunkulu wayediniwe kodwa wayeseqedile njalo konke kwasekuphelele. Cabanga okwe sikhathana okwasekuphelelisiwe nguNkulunkulu lecebo Lakhe elikhazimulayo ayelalo ngomuntu. Ngokudaniso, u-Adamu wakunikeza konke lokhu, phakathi kwakho konke, walahlekelwa ngumthetho eMbusweni.

Ngesikhathi uNkulunkulu emlanda eqeda ukuthatha isinqumo sokungalaleli, uNkulunkulu wathi ku Adamu:

Uqalekisiwe umhlaba ngenxa yakho; ngokusebenza nzima uzakudla okwawo insuku zonke zempilo yakho. Njalo uzakumila ameva lukhula oluhlabayo, ubususidla imibhida yeganga. Ngesithukuthuku zebunzi lakho uzakudla ukudla kwakho, uze ubuyele emhlabathini, ngoba wathatha kuwo; ngoba wena uluthuli njalo uzabuyela ethulini.

— Genesisi 3:17b-19

Into yokuqala engifuna uyibone yikuthi uNkulunkulu kazange aqalekise umhlaba, kwayenziwa ngu Adamu. Wayebusa

ngokupheleleyo phezu komhlaba. Waye ngumnakekeli. U-Adamu, ekubeni ebusa ngokupheleleyo phezu komhlaba, wayenza icala kuhulumende kaNkulunkulu exotshela uNkulunkulu ngaphandle. Isinqumo lesi saba lempumela embi hatshi ku-Adam kuphela kodwa lasemhlabeni wonke futhi lakuye wonke umuntu wesilisa loba owesifazane owayezaphila emhlabeni kusekela lelo langa. Loba waye lokhe elamandla esikhundla emhlabeni ayewaphiwe nguNkulunkulu, wazithola engasela mandla okubusa ngombono womqhele lohulumende ayewumela owawusekela ukubusa kwakhe. Ukwehlukaniswa lempilo ngokwayo, ukufa, ayengazange abebaze u-Adamu, bathatha indawo.

UNkulunkulu uyakhuluma lo-Adamu ngasekwenzile abesetshela u-Adamu ukuthi khathesi, okokuqala, ngesono sakhe, uselahlekelwe lilungelo lakhe kuhulumende kaNkulunkulu. Njalo ngoba u-Adamu wayemela lowo hulumende emhlabeni, izulu laselilahlekelwe ngum'meli wezomthetho owayesenza lona libe lelungelo lokubusa emhlabeni. Okwesibili, umhlaba wona usuphambanisekile njalo awusoze uthole inzuzo njengaleyo eyayiseNgadini yase-Eden. U-Adamu kwakuzamele asebenze nzima aphume lezithukuthuku ukuze umhlaba ukhuphe ayekudinga lokuthi aphile. Ukhula lameva ahlabayi sokugcwele ensimini lempilo iba nzima; ukuziphilisa kuba yindlela yokuphila.

Lokhu ngikubiza ngisithi yimpilo enzima futhi yindlela yokuziphilisa, engcoliswe ngumnuko wokwesaba lokufa, osinda umuntu wonke owabuya ngemva kuka-Adamu, umhlaba usuqalekisiwe. Yikho lapho mina lawe esakhula khona futhi ukuziphilisa sikwazi kahle. UDavida ukubiza esithi yisigodi sethunzi lokufa kuMahubo 23.

Loba ngidabula esigodini sethunzi lokufa, angiyikwesaba okubi, ngoba wena ulami.

— Amahubo 23:4

Yindawo lapho ukwesaba ukufa kugcwele emoyeni. Kodwa ikhona enye impumela embi. Umuntu ulahlekelwa yibudlelwan bakhe lo Nkulunkulu njalo, ngenxa yalokho, akasazazi—ulahlekelwa yisizatho sokudalwa kwakhe lokuba nguye kwakhe. Umuntu edalwa, waphiwa isizatho, injongo. Wayezabusa phezu komhlaba endaweni kaNkulunkulu. Ngamanye amazwi, wayelenjongo ayeyiphiwe nguNkulunkulu lesizatho sempilo yakhe. Kodwa khathesi inqgondo yomuntu isisekuziphiliseni. Ukuziphilisa kuba yisizatho sakhe futhi kuba yiyo injongo yakhe.

Khathesi, isinqumo esenziwa ngumuntu sizahlungulwa ngesiqalekiso sokuziphilisa, ukudinga kumbe ukugcina ingcebo. Akula kuthula; mihla lamalanga kugcwele ukukhathazeka okubuhlungu lezithukuthuku. Indlela yokuphunyuka empilweni leyi yokuziphilisa, isiphithiphithi njengoba sisitsho kulezinsuku, yikuba lenzuzo enengi ebekiweyo ukuze siyekele ukugijima. Lelo liphupho lomuntu wonke owesifazane lowesiliza kusukela ekuweni komuntu. Leso yisifiso sabo sokuqala, ukuma ukugijima. Olenhlanhla ukuthola inzuzo enengi uyibamba ngonanzelelo ayivikele. Babambelela kuyoi besesaba ukulahlekelwa yiyo, ngoba kungenzakala ukuthi ilahleke, kuzamele baqgilazwe bagijime njalo basebenze nzima ngezithukuthuku futhi.

Iphupho lomuntu, ukufuna kwakhe ukuziphilisa, njengoba ngitshilo, yikuthola inzuzo eyaneleyo ukuze ame ukugijima njenge-siqgili sokuziphilisa athole ukuphumula. Ngifuna ukuthola ukuthi

uyakuzwisisa lokhu: Kundlela yomhlaba eyokuziphilisa eyisiqalekiso, wonke umuntu ukhathale ngokugijima.

Ngikhumbula ngihlezi phansi lomunye umfundisi ngelinye ilanga ekuseni. Wayengitshela ukuthi wayeyithanda inkonzo nsuku zonke ekuseni evuka kwaze kwafika isikhathi ekhumbula indaba yezimali zakhe, isikwelede, lokuswela imali. Wathi indaba zakhe zezimali zazinjenge ngubo emanzi eyayizama ukumkhama imtshontshele injabulo yento zonke ayesezenzile. Akusibo bafundisi bodwa abakhangelana lesimo lesi. Yindlela yempilo yezimuli ezinengi ngoba bahlala esikweledeni, nxa behola nyanga zonke.

Wonke umuntu udinga indlela yokuphuma, njalo indlela yokuphuma yikunotha, ukuba lokunengi okudlulisileyo. Ngaphansi kokuqalekiswa komhlaba, ubuntu sobuchazwa yilokhu olakho lemali ongayiyenza. Okwakuqala, umuntu uzama ukufihla ubunqunu bakhe, ukulahlekelwa yisizatho sokudalwa kwakhe lobuntu, athathe inkohliso. Usezama ukubuyisela ugcobo lukaNkulunkulu, eyake yamembesa ngenkazimulo, ngenotho. Okwesibili, uzama ukubuyisela umqhele wesikhundla senhlonipho, ayebusa ngaso eMbusweni kaNkulunkulu, ngokuziqhenya kwempilo lokubusa phezu kwabanye abantu. Umuntu usecabanga into eyodwa kuphela—ukudinga loba ukugcwalisa inotho. Ukuba nguyi kwakhe sokuvela ekuthini ulenotho engakanani lokuthi engazizwa amandla angakanani phezu komunye umuntu. Ukwazakala lesikhundla emphakathini sokuqakatheke kakhulu khathezi emuntwini owileyo.

Kucabangisise. Yiwuphi umbuzo ojayele ukubuzwa ngeyinye indoda kweyinye kuqala? “Uziphilisa ngani?” Yindaba? Sifuna ukubakwazi ngoba silendaba noma ukukhathazeka? Hatshi ngempela, kodwa umbuzo lo ulungisa indlela umuntu lo esizamhlonipha ngayo. Ngamanye amazwi, sizibuza ukuthi,

“Ngubani omunye lo? Ulasiphi isikhundla noma isimo lapha emhlabeni? Ngimupha inhlonipho enganani?” Khathesi, ngikhuluma ngombono womuntu wesilisa lapha, bomama. Ngiyananzelela ukuthi abantu besifazana basebenza ngomunye umbono otshiyeneyo.

Namuhla isiqalekiso somhlaba lesi lokhe lisebenza! Abantu bathatha isinqumo sabo ngoku dinga noma ukugcina imali enengi. Abantu bangathutha lapha abahlala khona badinge imisebenzi engcono eholisa ngcono bengakucabanganga kabili ukuthi isizatho sempilo yabo singaba yini. Wonke umuntu ufuna ukwaziwa abelodumo. Yindaba? Kungenxa yobuntu (isikhundla) kumbe inotho.

Sabuza izifundi eziyinkulungwane ezisesikolweni kuzinga eliphakathi laphakathi ngendaba yokuthi bafuna ukubayini bengakhula. Abayi 65 *percent* bathi bafuna ukwaziwa bengakhula. Ukwaziwa? Ngokwazi kwami, ukwaziwa akusiwo msebenzi.

Olunye uphenyo lwathola ukuthi 30 *percent* yabantu bayawu-zonda umsebenzi wabo, njalo i40 *percent* ayiwuthandi umsebenzi wabo. Ngakho sile 70 *percent* yezisebenzi e-U.S. engawuthandiyo umsebenzi elawo! Manje badingani lapho? Ngoba bayizigqili zokuziphilisa, bagijima ngokusebenza nzima lezithukuthuku ukuze baphile. Injongo lokutshiseka akukho ehlelweni lwezisebenzi lezi; ukubhadala okuhlawulelwayo yikho okubafuqa ukuthi basebenze. Ukuqgilazwa yisidingo sokuthola imali, kutshiya isikhala esincane sokwenza ukhetho. Obhadala imali enengi nguye onqobayo sonke isikhathi. Kubizwa kuthiwa yisiphithiphithi! Yikho lapha wena lami esiphila khona. Thola umfanekiso engqondweni yakho owe *hamster* igijima kakhulu, lingayindawo phakathi kwesigomboloji esibhoda ndawonye. Siyahleka sicabange ukuthi kühle.

Kodwa emhlabeni esiphila kuwo, akukho kuhle. Abantu bayafa bekuleso sigokmbolozu bengafikanga lapho abafuna ukufika khona.

Lingazihluphi ezinhliziyweni zenu ngokuthi lizakudlani kumbe lizanathani; lingakhathazeki ngalokho. Ngoba umhlaba wabezizwe uxotshana lezinto ezinjalo, ikanti uYihlo uyazi ukuthi liyazidinga. Kodwa funani uMbuso Wakhe, zonke lezizinto lizaziphiwa lazo.

— ULukha 12:29-31

Ukugijima ngokusebenza nzima lokuphuma izithukuthuku yiyo yodwa indlela esiyaziyo. Ngingakutshela ukuthi kudingeka ukuthi uphume esikweledeni, ngitsho ukuthi KUDINGEKA ukuthi uphume ezikweledeni, ngemva kwenyanga ezingu12 ungekela imuli yakho izasuswa iyehlala e*North Pole* kokuphela (ngisebenzisa umzekeliso olukhuni ukwenza indaba izwakale), wawuza kwenza njani? Ngizakutshela ozakwenza. Uzaphangisa ukudinga icebo lokugijima uphume izithukuthuku. Uzakuthi “Ngingasebenza imisebenzi eminengi lapha lalapha. Unkosikazi angathatha laye okuyimsebenzi okuncane ngokunjalo, labantwana sebengasiza.” Uyabona, yiyo indlela yenzuzo owayifundayo, ukusebenza nzima lokuphuma izithukuthuku. Mana ngikuphe omunye umfanekiso wendaba le.

Asithi ngiyagijima emgwaqweni engihlala wangakini, besengithola iphepha ngale komgwaqo kulezigidi zemali phakathi. Ngithabe kakhulu, kodwa ngisazi ukuthi kumele ngibike ngayo. Kodwa njengoba ngikwazi wena, besengigijimela endlini yakho ngicele ukusebenzisa ucingo lwakho. Ngitshayele ucingo emapholiseni wena ume ulalele. Ngibatshela okwenzakalayo

lengikutholileyo. Ngemva kokuthula okwesikhatshana besakhangelazi izingwalo zabo, bethi akula muntu osebike ngokulahlekelwa yimali ngingayigcina. (Kangiboni ukuthi bengatsho njalo, kodwa kuyasebenza emfanekisweni wami.) Bengitshela lokho, ngiyeqe ngijabule. Ngibesengikutshela abangitshela khona, ngiseqa ngokujabula.

Uhlekelele kuhle ngisajabula ngikuchazela konke lokhu. Kodwa ucabanga ukuthi ungathini etafuleni selisidla ntambama usuxoxela umkakho? Uzahlekelela? Angicabangi njalo. Wena wawuyakuthi, “LOKHO AKU_____!” Uwugcwalisile umutsho lo, angithi? Ubekwazi njani uktuhi ibala elithi, “AKULUNGANGA” yilo eliqondileyo? Ngizakutshela ukuthi njani, ngoba yiyo indlela owakhuliswa ngayo. Kwakuyindlela owakhula ngayo. Ukusebenza nzima lokuphuma izithukuthuku yiyo indlela okwakusenziwa ngayo.

Kumzekeliso wami, ngathola imali engasetshenzelwanga nzima, njalo lokhu yikuqila indlela yokwenza izinto. Akulunganga. Kwakungalunganga ngoba angiyisebenzelanga nzima imali leyo; ngayithola nje. Ukwazi ukuthi ngeke uthole inhlanhla engako, sokukugcwalisa umhawu lenzondo, ukwazi ukuthi amalanga akho azabe egcwele yikuqgilazwa ukuze uziphilise.

Singafananisa, ngingabuya enkonzweni ngelinye ilanga lempahla zami zidabukile zingcolile ngithi ebantwini, “Sikwenzile! Mina loDrenda sisebenze amahola angu 22 ngelanga okweminyaka elitshumi edlulileyo, sesize sabhadalela indlu yethu ngokupheleleyo,” abantu babezathokoza betshaye izandla. Yindaba? Ngoba ukhona osekwenzile, njalo kuyakhuthaza. Ukhona okwenzileyo; ikhona indlela yokuphuma! Mhlawumbe singaba lesibindi, siziqinise, senze okudingekayo, lathi sikhululwe. Kodwa yindaba abantu bengaqakezanga bathaba ngesikhathi ngithola imali emgwaqweni? Futhi yindaba kube lula ukuthi ugcwalise isikhala lesiya? Ngoba ucabanga

kanje; lawe yikho ophupha ngakho. Okulungileyo yikusebenza nzima lokuphuma izithukuthuku njengesakufundiswayo. Imali oyithola ungayisebenzelanga ayilunganga.

Kodwa ukubalekela ukusebenza nzima lokuphuma izithukuthuku liphupho lomuntu wonke. Ukubalenotho, ukuba lezigidi zemali ngumcabango omnandi ebantwini abanengi. Izigidi zemali, akusafani lokuthi kwakunjani, kodwa ngenombolo, isakhuluma ngenotho. Inotho inika ukukhululeka okuma kuphikisane lokusebenza nzima nsuku zonke okuphilwa ngabantu abanengi. Wonke umuntu ukhathele ngokugijima, ukuba lezigidi zemali kutsho ukuthi sebengama ukugijima beyenze into abafuna ukuzenza. Kucabangisise: yikuyiyini okubukekayo ngokubheja? UKUKHULULEKA! Ukukhululeka kokuba lokhetho, ukwenza izinqumo ezingekho mayelana lokubhadala inhlawulo noma ukuziphilisa.

Umdlalo othiwa, *Who wants to be a Millionaire?*, udume kakhulu. Uyachaza ngoba wonke umuntu uphupha ngenkululeko leyo. Bebukela uhlelo lolu, babukela bekufake enhlizweni, besekela abadlalayo, bethemba ukuthi bazaphumelela.

Ngisatshintsha inhloko yengxoxo yethu kancane, ukutshontsha lakho singakuchasisa sithi yikuthola inzuzo engasetshenzelwanga. Ngomcabango ongcobileyo, kunika inkululeko kusiqalekiso somhlaba. Kasivumelane ukuthi wonke umuntu ufuna ukuma ukugijima! Kodwa ikhona indlela yokuphuma na? Indlela zokwenza imali zinengi. Ngithola imilayezo eminengi ebantwini abaphetsheya kolwandle abangitshela indaba zabo ezibuhlungu ukuthi batshiyelwa ilifa elingamadola ayizigidi ezingu20 njalo badinga umuntu ongabancedisa ukugcina imali leyo endaweni ephephileyo. Bayatsho bathi bayangipha ingxenye yemali le nxa ngingavuma ukuthatha imali le ngiyigcine kuhle. Kodwa besebesithi, bafuna ikheli yami

ye *email* lokuthi mina ngibhadale imali encane eyokuqala uhlelo lolu, ukuyithwala, lomshuwalense, laloba yiliphi elinye ibizo abafuna ukulipha imali le ukuze bakhulule ilifa lelo. Ngempela? Ngikhangeleka ngengomuntu ongacabangiyo?

Kulomthengi owangitshayela ucingo, efuna ukuboniswa ngokuhlanyela imali. Ngambuza imibuzo nje ejwayelekileyo, ngathola ukuthi wayelamadola ayizigidi ezinhlanu ayefisa ukuwahlanyela. Yena wangitshela ukuthi wayengelayo imali le ngaleso sikhathi, kodwa yayililifa. Ngambuza ukuthi indaba zelifa zaziyaqitshwa nini, wathi ngemva kwamaviki amabili. Ngakho ngamthinta ngocingo ngemva kwamaviki amabili, wathi kwakukhanya kusazathatha isikhathi. Wayehlangana lohlupho ezama ukuthatha ilifa leli ebhanga yase-Europe eyayilibambile. Yebo ke, lokho kwangenza nganaka kakhulu, ngakho ngaqala ukubuza imibuzo. Indaba kwakuyikuthi kwakuthiwe ulomalume owayefe eFrance. Umalume lo wamtshiyela amadola ayizigidi ezinhlanu. Kodwa ke, kwakule \$50,000 yomthelo okwakumele ayihlawulele ilifa lelo bengakamthumezeli lona. Wangitshela ukuthi wayezama ukuthola imali leyo njalo wayesebhale izincwadi zokuyiboleka ebambisa ngendlu.

Ngabuza ukuthi igqwetha wayelalo na, wathi, “Yebo, igqwetha ngilalo eFrance eliphethe udaba lolu.” “Kawula gqwetha e-America eliphethe udaba lolu?” Wathi, “Hatshi, ngila leli elingitshaye ucingo eliseFrance.” Waqhubeka wachasisa ukuthi ngoba wayengenelisi ukuthola i\$50,000, igqwetha lase France lalithe lizahlawula ingxenye yemali le, yena ebeseyibuyisela nxa imali yakhe ingakhululwa. “Hatshi,” ngatsho, “yibuqili lobu!” Noba wayengakaze azwe ngaye umalume lo okwakukhulunywa ngaye, wakholwa ukuthi lokhu kwakuliqiniso. Ngamtshayela ucingo ngemva kwamaviki amabili, wasesithi imali yayisiza yenela ukuthi

ayithumezele ebhanga. Ngaphinda, ngamtshela, “Bavele balawo amadola ayizigidi ezinhlanu. Nxa bevele befuna imali yomthelo, kumele ngabe bayakuthumela i-*email* kumbe iphepha lokuthi ufake uphawu lwakho ubabuyisele ubapha imvumo yokuthatha i\$50,000 emalini abavele belayo.” Kodwa kazange angikholwe futhi wayeqinisekile ukuthi babeqinisele.

NgeSonto edlulileyo enkonzweni, ngaba lodaba olufanayo. Ijaha langibuza lifuna ukusizwa ngesaluleko sokuhlanyela imali mayelana lemali eyayizavela ngaphetsheya kolwandle eyelifa. Kangisamvumelanga ukuthi aqedise inkulumo yakhe. Ngathi, “Ngiyakwazi, ngiyakwazi, bafuna ubathumele imali khona bezakhulula ilifa lakho, angithi?” “Ngempela, yebo, ukwaze njani?” Ngamtshela into efananayo, ukuthi yibuqili. Loba wayengamazi umuntu okwakuthiwa wadlula emhlabeni, njalo wayengala gqwetha lapha eU.S., wangilwisa ngendaba yokuthi imali ikhona. Bawela njani kulokho abantu laba? Ngoba bafuna ukukhululwa! Abenelisi ukukwekela ngoba, engqondweni zabo, nxa kulokuncinyane okwethuba lokuthi kubeliqiniso, bayakufuna.

Mana ngikuphe omunye umzekeliso. Ibhizimusi lezimali esilalo mina lo Drenda ligcwele i-United States yonke. Libhizimusi elihle! Amathuba akunhlanganiso yami aliqiniso; ngilabantu abayenza amakhulu enkulungwane amadola ngomnyaka. Kodwa kunengi okumele kufundwe kubhizimusi yami le. Uyabuphethe izimali zabantu. Kule mithetho okumele ubeyazi futhi lokufunda ukuhlela ingcebo.

Ngangisenza izimemezelo eColumbus, Ohio, indawo kusiteshi sewayilesi esamaKhristu ngibizela ukuthi baze lamaphepha abo okudinga uimsebenzi, njengoba ngangidinga umuntu owayefanele isikhundla. Kwabuya abangu 50. Endaweni yokuthi ngihle ngibabuze imibuzo yomsebenzi ngaleso sikhathi, ngacabanga ukwenza uhlelo

lokubafundisa sisehoteleni nje eyayiseduzane ukuze ngisizakale ukukhetha. Umhlango wawuzakhuluma kabanzi ngamathuba ayengatholwa yinhlanganiso yethu ngaphandle, lokuthi thina kasikhulumi ngendlela izimali eziphathwa ngayo kodwa lokuthi sinika izaluleko lezi ngendlela zesiKhristu. Sakhuluma ngendaba yokuthi inhlanganiso isebenza njani ngokuphathelane landlela zokusebenza, ukuholisa, ukuqeqetsa lemithelo edingekayo. Ngangikwazi ukuthi inengi lalabo ababe lapho babeza tshiya sebebona ukuthi kwakungu msebenzi omnengi okunganani ukwenza i \$200,000 ngomnyaka.

Ngemva komhlango, ngangihamba phakathi kwehotela ngabona ukuthi kwakule siqumbi sabantu abangu 1,000 kwelinye igumbi. Bonke babe buye ngesizatho esisodwa. Inhlanganiso enkulu yayisazisa abantu ngokudingeka ukuba bangene kunhlanganiso yabo. Kodwa yindaba abantu babe banengi lapha kulababengu 50 ababe kimi? Impendulo ilula—imali! Ngokubi ke, kodwa lokhu ayisikho kanye inhlanganiso le eyayikutsho, kodwa umfanekiso ababewunika ngothi “Ngingangena, ngingenisa abanye abantu abathathu ngaphansi kwami, kanjalo nje, ngizakuba lezigidi zemali.” Khathesi, njengomuntu osezazi into lezi ezokuthi loba ngubani oyenza imali enengi kangako usebenza nzima! Yebo, ukwanelisa kuyabe kukhona, kodwa, umbono olapha ngowemali elula “Ngingayekela ithuba leli lihambe, khangela abantu bonke laba abalapha, ngizakhutha lithuba elikhulu!” Ngicela ungangitholi kubi. Ngilabangane abanengi abalungileyo asebayenza izigidi ngenhlanganiso ezinje, njalo kulama *MLM* ayenza kuhle phandle lapha. Kodwa ngizama ukutshengisa inqgondo elabantu abajwayelekileyo abangaphansi kwe *MLM*. Ukuthengisa indlela elula eyokwenza imali kukhulu emhlabeni olesiqalekiso sokuziphilisa.

Nxa ungama kancane uzibuze ukuthi ucabanga kangakanani ngemali, kungabe kuyikuyithola noma ukugcina kuhle olayo, uzamangala. Ngizakutsho lokhu futhi ukuze uthole engizama ukukutshengisa khona: wonke umuntu ufuna ukuma ukugijima, futhi wonke umuntu usediniwe ngokuphilela nje ukuthi aziphilise! Okwenza sithande impelaviki

**KUNGALUNGISWANGA
INDABA YEMALI,
UZAGWETSHELWA UKUGIJIMA
NGAPHANSI KOMCABANGO
WASEQALEKISO SOMHLABA
OWOKUZIPHILISA IMPILO
YAKHO YONKE.**

yikuthi sifuna ukuke sime. Okwenza sithande amakhulu yikuba sifuna ukuke sime. Okwenza sikhangelele ukuthatha umhlala phansi yikuthi sifuna ukuke sime senze lokho esifuna ukukwenza. Ungangitholi kubi. Indlela abantu ababona ngayo impilo asikho kuthi bafuna ukuhlala phansi bengayenzi lutho. Futhi kangitsho ukuthi yiyo intando kaNkulunkulu lakuwe. Hatshi, sadalelwa ukuthi sifeze izizatho sokudalwa kwethu. Ngokubi ke, abantu abanengi bayagijima ukuthi baphile sebaze bakhalala amaphupho abo kudala.

Ngilesiqiniseko sewake wezwa umuntu esitsho lokhu kumbe sewake wakupsho wena: “Kumele ngiye emsebenzini namuhla.” Njengoba usuke wananzelela, abantu abaphatheki kuhle ngaphakathi nxa “kumele” baye emsebenzini. Kodwa ke, bayenza kuhle nxa besiya emsebenzini ngokutshiseka lokuthanda lokho abakwenzayo. Kodwa kanengi, akunjalo empilweni zabnamtu abanengi. Ngaphandle kwalokhu, bona bathi, “Kumele ngiye emsebenzini namuhla.” Ukuthola elinye iholo, elinye ilanga ehofisini, elinye ilanga lokuziphilisa futhi ungatholi okwaneleyo. Inengi liqalisa kuhle ligcwele injabulo. Umsebenzi abawuthatha

ukuthi babhadale inhlawulo zabo wawungowe sikhathshana, baze bethole ukuthi impilo ihamba njani. Kodwa abakutholayo yikuthi impilo yaba ngani ayikhanyi, sebegijimela ukubamba iminyaka yamatshumi amane, bathola ukuthi akula ndlela yokuphuma. Kubizwa kuthiwa yi-*mid life crisis* (inhlupho ezihlangana labantu sebekhulile), futhi okwakuqala, bayananzelela ukuthi baphakathi kwesithiyo.

Mngane wami, leyi akusiyo impilo uNkulunkulu ayihlela ukuba siyiphile. Usukwazi lokhu. Kodwa ukubalekela ikusasa leli elizwisa ubuhlungu yikho okwenza mina loDrenda sitsho okweminyaka eminengi ukuthi ungekela ukulungisa into yemali, kawusoze uthole injongo, injongo edalelwe eyakho impilo. Kungalungiswanga indaba yemali, uzagwetshelwa ukugijima ngaphansi komcabango waseqalekiso somhlaba owokuziphilisa impilo yakho yonke.

Ungekela ukulungisa indaba yakho yemali, kawusoze uthole isizatho esadalelwa wena!

Nxa sesifananisa, asikhulume ngokuthi impilo yakho ingabukeka njani. Asikhangele othanda ukukwenza. Asithi yi *golf*. Wake wezwa umuntu esithi, “Besengilibele, kumele ngihambe ngiyedlala i-*golf* namuhla”? Kumbe wake wezwa umuntu esithi, “Besengilibele, nguLwesihlanu ebusuku; ngiyabuzonda ubusuku bangoLwesihlanu. Ngifisa ukuthi ngaba namuhla nguMvulo ekuseni, khona ngizabuyela emsebenzini.” Kumbe asithi uthanda ukuthiya inhlanzi. Ngangingakuzwa na usithi “Besengilibele, kumele ngiyedobha inhlanzi namuhla”? Hatshi, angithembi ukuthi ngingakuzwa ukutsho lokhu ngoba ulothando lokwenza lokhu. Kungayenzekani nxa ungaphila impilo yakho ngothando lentshisekelo yalokho

okwenzayo, wenelise ukugxila entweni oyithandayo futhi uthole indlela emnandi, hatshi lokho okukukhupha izithukuthuku? Nxa ungaba lemali edingakalayo ukugcina imuli yakho uphile impilo engala nkathazo zemali? Ikhona na indlela yokwenza lokhu? Mina loDrenda sathola ukuthi indlela ingabakhona!

Isibusiso seNkosi siletha inotho, leyonotho ingabi lahlupho.

— Izaga 10:22

Thatha isikhathi sakho, uwubale kuhle umbhalo lowu. AmaHebheru atsho inotho engasetshenzelwanga nzima. Uyakubona? UMbuso kaNkulunkulu unika indlela yokubalekela ukusebenza nzima lezithukuthuku esazitshiyelwa ngu-Adamu. Indima le itsho ngempela esikubalayo na? Usungavuma uthi uma isitsho njalo, kutsho ukuthi ubale indaba ezimnandi kakhulu osulesikhathi ungazange uzizwe. Itshaya ekhanda! Yikho u-Isaya 61, ekhuluma ngokwesiphrofethi ngoJesu layengakwenza enkonzweni yakhe, esithi:

UMoya weNkosi Yobukhosi uphezu kwami, ngoba iNkosi ingigcobile ukuthi ngitshumayele izindaba ezinhle kwabampofu.

— U-Isaya 61:1

Yiziphi indaba ezinhle emuntwini ovaletwe empilweni le eyokuziphilisa kusiqalekiso somhlaba? Ukukhululeka ngokokomnotho, yebo ke! UJesu uthi uMbuso kaNkulunkulu unika ngaphandle kwesilinganiso sesiqalekiso somhlaba esokugijima lokusebenza nzima lezithukuthuku. Asikhangelane lakho. Awungeke ugijime

ngokwaneleyo, futhi kubantu abanengi, bagijima kakhulu njalo kanzima kodwa bathole ukuthi abagijimi kakhulu ukuthi bakhululeke. Ngangigijima kakhulu kuminyaka leyana eyisitshi-yagalolunye mina loDrenda sisezikweledeni ezinkulu. Abathengi abangamakhulu ezinkulungwane ababuye kunhlanganiso yethu kuminyaka engu 27 edlulileyo labo bebegijima kakhulu. Kodwa, ngaphandle kokukhuthala kwabo, bavalelwe empilweni yokuba yiziqgili zenotho. Bonke basitshayela ucingo ngoba benanzelela ukuthi babengela themba kwezomnotho, amaphupho abo okukhululeka ayekhangeleka enzima ukufinyelela, futhi umbono wawusuthathelwe indawo yikuziphilisa. Hlolisisa ibala elithi inzuzo.

Inzuzo yikuba lombono.

Kungela nzuzo akula mbono ngoba kungela nzuzo, ukuthola inzuzo, kuba njalo yiwo umbono wakho. Futhi, leyi yindlela inengi eliphila ngayo—impilo engela mbono. Lobu yibugqili obukhohlisayo kakhulu.

ISAHLUKO 7

UMNYANGO

Kasibuyele kancane sikhangele esesikufunde ngoMbuso kaNkulunkulu. Okwakuqala, sifunde ukuthi umuntu wabekwa emhlabeni wanikwa isikhundla sokubusa umhlaba. Sibona kumaHebheru 2:7-8 ukuthi akukho okusemhlabeni okwakungabekwanga ngaphansi komuntu. Ngenxa yalokhu, sithole ukuthi umuntu nguye isihluthulelo kumbe umnyango wokungena emhlabeni. USathane wayekwazi lokhu, yingakho waqopha u-Adamu lo-Eva kucebo lakhe lokuthola amandla phezu komhlaba. U-Adamu lo-Eva bathi sebewe kucebo lakhe elenkohliso, bawona baquma amandla kahulumende kaNkulunkulu awomthetho empilweni zabo. UMoya kaNkulunkulu, owawubembesile ngesikhathi sokudalwa kwabo, kwasokumele usuke. Babanqunu hatshi okomzimba kuphela kodwa lasemoyeni. Ngiyacabanga ngobukhulu bokwethuka kwabo lapho uMoya kaNkulunkulu usubatshiyile. IBhayibhili lithi masinyane baqala ukweluka amahlamvu esihlahla somphafa baqala ukuzigqokisa, ngoba basebezizwa benqunu.

Noma umuntu wayelokhe elesikhundla sokubusa umhlaba njengoba wayewuphiwe ekuqaleni, wayeselahlekelwe ngamandla okubusa umhlaba ngokomoya. Ngokuba wayekhethe

ukuhlamukela uNkulunkulu wakhetha ukukholwa lokulandela uSathane kuloNkulunkulu, umuntu waba ngaphansi kwamandla kaSathane, ngokunjalo, yikho ukwahlulelwa okufanayo okwakunikezwe uSathane (uLusifa) lapho exotshwa ezulwini. Ukwahlulelwa kwakuyikusiwa endaweni okuthiwa yisihogo, indawo elenhlungu lokulahlelwa kokuphela kude lobukhona bukaNkulunkulu. Kumele sikutsho ukuthi isihogo sasingadalwanga kucatshwanga umuntu noma ukudalelwa umuntu. Kwakungazange kube yinjongo kaNkulunkulu ukuthi noma nguwuphi umuntu ayekhona.

Yona izakuthi kulabo abakwesokhohlo sayo, “Xekani kimi lina eliqalekisiweyo liye emlilweni ongapheliyo owalungiselwa uathane lezingilosi zakhe.”

— UMathewu 25:4

Ukuze akhulule umuntu kulesi siphetho, uNkulunkulu kwakuyamele athuthukise njalo amandla kahulumende Wakhe emhlabeni. Kwakuyamele adinge indlela yokuthatha amandla ayesebanjwe nguSathane. Yinye nje indlela eyayingenza lokhu. Kwakumele umuntu ongelasono angene endaweni ka-Adamu athathe isijeziso sokufa. Kodwa kwakulenkinga eyodwa eyayisenza icebo lelo libenzima. Wonke umuntu owayesemhlabeni leso sikhathi, eyisizukulwane sika-Adamu, wayengcoliswe yisono njalo engenelisi ukuthwala uMoya kaNkulunkulu lamandla Akhe. Kodwa uNkulunkulu wayelecebo lokulungisa inkinga le. Icebo leli lalidinga ukuthi okudingekayo okokulunga Kwakhe, umthetho Wakhe, kuthuthukiswe njalo kulotshwe emhlabeni ukuze umuntu owayephila emhlabeni atholakale engelacala ngomthetho ofanayo, nxa kwakusenza. Kulapho kuphela umuntu

ayezenelisa khona ukuma endaweni ka-Adamu, athathe isijeziso lenhlawulo ka-Adamu.

Kodwa kwakulenkinga enkulu ngendlela le njengoba umuntu owayengalenza leli icebo kwakungamelanga abe yisizukulwane sika-Adamu, njengoba usendo lolu lwasolungcolisiwe njalo lwasuswa ebukhoneni bukaNkulunkulu. Ngakho icebo lokuhlenga leli lalizayenzeka njani? Ukuze lenzakale, kwakuyadingeka ukuthi uNkulunkulu abeke umuntu emhlabeni owangasuye wosendo luka-Adamu owayezabe ezinikele endaweni yomuntu. Kodwa umhlaba wawusunikezwe u-Adamu lezizukulwane zakhe, njalo ngokomthetho, lokhu kwakuyakuba licala. Yayinye nje indlela yokukwenza lokhu, eyodwa nje zwi. Umuntu lowo kwakuyamele azalelwe lapha, kodwa engayisuye wosendo luka-Adamu.

Ekuqaleni, usungavuma uthi lokhu, lakho futhi, kwakungayenzi. Kodwa ngokolwazi, yayikhona indlela. UNkulunkulu wayengafaka inhlanyelo yendoda ngokomthetho phakathi kowesifazana osemhlabeni nxa wayezathola umuntu owayengakholwa ukuba Yena enze njalo, lokho kwakuzamnika Yena umthetho wokubusa. Khumbula, umuntu wayelesihluthulelo sokungena emhlabeni. USathane wayesebenzise isihluthulelo esifanayo ukuze angene emhlabeni atshontshe isikhundla sika-Adamu somoya esokuba lamandla. Ukuze icebo likaNkulunkulu lisebenze lokubonisa uSathane ukuthi icebo leli lalisemthethweni, owayezakhala ngeqiniso, uNkulunkulu kwakuyamele athole owesilisa lowesifazane owayezakholwa Kuye ngokuba lomntwana ngoba kungenjalo kwakungeke kwenzeke uthi bona babelaye umntwana. Babeyakholwa kuNkulunkulu ukuze enze lokho okungenzekiyo.

Ukuzalwa komntwana wabo kwakuyabe kuthwele isiphetho sakhe, ukuthi ngosendo lwakhe zonke izizwe zazizabuseseka,

njengoba usendo lolu uNkulunkulu wayezakuba elomthetho wokubusa phezu kwalo ukuze alethe uJesu emhlabeni. Nxa babekhona abathatheneyo ababengakholwa ukuthi uNkulunkulu wayengakwenza lokho, ukubeka umntwana phakathi kwesibeletho esifileyo, bekholwa ukuthi ngalowo mntwana zonke izizwe zazizabusiwa lokuthi ukuzalwa kwakhe kwakuzabanikeza izizukulwane ezinengi kulenhlamvu zetshebetshebe eziseceleni kolwandle, uNkulunkulu wayezakuba lalo ilungelo ayelidinga ukuze Yena afake inhlanyelo Yakhe phakathi kukaMariya, umama kaJesu. Kodwa uNkulunkulu wayengayithola na indoda enje. Ibizo lakhe kwakungu-Abhrahama, ubaba wokholo lwethu.

Kungekho themba, u-Abhrahama ngethemba wakholwa waba nguyise wezizwe ezinengi, njengoba kwakutshiwo kuye ukuthi, “Izakuba njalo inzalo yakho.” Engekethisanga ekukholweni kwakhe, wamelana lobuqotho bokuthi umzimba wakhe wawusufana lofileyo—njengoba wayeseleminyaka ephosa ibe likhulu ubudala—kanye lokuthi isibeletho sikaSara laso sasesifile. Khepha akazange atshede ngokungakholwa kusithembiso sikaNkulunkulu, kaqiniswa ekukholweni kwakhe, wapha udumo kuNkulunkulu, ekholwe ngesiqiniseko esipheleleyo ukuthi uNkulunkulu wayelamandla okwenza lokho ayekuthembisile.

—KwabaseRoma 4:18-21

U-Abhrahama loSara bakholwa kuNkulunkulu bazala u-Isaka sebebadala kakhulu kungaselathemba lokuthi bangaba labantwana. Ngenxa yokuthi u-Abhrahama nguye owakholwa kuNkulunkulu, isithembiso sasingabuya kuphela ngomnyango

owawuvulwe ngu-Abhrahama. UJesu kwakuyamele abuye ngosendo luka-Abhrahama. Kahle ngikucacise lokhu. Ukuze uNkulunkulu alethe uJesu emhlabeni, Yena kwakumele abuye ngosendo luka-Abhrahama. Kwakumele!

Ukuza ngo-Abhrahama yiyo yodwa indlela eyayisemthethweni. Yingakho nxa ungakhangela kusahluko sakuqala esika Mathewu, uthola uluhlu lwalo lalawayana owazala lo lalawayana. Isahluko lesi saba ngesakuqala ngesizatho. Sona

**KHATHESI BASEBEHAMB
PHEZU KWESIQALEKISO
SOKUSEBENZA NZIMA
LOKUPHUMA IZITHUKUTHUKU
UKUZE NJE KUBE
LOKUZIPHILISA.**

sicacisa iqiniso lokuthi lapha emhlabeni uJesu wayeyisizukulwane sika-Abhrahama. Lokhu kwakumelwe kulotshwe emhlabeni lapho uSathane afuna khona amandla ngokomthetho. Uma uluhlu lolu lwalungayisilo qiniso kumbe ukuthi uJesu akazange abuye ngosendo luka-Abhrahama, uSathane wayezakuthi ukuzalwa kukaJesu lempilo yakhe kwakuyibuqili njalo Yena wayengafanelanga ukuhlawulela izono zethu.

Nxa ukhumbula, u-Isirayeli wayelemithetho eminengi eyayingavumeli ukuthathana kwabantu bangaphandle kwelizwe labo. Umuntu angathatha ngaphandle kwelizwe labo kwakumele ajeziswe ngokufa. Usukwazi ke khathesi ukuthi kungani usendo lolo kwakumele luhlale lumsulwa lokuthi kungani lwalulondolozwa kangaka. Yebo, usungathola omama bangaphandle ababethathwa ngama-Isirayeli, njengoRahabi, owayehlala edolobheni laseJericho futhi wafihla inhloli ezazithunywe ukuyahlola ilizwe. Yebo, yena ulotshiwe kulesi isahluko sakuqala esikaMathewu njengoba wayethethwe ko-Isirayeli. Kodwa kumele uzwisise ukuthi isiko lamaJuda lalisithi abathwala usendo ngamadoda.

Kahle ngibalekele ingxoxo yethu kancane. Kulenkulumo ezinengi mayelana lokuthi umuntu uselesikhathi esingakanani esemhlabeni. Ikhona na indlela yokwazi lokhu ngempela? Yebo! Ngingaqinisa ngalokhu okukodwa. Uluhlu olukusahluko sikaMathewu esakuqala luqinisile. Kangiboni ukuthi ukhona ongaqanjwanga ngoba ngabe mina lawe kasilukholisi usindiso lolu esilukholisa khathesi. USathane wayeyakuthi kulobuqili. Uluhlu loluyana luqotho. Ngakho ngenxa yalokho, usungazama ukucabangela isikhathi esesahlalwa ngumuntu emhlabeni. Ngithe kahle ngiphosele lokhu lapha.

“Ngizakwenza ube yisizwe esikhulu, njalo ngizakubusisa. Ngizakwenza ibizo lakho libe likhulu, njalo uzakuba yisibusiso. Ngizababusisa labo abakubusisayo, lalowo okuqalekisa ngizamqalekisa; njalo bonke abantu emhlabeni bazabusiswa ngawe.”

— UGenesisi 12:2-3

Njengoba ubona kulo umfanekiso, umnyango wokungena emhlabeni owalethwa ngu-Abrahama yiwo umnyango osemthethweni owawuzangena ngoJesu Khristu ukuzebusisa abantu bonke emhlabeni. Noma u-Abrahama lezizukulwane zakhe babenikeze uNkulunkulu umthetho wokubusa owawudingeka ukuletha amandla okufinyelela kukahulumende Wakhe emhlabeni, umuntu wayelokhu evalelwe ngaphansi kwesisindo sesono lokufa komoya kwaze kwathi uNkulunkulu alethe uJesu emhlabeni, ukuze ahlawulele isono sika-Adamu. Kodwa mayelana lenzuzo, sithola ukuthi u-Abrahama lendlalifa zakhe, labo ababelo-phawu lokusokwa, baphumelela. Khathesi basebehamba phezu

kwesiqalekiso sokusebenza nzima lokuphuma izithukuthuku ukuze nje kube lokuziphilisa.

U-Abhrama wayesenothile kakhulu ngezifuyo langesiliva legolide.

— UGenesisi 13:2

Siyabona kulo umbhalo utshintsho olwalethwa yisivumelwano lesi mayelana lenzuzo. Kukhona okwahlukileyo na mayelana lalokho okutshiwo nguNkulunkulu ku-Abhrahama nxa uqathanisa lalokho Yena akutsho ku-Adamu kuGenesisi 3:17? Uyakhumbula, ngemva kokona kuka-Adamu, uNkulunkulu wamtshela ukuthi wayesezaziphilisa ngokusebenza nzima lezithukuthuku. Kodwa khathesi ku-Abhrahama, sibona umehluko. UNkulunkulu uthi, “Ngizakwenza!” Akuzange kuthiwe u-Abhrahama watshiywa yedwa ukuba agijime ngezithukuthuku lokusebenza nzima. Kuthiwa uNkulunkulu usephakathi. UNkulunkulu wathi, “Ngizakwenza!” Ngakho siyabona na u-Abhrahama ephumelela empilweni ngemva kwalokhu? Lutho!

U-Abhrahama wayenothile! Abantwana bakhe babenothile. U-Abhrahama wayephila ngaphandle kwesiqalekiso somhlaba. Wayelokwedlula okwaneleyo! Akuthathanga isikhathi eside ukuthi abantu bawubone umahluko. Umahluko lo waqhubeka kusendo lwakhe lonke. Ngempela, kuzizukulwane ezinlutshwane ezalandela u-Abhrahama, umzukulu wakhe uJakhobe wayesebenzela uLabhani, ubabazala kaJakhobe. ULabhani wabona isibusiso esasikuJakhobe wazama ukumqila ukuba amthathele impumelelo yakhe. Kodwa uNkulunkulu watshibilikisa icebo lakhe lokweba isibusiso labayingozi kuye wasebusisa uJakhobe ngenotho enkulu kungasenani.

Engikutshoyo yikuthi noma abantu bazama ukuvimba isibusiso, kabazange benelise. Nxa indlalifa zazihleli eqinisweni lesivumelwano zikhonza uNkulunkulu, uNkulunkulu wayezinikeza impumelelo.

Cabanga iminakano yalokho okungenzakala ngalokhu engikutshoyo! Ngithola imihlobo lemhlobo yezincwadi lama emails asuka

**“INKOSI IZAVULA AMAZULU,
UKUPHUPHUMA KWESIPHALA
SAYO, UKUZE ILITHUMELE
IZULU NGESIKHATHI
ESIFANELEYO NJALO
IBUSISE YONKE IMISEBENZI
YEZANDLA ZENU.”**

—UDUTHERONOMI 28:8A

kubantu abangitshela ukuthi ngikhuluma kakhulu ngemali. Bangitshela ukuthi ukuphumelela akusiyo ntando kaNkulunkulu. Bagcizelela ukuthi sonke kumele sihlupheke kakhulu empilweni ukuze sisebenzele uNkulunkulu. Ngivumelana kancane lengxenywe yalokho abakutshoyo. UJesu watsho ukuthi ukuphumelela

kwethu kuzasenza sihlukuluzwe kuMakho 10:30. Ngokubi ke, amaKhristu amanengi akholwa ukuthi uNkulunkulu yinkosi yomsebenzi elukhuni njalo kumele sidubeke ngokugula lezifo. Hatshi, lesi yiso isiqalekiso somhlaba hatshi isibusiso! UNkulunkulu ufuna uthuthukise inotho yakho.

UNkulunkulu UFuna Ukukuthuthukisa!

Nxa inotho yakho ingavikelekanga futhi ingathuthukanga, uyabandezelwa ukuthi ugijime ngendlela yokuziphilisa impilo yakho yonke, usehluleka ukwenza umsebenzi wakho kamoya, uphila impilo yobugqili. Khangela lokho uNkulunkulu akutshela izizukulwane zika-Abrahama kuDutheronomi 28:8-13.

“INKosi izakwehlisela isibusiso phezu kweziphala zenu, lakukho konke elizakwenza. INkosi uNkulunkulu wenu izalibusisa elizweni lelo alinika lona. INkosi izalithuthukisa njengabantu bayo abangcwele, njengokulithembisa kwayo ngesifungo, nxa lingagcina imilayo yeNkosi uNkulunkulu wenu lihambe ngezindlela zayo. Ngelokho bonke abantu emhlabeni bazabona ukuthi lina libizwa ngebizo leNkosi, balesabe. INkosi izalenza liphumelele kakhulu—enzalweni yenu, lenzalo yezifuyo zenu kanye lezithelo zomhlabathi wenu —elizweni afunga ngalo kubokhokho benu ukuthi izalinika lona.

INKosi izavula amazulu, ukuphuphuma kwesiphala sayo, ukuze ilithumele izulu ngesikhathi esifaneleyo njalo ibusise yonke imisebenzi yezandla zenu. Lizakweboleka izizwe ezinengi kodwa lina, iNkosi izalenza libe yinhloko, hatshi umsila. Nxa lizalalelisisa imilayo yeNkosi uNkulunkulu wenu engilinika yona lamuhla njalo liyilande le ngonanzelelo, lizahlala njalo liphezulu, lingabi ngaphansi lanini.”

Nanzelela ukuthi kuleli ilizwe elitsha babengakathuthukiswa noma isithembiso babelaso. Kodwa uMosi ubatshela ukuthi uNkulunkulu uzabathuthukisa! Ukuze uzwisise ukuthi lokhu kungabukeka kunjani lokuthi uNkulunkulu uzama ukuthini kubo, cabanga isihlahla se okhi. Nxa sisase lihlumela, kasikathuthuki. Noma ngubani angasisiphuna asitshintshe indawo asise lapho YENA ayabe efuna siyekhona. Kodwa nxa isihlahla se okhi sesikhulile savuthwa, akula ongasitshedisisa. Sesithuthukile.

INKosi izakwehlisela isibusiso phezu kweziphala zenu,

lakukho konke elizakwenza. INkosi uNkulunkulu wenu izalibusisa elizweni lelo alinika lona. INkosi izalithuthukisa...

— UDutheronomi 28:8-9

Ngakho kunjani ukuthuthukiswa kwezezimali? UNkulunkulu uyasitshela lapha kundima 12b:

Lizakweboleka izizwe ezinengi kodwa lina, iNkosi izalenza libe yinhloko, hatshi umsila.

UNkulunkulu wayesitsho ukuthi Yena uzababusisa kakhulu okokuthi bona babezakweboleka abanye. Babeyakuba ngamakhanda hatshi imisila. Umsila awukwazi lalapho oya khona; wona uya lapho ikhanda eliya khona.

Abanothileyo babusa abayanga, lalowo owebolekayo uyisichaka salowo omebolekayo.

— Izaga 22:7

Oboleka kwabanye kathuthukiswanga. Yena uhleli ngaphansi komusa walowo omebolekayo, esebenza njengesichaka kungela nkululeko. Kodwa uNkulunkulu uthi, “HATSHI! Mina ngiza-kuthuthukisa! Akukho ozakutshela ukuthi utshiye umuzi wakho ngoba uyabe uhlawulelwe. Akakho ongakuthathela imota yakho, ngoba iyabe ihlawulelwe. Indlu yakho yokuphekela izagcwala ukudla, njalo uzahamba phezu komhlabathi owawuhlawulela okupheleleyo, ugcwalisisa umsebenzi wakho owawuphiwa nguNkulunkulu ulokuthula kwezezimali. Uzathuthukiswa!”

UNkulunkulu ufuna uphumelele!

ISAHLUKO 8

AMANDLA OKUTHEMBEKA

Lokho osuzakufunda yisimiso soMbuso esilamandla, amanengi okokuthi ngezwa sifanele ukuba yisihlokwana salolu ugwalo. Sisithola kundaba lempilo kaJosefa, umzukulu ka-Abhrahama. Ukuze ngikunikeze indabamuva, uJosefa wayezondwa ngabafowabo, njalo babefuna ukumsusa. Ngempela, bona babefuna ukumbulala, kodwa oyedwa wabafowabo wayengafuni benze okukhulu kangaka kuye; ngakho, bacina bemthengisa kwabanye abathengisi ababeyizihambi abamthwalela eGibhithe lapho abafika bamthengisela uPhothifa, owayeyindunankulu yabalindi bakaFaro.

UJosefa wathathwa wasiwa eGibhithe. UPhothifa, owayengomunye wezikhulu zikaFaro, eyindunankulu yabalindi, wamthenga kuma-Ishumayeli abayibo abamletha khona. UJosefa wathathwa wasiwa eGibhithe. UPhothifa, owayengomunye wezikhulu zikaFaro, eyindunankulu yabalindi, wamthenga kuma-Ishumayeli abayibo abamletha khona. INkosi yayilaye uJosefa ngakho waphumelela, wahlala

endlini yenkosi yakhe umGibhithe. Kwathi inkosi yakhe ikubona ukuthi iNkosi yayilaye lokuthi iNkosi yamphumelelisa kukho konke ayekwenza, uJosefa wasethandeka kuye wasesiba yinceku yakhe. UPhothifa wasembeka ukuba ngumphathi womuzi wakhe, kwathi konke ayelakho wakubeka ezandleni zakhe.

Kusukela ngesikhathi embeka ukuba ngumphathi womuzi wakhe lakho konke okwakungokwakhe, iNkosi yawubusisa umuzi womGibhithe ngenxa kaJosefa. Isibusiso seNkosi saba phezu kwakho konke uPhothifa ayelakho, loba kusendlini loba kusensimini. Ngakho watshiya konke okwakhe ezandleni zikaJosefa; kwathi ngoba uJosefa enguye ophetheyo, wakhohlwa ngakho konke ngaphandle kokudla ayekudla.

— UGenesisi 39:1-6

Qaphelisisa kundima 2a, “INkosi yayilaye uJosefa ngakho waphumelela.” Kutshoni lokhu? Kanti uNkulunkulu akalaye wonke umuntu? Nxa sikhangelale lokho ebesikuxoxa kuzahluko ezidlulileyo mayelana losendo, impendulo ngethi hatshi. Khumbula, ukholo luka-Abhrahama lesivumelwano esalandelayo yikho okwanikeza uNkulunkulu ilungelo lokufinyelela u-Abhrahama lendlalifa zakhe—kuphela. Ngakho nxa sikhuluma ngokuthi uNkulunkulu ulomuntu wonke, akumelanga sikuphambanise lokuthi uNkulunkulu uthanda wonke umuntu; Yena uthanda wonke umuntu. Kodwa kulabo abangekho emthethweni phambili kukaNkulunkulu, akukho Laye angakwenza.

Khumbulani ukuthi ngalesosikhathi lalehlukene loKhristu, lingabalelwa enzalweni yako-Isirayeli njalo lingabezizweni kusivumelwano sesithembiso, lingelathemba njalo lingelaye

uNkulunkulu emhlabeni. Kodwa khathesi kuKhristu uJesu lina elake laba khatshana le selisondezwe eduzane ngegazi likaKhristu.

— Kwabase-Efesu 2:12-13

Nanzelela ukuthi umbhalo lo ukhuluma ngokungabi lesivumelwano, okutsho ukuthi uNkulunkulu lamandla Akhe kuyabe kuqunyiwe ngokomthetho emuntwini. Kungani? Ngoba uNkulunkulu akabi lokubusa okusemthethweni phezu komhlaba engelaso isibopho esisemthethweni, isivumelwano esibekiweyo, lowesilisa noma owesifazane emhlabeni. Indima le iletha lokhu egcekeni lapho isithi ngaphandle kwesivumelwano, abantu kabala-themba njalo kabalaye uNkulunkulu emhlabeni. Khumbula ukuthi uJesu selokhe wasifakela isivumelwano esitsha, sesingamalunga amatsha awendlu kaNkulunkulu njalo sesiyinzalo yoMbuso Wakhe omkhulu. (Kwabase-Efesu 2:19.)

Ngakho khathesi, sikhangele umbhalo wethu kuGenesisi 39, siyazwisisa ukuthi umutsho othi “iNkosi yayilaye uJosefa” utsho ukuthi ngokusemthethweni, uNkulunkulu wayelokufinyelela komthetho empilweni kaJosefa ngenxa yesivumelwano esasibekwe ngukhulu wakhe u-Abhrahama. Isivumelwano somthetho lesi, esasivumela isibusiso kunye lokufinyelela kukaNkulunkulu, sasikhulela ukusebenza nzima lezithukuthuku zomhlaba. Kwakusemthethweni ukuthi uNkulunkulu abusise uJosefa.

**UNKULUNKULU
AKABI LOKUBUSA
OKUSEMTHETHWENI PHEZU
KOMHLABA ENGELASO
ISIBOPHO ESISEMTHETHWENI,
ISIVUMELWANO
ESIBEKIWEYO, LOWESILISA
NOMA OWESIFAZANE
EMHLABENI.**

Khumbula okwatshiwo nguNkulunkulu ku-Abhrahama ngaphambilini, “*Ngizakwenza.*” Ngenxa yokuthi uNkulunkulu wayeloJosefa, emsiza empilweni, wayephumelela kukho konke ayekwenza, okokuthi inkosi yakhe eyayingumhedeni, uPhothifa, yabona umehluko phakathi kokwanelisa kukaJosefa lokwamanye amadoda eyayiwabonile. Kumele ngitsho sisaselapha ukuthi nxa siphumelela ngokusizwa nguNkulunkulu, abantu abaphila ngaphansi kwesiqalekiso somhlaba esokuziphilisa bayawubona umehluko! UPhothifa wathokoza waze wacina etshiya konke okwakhe ezandleni zikaJosefa.

Zinengi izimiso zoMbuso ezivezwa kulo umbhalo, kodwa isihluthulelo sezihluthulelo sivezwa lapha. Ngisibiza ngokuthi “Amandla Okuthembeka,” kumbe wena ungasibiza uthi “Isimiso sikaPhothifa.” Sitholakala kuGenesisi 39:5:

*Kusukela ngesikhathi embeka ukuba ngumphathi womuzi wakhe lakho konke okwakungokwakhe, iNkosi yawubusisa umuzi womGibhithe ngenxa kaJosefa. **Isibusiso seNkosi saba phezu kwakho konke uPhothifa ayelakho, loba kusendlini loba kusensimini.***

Ngifuna uthole umfanekiso ocacayo ngalokho okwenzakala lapha. Kuleli ilanga uJosefa wayengasuye mphathi kwelilandelayo wayesenguye. IBhayibhili likhuluma ngesikhathi lapho utshintsho lolu olwayenzakala khona. Isibusiso seNkosi sayehlala phezu kwazo zonke izisebenzi zikaPhothifa, impahla yekhe yonke! Kodwa yena wayengamazi uNkulunkulu kaJosefa njalo wayengasuye wako-Isir-ayeli. Ngakho lokhu kwakungayenzakala njani futhi kutshoni? Nansi impendulo. UPhothifa wathi ebeka impahla yakhe ngaphansi

kwamandla kaJosefa, engakwazi, impahla yakhe yayisingaphansi kwesivumelwano uJosafa ayesenze loNkulunkulu.

Izinto zikaPhothifa, impahla yakhe, lengcebo yakhe konke kwaguqula imbuso!!

Uyabona, ingcebo kaPhothifa yayilokhu ibotshelwe kusiqa-
lekiso somhlaba ngokomthetho kwaze kwathi isibekwe ngaphansi
kukaJosefa. UPhothifa wathi esebeke ingcebo yakhe ngaphansi
kwamandla okubusa kukaJosefa, akazange ananzelele ukuthi
wayeyibeka ngaphansi kwalapho okufinyelela khona isibusiso sikaN-
kulunkulu. IBhayibhili liyaqhubeka lisithi uJosefa esengumphathi,
uPhothifa akasazange abuye azihluphe kumbe akhathazeke ngokunye
ngaphandle kokudla ayekudla. Wayengela nkathazo! Kungela
nkathazo, uPhothifa okwakhe kwaku-

**KWAKUTHIWA YISABATHA,
UMFANEKISO WELANGA
LAPHO UMUNTU
AYENGATSHONI KHONA
ESEBENZA NZIMA
NGEZITHUKUTHUKU UKUZE
AZIPHILISE.**

yikukhangela umsebenzi wakhe lenjongo yakhe njengendunankulu
yabalindi baseGibhithe. Kulokunengi esingakubona lapha,
kodwa okwayehlela uPhothifa, engananzeleli, yilokho okubizwa
kumaHebheru 4 kuthiwa yikuphumula kweSabatha, njalo yebo,
kuyatholakala lakumakholwa eThestamende eNtsha.

Ungafundisisa ngeSabatha, uzathola ukuthi uNkulunkulu
akazange avumele ama-Isirayeli ukuba enze umsebenzi ngalolo
suku; akukho zithukuthuku kumbe ukusebenza nzima okwakusiba
khona. ISabatha, yebo ke, kwakulilanga lesikhombisa, elali-
hambelana lelanga lesikhombisa elokudalwa kwendalo yonke.

Usungakhumbula ukuthi ilanga lesikhombisa elokudalwa yilo ilanga elathiwa nguNkulunkulu ngelokuphumula. Kwakungayisikho ngoba uNkulunkulu wayesediniwe, kodwa, kwakungoba Yena wayeseqedile. Konke kwasokuphelile. Ilanga lesikhombisa kwakulilanga elalihlelelwe umuntu ukuba aphile kulo, ilanga elingela kukhathazeka, elilakho konke okwakungadingwa ngumuntu engakakudingi. Kodwa yebo ke, siyazi ukuthi u-Adamu walahlekelwa yikuphumula lokhu aze ahlamukele uNkulunkulu. Ngokuhlamukela uNkulunkulu, u-Adamu waquma ukwanelisa kukaNkulunkulu ukumlethela inzuzo. Walahlekelwa yindawo yenzuzo ayeyiphiwe nguNkulunkulu ngaphambilini. U-Adamu wayesephoqeka ukuba azidingele inzuzo, echitha isikhathi sakhe sonke esebenza nzima ngezithukuthuku ukuze aziphilise.

Kodwa uNkulunkulu akazange atshiye umuntu engela themba. Yena wanikeza umuntu umfanekiso wokuphumula ayezakubuyisela ngelinye ilanga. Kwakuthiwa yiSabatha, umfanekiso welanga lapho umuntu ayengatshoni khona esebenza nzima ngezithukuthuku ukuze aziphilise. UPhothifa wathi esethinte isibusiso seNkosi esasikuJosefa ngenxa yesivumelwano, yena wayethinta ukwanelisa kukaNkulunkulu okokuletha inzuzo ngoJosefa, wasethola ukuphumula. Konke kwasokunakekelwe; wayengasela nkathazo.

Ngakho watshiya konke okwakhe ezandleni zikaJosefa; kwathi ngoba uJosefa enguye ophetheyo, wakhohlwa ngakho konke ngaphandle kokudla ayekudla.

— UGenesisi 39:6

Ukuze uzwisise ukuqakatheka kweSabatha lalokho uNkulunkulu

ayekutshengisa umuntu, kumele ubuze umbuzo olula. Usuku lweSabatha lwalungayenzakala njani? Ngitsho ukuthi, ngaphansi kwesiqalekiso somhlaba, umuntu wayegijima nsuku zonke ukuze aziphilise. Nxa lokho kuliqiniso, umuntu wayesezayekela njani ukugijima ngosuku lweSabatha? Wayezathola njani ayekudinga uma wayengayekela ukusebenza ngeSabatha? Lowo ngumbuzo omuhle njalo kumele uphendulwe, njalo kumpelo le sizathola isambulo sonke “esesibusiso seNkosi” uJosefa ayehamba kuso.

Ngicabanga ukuthi umzekeliso omuhle owesimiso lesi utholakala kuLevi isahluko 25 lapho uNkulunkulu echasisa uMnyaka weJubhili kusizwe sako-Isirayeli. Nansi indabamuva, uMnyaka weJubhili wawusenzakala ngemva kweminyaka engu50, njalo kukhona okunengi okubalulekileyo ngomnyaka lowo engingasoze ngikhulume ngakho lapha. Kodwa ke, engifuna ukuzwisise yikuthi babengenelisi ukuhlanyela izilimo zabo ngalowo mnyaka. Ngempela, babengenelisi ukuhlanyela izilimo zabo langomnyaka wesi49 njengoba kwakungumnyaka weSabatha. Ngakho ngifuna uthole umfanekiso ocacayo mayelana lalokhu okwenzakalayo: U-Isirayeli wayetshelwe ukuthi wayengeke ahlanye izilimo ngomnyaka wesi49 lowesi50. Kwakumele balinde ukuphela komnyaka wesi51, nxa bangahlanyela izilimo, ukuze zivuthwe bavune. Ngakho, uNkulunkulu wayebatshela ukuthi kwakuyamele bahlale iminyaka emithathu bengazange bavune lutho. Uma ngangingakutshela ukuthi wawungasoze uthole imali okweminyaka emithathu, ngabona wawungakhathazeka. Yingakho, u-Isirayeli wakhathazeka. Ngokwemvelo, lokhu kwakungeke kwenzeke. Kodwa uNkulunkulu wayebatshengisa okuthile.

“Lingabuza lithi, ‘Pho sizakudlani ngomnyaka wesikhombisa nxa singahlanyeli kumbe sivune izilimo zethu na?’ Mina ngizalilethela isibusiso ngomnyaka wesithupha, ilizwe lithela izithelo zeminyaka emithathu. Lapho selilima ngomnyaka wesitshiyagalombili, lizakube lisidla izilimo ezindala, liqhubeke lisidla zona kuze kufike isivuno somnyaka wesitshiyagalolunye.”

— ULevi 25:20-22

ISabatha lalingayenzakala ngoba uNkulunkulu wayebusisa ilanga lesithupha ngenzuzo ephindwe kabili, kumbe eyedlula okwanelayo. Umutsho lo wekele ubhode ekhanda lakho kancane. Kayisikho na okulangazelelwa nguye wonke owesilisa lowesi-fazane, ukuba lokwedlula okwanelayo? UNkulunkulu wathi lapho enikeza umuntu inzuzo ephindwe kabili ngosuku lwesithupha, Yena wayekhumbuza umuntu ukuthi Yena nguye owayenakekela, njalo wayesenelisa ukunikeza okwedlula okwanelayo. Kasikhulume iqiniso; okwedlula okwanelayo kunikeza inkululeko kusiphithip-hithi. Kuyasisusa ebugqilini bokungabi lokhetho. Okuqakathek-ileyo yikuthi, kusikhulula ukuze sithole njalo siphumelele kunjongo yethu lalokho esitshiseka ngakho. Yikho lokho okwakhwabithwa nguPhothifa. Ukungabi lenkathazo. Sonke isidingo sakhe sasesinakekelwe. Okukodwa okwakumele ahlose kukho yinjongo yakhe. Njalo futhi, njengoba mina loDrenda sisitsho. “Uze ulungise indaba yemali, kawusoze wenelise ukuthola injongo yakho.” Kodwa kulendaba ezimnandi! Ukuphumula kweSabatha lokhe kutholakala namhlanje, njalo kunikeza indawo lapho izidingo zethu ezinakekelwa khona zinqobe ukuziphilisa kwakudala.

Isakhona, ngokunjalo, iSabatha lokuphumula kwabantu bakaNkulunkulu; ngoba lowo ongena ekuphumuleni kukaNkulunkulu uyaphumula owakhe umsebenzi (ukusebenza nzima ngezithukuthuku, ukuziphilisa) njengoba uNkulunkulu waphumula koWakhe.

UMbuso kaNkulunkulu wasusa kuPhothifa isikhundla somthetho womhlaba owokusebenza nzima ngezithukuthuku, njalo uzakwenza okufanayo lakuwe. Lapho sifunda ukuthinta uMbuso kaNkulunkulu, singaphumelela njalo sithole injongo yethu. Impilo ingabamnandi, igcwale ngokutshiseka lenjabulo, ngeqiniso!

Isibusiso seNkosi siletha inotho, leyonotho ingabi lahlupho.

— Izaga 10:22

Isibusiso seNkosi siletha inotho, njalo uNkulunkulu akayilethi ngokusebenza gadalala!!! Siyenelisa ukuphila phezu kokusebenza nzima ngezithukuthuku okukuGenesisi 3:17. Mina ngaphila ngale indlela okweminyaka eminengi ngaze ngafunda ukuthi uMbuso kaNkulunkulu usebenza njani. Lawe usungafunda. UNkulunkulu ulawe! Angakusiza! Ungaphumelela. Hatshi, kahle ngitsho lokhu kahle: Kumele uphumelele. OPhothifa bomhlaba, labo abangamaziyo uNkulunkulu njalo bebhensile ngaphansi kwesiqalekiso sokungabi lethemba, ukusebenza nzima, bezama ukuziphiliza, bakubukele. Kabalukholisi ukholo lwakho, izakhiwo zamabandla,

**YEKEKELA UKULANDELA
UKUNGAKHOLWA LENSULO
OKUKUGOMBOLOZELEYO.
GUQULA ITHEMBA LAKHO
UKHOLISE UMBUSO
KANKULUNKULU!**

kanye lemibhalo ngoba kabenelisi ukubona ngangale kwempendulo ongelazo. Ngeke ukhangelele ukuthi abantu bakulalele nxa ubatshela ukuthi uNkulunkulu umkhulu wena uphila impilo elenhlungu zezimali lokuziphilisa njengabo. Hatshi, kumele utshengise ukuthi uMbuso unjani njengalokho okwayenziwa nguJosefa. Kangijonganga ukuba lukhuni, kodwa abantu akusizo ziwula. Badinga impendulo.

Ngangingelalo ilizwi elifinyelela abantu okweminyaka. Akakho owangicela ukuba ngibe kumabonakude; ngangingakhokheli ibandla lezinkulungwane. Kungani? Ngoba akukho engangingakutsho, ngangingelamacebo, ngingela mpendulo, ngingela bufakazi bokuthi uNkulunkulu wayephila njalo elami. Ngangiziphilisa ngokuboleka imali emulini yangakithi. Imota yami yayidilika, indlu yami idilika, lempilo yami layo idilika. Ngubani owayengafuna ukwazi ngobukhulu bukaNkulunkulu wami? Yebo, ngangisendleleni yokuya ezulwini, njalo izulu yilo elikhulu kulakho konke, kodwa abantu kabasoze balalele ngobukhulu bezulu ngaphandle uze ubatshengise ukuthi izulu lilapha emhlabeni. Lalela, engikutshoyo yikuthi nxa uNkulunkulu enguNkulunkulu njalo iLizwi Lakhe liliqiniso, kumele lisebenze. Impilo zethu kumele zikhangeleke zahlukile njalo zehlukane! Kumele sifinyelele isizukulwane lesi ngeqiniso loMbuso. OPhothifa babukele.

Ngakho kungani nginike ugwalo lolu isihlokwana esithi *Amandla Okuthembeka*? Kungoba uPhothifa wathinta uMbuso kaNkulunkulu wakholisa ukuphumula kweSabatha okwakungela kusebenza nzima ngezithukuthuku, kungela kwesaba, kodwa kubusa ukuthula. Kulapho ukuziphilisa okukhulelwa khona yinjongo lokutshiseka, ukudubeka kuginywe yinzuzo. Yena wakwenza njani lokho? Waletha inkinga lenhlupho zakhe ngaphansi kwamandla

okubusa koMbuso kaNkulunkulu. Kalula, singathi noma wayenganzeleli ayekwenza, yena walandela indlela zikaNkulunkulu. Waba lesibopho njalo waba ngaphansi kokubusa koMbuso kaNkulunkulu. UPhothifa wahlakanipha wabeka indaba zakhe ngaphansi kukaJosefa ngoba wayebona izimpendulo. Lawe ungakwenza lokho; yikho mina loDrenda esakwenzayo. Yikho okwaletha impunzi, kwaletha imali, izimota, kwaletha njalo umuzi esasiwufuna. Njalo kahle ngikunikeze isaluleko. Yekekela ukulandela ukungakholwa lensolo okukugombolozelayo. Guqula ithemba lakho ukholise uMbuso kaNkulunkulu!

ISAPHLUKO 9

LINA BANIKENI UKUDLA!

Ngigqala ukuhlangana loDon, wayebuyele ehofisini yami edangele ngenxa yezikweledi. Akukho okwakumi kule empilweni yakhe ngaleso sikhathi. Ngathi sengihleli laye sikhuluma, ngafumana ukuthi wayeseyeqise inyanga phose ezintathu kumbe ezine engakhokhanga imali yendlu ayeyiqhatshile njalo wayesemuva ukuhlawulela ezinye indleko ayebhekane lazo. Kwakukhona inhlupho emtshadweni wakhe—umkakhe wayesekhathele ngesimo sezimali zabo eseqale ukudelela uDon ngenxa yokuthi wayesehluleka ukusilela yena mlobokazi labantwababo abahlanu. Iqiniso yileli, uDon wayengasazihloniphi yena mathupha. Njalo elemibuzo eminingi.

Umsebenzi wakhe wawungowokuthengisa umshuwalense wempilakahle kusifundazwe sase-Ohio, kodwa ukungabhobokeli kwakhe kwasokum'hugela ekutshabalaleni komnotho.

Kungakhathalekile ukwakumhanqile uDon, mina ngangibona ithuba lokwanelisiswa kuye. Yena wayezimisele ukufunda lokusebenza. Lezo zinto zombili ezilamandla zenza ngakhwabitha

ukumqhatsha lokutshala kumpilakahle yekusasa lakhe. Ekucineni, kwaba yikutshala ikwaba lesivuno esikhulu kithi sobabili.

Inhlanganiso yami eyayisentsha yayithole umklomelo wohambo lokuya eHawaii komunye othengisayo, mina ngabona kulithuba elihle lokwabelana loDon ngokoMbuso kaNkulunkulu. Noma nje uDon wayengumKhristu, wayengelalo izinga lokuzwisisa elifana lelami. Noma ngasengizame kanengi ukwabelana laye izimiso zikaNkulunkulu laye kulesi sigaba, wayengakuzwisisi engangikutsho.

Ngangihleli ngidinga indlela yokukhanga uDon eyayizamenza ananzelele ukuthi laye, futhi, wayesanelisa ukufunda ukuba umbuso kaNkulunkulu usebenza njani. Kungenani, uDon wayedangele okokuthi kwakusiba nzima kuye ukuzethemba lokukholwa ukuthi inguquko ingenzakala. Ngangisazi ukuthi uhambo lweHawaii kwakulithuba lami.

Kumaviki ayesandulela ukusukuma kwami loDon, sasixoxa ngokuthi sasizakwezani siboneni khonale. Kukhona okukodwa okwakukhanga uDon ukwedlula okunye konke. Wayefisa ukugola i-*blue marlin*, emanzini amahle awolwandle lwe*Pacific Ocean*. “IHawaii yiso isigodlo se-*blue marlin* emhlabeni lo,” nguDon engethulela ngenjabulo. “Ngihleli ngifuna ukuthiya i-*blue marlin*, liphupho lami ke lelo.” Okwakuqala kumaviki ambalwa ngabona ukuphazima emehlweni kaDon. Kukhona okwakumjabulisa, njalo lami ngazazela ukuthi ukuthokoza kwakhe kwakulisango lesifundo esikhulu.

“Don,” mina ngatsho, “uyakwazi na ukuthi kuyenzeka ukuba wazi, hathi ukuba lethemba, kodwa ukwazi ukuthi uzayibamba i-*blue marlin* eHawaii ngokuthinta uMbuso kaNkulunkulu? Ethithibele ngokumangala, uDon wafisa ukwazi okunengi, mina ngaqhubeka ngengcazelo yami mayelana loMbuso. Ngaphinda uMakho 11:24, indima ethi, “*Ngakho ngiyalitshela ukuthi loba*

kuyini elikucelayo ngomkhuleko, kholwani ukuthi selikwamukele, sekuzakuba ngokwenu.” KuDon, lokhu kwakukuhle kakhulu kungakholeki lula. Ngathatha isikhathi sokumsiza ngimchasisela ngoMbuso lokuthi ukholo lwakhe lungakhululwa njani. Ngakho ke, singakaqali uhambo lwethu, yena lomkakhe batshala ngendlela engangenze ngayo kumpunzi yami, benza umkhuleko wokuvumelana, bekhola ukuthi uzayibamba *ibblue marlin*.

Kusenjalo, uDon wenza konke okwakusemandleni akhe ukuthi agcine umlandu wakhe kusivuno lesi. Wenza uphenyo lokudinga izikepe ezitholakalayo lentengo zazo waze waqhatsha lomtshayeli ayasizwa kukukuhle ukusebenza laye. Konke kwasokuhlelekile, sonke sasikujabulela ukuya emanzini aluhlaza aseHawaii.

Lwafika usuku lokuntsheza, sathi singena esikepeni, sasithabile satshela umtshayeli ukuba lolu yilo usuku esasizagola khona *ibblue marlin*. Noma wayekhangelele ukuthi sibe losuku olule mpumela enhle ekuthiyeni eminye imihlobo yenhlanzi, wasithembisa ukuthi amathuba okubamba *ibblue marlin* ayemancinyane kakhulu mhlalokho. Nsukukuzonke kunyanga ezine ezedluleyo besebenzisa izikepe zokuqatsha ezimbili, iqula lakhe lalenelise ukubamba *i-blue marlin* eyodwa qha. Lokhu kwakubangelwa yikuthi kwakungayisiso sigaba sokutholakala kwe-*blue marlin*, njengoba *imarlin* kuyinhlanzi ezizula ngezigaba zomnyaka. Salandula ukudangaliswa, samtshela ngenhlonipho enkulu ukuthi sasizayithola eyodwa saqhubeka silungiselela.

Ngemva kwamahola ayisithupha okuzulazula, sasingakatholi

**“NGAKHO NGIYALITSELA
UKUTHI LOBA KUYINI
ELIKUCELAYO NGOMKHULEKO,
KHOLWANI UKUTHI
SELIKWAMUKELE,
SEKUZAKUBA NGOKWENU.”**

— UMAKHO 11:24

lutho olulodwa, lami sengiqala ukudangala ukuthi ukusweleka komcimbi lokhu kwakuzathundubaza ukholo lukaDon. Ngikhathekile ngamemeza umbuzo kuye, “Don,” ngamemeza ngisesiqongweni engangihleli khona phezu kwakhe, “kahle ngikubuze umbuzo. I-*blue marlin* yakho uyamukele sikhathi bani, kulapho ezavela khona na kumbe laphaya uze ukhuleke?” Ngesiqiniseko, uDon waphendula ngamandla, “Gary, kulula lokho. Ngiyamukele laphana ngize ngikhuleke,” Ngajabula ngakhuthazeka ngisizwa impendulo yakhe. Ngazi ukuthi uDon wayelalele isixwayiso sami njalo wayezimisele ukuyithola leyo *marlin*.

Ngemva kwemizuzu embalwa, induku yokugola ekaDon yaqala ukuholoba igobela elwandle abasizi bamemeza bethi, “Inhlanzi isidlele!”

“Lingathabi kakhulu,” kwatsho umtshayeli ekhuza. “Ngiyayibona yihlanzi enkulu sibili, kodwa akusiyo *blue marlin*. I*marlin* ivele ize phezu kwamanzi iseqela emoyeni kakhulu, kodwa lihlanzi iyalela enzikini.” Imizuzu yadlula uDon ebindana layo ihlanzi eyayisize eduzane isibonakala ke. Ediniwe enjalo uDon, ngokufanayo ihlanzi layo yayisiphelile yavuma ukwehlulwa. Mina loDon asimangalanga

**NGANDLELA YINYE UMOYA
UNGEKE UBONAKALE KODWA
UKUSEBENZA KWAWO
KUBONAKALA KUMVELO,
UQOTHO KANJALO UMBUSO
KANKULUNKULU NJALO
USEBENZA OKUBONAKALAYO
KUMVELO.**

lapho siyidonsela phakathi, i*blue marlin* enkulu enhle, kodwa abanye bonke esikepeni babethithibele.

Umfanekiso kaDon laleyo nhlanzi ukhona ehofisini yami lanamuhla lokhu njengobufakazi lesikhumbuzo kimi ngoMbuso. Ngaphandle, kwakuyinhlanzi nje. Kodwa kuDon, i*marlin* yayis- itsho okukhulu. Nxa uMbuso

wawusebenzile ku*marlin*, kutsho wawusebenza kunoma yisiphi

isiqi asidingayo empilweni. KuDon kwakuyikuqala kokubonakala kwesisindo soMbuso kaNkulunkulu empilweni yakhe.

Asibuyele emuva ngeminyaka eyinkulungwane ezimbalwa lapho ozafunda khona ngendoda eyayithiwa nguNikhodimasi, eyabuza uJesu ijonge uMbuso kaNkulunkulu. Isahluko 3 sogwalo luka Johane simumethe impendulo kaJesu, *“Umoya uphephethela loba kungaphi lapho othanda khona. Ungakuzwa ukuvunguza kwawo, kodwa ungeke utsho ukuthi uvela ngaphi loba ukuthi uya ngaphi. Ngakho kunjalo emuntwini wonke ozelwe ngoMoya”* (indima 8). Loluya suku oluhle sisesikepeni loDon yisibonelo esihle esingatholakala.

Noma nje Mina loDon sasingawuboni uMbuso kaNkulunkulu, ngeqiniso sazibonela sabuzwa ubuhle bawo lapho *imarlin* enkulu igolwa. Ngandlela yinye umoya ungeke ubonakale kodwa ukusebenza kwawo kubonakala kumvelo, uqotho kanjalo uMbuso kaNkulunkulu njalo usebenza okubonakalayo kumvelo. Nxa sifunda imithetho yokubuswa koMbuso kaNkulunkulu siletha inguquko empilweni zethu njengoDon ngaloluya suku.

Kuhle ke, nanku umbuzo. I-*Marlin* leyana yavela njani? Ikhona impendulo yalowo mbuzo. Awungeke umane uthi uNkulunkulu wakwenza. Cha, kumele sazi ukuthi sakwazi njani ukuthi iyeza. Kumele ukwazi lokhu ngoba sokungaba losuku lapho lawe ozafuna khona *imarlin* eluhlaza kumbe imota eluhlaza kumbe okudingakala endlini nje (ama-*groceries*). Iqiniso yikuthi isiqokoqela sendaba akusikho kugola inhlanzi njengendaba zami zokuzingela impunzi. Indaba ivula inkophe ngoMbuso njalo lokusebenza kwawo. Kulesizatho sokuvela kwayo *imarlin*! UJesu wachitha isikhathi esinengi efundisa abafundi Bakhe ngokuthi uMbuso usebenza njani, ngaphandle kokukhuluma ngawo nje Yena wayebabonisa.

Ngicela uqaphelise. UMbuso awusebenzi ngandlela yemvelo

owakhulela kuyo wena. Awungeke noma nini uwuqedisise engqondweni. Wona usebenza ngemithetho ethile, imithetho eyehlukeneyo lale evamileyo kumvelo yethu. Kodwa singayifunda leyo mithetho. UJesu wachitha isikhathi efundisa njalo ebonisa ngale imithetho konke lapho Yena ayesiya khona. Enye indaba engiyithandayo lapho uJesu abonisa khona ngoMbuso yenzakala kuMakho 6. Yindaba edumileyo ekaJesu esilela angu 5,000 amadoda ngezinkwa ezinhlanu lenhlanzi zimbili. Noma sengayizwa kayisigidi ngisakhula ebandleni, akekho owayetha ngendlela uJesu enza ngayo.

Ngalesi isikhathi kwasekusemini kakhulu, ngakho abafundi bakhe beza kuye bathi, “Le yindawo esesikhaleni,” batsho, “njalo sekusemini kakhulu. Tshela abantu bahambe ukuze baziyele emadolobheni lasemizini bayezithengela abangakudla.”

Kodwa waphendula wathi, “Bapheni lina ukudla.”

Bathi kuye, “Lokho kungathatha umholo wendoda owenyanga eziyisitshiyagalombili! Uthi sihambe siyochitha imali engako sithenge isinkwa sibaphe badle?”

“Lilezinkwa ezingaki na?” Wabuza. “Ake liyokhangela.”

Sebezibonile bathi, “Zinhlanu—lenhlanzi ezimbili.”

UJesu wasebalaya ukuthi bahlalise bonke abantu phansi etshanini ngamaxuku. Yikho bahlala phansi ngamaxuku alikhulu. Abanye ngamatshumi amahlanu. Ethatha izinkwa ezinhlanu lenhlanzi ezimbili wakhangela ezulwini, wabonga, wasehlephuna izinkwa. Waseziqhubela abafundi bakhe ukuba bazabele abantu. Waphinda wabehlukanisela inhlanzi zombili. Bonke badla basutha, abafundi basebebutha imvuthu zezinkwa lenhlanzi bagcwalisa izitsha ezilitshumi lambili. Abadlayo babengamadoda azinkulungwane ezinhlanu.

— UMakho 6:35-44

“Jesu, sesilenkinga. Abantu sebelambile njalo nxa bengasasukumanga khathesi, abangeke babebesafika emakhaya kungahlwi; thina ke kusiphatha kabi.” Ngakho uJesu uthini kubo? “O, maye, liqinisile. Ngisuke ngalibala isikhathi; asiphetheni umhlango masinyane.” Cha, Yena umane athi, “Lina banikeni ukudla.” Ini? IBhayibhili libalisa 5,000 amadoda ayekhona, kodwa kungabalwa lamanenekazi labantwana inani lifika lula ku 20,000 ababelapho. Ukuphakela leloqembu labantu, noma kuthiwa ulazo izinsiza, ngumsebenzi omkhulu lowu, phose ongafezekiyo. Ngiyakholwa abafundi babengazwisisi ukuthi uJesu uthini. Impendulo yabo kuleso sinqumo Sakhe lesi siveza ingqondo yabo yasemhlabeni. “Kodwa, Jesu, lokho kungathatha umholo wendoda owenyanga eziyisitshiyagalombili! Uthi sihambe siyochitha imali engako sithenge isinkwa?” Okokuqala, nanzelela ukuthi baluguqula njani uhlupho lwabo lokwehluleka ukusilela lube yindlelayesiqalekiso somhlaba kwezomnotho, ukusebenza nzima, ngezithukuthuku, okwenyanga eziyisitshiyagalombili nxa sicacisa.

Ngelinye ilanga ngangikhuleka uNkulunkulu wangitshela ukuthi ngangilengqondo yenyama. Ngadideka; kambe kutshoni lokhu? Ngingabe ngilohlupho lwenkanuko? Hatshi, Yena wayesitsho imicabango yami lokuthi ngangisenqabelwa kanganani ngoba indlela yesiqalekiso somhlaba yayicubungula ikusasa lami kusiya ngokuthi ngangiphanga ukusebenzisa ingqondo kanganani. Sonke siyakwenza lokhu. Nxa sifuna indlu entsha, siqala ngokudinga ukuthi ibiza okunganani, sihle siqale ukuqathanisa ukuba siyayanelisa yini. Sikuqathanisa njani lokho? Ngokusebenzisa indlela yomhlaba eqalekisiweyo ukuqatha isiqubu sethu. Kahle sibone, mina ngenza i-\$15 ngehola ngisebenza amahola angu40 ngeviki lokhu kusinika ... “Habe, angingeke ngiyanelise indlu leyi.”

Uhle uyijikele eceleni uthi ayiqaleki. Nxa singacubungula konke sisebenzisa isilinganiso sesiqubu sethu, ASINGEKE singene ekuphileni ngendlela yoMbuso ngoba uNkulunkulu akavumelani lendlela zethu. UNkulunkulu wayengitshela ukuthi nxa ngangifisa ukuxhumana loMbuso, kumele ngiqale ukucabanga ngendlela yoMbuso—konke kuyenzeka!

Kulapho abafundi ababekhona lapho bethi, “Lokho kungathatha umholo wendoda owenyanga eziyisitshiyagalombili.” Kalula nje, babethi akwenzakali ukusilela ixuku labantu abanengi.

Kahle ngibukise ukuthi uJesu ethi “Lina banikeni ukudla” wayezwakala njani kubo. Cabanga ngingumfundisi wakho usuwelwe luhlupho, ususalele emuva ekubhadaleni inhlawulo zendlu yakho. Ususalele ngenyanga ezintathu usuzalahlekelwa yindlu yakho. Uze uzocela nxa ibandla lingakusiza ukuze ungasaleli muva ekuhlawuleni. Mina besengisithi kuwe ngelipholileyo, “Mina ngilecebo elingcono. Kungani ungayibhadali yonke nje leyo mali, ungasali ulohlupho lokuyikhokha?” Wena usungangikhangela ngelithi, “Ngeqiniso akazwisisanga ukuthi ngitheni.” “Cha, Mfundisi, ngibona awuzwisisanga. Asilayo imali; yikho sibuye kuwe. Sidinga ukuba ibandla lisincedise singasaleli emuva ekuhlawuleni kwethu.” Ngiphinde, ngikukhangele ngithobekile nje, “Cha, ngiyakuzwisisa okutshoyo, yikho ngikupha icebo elihle. Kumele uyihlawulele kanye indlu kuphele, njalo uyabe ungasela sikwelethe, Njengomtshina we-*pinball* olomsindo nxa ugoba, lawe wawungathi sengisangene.

Yebo, yiyo imizwa yabafundi ke leyo. “Jesu, uyasoma ukuthi ungasilela ukudla kwabantu abangu 20,000 bonke laba, kambe? Lokho akwenzakali vele. Asilazo izinsiza zokuba sikwenze lokho. Noma singenza isu lokuyasebenza gadalala ukuba sithole imali

eyaneleyo, sihlele inqola lamaqembu abaholi siyethola leso sinkwa, ngesikhathi siphenduka bonke abantu bayabe sebefile. Noma ngabe imali ikhona asilaso isikhathi sokukwenza lokho.” Yiyo indlela esisabela ngayo izinto sisenyameni singasaboni indlela yokuphunyuka. Nxa kungekho nzuzo, umbono wethu uyafa.

UJesu abafundi bakhe akabatshiyanga bekulesosimo sokungabi lempedulo, njalo Yena wayengeke abatshele ukuthi banike abantu ukudla ngabe kwakungela ndlela yokwenza njalo. Yena wayesezabatshengisa enye indlela—uMbuso usenza umsebenzi wawo. Abafundi sebethithibele, uJesu wathatha indawo yobukhokheli.

“Lina lilani? Ake liyokhangela,” uJesu watsho. Abafundi baphenduka bathi, “Sithole izinkwa ezinhlanu lenhlanzi ezimbili.” Kwathi izinkwa ezinhlanu lenhlanzi ezimbili sezitholakele, uJesu wacela abafundi ukuthi beze lazo Kuye. Uthatha isinkwa lenhlanzi akubusise abesekubisela kubo. Emehlweni emvelo, akukho okuguqukileyo, kodwa kwelikamoya, okuthile okumqoka kwasekwenzakele, okuthile okuqakathekileyo ekuzwisiseni uMbuso. UJesu ulayela abafundi ukuba bayabele abantu isinkwa lenhlanzi bona babukele bemangala ukudla kusiba kunengi emehlweni abo kwanele abantu abangu 20,000 baze behluleke ukuluma ucezu nje. Kwenzakaleni? Kwenzakale njani?

Ukuze sizwisise kuzamele kesibuyele emuva kancane sihlo-
lisise isehlakalo lesi. Ibala elithi “ukubusisa” litsho ukwahlukanisa kumbe ukukhetha. Ngakho singathi uJesu wakhuluma phezu kokudla wakubusisa, isinkwa lenhlanzi kwakhethwa kusuka komunye umbuso kusiya komunye. Kuzinga lomhlaba, ukusilela abantu abangu 20,000 ngezinkwa ezinhlanu lenhlanzi ezimbili akwenzakali. Kodwa eMbusweni kaNkulunkulu, konke kuyenzeka. Eqinisweni indaba ayipheleli lapha. Ingakapheli abafundi

basebebuthe ingcebethu ezingu 12 zokudla okwakusele. Izinkwa ezinhlanu lenhlanzi ezimbili kwasuka ekubeni ngokunganeliyo, kwaba ngokusuthisa abantu 20,000 kwabuye kwaba kunengi ukwedlula okwakukhona ekuqaleni? Yiyo indlela yoMbuso, ukuba lokwedlula okwanelayo!

Njengalowo ophenya ahlaziye izinto zikamoya, ngathi ngiyikhangelisisa indaba le, ngabona indlela efanayo engayiphiwa nguNkulunkulu ngempunzi zami. Ngokuzingela kwami impunzi, uNkulunkulu wangifundisa ukuqala ngihlanyele eMbusweni kaNkulunkulu ingxenye yalokho okwakudingeka. Yilokho okwayenziwa ngumfana wesinkwa lenhlanzi. Yena wakubeka ngaphansi kwamandla oMbuso kaNkulunkulu, kwaphindwa, kwasilela abantu abangu 20,000 kwasala amabhasikiti angu12 eceleni. Nanzelela ukuthi isinkwa saphindwa saba yisinkwa, inhlanzi zaphindwa zaba zinhlanzi. Yiyo indlela okusebenza ngayo le. Ngingahlanyela

UNKULUNKULU

WANGIFUNDISA UKUQALA

NGIHLANYELE EMBUSWENI

KANKULUNKULU INGXEENYE

YALOKHO OKWAKUDINGEKA.

inhlanzi eMbusweni ziyaphindwa zibe zinhlanzi. Kodwa nxa ngifuna inhlanzi ngingelayo ke eyokuhlanyela? Ipendulo—yimali! Khumbula imali ngeyokuthengiselana. Mina lawe “siqamba” imali nsuku zonke. Siyiqamba sithi

iluchago, iyindlu, iyizigqoko, iyisinkwa, lokunye konke esikudinga nsuku zonke. Imali iba yilokhu esikudingayo. Ngakho kunjalo lapho esihlanyela khona; singayiqamba imali. Kulokuya esitolo ukuyathenga inhlanzi ukuze sihlanyele inhlanzi, singaqamba sisebenzise imali. Lokhu kungenzakala ngokunika kwakho, kodwa hatshi okwetshumi kwakho, njengoba lokho uNkulunkulu sowakunikeza ibizo. Umthetho lo siwubona usebenza kuLukha 5.

Ngelinye ilanga uJesu emi eduze kweChibi laseGenezaretha, abantu beminyezelana kuye belalela ilizwi likaNkulunkulu, wabona ekhunjini lechibi izikepe ezimbili zitshiywe khonapho ngabagoli benhlanzi ababegezisa omambule babo. Wangena kwesinye isikepe esasingesikaSimoni, wamcela ukuthi akathi gudlu asuke kancane okhunjini. Wasehlala phansi wafundisa abantu ehlezi esikepeni. Eseqedile ukukhuluma wathi kuSimoni, “Gwedla ungene enzikini uphosele omambule bakho ukuze ubambe inhlanzi.”

USimoni waphendula wathi, “Nkosi, sisebenze gadalala ubusuku bonke, kodwa kasibambanga lutho. Kodwa njengoba usitsho njalo ngizabehlisa omambule.” Kwathi sebenze njalo babamba inhlanzi ezaba zinengi kwaze kwaqalisa ukudabuka omambule. Basebebiza abakhula babo kwesinye isikepe ukuthi bazobelekelela. Beza abakhula babo kwesinye isikepe ukuthi bazobelekelela. Beza bazigcwalisa zombili izikepe zathi phamu zaze zaqalisa ukutshona.

— ULukha 5:1-7

Njengalowo ophenya ahlaziye izinto zikamoya, kasikhangelisise indaba le. Inhlanzi lezi zabuya njani? Uyakubona na? UJesu uhamba eceleni kwamanzi athole isikepe afuna ukusisebenzisa ukutshumayeza ixuku labantu. Abesebuza uPhethro, umnikazi wesikepe, ukuthi angasisebenzisa yini uPhethro athi, “Yebo.” Ngoba phela, wayeseqedile ukusisebenzisa; wayezame ukuthiya ubusuku bonke kodwa kabambanga lutho. UJesu wathi eseqedile ukusebenzisa isikepe, watshela uPhethro, wathi kabuyele ayezama ukugola futhi inhlanzi. Ngileqiniso lokuthi lokhu kwathola uPhethro engalindelanga, ngoba uphendula ethi, “Jesu, sisebenze gadalala ubusuku

bonke, kodwa kasibambanga lutho.” UPhethro wayeyingcitshi kwezokugola inhlanzi, njalo wayekwazi ukuzithiya. Ngokwazi kwakhe, kwakungela nhlanzi lapho. Kwakungazwisiseki ukuthi kungani umuntu wayengabuyela ayezama futhi. Basebebekile lento zabo zokuthiya bagezisa omambule.

Kangikholwa ukuthi uPhethro wayezakwenza ngabewayengaqedi kulalela intshumayelo kaJesu ihola lonke eyayimthinte ngendlela ayengakaze athinteki ngayo. Ngakho uthi, “Ngenxa yokuthi utsho njalo, ngizabaphosela phakathi kwamanzi omambule.” UPhethro wabuyela wayabamba inhlanzi ezinengi ezaphosa zadabula umambule zatshonisa lesikepe sakhe. Wabizela abanye bakhe esephelelwe ababelokhu bemi ngaphandle eceleni kwamanzi, bona beza kodwa labo omambule babo baphosa badabuka lezikepe zabo zaphosa zatshona. IBhayibhili lithi uPhethro; wayemangele!

Lokhu kwayenzakala njani? Kukhona okungasibonisa? Singabakwazi na? Ngamafitshane ngingathi, yisimiso samandla okuthembeka esike sakhuluma ngaso. UPhethro aze avumele ukuba uJesu asebenzise isikepe sakhe, isikepe lebhizimusi kwatshintsha imbuso. Ibhizimusi elalingaphansi kwesiqalekiso somhlaba lasel-ingaphansi kokubuswa nguMbuso kaNkulunkulu. Selingaphansi kwamandla okubusa koMbuso kaNkulunkulu, uNkulunkulu kwasokusemthethweni ukuba athaphe ilizwi lolwazi atshele uJesu ngalapho okwakulenhlanzi khona; “laphayana okulamanzi atshona kakhulu.”

Kasicubungule isenzakalo lesi. UJesu uboleka isikepe kuPhethro owayevela chitha ubusuku bonke engabambanga lutho. Ngenxa yalokhu, izikepe zicina sezingaphansi kwamandla okubusa awoMbuso kaNkulunkulu. UJesu khathesi waba lolwazi lwalapho okwakulenhlanzi khona ngenxa kaMoya oNgcwele.

UJesu waselayela isikepe sikaPhethro ukuba siye kuleyo ndawo. Isikepe sikaPhethro laso saphosa sacwila ngenxa yenhlanzi. Isikepe sabanye bakhe laso saphosa sacwila ngenxa yobunengi benhlanzi. Ngakho inhlanzi lezi zabanjwa njani? Ngamazwi alula, zona zalethwa yilizwi elavela ezulwini. Kasikukhangele, noma ngubani angazibamba inhlanzi nxa ekwazi ukuthi zingaphi. Cabanga ngalokhu esisanda kukutsho. UNkulunkulu wazi konke; Yena angakusiza akutshela ukuba wenzeni.

Mina loDrenda sathi singela mali sesiqala ukufunda ngoMbuso, uNkulunkulu wanginikeza iphupho ebusuku elokuqala ibhizimusi engangingakwazi ukuthi ngilikalise njani. Ibhizimusi leyo lokhe isebenza lanamuhla ngemva kweminyaka engu28, iletha amakhulu ezinkulungwane zamadola mnyaka munye ngamunye. Kusedlula iminyaka leyo engu28, sengithole ithuba lokuhlanyela izigidi enkonzweni lasekusizeni abantu. Njani? Ngezwa kuvela ezulwini, futhi lawe kungaba njalo kuwe! Kahle ngikunikeze isibonelo.

Ngangilomhlangano wezinsuku ezinhlanu ebusuku mayelana loMbuso kaNkulunkulu kuminyaka emilutshwane edlulileyo. Ngemva kobusuku besibili, kulendoda ethiwa nguChris eyangilanda yacela ukuba ngiyithandazele. Ngambuza ukuthi wayedinga umkhuleko ngasizatho bani. Wasengitshela ke indaba yakhe. Yena wayesenza ibhizimusi lomunye undoda owayekhwabanisa imali ngokungekho emthethweni. Yena wayesemtshadweni wesine, kwakungahambi kuhle, njalo wayeleminyaka yokuzalwa engu40 kuphela. Wangitshela ukuthi wayedangele okokuthi wake wathatha umbhobho owawulenhlamvu waphuma ngemota wayakuma esititshini somhluzi wemota esasesivaliwe efuna ukuzibulala.

Uthi kwakungaba ngu 3:00 ekuseni, ehleli lapho lombhobho olenhlamvu, ucingo lwakhe lwabe lukhala. Wananzelela lowo

owayemthinta. Ngulowo ayekade esebenzisana laye. Wayengafuni ukukhuluma laye, ngakho akaphendulanga. Lwakhala njalo, njalo, njalo. Lona lwakhala ka11 uChris wacina eseluphendula. Amazwi okuqala aphuma emlonyeni omunye wakhe ngathi, “Ungaphi, njalo wenzani?” UChris wathi esemtshelile, lo ayesebenza laye wathi, “Ungatshedi; ngiyeza lapho khona manje!” Kwakhanya ke, ukuthi omunye wakhe ayesebenza laye wayesenikele impilo yakhe kuNkulunkulu njalo wayefuna ukwabela uChris ngakho. Okumangalisayo yikuthi, yena wezwa kusithi athinte uChris ngo 3:00 ekuseni, njalo uChris wathi engaphenduli, waqhubeka elokhu ezama.

Omunye kaChris wathi esefikile, waqondisa uChris eNkosini, njalo impilo kaChris yaguquka. Konke kwaqala ukuba ngcono. Wathola ibandla elihle, umtshado wakhe waqala ukuba gcono. Konke kwaqala ukuba ngcono ngaphandle kwemali ayeyenza. UChris wayengela msebenzi, yilokho ke ayefuna ngikhuleke laye ngakho. Kulowo mhlango ngafundisa xathu lokho engikufundisa kulolu ugwalo, ukuthi uMbuso usungenza izinto ezimangalisayo ezingaphezu kokwanelisa kwakho.

UChris wathi ecabanga ngokuthi uMoya oNgcwele uyasikhokhela njalo abuye asisize langamacebo, masinyane waba lecebo. Wayekwazi ukwenza i-*cheesecake* eliminandi. Wayeyingcitshi yokwenza i-*cheesecake* elilempilakahle, ayesazi ukuba laliphuma phambili kulamanye onke ayeke wahlangana lawo. Abangane bakhe babemazi njengalowo oyenza i-*cheesecake* eliminandi kulawo wonke. Wayevakatshele isitolo sokudla okulempilakahle kanengi, wazama ukudla ukudla ababekubhaka lapho wathola ukuthi kwakukhona okwakungaqondanga kukho. UChris wayengela-macebo amanengi, kodwa wacabanga ukuthi mhlawumbe leli licebo elilodwa ayelalo, ukuthengisa ama-*cheesecake*. Wayeleqiniso

lokuthi angahambisa i-*cheesecake* lakhe elilodwa esitolo sokudla okulempilakahle balizwe, babezafuna ukulithengisa. Wayeleqiniso lokuthi lalizathengwa ngcono kulelabo. Ngakho yikho akwenzayo lokhu. Wapheka i-*cheesecake* walihambisa esitolo sokudla okulempilakahle engamenywanga. Sengathi wayekwazi isikhathi, wathi efika wathola uCEO wezitolo lezi ezokudla kwempilakahle ekhona lapho yena uChris efika. UCEO wavuma ukulizama i-*cheesecake* lakhe abesemtshela.

Lobo busuku uChris weza esuka emuva ngemva komhlangano ukuzekhuluma lami. Wangitshela ngalokho ayekwenzile wangicela njalo ukuba ngikhuleke laye ngokuthola umsebenzi esitolo sokudla okulempilakahle. Ngelanga elalandelayo uChris wayekhona futhi ngiyakutshela, wayejabule! Wangitshela ukuthi uCEO loyana wayethe ufuna abhake i-*cheesecake* leli hatshi ebhakela isitolo esisodwa lapho ayedlele khona i-*cheesecake* kodwa zonke izitolo zabo. Wambuza futhi lokuthi yikuyini okunye ayesenelisa ukukubhaka. UChris wamangala! Okunye okumangazayo, uCEO lowo weza ngosuku lokucina olomhlangano, wabuya phambili wanikela inhliziyo yakhe eNkosini wabhaphathizwa ngoMoya oNgcwele. Ngayamukela incwadi ivela kuye ngemva kwamaviki amabili esithi ufuna ukuhlanyela eMbusweni kaNkulunkulu. Wathi uyanikeza i10 percent yengcebo yenhlanganiso yakhe kunkonzo yethu, i*Faith Life Now*. Kuyamangaza! UNkulunkulu uyanelisa ukuthatha icebo elingasi lutho alenze libe likhulu.

ISAHLUKO 10

BUTHA, UNGAGINQI!

Sowake wabona ibhiza ngesikhathi sehlobo nxa liqeda ukugijima umango omude? Wona ayabe egcwele izithukuthuku; ayabe egcwele uhlobo lwezithukuthuku ezibhubhudlayo engizalubiza ngithi gamaginqo. Kubasegcekeni lakuwe ukuthi kade esebenza gadalala. Ngithola umbuzo lowu sikhathi sonke, “Gary, kungani usithi akumelanga ngisebenze?” Cha, angitshongo njalo leLizwi likaNkulunkulu kalitsho njalo. Kodwa kulomahluko omkhulu kundlela osebenza ngayo. Thatha, njengesibonelo, indaba esiyifunda ngoPhethro labanye bakhe begola inhlanzi ezagcwalisa izikepe ezimbili kwangani zingatshona. Babesebenze gadalala ubusuku bonke bezama ukugola inhlanzi kodwa kungela mpumela. Kwasokusithi ke, uJesu weza wabatshengisa lapho inhlanzi ezazikhona ngelizwi lolwazi. Ngaleso sikhathi basebenza kodwa kwasokungolunye uhlobo lomsebenzi. Ngeqiniso basebenza bedonsa inhlanzi. Kodwa babegola na?

Ngiyazi ukuba ngidlala ngamabala lapha. Sisebenzisa ibala elithi ukugola ezintweni ezinengi. Owesifazane ogola ukubukwa. Indoda eyagebha izamba zayo, igola izihluthulelo zayo. Sisebenzisa ibala elithi ukugola sikhomba ukudinga ulutho oluthile. Ngakho uPhethro wayegola na? Nxa ngisiya zingela, ngikutshelile ukuthi

ngithatha 40 imizuzu ukuthola impunzi. Kambe ngiyazingela na? Ngamanye amazwi nxa usazi lapho inhlanzi ezikhona, uyagola na? Nxa ngisazi lapho engithola khona impunzi, kambe ngiyazingela na? Ngitsho lokhu ngoba ngifuna ubambe umahluko. Yebo ngiyasebenza kodwa angisebenzi ubusuku bonke ngingajimbanga lutho. Mandulo, ngokuba lalokho engikufunayo empilweni, ngiyanelisa ke ukusebenza embusweni ngiphethe umsebenzi kaBaba lenjongo yami.

Ngingakubiza Ngithi Yikubutha!

UPhethro wathi esiza kuJesu ezobuza ukuba bangathela njani imithelo yabo kuMathewu 17: 27b, uJesu watsho okulandelayo:

“Yana echibini uphosele iwuka yakho khona. Ubothatha inhlanzi yokuqala ozayibamba; uvule umlomo wayo uzafumana khona uhlamvu lwemali engamadrakhima amane. Uyithathe ubaphe ibe ngumthelo wami lowenu.”

Nanzelela ukuthi uJesu kazange athi, “Kulungile, Phethro, silemithelo okumele siyibhadale. Uyazini, hamba edolobheni okwenyanga ezintathu, udinge umsebenzi, wenze imali, ubususinga nxa usuyenzile imali yokuhlawula imithelo yethu.” Hatshi, uJesu akazange atsho njalo. Kungani? Ngoba uPhethro kwakuyamele atshiye umsebenzi wakhe aqale ukugijimisa imali nxa wayengabuyela kundlela yokucabanga kwesiqalekiso somhlaba. Kodwa, uJesu usitshengisa ukuthi uMbuso usebenza njani lokuthi thina kumele senzeni siseselapha emhlabeni. Impendulo kaPhethro yimpendulo yakho lawe. UJesu watshela uPhethro kalula lapho okwakulenzuzo khona, indlela okwakumele ayisebenzise ukuze

ayithole, lokuthi kwakumele ayethola ini. Okwakumele kwenziwe nguPhethro yikukubutha.

Nxa sibukele uJesu labafundi Bakhe, babehlala bemangala nxa bebona uMbuso usebenza. UJesu wathi ebulala isihlahla somkhiwa ngamazwi Akhe kuMakho 11, iBhayibhili lithi uPhethro wamangala. ULazaro wathi ephuma ethuneni ngemva kwensuku ezine efile, bamangala. UPhethro, uJakhobe loJohane bathi begola inhlanzi ezinengi, bamangala. Mina loDrenda siyamangala, sibambe owangaphansi, sithi, “Ukubonile na lokhuya?” okweminyaka siqhubeka sifunda njalo nje ngokusebenza koMbuso. Lapho sisakhuluma ngokubuthanisa ngosizo lukaMoya oNgcwele, kumele ngikuse kuMathewu 6. IBhayibhili lami lilesihlokwana phezu kwale indima esithi, “Lingakhathazeki!”

“Kakulanceku engakhonza amakhosi amabili. Funa izonde enye kodwa ithande enye, kumbe izinikele kwenye yeyise enye. Lingezake likhonze uNkulunkulu lemali.

Ngakho ngiyalitshela ukuthi lingakhathazeki ngokuphila kwenu, ukuthi lizakudlani loba lizanathani; kumbe ngemizimba yenu, ukuthi lizagqokani. Impilo kayiqakathekanga ukwedlula ukudla na, lomzimba ukwedlula izigqoko na? Khangelani izinyoni zasemoyeni; kazihlanyeli, kazivuni kumbe ukubuthela eziphaleni kodwa uYihlo osezulwini uyazipha ukudla. Lina kaliqakathekanga ukwedlula zona na? Ngubani kini othi ngokukhathazeka angezelele ihola elilodwa empilweni yakhe na?

Kanti lizihluphelani ngezigqoko na? Ake libone ukuthi amaluba eganga akhula njani. Kawasebenzi njalo aweluki. Kodwa ngilitshela ukuthi laye uSolomoni ekucwebezeleni kwakhe kazange acece njengawo. Nxa kuyiyo indlela

uNkulunkulu ahlobisa ngayo utshani beganga, obukhona namuhla kodwa kusasa sebuphoselwa emlilweni, pho lina kazukuligqokisa ngcono yini, lina bokukholwa okuncinyane?

Ngakho lingazihluphi lisithi, “Sizakudlani?” kumbe “Sizanathani?” loba “Sizavunulani na?” Ngoba abezizweni bagijimela zonke lezizinto, kodwa uYihlo osezulwini uyakwazi ukuthi liyazidinga. Kodwa funani kuqala uMbuso Wakhe lokulunga kwakhe, kuzakuthi-ke zonke lezizinto liziphiwe lazo. Ngakho lingazihluphi ngelakusasa, ngoba ikusasa lizazingqinekela lona. Usuku lunye ngalunye lulenhlupho zalo oluzaneleyo.”

— UMathewu 6:24-34

UJesu uthi awungeke ukhonze amakhosi amabili ngasikhathi sinye. Ungacabanga ukuthi kuyenzeka kodwa awungeke. Uzathanda oyedwa ngitsho oyedwa qha. Ngingakutshela ukuthi yiphi. Yileyo othemba ukuba izagcwalisa izidingo zakho. Lapho iNkosi ikhulumisana lami endlini endala yasepulazini ngokuthi mina ngangingathathi isikhathi sokufunda ngokusebenza koMbuso, Yena wayesithi akasiyo inkosi yami. Akasuye engangilethemba eligcweleyo Kuye engangimkhonza njalo ngimethemba. O, yebo, ngangisiya enkonzweni, ngisipha, ngimthanda uNkulunkulu, njalo ngisazi ukuthi ngiya ezulwini. Kodwa ngangingakaze ngithathe ithuba lokufunda uhlelo lukaNkulunkulu lwezomnotho lokuthi uMbuso Wakhe usebenza njani.

Ngoba lapho okulenotho yakho khona, inhliziyo yakho layo ilapho.

— Luke 12:34

Kubale futhi kancane kancane, “*Ngoba lapho okulenothe yakho khona, inhliziyo yakho layo ilapho.*” Inengi lithanda ukunyemukula lithi, “Lapho okulenhliziyo yakho khona, kulapho okulenothe yakho khona.” Kodwa akusikho ekutshoyo, njalo akusebenzi njalo. Abantu bacabanga ukuthi kutsho ukuthi bangamthanda uNkulunkulu ngeSonto ekuseni ngakho kulapho inothe ekhona. **AKUQONDANGA!** Uhlelo othemba ukuthi luzafeza izidingo zakho kulapho okulenothe yakho khona.

UJesu uthi sesakuhlanekela!

UNkulunkulu ufuna ukuba ngowokuqala empilweni zethu hatshi imali. Nxa imali kuyilo igugu lomnothe wethu, izaqala yona, ifuna isikhathi sethu, izinqumo zethu lalo uthando lwethu. Yingakho uPhethro wayengeke watshiya inkonzo yakhe ukuthi ayedinga imali lapho imithelo isifuneka. Yingakho uNkulunkulu esifundisa ukubutha hatshi ukuginqa. UJesu kumele asifundise indlela yoMbuso, ukuthi singamethemba njani uNkulunkulu ukuthi uzasabela, ngandlela yinye ekhulula inhliziyo zethu ukuthi zithande uNkulunkulu ngokupheleleyo! UJesu wathi, “*Impilo kayiqakath-ekanga ukwedlula ukudla na, lomzimba ukwedlula izigqoko na?*” Wayesithi impilo akusikho kuba lezinto. Injongo yempilo yikuthi lezo zinto zikhonze kuwe lenjongo yakho emhlabeni.

Kodwa sibonani na? Inengi labantu ligijima indawo yonke bekhonza lezo zinto. Abantu bagijima ukuyabhadala izikweledi, ukuyakhokhela imota, ukuhlawulela imithelo. UJesu uthi akusiyo mpilo leyi! Khathesi, ungangifulatheli uqale ubusuqala ukuthi kimi, “Bona laphaya, uJesu, Yena

**NXA IMALI KUYILO IGUGU
LOMNOTHO WETHU, IZAQALA
YONA, IFUNA ISIKHATHI
SETHU, IZINQUMO ZETHU
LALO UTHANDO LWETHU.**

ngokwakhe uthi ukuba lezinto khona kubi.” Cha, akatshongo njalo. Yena wathi kundima 33 nxa ungadinga umbuso kaNkulunkulu lokulunga Kwakhe konke kuqala, konke lokhu kuzayengezelelwa empilweni yakho. Indaba akusikho kuthola lapho okulohlupho khona; kodwa inhliziyi. Ngabe uNkulunkulu wayengafuni sibe lezinto, ngabe uJesu wakatsho. Kodwa ke, Yena uthi izinto zonke ezixotshwa ngumhlaba zizakwengezelelwa nxa singaphila ngendlela kaNkulunkulu.

Ngamanye amazwi, impilo akusikho kukhonza izinto, ngeshwa elikhulu, inengi labantu yikho elikwenzayo. Abalalo ukhetho; bayizigqili. Akwenzakali ukuthi ungakhonza amakhosi amabili, ukukhonza izinto akusiyo mpilo. UJesu uqhubeke echasisa ukuba lukhona olunye uhlelo, indawo yokuthula kwezomnotho lokwabelwa okukhulula ukuphila kwakho. Luthiwa nguMbuso.

UJesu unika imifanekiso emibili yokuthi uMbuso ukhanya njani kumfundiso Zakhe lapha kuMathewu 6. Yena uthi, “*Khangelani izinyoni zasemoyeni; kazihlanyeli, kazivuni kumbe ukubuthela eziphaleni kodwa uYihlo osezulwini uyazipha ukudla.*” (indima 26).

Inyoni kazilawo amapulazi amathuku!

Azilawo umlandu wokunakekela izidingo zansuku zonke. Cha, uBaba uyazisilela. Zimane zibuthe lokho ezikudingayo ngalolo suku. Usukubona na? Azisokoli ngomsebenzi onzima ngempilo zazo. Ziyabutha!

Amaluba Awasebenzi noma Ukweluka

“Kanti lizihluphelani ngeziggoko na? Ake libone ukuthi amaluba eganga akhula njani. Kawasebenzi njalo aweluki.

Kodwa ngilitshela ukuthi laye uSolomoni ekucwebazeleni kwakhe kazange acece njengawo.” (indima 28)

Amaluba awazigqokisi ngokusebenza gadalala lezithukuthuku ukuze lokho kwenzakale. Cha, uBaba uyawagqokisa. UJesu uqhubeka esazisa mina lawe impendulo yethu. Ikhona eyinye indlela yokuphila, indlela yoMbuso! UJesu uthi, “*Kodwa funani kuqala uMbuso Wakhe lokulunga Kwakhe, kuzakuthi-ke zonke lezizinto liziphiwe lazo*” (indima 33). Kutshoni ukuthi “funani kuqala uMbuso kaNkulunkulu” Kutsho ukuthi dingani ukuthi usebenza njani! Fundani imithetho okubuswa ngayo kuwo. Fundani ukuthi indlela kaNkulunkulu isebenza njani!

Ngabe ngangingakuphosela phandle kwendizamtshina uwele ezweni ongakaze uye kulo, umlandu wakuqala yikufunda ukuthi lowo mbuso usebenza njani: ukuthi badla njani, abakuthengayo labakuthengisayo, lemithetho okubuswa ngayo kulelo lizwe. Kunjalo laseMbusweni kaNkulunkulu. Kumele ufunde ukuthi uMbuso kaNkulunkulu usebenza njani ukuze wenelise ukukholisa inzuzo zokuba lilunga lawo. Sengikwazi ngezehlakalo engaba lazo ukuba ngangilahlekelwa kangenani ngesikhathi ngingazi ukuthi usebenza njani. Impendulo yakho ilula. Udinga inguquko kwezomnotho. Nxa kulenguquko, abantu bamelana lohulumende obusayo bebeka uhulumende omutsha. Kudingeka lawe wenze okufanayo. Kumele uhlamukele uhulumende omdala owenhlelo zesiqaqalekiso somhlaba lokuswela kwayo lokudangala ubusukholisa impilo entsha—ukuphila eMbusweni kaNkulunkulu, okungela mithetho emitsha, kungela kuswela, ndawonye lenjabulo enkulu!

ISAHLUKO 11

UKUPHAPHA KULULA KULOKUHAMBA!

Nxa ungabuyela emuva kumbali ufisa ukusuka eNew York usiya eSan Francisco, kwakumele uhambe ngesikepe. Kungakavulwa umkandlo wePanama Canal uhambo lolu lwaluthatha umnyaka ubhoda ngaseSouth America. Phambidlana, i-Oregon Trail isicandiwe, wawusungaphutsha uhambo ngenyanga ezine. Namuhla, usungafika khona ngamahola amane. Njani? Ngokusebenzisa umthetho omutsha, umthetho wokundiza. Umthetho wokundiza uhleli ukhona—inyoni ziyawusebenzisa nsukuzonke—kodwa abantu babengawuzwisisi. Njengemithetho yemvelo eyokuphaha, amaKhristu amanengi awayazi imithetho yoMbuso, noma nje bebala ngayo phose impilo zabo zonke. UMbuso kaNkulunkulu usulapha, ungaphakathi kwakho, ulalo ilungelo ngomthetho lokukholisa inzuzo zawo. Kumazinga emvelo, imithetho yokuphapha kayicitshi imithetho yokudonsela phansi umthetho we-*gravity*, iyayehlula. Ngamanye amazwi, inqe usebenza ngemithetho ehola ukuphapha, uyaphapha, noma nje i-*gravity* ikhona. Sesingavumelana ukuthi ukuphapha okwamahola amane kulula kulokuqeda

umnyaka uhamba ngesikepe! Yebo, ngakho ke qala ukwenza izinto ngesiphange utshiyane lindlela zakho zakudala eziphuzayo.

Sowake wabona ivevane lohlobo lwe*Monarch*? Lapha e-Ohio, ngesikhathi sekwindla, ubona amakhulu amavevane e*Monarch* ephapha eqonda enyakatho elanda ubusika. Aqonda eMexico, uhambo phose olungaba ngamamayela angu 2,000. Kodwa nansi indaba. Awakaze afike khona! Abakwazi njani ukuthi kuyiwaphi njalo nini? Nxa uNkulunkulu wadala indlela zokuthi amavevane e*Monarch* aphile, Yena ulayo indlela akubekele yona wena. Ivevane likwenza njani?

Ibala lalokhu ngu-*metarmorphosis*. Isiqu salelibala ngu “*morph*,” elitsho inguquko. Inengi labantu liyazi ukuthi i*Monarch* aliqali lilivevane. Eqinisweni, liqala lilicimbi. Lapho lisase licimbi, liphiliswa yisihlahlakazana sochago lwengotsha lona likhule, kuze kufike, isikhathi sontshintsho olukhulu. Ngemva kokukhula okwebanga elithile, ziyakha uqweqwe, umhlobo wekhasi lapho icimbi elizivalela khona okwamalanga angu7 kusiya kwangu15. Ngemva kwalokhu, ivevane liyaphuma kuqweqwe lolu selibukeka njalo lisenza okwehlukeneyo lokwakusenzinwa kusigaba sokuba licimbi. Seliphila impilo kuzinga elitsha. Seliphapha ke! Endaweni yokunamathela kusihlahlakazana sengotsha esisodwa, seliphaphela kunoma yiphi indawo eliyikhethileyo. Selilihle lilesizotha lobuhlekazi obungeke bulinganiswe kumvelo.

Kodwa into enkulu eliyifumeneyo yikwanelisa ukuphapha libalekele izinkinga. Uyabona, i*Monarch* alanelisi ukuphila kunyanga zebusika ezilomqando ovamileyo kumikhathi yasenyakatho. Lingacitsha life. Kodwa uNkulunkulu wavula indlela yokuthi isidalwa lesi siphaphele kude lenhlupho, ngokuphapha amamayela angu 2,000 sisiya endaweni esingayaziyo. Kambe indlela yokuya khona liyazi

njani? Likwenza njani? Yi *metamorphosis* (Yinguquko). IBhayibhili lithi ngendlela efanayo wena usungaphapha phezu kwezinkinga zakho, noma kuzehlakalo lapho ongelacebo lokuzinqanda, njengalo iMonarch.

USteve, omunye umngane wami, wayetshayela imota yakhe eqonde ekhaya ngobunye ubusuku wasetshaya impunzi. Layibhidliza imota yakhe. Ngeshwa, imota yemuli yonke eyiyo eyayisisele, yayitshise i-engine yayo kuviki edluleyo. Inhlenganiso yomshuwalense kaSteve yayimboleka imota okwamaviki amabili kungelanhlawulo bemduduza ngokulahlekelwa yimota, kodwa imota yemuli yayingelawo umshuwalense ukuze ibuyiselwe. USteve loKaren babengasazi lokuthi benzeni. Umsebenzi kaSteve wawufuna ukuba abelemota ngoba wayengumthengisi ngakho wayehamba ethengisa mihla yonke.

Basebehlale kumfundiso zoMbuso okwesikhathi sebesazi uNkulunkulu eyimpendulo yabo. Ngaleso sikhathi, babengela mali yokubuyisela imota zabo. Ngakho babesazi uNkulunkulu loMbuso kuyilo ithemba labo. Amaviki amabili okuqhatsha imota kungelanhlawulo ayesesiyagqiba masinyane kodwa impendulo ilokhe ingekho. Ngesimanga, ngobusuku uSteve ezakuyabuyisela imota yokuqhatsha, uSteve wamukela ucingo olwaluvela kweyinye indoda eyayithi ilemota eyayifisa ukuyinikela, njengoba wayesazi uSteve engumzalwane ebandleni lami, watshayela uSteve efisa ukwazi ukuthi kungaba lemuli engabe ifuna imota. USteve waphangisa wachasisa umumo wakhe watsho lokuthi angakujabulela ukuthi yena lemuli yakhe bayithathe leyo mota. Kwaba kuhle ke, kodwa uSteve wayelabantwana abayisithupha, ngakho okuyimota okuncane kwakungeneli. Kodwa ukuvela kwale imota kwabakhuthaza kakhulu.

NgeSonto eyalandelayo, beza phambi kwebandla bobabili bacela ukuthi ngikhulekele imota yabo elandelayo. UKaren wathi, “Mfundisi, ngiyakholwa ukuba samukele iHonda Odyssey, ngokukholwa, njalo sifuna uvumelane lathi lapho sitshala inhlanyelo yakhona.” Mina ngathi, “Ngiqinisile ngizakwenza njalo.” Ngakho sakhuleka. Angisakhumbuli kahle ukuthi kwedlula amaviki amangaki, kodwa awamanengi, angaba mathathu kumbe amane, kwaze kwafika usuku engadlula khona emzini wabo. Sathi sifika khona, sengena ngasemkulwini, nansiya laphana iHonda Odyssey ise-frijini. UKaren uthi mihla yonke wayethi nxa evula ifriji wayebeka isandla sakhe phezu komfanekiso abonge uNkulunkulu ngaleyo mota.

Ngemva kweviki, umabhalane wami watshaya ucingo wathi, “Mfundisi, namuhla kungene ucingo olumangalisayo,” Kulendoda ethile ebifuna ukunikela imota yemuli kubandla. Khepha, ngaleso sikhathi akula muntu owayesazi ukuthi uSteve loKaren babekhulule ukholo lwabo besenzela imota yemuli entsha kumbe lowo mhlobo ababewufuna. Ngakho ngathi kumabhalane wami, “Ngumhlobo bani wemota?” Yena wathi, “Yi Honda Odyssey.” “Ibunjwe njani yona?” Yena wathi yayinhle kakhulu ingelaso isici ihambe amamayila angu 70,000 kuphela. Ngathi kuye ngiyazi ukuthi imota leyo kwakumele iye ngaphi. Ngatshela uDrenda ngale indaba ngasengicela ukuthi atshayele ucingo kuKaren. Kwathi uDrenda etshayela uKaren ucingo wambuza ukuthi izinto zazihamba njani njalo kungabe kukhona na okwasekwenzakele ngesidingo sabo semota. Amazwi kaKaren akuqala athi, “Yebo, ngisondela kuyo ngosuku olulodwa!” UDrenda wathi, “Yebo, ususeduzane layo kulalokho okucabangayo. Buyani lizoyithatha.”

Ngiyazithanda indaba ezinje, awuzithandi na wena? Indaba

iyaqhubeka ngokukhula kukaSteve loKaren kusiqiniseko sokuba uMbuso uyabela.

Ngaleso sikhathi, uSteve loKaren babefuna ikhaya. Babesebenzisa indlu yokuqhatsha okweminyaka emilutshwane, basebenziswa kusitsho ukuthi sokuyisikhathi sabo sokuba babelomuzi wabo; kodwa ke futhi imali yabo yayingeneli. Basebevakatshele amabhanga amanengi bebuza ngokuthenga umhlabathi, bethola impendulo yinye, kufuneka i-50 *percent* kuqala. Kulesi sigaba sempilo lemuli yabo encane babengelayo imali eyanelayo ukuthi bavunyelwe. UKaren wayesedumazekile wangibuza ngakho.

**KANENGI, SIYAZIGUBA
NGENXA YOKUQATHANISA
IKUSASA LETHU NGALOKHO
ESICABANGA UKUTHI
KUYANELISEKA.**

Savumelana ukuthi uNkulunkulu wayezavula indlela. Ngakho baqala ukuhlola izakhiwo lezindlu ezehlukeneyo.

Enye yezindlu abazibonayo yakhanga amehlo abo. Yayikusiqinti ababefisa ukwakha kiso, yona ibiza amadola ayi \$55,0000 ilama-*acre* angu 55. Phindenjalo, babengelayo inhlawulo yokusungula. Kungenani, ngangike ngezwa ngebhanga encane eyemaphandleni, eyayingekho esigabeni sethu kodwa umango wamahola amabili, yayivuma ukuthatha impahla njengenhlawulo yokuqala ukuthenga umhlaba. Lokhu kwakungavamanga nxa kukhulunywa ngomhlaba oyingqatho. Ngabatshela ngayo, babeka isikhathi sokuya khuluma layo ibhanga. Umhlabathi wawubiza \$100,000, ibhanga yona yathi yayingayifuni imbhadalo yakuqala leyana. Ngakho bathenga umhlabathi bengakhokhanga bayakha ikhaya elihle kulawo masimu asemaphandleni amahle, konke lokhu bengakhokhanga lutho. USteve loKaren baqhubeka ngokuphumelela namuhla ngoba labo, njengami loDrenda, benza izinto ngendlela yoMbuso.

Ngilendaba ezifana lale kubandla lami lonke, njalo ngikhangelela indaba ezifanayo lakweyakho impilo. UNkulunkulu uyanelisa ukwenza izinto ezimangalisayo lezingajwayelekanga ukuze ahlangele lezidingo zethu. Kanengi, siyaziguba ngenxa yokuqathanisa ikusasa lethu ngalokho esicabanga ukuthi kuyaneliseka. Kodwa ngoNkulunkulu, konke kuyenzeka nxa singavumela iLizwi likaNkulunkulu ukuthi liguqule imicabango yethu.

Lingavumi futhi ukulingisa umhlaba lo, kodwa liguqulewe ingqondo zenu zibe zintsha. Lapho-ke lizakwenelisa ukuhlola lokwamukela lokho okuyintando kaNkulunkulu, intando yakhe—elungileyo, ethokozisayo lepheleleyo.

— Kwabase-Roma 12:2

Njengamakholwa akumelanga sivume ukulingisa izindlela zalo umhlaba. UPhawuli ukhuluma ngezindlala zalo umhlaba othukiweyo lendlela okuphilwa ngayo, ikakhulukazi indlela esicabanga ngayo. Sowake wathunga isigqoko na kumbe wakha okuthile usebenzisa umdwebo? Nxa wakwenza kodwa ungajabulanga ngempumela, kwenzakalani ungazama futhi usebenzisa umdwebo ofanayo? Uthola impumela efanayo. Ngakho uPhawuli uthi kumele siguqulwe ingqondo zethu zibe zintsha; kumele siguqule indlela esiphila ngazo. Kumele sicabange ngendlela eyahlukileyo kweyomhlaba.

Ibala lelo elithi “ukuguquka” lifana laleli esike sakhuluma ngalo, “*morph*,” njalo litsho ukuguquka. Sidinga *imetamorphosis*! (inguquko!) Sidinga ukuba sicabange njengoNkulunkulu. Kumele sibe lemicabango yoMbuso. Kulokucabanga ngeso lobubi, elokuvinjelwa, lelecimbi eligwethelwe ukufa ebusika, kumele sithembe

uNkulunkulu ngendlela yempilo entsha. Kulapho kuphela esingaphapha khona phezu kwezinkinga zethu sihlonyiswe ngolwazi lwentando kaNkulunkulu kuzo zonke izehlakalo. Singekela ukwamukela inguquko yemicabango, imiqondo yethu emidala izahlala isithi, “Hatshi, hatshi, lokho angenelisi ukukwenza. HATSHI, kangiboni ukuthi lokhu kungenzakala njani.”

Ngubani owayengacabangela ukuthi icimbi leliyana elibi lalizacina seliphapha ngendlela enhle ebukeya kangaka? Ungakhangelanga icimbi lohambo lwamamayela angu 2,000 okumele liwahambe, wawuzanyikinya ikhanda nje uthi, “AKWENZEKI!” Kodwa eMbusweni kankulunkulu, konke kuyenzeka. Khangela mina. Uhlelo lwami lukamabonakude nxa luqala, luqala ngokuthi ngiyingcitshi kwezezimali. Kwesinye isikhathi ngiyazikhumbula insuku zami ngisaselicimbi ngithi, “Kuyamangaza lokhu!”

Sisakhuluma ngokuphapha, mina loDrenda sathi sesiqale ukufunda ukuthi uMbuso usebenza njani, ngathatha isinqumo sokuthi ngasengifuna indizamtshina. Ngangikade ngingumtshayeli wayo kusukela ngileminyaka engu19 eyokuzalwa njalo ngangihlala ngiqhatsha izindizamtshina, kodwa eyami ngangingelayo. Yebo ke usukwazi ukuthi kungani; ngangingelayo imali. Ngakho ngelinye ilanga ngathatha isinqumo sokuthi lokhu kwakufuna ukuqondiswa; indizamtshina yayengekho nzima kangako eMbusweni kaNkulunkulu. Kungani ngangivimba uMbuso kulokho mina engangizibona ngikwanelisa? Ngakho ngabhala i-check, ngabhala umutsho lo ngaphansi, “Ukuze ngithole indizamtshina” (ngaloba ngiyichasisa). Ngabeka izandla zami phezu kwayo ngayithumela, ngikholwa ukuthi ngasengiyamukele indizamatshina ngesikhathi ngikhuleka, njengokutshiwo kuMakho 11:24.

“Ngakho ngiyalitshela ukuthi loba kuyini elikucelayo ngomkhuleko, kholwani ukuthi selikwamukele, sekuzakuba ngokwenu.”

Kwasokuzadlula phose inyanga ngasengihamba kumongi ukuyahlolwa umzimba njengenjwayelo. Ngamangala, kanjalo nje, umongi wathi, “Ukhona omaziyo na ofuna ukuthenga indizamtshina?” Ngacabanga ukuthi lokhu kwakungajwayelekanga. “Yindizamtshina enjani?” ngabuza. Ngamangala njalo ngathaba njengoba wayechasisa yona kanye engangikholwa ukuthi ngizayithola ngize ngithandaze. Ngakho ngambuza ukuthi ngangingayibona ngaphi, wangitshela ukuthi yayisegcekeni lendizamtshina eliseceleni komuzi wami. Kahle ngichasise. Umuzi wami uhleli emphethweni wegceke lendizamtshina. Yonke indizamtshina efikayo kumele idlule phezu komuzi wami. Ukubukela indizamtshina lezi zibuya njalo zihamba nsuku zonke lokuthi lapho ezisukumela khona kwakuseduze nje ngemayela elilodwa lomuzi wami kwakusitsho ukuthi kwakumele ngibe layo inzizamtshina!

Ngakho ngathinta umngane owayekade etshayela indiza impilo yakhe yonke njalo efundisa labanye ukuba angiphelekezele siyebona indizamtshina le. Sathi siyikhangela, ngabakwazi ukuthi le yindizamtshina yami; yayinhle! Yayiyilokho engangikufuna. Ngangilenkinga nje eyodwa, yebo ke, inkinga efanayo engangihlangane layo iminyaka yonke mayelana lokuba ngumnini wendizamtshina—ngangingelayo imali yayo. Wake waba lohlupho lolo? Kodwa khathezi ngangingasoze ngihlehlele emuva ngenxa yokwesaba. Ngangisazi ukuthi le yindizamtshina yami; ngangingazi nje kuphela ukuthi uNkulunkulu wayezayiletha njani imali.

Kunyanga ezimbalwa ezazedlule, mina loDrenda sasidinga ihofisi yenhlanganiso yethu. Sasikwazi lapho esasifuna ibhizimusi ibekhona, kodwa kwakungelandawo lapho; ngakho saqala ukukhangela kwezinye indawo. Sathola izakhiwo ezimbalwa esaphosa sazithenga, kodwa sasisizwa kusala emoyeni ukuba sizithathe. Sasilokhu siqhubeka sisiya kuleyana indawo esasifisa ihofisi yethu ibekhona, sisithi mhlawumbe singathola kuvuleke kweyinye indawo. Silokhu sithandaza ngesinqumo lesi, ngelinye ilanga ubaba wami wangithinta watsho amazwi lawa, “Ngiyazi, uzakuthi lo nguNkulunkulu, kodwa mina lonyoko sesikhulumile, sifuna ukukunikeza isakhiwo sethu ukuba wenze ihofisi.” Isakhiwo sabo sasilapho engangikhangelele ukuthola khona indawo. Ngamangala!

Ukuze uzwisise lokhu okwenzakeleyo kumele ubekwazi ukuthi ubaba wami wayengasilo kholwa ngaleso sikhathi. Wayengazwisisi sonke isikhathi kungakhulunywa ngoNkulunkulu. Eqinisweni, kwakukubi okokuthi nganginga-sakhulumi laye ngoNkulunkulu. Ngaze ngathandaza ukuthi ngabe uNkulunkulu uyathumela omunye umuntu oyahlangana laye amtshumayeze ngoKhristu. Ngangisazi ukuthi mina ngeke ngimfinyelele; wayengeke angilalele. Kodwa ubaba wacina esindisiwe ngemva

**IMPILO YAMI,
EYAYISIVALELWE PHAKATHI
KOKWESABA LOKUZIPHILISA,
YAYISIGUQULWE NGUMBUSO
KANKULUNKULU.
NGOKUTHINTA IMILAYO
YAWO, NGENELISA UKUTHOLA
IMPILO ELAMATHUBA ANGELA
MKHAWULO.**

kweminyaka emilutshwane eselengu80 eyokuzalwa. Okuman-gazayo yikuthi, yena wasindiswa ngemva kokubukela uhlelo lwethu lukamabonakude njalo ebona zonke izinto ezimangalisayo ezazisenziwa nguNkulunkulu. Wachitha iminyaka yakhe emithathu

lengxenye eyokucina engumuntu oguqukileyo njalo esenkonzweni zonke impelaviki.

Ngelinye ilanga sisanda kuqeda inkonzo, ngaphuma ngama kuphasiji. Ngabona ubaba ekhuluma leyinye indoda ayeseleminyaka eyazi, eyayililunga lebandla lami. Ngathi ngibalanda, ngezwa indoda le ibuza ubaba ukuthi kungani wayeseqale ukuza enkonzweni. Ubaba waphendula wathi wayesebone izinto ezinengi zisehluleka ukuzichasisa. Makadunyiswe uNkulunkulu! Kumele kubenje.

Kodwa kumele sibuyele kundaba yocingo loluyana olwesakhiwo, ubaba engakasindiswa. Mina loDrenda sasilokhu sisamangele ukuthi yena wayesinikeze isakhiwo lesiyana. Sasikwazi ukuthi nguNkulunkulu, ngempela; njalo sasingakutsho kuye uBaba aze asithinte ukuthi, “Yebo, Baba uqinisile; lo nguNkulunkulu!”

Isakhiwo kwakusamele silungiswe ngendlela enkulu ukuze sifike izinga lezakhiwo ezazivunyelwa nxa sasiyasebenzela kuso njengehofisi yethu. KwakunguMpalakazi lapho ubaba enginikeza isakhiwo, njalo ngangizalinda kuze kube yintwasahlobo besengiqala ukusilungisa. Isakhiwo sasivaliwe ngenxa yesikhathi sebusika kungela owayesisebenzisa, njalo ubaba wathi wayevalisile amanzi. Ngakho izinto zazimi njalo kunyanga zesikhathi sebusika kwaze kwathi ngemva kweviki sengivela bona indizamtshina. Umfowethu wangithinta ngocingo wangitshela ukuthi kwakumele ngokuphangisa ngiye kusakhiwo sami, kwakulamanzi ayegeleza ephuma kuso esiya emgwaqweni. Kwasekukhudumala ngakho ubaba wayephambanisile; amanzi ayengavalwanga ebusika. Ngatshayela imota ngayafika kusakhiwo, kukamelo lokugeza elaliphezulu ngathola ukuthi amanzi ayekade evulelwe okwamalanga mhlawumbe okwamaviki. Umduli kumakamelo angaphansi wawusuhlubeka.

Ngiyazi ukuthi indaba le izwakala imbi kakhulu, kodwa wena ongakwaziyo, lalokho umfowethu ayengakwazi, yikuthi mina ngangibhale isivumelwano sokuthi umduli wonke uhlutshwe kusakhiwo lesi sonke, konke okwangaphandle kukhutshwe, njalo kwakuzaqala ukulungiswa kutsha kwesakhiwo lesi kumaviki ambalwa ayelandela. Ngakho umonakalo wamanzi lo wawungayisiyo nkinga ngoba konke okwakonakele kwakuvele kusazakhutshwa. Kodwa bamba lokhu—inhlenganiso yami yomshuwalense yanginikeza i-check yomonakalo lo, eyayisanela ukuthenga indizamtshina yami!

Yikho na engangikubonile? Ngangithole indizamtshina yami lesakhiwo sehofisi yami, konke ngingela sikwelede lokugijima lapho lalapha ngizama ukuthola konke lokhu? Yebo, kwakunjalo! Khathesi nxa ngitshayela indizamtshina le, ngidlula phezu kwamasimu, ngiyakhunjuzwa ukuthi ukuphaphisa indizamtshina le kufana loMbuso kaNkulunkulu. Ukusebenza kwayo lemithetho yayo kuyasivumela ukuba siphile impilo ngendlela eyehlukileyo kakhulu. Njengecimbi levevane, icimbi leliyana lalingeke ligijime ngenyawo zecimbi masinyane lize liyefika eMexico. Impilo yami, eyayisivalelwe phakathi kokwesaba lokuziphilisa, yayisiguqulwe nguMbuso kaNkulunkulu. Ngokuthinta imilayo yawo, ngenelisa ukuthola impilo elamathuba angela mkhawulo.

Lapho ngiqedisa ugwalo lolu, ngifuna ukukutshiyela umbhalo owodwa. Ngileqiniso lokuthi wona usuwuzwe impilo yakho yonke, kodwa ngicabanga ukuthi khathesi uzawuzwa ngendlela eyahlukileyo entsha.

Wozani kimi lina lonke elikhatheleyo lelisindwayo, ngizaliphumuza. Zithwaliseni ijogwe lami, lifunde kimi, ngoba ngimnene futhi ngithobekile enhliziyweni njalo lizazuza

*ukuphumula kwemphefumulo yenu. Ngoba ijogwe lami lilula,
lomthwalo wami kawusindi.*

— UMathewu 11:28-30

UJesu weza ukuzothatha ijogwe lethu, ukusebenza nzima lezithukuthuku zesiqalekiso somhlaba, okukithi. Khathesi sesisenelisa ukuthatha ijogwe Lakhe (kuphelile) sithole ukuphumula (ilanga lesikhombisa, iSabatha yeqiniso) kwemphefumulo yethu.

Lawe usungaba lazo izinto lezi ezinhle empilweni yakho ngokwenza lokho okwayenziwa nguPhothifa, ukusebenza ngendlela yempilo eyoMbuso. Thatha isinqumo namhlanje uzifake endleleni yoMbuso kaNkulunkulu uqale ukukholisa amandla okuthembeka. Qala inguquko yezimali zakho namuhla, ulahlele khatshana indlela owawuphila ngayo kudala, uhulumende omdala, isiqalekiso somhlaba esobumpofu, ukugula, lokuswela ithemba. Tshiya indlela zakho zecimbi uqale ukundiza usebenzisa imithetho yoMbuso owayinikezwa nguJesu. Wena ungumhlali walowo Mbuso.

Ulawo amalungelo omthetho!

Nxa ulukhwabithile ugwalo lolu njalo uzimisele ukuba ngumfundi woMbuso, kahle ngikulaye ku GaryKeesee.com. Lapho uzathola isiphala solwazi oluzakusiza lukufundise eMbusweni. Ngithanda njalo ukukukhuthaza ukuba ube yi *Team Revolution Partner* lapho ozakuba khona lethamsanqa lokuthola ulwazi ngezenzakalo ezibalulekileyo lezifundo zokuholwa.

Ukunqoba kwezemali kudinga ulwazi lwezikamoya lomhlaba, ulwazi lwemvelo. Ukuze uthole ulwazi ngokuphuma ezikweledeni, ukuze uthole uhlelo lwamahala olokuphuma kuzikwelede zakho olulungiselwe wena yinhlanganiso yami, i-*Forward Financial Group*, thinta ngocingo inombolo ethi 1-800-815-0818.

Ukuvikela imali yakho yomhlala phansi oyisebenzele nzima kuqakatheke njengokwazi ukuthi uyizuza njani, ikakhulu kuleli ihola lokuxubana kwezimali. Inhlanganiso yami ijonge ukusiza abantu ukuba batshale kuhle. Sesihlanyelele abathengi bethu amadola ayedlula amakhulu ezigidi, akekho loyedwa owalahlekelwa ngencane okungakanani imali kuminyaka engu15 edlulileyo lapho ilizwe lethu lile ngxabangxoza yemali. Futhi njalo, ucingo lolu kaluhlawulelwa njalo izaluleko zitholwa mahala. Thinta u 1-800-815-0818 ukuze uthole ulwazi.

UDendra lami sizimisele ukuze amalunga lezimuli ukuze banqobe empilweni. Yingakho uDendra elomsakazo wakhe kamabonakude, othiwa *Dendra*. Luhlelo olujonge impilo yezimuli lokukhuthaza abesifazana abehlukeneyo. Ukuze uthole ulwazi ngalo hamba kuDrenda.com.

Okokucina, mina loDrenda sithanda ukuthi ucabange ngokuxhasa amabandla labafundisi umhlaba wonke jikelele. Umsebenzi wethu wokufinyelela othiwa yi H-3 yikugeleza kwenhliziyo zethu ukuze sisize abantu ngezinto zempilo

ezibambekayo. I H-3 ilungisa izinsiza zokufundisa ezingamatshumi ezinkulungwane ngomnyaka zisiya kubafundisi umhlaba wonke jikelele. Siyasiza njalo ukuphakulela abalambileyo, ukuxhasa izinkonzo ezijonge ukulwisana lokuthengiswa kwabantu ngenxa yocansi kumazwe amanengi, siyaxhasa abagcina intandane, njalo sixhasa ngemali abafundisi umhlaba wonke jikelele, sibuye sigcine ikhaya labesifazane lapha e-Ohio. Injongo yethu yikusiza abantu umhlaba wonke ukuba bafunde ngoMbuso kaNkulunkulu njalo bafunde ukukhululeka lokusuthiseka ngalokho uNkulunkulu afuna sonke sibe lakho.

Ngiyabonga kakhulu ngokungivumela ukuba ngabelane lawe indaba le enhle. Khathesi, hamba lawe uyekwenza eyakho indaba enhle, ngoMbuso kaNkulunkulu.

A handwritten signature in black ink, appearing to read "Gary Keesa". The signature is fluid and cursive, with a large initial "G" and a long, sweeping underline.

Hamba ku **FLNFree.com**
ukuze uthaphe ezinye
imfundiso mahala
ngolimi lwakho!

Uyazifuna na ezinye imfundiso MAHALA ngolimi lwakho?
Hamba ku **FLNFree.com**

INGUQUKO YEZIMALI ZAKHO

Amandla Okuthembeka

Funda ugwalo lolu nxa...

USUKHATHELE NGESIMO SEZIMALI ZAKHO

UFUNA UKUPHUMA EZIKWELEDENI

UNGAZI UKUTHI UQALISELE NGAPHI

UNGASELA THEMBA

UGary Keesee useke waba kuleso simo ngokwakhe. Okweminyaka emide eyisitshiyagalolunye, impilo yakhe yayigcwele ukudideka kwemizwa okunzima ngenxa yesimo sezimali zakhe esasisibi. Abalandelela imali babemtshayela ucingo, abe-IRS ababamba impahla zalowo olezikwelede, ukwahlulelwa, kanye lokuyangeka kwasokujwayelekile empilweni yakhe. Kodwa konke kwaguquka ngolunye usuku lapho uNkulunkulu ekhuluma lo Gary mayelana lezimali zakhe futhi wamnikeza imfihlo eyaguqula impilo yakhe! Wasala engasela sikwelede, wasungula inhlanganiselo zezigidi zamadola, njalo khathesi wabelana labantu isihluthulelo esaguqula impilo yakhe kumsakazo kamabonakude othiwa, *Fixing the Money Thing*, osakazwa ngezikhathi ezehlukeneyo nsuku zonke umhlaba wonke jikelele. UGary usefundise imiqondo le kumakhulu enkulungwane zabantu bomhlaba emihlanganweni lakubantu mathupha. Yena uyavuma ukuthi zikhona izimiso ezinengi eziletha impumelelo empilweni. Kodwa esisodwa isimiso angasabela, yiso lesi. UGary uyakunxusa ukuba ubambane lenguquko untshintshe izimali zakho ngaMandla okuThembeka.



UGary Keesee ngumlobi, isikhulumi, usomabhezimusi, ingcitshi yezemali, futhi ungumfundisi olomvutho wokusiza abantu ukuze bangqobe empilweni, ikakhulu kundaba zokholo, ezemuli, kanye lezezimali. UGary lonkosikazi wakhe, uDrenda, sebasungula amabhezimusi aphumelelayo ambalwa, njalo yibo abasungula i-*Faith Life Now*, esakaza inhlelo zikamabonakude ezimbili ezithiwa—*Fixing the Money Thing* lo Drenda, imihlangano emhlabeni wonke jikelele, lezinsiza ezibambekayo. Abako-Keesee bangabafundisi e*Faith Life Church* eseduzane leColumbus, e-Ohio.

P.O. Box 779, New Albany,
OH 43054, USA
garykeesee.com

Uyazifuna na ezinye imfundiso
MAHALA ngolimi lwakho?
Hamba ku**FLNFree.com**